



at 5/-

# PRICES OF THE **OXFORD POCKET CLASSICS.**

					Paper. s. d.	Bo. s.
Æschylus	...	...	...	...	2 6	3
Aristophanes.	2 vols.	...	...	...	5 0	6
Aristotelis Ethica	...	...	...	...	1 6	2
Cæsar	...	...	...	...	2 0	2
Cicero De Officiis, de Senectute, et de Amicitia	...	...	...	...	1 6	2
Cornelius Nepos	...	...	...	...	1 0	1
Demosthenes de Corona et Æschines in Ctesiphontem	...	...	...	...	1 6	2
Euripides.	3 vols.	...	...	...	5 0	6
————— Tragœdiæ VI.		...	...	...	3 0	3
Herodotus.	2 vols.	...	...	...	5 0	6
Homeri Ilias	...	...	...	...	3 0	3
————— Odyssea		...	...	...	2 6	3
Horatius	...	...	...	...	1 6	2

					Paper.	Bound.
					s. d.	s. d.
Juvenalis et Persius	...	...	...	...	1 0	1 6
Livius. 4 vols.	...	...	...	...	5 0	6 0
Lucanus	...	...	...	...	2 0	2 6
Lucretius	...	...	...	...	1 6	2 0
Phædrus	...	...	...	...	1 0	1 4
Sallustius	...	...	...	...	1 6	2 0
Sophocles	...	...	...	...	2 6	3 0
Tacitus. 2 vols.	...	...	...	...	4 0	5 0
Thucydides. 2 vols.	...	...	...	...	4 0	5 0
Virgiliius	...	...	...	...	2 0	2 6
Xenophontis Memorabilia	...	...	...	1 0	1 4	
Xenophon's Anabasis	...	...	1 6	2 0		

*Fifth Edition. 16mo. 6d.*

THE LAWS OF THE GREEK ACCENTS.

By the Rev. JOHN GRIFFITHS.

Uniform with the Oxford Pocket Classics.

---

JOHN HENRY and JAMES PARKER, Oxford and London.

LIST OF BOOKS,  
FOR SCHOOL AND COLLEGE USE,  
PUBLISHED BY  
MESSRS. JOHN HENRY AND JAMES PARKER,  
OXFORD;  
AND 377, STRAND, LONDON.

---

*Just published, 8vo., cloth, 12s.*

ARISTOTLE'S ETHICS, with English Notes.  
By the Rev. W. E. JELF, M.A., late Student of Ch. Ch.  
Text separate, 5s. Notes separate, 7s. 6d.

---

JELF'S GREEK GRAMMAR.

A GRAMMAR of the GREEK LANGUAGE, chiefly from  
the Text of Raphael Kühner. By WM. EDW. JELF,  
M.A., Student of Ch. Ch., Oxford. 2 vols. 8vo.  
*Second Edition, 1l. 10s.*

\* \* This Grammar is now in general use at Oxford, Cambridge, Dublin, and Durham; at Eton, King's College, London, and most other public schools.

---

*Just published. Third edition, 8vo., cloth, 12s.*

MADVIG'S LATIN GRAMMAR.

A LATIN GRAMMAR for the Use of SCHOOLS. By  
PROFESSOR MADVIG, with additions by the Author.  
Translated by the Rev. G. F. WOODS, M.A. 8vo.  
uniform with JELF'S "Greek Grammar."

*Competent authorities pronounce this work to be the very best Latin Grammar yet published in England; the present edition contains an index to the authors quoted.*

---

BURTON'S GREEK TESTAMENT.

The GREEK TESTAMENT, with English Notes. By  
the Rev. EDWARD BURTON, D.D. *Fourth and  
cheaper Edition, revised.* 8vo. 10s. 6d.

LL

C1. sen.

TII86Nz.2

C. CORNELII TACITI

O P E R A O M N I A,

A D F I D E M E D I T I O N I S O R E L L I A N Æ .


T O M. II.

O X O N I I ,

J O H A N N E S H E N R I C U S P A R K E R :

E T L O N D I N I , 377, S T R A N D .

M D C C C L I V .



Cr

PRINTED BY MESSRS. PARKER, CORN-MARKET, OXFORD.

C. CORNELII TACITI

AB EXCESSU DIVI AUGUSTI

H I S T O R I A R U M  
LIBER PRIMUS.

---

INITIUM mihi operis Servius Galba iterum Titus 1  
Vinius consules erunt. Nam post conditam urbem  
octingentos et viginti prioris ævi annos multi auctores  
retulerunt, dum res populi Romani memorabantur, pari  
eloquentia ac libertate. Postquam bellatum apud Ac-2  
tium atque omuem potentiam ad unum conferri pacis  
interfuit, magna illa ingenia cessere; simul veritas  
pluribus modis infracta, primum inscitia rei publicæ ut  
alienæ, mox libidine assentandi aut rursus odio adversus  
dominantes: ita neutris cura posteritatis, inter infensos  
vel obnoxios. Sed ambitionem scriptoris facile averseris, 3  
obtrectatio et livor pronis auribus accipiuntur: quippe  
adulationi foedum crimen servitutis, malignitati falsa  
species libertatis inest. Mihi Galba Otho Vitellius nec 4  
beneficio nec injuria cogniti. Dignitatem nostram a  
Vespasiano inchoatam, a Tito auctam, a Domitiano  
longius provectam non abnuerim: sed incorruptam  
fidem professis neque amore quisquam et sine odio  
dicendus est. Quodsi vita suppeditet, principatum divi 5  
Nervæ et imperium Trajani, uberiorem securioremque

materiam, senectuti se posui, rara temporum felicitate,  
ubi sentire quæ velis, et quæ sentias dicere licet.

2 Opus aggredior opimum casibus, atrox præliis, discors  
seditionibus, ipsa etiam pacis sævum. Quatuor prin-  
cipes ferro interempti. Trina bella civilia, plura externa  
ac plerumque permixta. Prosperæ in Oriente, adversæ  
3 in Occidente res. Turbatum Illyricum; Galliæ nu-  
tantes; perdomita Britannia et statim missa; coortæ  
in nos Sarmatarum ac Suevorum gentes; nobilitatus  
cladibus mutuis Dacus; mota prope etiam Parthorum  
4 arma falsi Neronis ludibrio. Jam vero Italia novis  
cladibus vel post longam seculorum seriem repetitis  
5 afflita. Haustæ aut obrutæ urbes fecundissima Cam-  
paniæ ora. Et urbs incendiis vastata, consumptis an-  
tiquissimis delubris, ipso Capitolio civium manibus  
6 incenso. Pollutæ cærimoniæ, magna adulteria. Ple-  
num exiliis mare, infecti cædibus scopuli. Atrocies in  
7 urbe sævitum. Nobilitas, opes, omisi gestique honores  
pro crimine, et ob virtutes certissimum exitium. Nec  
minus præmia delatorum invisa quam scelera, cum alii  
sacerdotia et consulatus ut spolia adepti, procurationes  
alii et interiorem potentiam, agerent verterent cuncta  
8 odio et terrore. Corrupti in dominos servi, in patronos  
liberti; et quibus deerat inimicus, per amicos oppressi.  
3 Non tamen adeo virtutum sterile seculum ut non et  
bona exempla prodiderit. Comitatæ profugos liberos  
matres, secutæ maritos in exilia conjuges; propinquai  
audentes, constantes generi; eontumax etiam adversus  
tormenta servorum fides; supremæ clarorum virorum  
necessitates; ipsa necessitas fortiter tolerata, et lauda-  
2 tis antiquorum mortibus pares exitus. Præter multi-  
plices rerum humanarum casus cælo terraque prodigia et  
fulminum monitus et futurorum præsagia, læta tristia,

A. D. 69.]

ambigua manifesta. Nec enim unquam atrocioribus 3 populi Romani cladibus magisve justis indicis approbatum est non esse curae deis securitatem nostram, esse ultionem.

Ceterum antequam destinata componam, repetendum 4 videtur qualis status urbis, quae mens exercituum, quis habitus provinciarum, quid in toto terrarum orbe validum, quid ægrum fuerit, ut non modo casus eventusque rerum, qui plerumque fortuiti sunt, sed ratio etiam causæque noscantur. Finis Neronis ut lætus primo 2 gaudientium impetu fuerat, ita varios motus animorum non modo in urbe apud patres aut populum aut urbanum militem, sed omnes legiones ducesque conciverat, evulgato imperii arcano, posse principem alibi quam Romæ fieri. Sed patres læti, usurpata statim libertate 3 licentius ut erga principem novum et absentem; primores equitum proximi gaudio patrum; pars populi integra et magnis domibus annexa, clientes libertique damnatorum et exulum in spem erecti: plebs sordida et circu ac theatris sueta, simul deterrimi servorum, aut qui adesis bonis per dedecus Neronis alebantur, mæsti et rumorum avidi. Miles urbanus longo Cæsarum sacramen- 5 to imbutus, et ad destituendum Neronem arte magis et impulsu quam suo ingenio traductus, postquam neque dari donativum sub nomine Galbae promissum, neque magnis meritis ac præmiis eundem in pace quem in bello locum, præventanique gratiam intelligit apud principem a legionibus factum, pronus ad novas res, scelere insuper Nymphidii Sabini præfecti imperium sibi molientis agitatur. Et Nymphidius quidem in ipso conatu oppressus: sed 2 quamvis capite defectionis ablato, manebat plerisque militum conscientia, nec deerant sermones senium atque avaritiam Galbae increpantium. Laudata olim et mili- 3

tari fama celebrata severitas ejus angebat aspernantes  
veterem disciplinam, atque ita quatuordecim annis a  
Nerone assuefactos, ut haud minus vitia principum  
4 amarent quam olim virtutes vrebantur. Accessit Galbae  
vox pro re publica honesta, ipsi anceps, legi a se mili-  
tem, non emi. Nec enim ad hanc formam cetera crant.  
6 Invalidum senem Titus Vinius et Cornelius Laco, alter  
deterrimus mortalium, alter ignavissimus, odio flagitio-  
2 rum oneratum contemptu inertiae destruebant. Tardum  
Galbae iter et cruentum, interfectis Cingonio Varrone  
consule designato et Petronio Turpiliano consulari : ille  
ut Nymphidii socius, hic ut dux Neronis, inauditi atque  
3 indefensi tanquam innoceutes perierant. Introitus in  
urbem trucidatis tot millibus inermium militum infaus-  
tus omine, atque ipsis etiam qui occiderant formidolo-  
4 sus. Inducta legione Hispana, remanente ea quam e  
classe Nero conscripserat, plena urbs exercitu insolito.  
5 Multi ad hoc numeri e Germania ac Britannia et Illyrico,  
quos idem Nero electos præmissosque ad claustra Cas-  
piarum et bellum quod in Albanos parabat, opprimendis  
Vindicis cœptis revocaverat: ingens novis rebus materia,  
ut non in unum aliquem prono favore, ita audenti  
7 parata. Forte congruerat ut Clodii Macri et Fonteii  
Capitonis cædes nuntiarentur. Macrum in Africa haud  
dubie turbantem Trebonius Garutianus procurator jussu  
Galbae, Capitonem in Germania, cum similia cœptaret,  
Cornelius Aquinus et Fabius Valens legati legionum  
2 interfecerant, antequam juberentur. Fuere qui crede-  
rent Capitonem ut avaritia et libidine fœdum ac macu-  
losum, ita cogitatione rerum novarum abstinuisse ; sed  
a legatis bellum suadentibus, postquam impellere nequi-  
verint, crimen ac dolum ultro compositum ; et Galbam  
mobilitate ingenii, an ne altius scrutaretur, quoquo

A. D. 69.]

modo acta, quia mutari non poterant, comprobasse. Ce-3  
 terum utraque cædes sinistre accepta; et inviso semel  
 principe seu bene seu male facta premunt. Jam affe-4  
 rebant venalia cuncta præpotentes liberti; servorum  
 manus subitis avidæ et tanquam apud senem festinan-  
 tes; eademque novæ aulæ mala æque gravia, non æque  
 excusata. Ipsa ætas Galbæ irrisui ac fastidio erat 5  
 assuetis juventæ Neronis et imperatores forma ac de-  
 core corporis, ut est mos vulgi, comparantibus. Et 8  
 hic quidem Romæ, tanquam in tanta multitudine, habitus  
 animorum fuit. E provinciis Hispaniæ præerat Cluvius 2  
 Rufus, vir facundus et pacis artibus, bellis inexpertus.  
 Galliæ, super memoriam Vindicis, obligatæ recenti 3  
 dono Romanæ civitatis et in posterum tributi levamento.  
 Proximæ tamen Germanis exercitibus Galliarum civita-4  
 tes non eodem honore habitæ, quædam etiam finibus  
 ademptis, pari dolore commoda aliena ac suas injurias  
 metiebantur. Germani exercitus, quod periculosissi-5  
 mum in tantis viribus, solliciti et irati, superbia recentis  
 victoriæ, et metu tanquam alias partes fovissent. Tarde 6  
 a Nerone desciverant; nec statim pro Galba Verginius.  
 An imperare voluisse, dubium: delatum ei a milite 7  
 imperium conveniebat. Fonteum Capitonem occisum  
 etiam qui queri non poterant, tamen iudignabantur.  
 Dux deerat, abducto Verginio per simulationem amici-8  
 tiæ; quem non remitti atque etiam reum esse tanquam  
 suum crimen accipiebant. Superior exercitus legatum 9  
 Hordeonium Flaccum spernebat, senecta ac debilitate  
 pedum invalidum, sine constantia, sine auctoritate, ne  
 quieto quidem milite regimen: adeo furentes infirmitate  
 retinentis ultiro accendebantur. Inferioris Germaniæ 2  
 legiones diutius sine consulari fuere, donec missu Galbæ  
 A. Vitellius aderat, censoris Vitelli ac ter consulis

3 filius : id satis videbatur. In Britanico exercitu nihil  
 irarum : non sane aliae legiones per omnes civilium  
 bellorum motus innocentius egerunt, seu quia procul  
 et Oceano divisæ, seu crebris expeditionibus doctæ  
 4 hostem potius odisse. Quies et Illyrico, quanquam  
 excitæ a Nerone legiones, dum in Italia cunctantur,  
 5 Verginium legationibus adissent. Sed longis spatiis  
 discreti exercitus, quod saluberrimum est ad continen-  
 dam militarem fidem, nec vitiis nec viribus miscebantur.  
 10 Oriens adhuc immotus. Syriam et quatuor legiones  
 obtinebat Licinius Mucianus, vir secundis adversisque  
 2 juxta famosus. Insignes amicitias juvenis ambitiose  
 coluerat ; mox attritis opibus, lubrico statu, suspecta  
 etiam Claudi iracundia, in secretum Asiæ repositus  
 tam prope ab exule fuit quam postea a principe.  
 3 Luxuria, industria, comitate, arrogantia, malis bonis-  
 que aitibus mixtus. Nimiæ voluptates, cum vacaret :  
 4 quotiens expedierat, magnæ virtutes. Palam laudares :  
 secreta male audiebant. Sed apud subjectos, apud  
 proximos, apud collegas variis illecebris potens ; et cui  
 5 expeditius fuerit tradere imperium quam obtainere. Bel-  
 lum Judaicum Flavius Vespasianus (ducem cum Nero  
 6 delegerat,) tribus legionibus administrabat. Nec Ves-  
 pasiano adversus Galbam votum aut animus : quippe  
 Titum filium ad venerationem cultumque ejus miserat,  
 7 ut suo loco memorabimus. Occulta fati et ostentis  
 ac responsis destinatum Vespasiano liberisque ejus im-  
 11 perium post fortunam eredidimus. Ægyptum copias-  
 que, quibus coerceretur, jam inde a divo Augusto  
 equites Romani obtinent loco regum : ita visum ex-  
 pedire, provinciam aditu difficilem, auronæ fecundam,  
 superstitione ac lascivia discordem et mobilem, insciain  
 2 legum, ignaram magistratum, domi retinere. Regebat

A. D. 69.]

tum Tiberius Alexander, ejusdem nationis. Africa ac legiones in ea, interfecto Clodio Macro, contenta qualiterunque principe post experimentum domini minoris. Duæ Mauritaniae, Rætia, Noricum, Thracia et quæ 3 aliae procuratoribus cohibentur, ut cuique exercitui vicinæ, ita in favorem aut odium contactu valentiorum agebantur. Inermes provinciæ atque ipsa in primis 4 Italia, cuicunque servitio exposita, in pretium belli cessuræ erant. Hic fuit rerum Romanarum status, 5 cum Servius Galba iterum Titus Vinius consules inchoavere annum sibi ultimum, rei publicæ prope supremum.

Paucis post Kalendas Januarias diebus Pompeii Pro- 12 pinqui procuratoris e Belgica litteræ afferuntur, superioris Germaniæ legiones erupta sacramenti reverentia imperatorem alium flagitare, et senatui ac populo Romano arbitrium eligendi permittere, quo seditio mollius acciperetur. Maturavit ea res consilium Galbæ 2 jam pridem de adoptione secum et cum proximis agitantis. Non sane crebrior tota civitate sermo per illos 3 menses fuerat, primum licentia ac libidine talia loqueudi, dein fessa jam ætate Galbæ. Paucis judicium aut rei 4 publicæ amor: multi stulta spe, prout quis amicus vel cliens, hunc vel illum ambitiosis rumoribus destinabant, etiam in Titi Vinii odium, qui in dies quanto potentior, eodem actu invisor erat. Quippe hiantes in magna 5 fortuna amicorum cupiditates ipsa Galbæ facilitas intendebat, cum apud infirmum et credulum minore metu et majore præmio peccaretur. Potentia principatus 13 divisa in Titum Vinium consulem et Cornelium Laco-nem prætorii præfectum. Nec minor gratia Icelo Galbæ 2 liberto, quem annulis donatum equestri nomine Marcianum vocitabant. Hi discordes, et rebus minoribus 3 sibi quisque tendentes, circa consilium eligendi succes-

4 soris in duas factiones scindebantur. Vinius pro M.  
 Othonē : Laco atque Icelus consensu non tam unum  
 5 aliquem fovebant quam alium. Neque erat Galbæ  
 ignota Othonis ac Titi Vinii amicitia ; et rumoribus  
 nihil silentio transmittentium, (quia Vinio vidua filia,  
 6 cælebs Otho,) gener ac sacer destinabantur. Credo et  
 rei publicæ curam subisse, frustra a Nerone translatæ,  
 7 si apud Othonem relinqueretur. Namque Otho pueri-  
 tiam incuriose, adolescentiam petulanter egerat, gratus  
 8 Neroni æmulatione luxus. Eoque jam Poppæam Sa-  
 binam, principale scortum, ut apud conscient libidinum,  
 9 deposuerat, donec Octaviam uxorem amoliretur. Mox  
 suspectum in eadem Poppæa in provinciam Lusitaniam  
 10 specie legationis seposuit. Otho comiter administrata  
 provincia primus in partes transgressus, nec segnis, et  
 donec bellum fuit, inter præsentes splendidissimus,  
 spem adoptionis statim conceptam acrius in dies ra-  
 piebat, faventibus plerisque militum, prona in eum aula  
 14 Neronis ut similem. Sed Galba post nuntios Germa-  
 nicæ seditionis, quanquam nihil adhuc de Vitellio  
 certum, anxius quonam exercituum vis erumperet, ne  
 urbano quidem mili confisus, quod remedium unicum  
 rebatur, comitia imperii transigit ; adhibitoque super  
 Vinium ac Laconem Mario Celso consule designato ac  
 Duxenio Gemino præfecto urbis, pauca præfatus de  
 sua senectute, Pisonem Licinianum accersi jubet, seu  
 propria electione, sive (ut quidam crediderunt,) Lacone  
 instantे, cui apud Rubellium Plautum exercita cum  
 Pisone amicitia : sed callide ut ignotum fovebat, et  
 prospera de Pisone fama consilio ejus fidem addiderat.  
 2 Piso M. Crasso et Scribonia genitus, nobilis utrinque,  
 vultu habituque moris antiqui, et æstimatione recta  
 severus, deterius interpretantibus tristior habebatur.

A. D. 69.]

Ea pars morum ejus quo suspectior sollicitis, adoptanti 3 placebat. Igitur Galba, apprehensa Pisonis manu, in 15 hunc modum locutus fertur:—“ Si te privatus lege cu-  
riata apud pontifices, ut moris est, adoptarem, et mihi egregium erat Cn. Pompeii et M. Crassi subolem in pe-  
nates meos adsciscere, et tibi insigne Sulpiciæ ac Lutatiae decora nobilitati tuæ adjecisse. Nunc me deorum ho- 2 minumque consensu ad imperium vocatum præclara indoles tua et amor patriæ impulit, ut principatum, de quo majores nostri armis certabant, bello adeptus quies-  
centi offeram, exemplo divi Augusti, qui sororis filium Marcellum, dein generum Agrippam, mox nepotes suos, postremo Tiberium Nerонem privignum in proximo sibi fastigio collocavit. Sed Augustus in domo successorem 3 quæsivit, ego in re publica, non quia propinquos aut socios belli non habeam: sed neque ipse imperium am-  
bitione accepi, et judicij mei documentum sint non meæ tantum necessitudines, quas tibi postposui, sed et tuæ. Est tibi frater pari nobilitate, natu major, dignus hac fortuna, nisi tu potior es. Ea ætas tua, quæ cupi- 4 ditates adolescentiæ jam effugerit; ea vita, in qua nihil præteritum excusandum habeas. Fortunam adhuc tan- 5 tum adversam tulisti: secundæ res acrioribus stimulis animos explorant, quia miseriæ tolerantur, felicitate corrumpimur. Fidem, libertatem, amicitiam, præcipua 6 humani animi bona, tu quidem eadem constantia reti-  
nebis, sed alii per obsequium imminuent. Irrumpet 7 adulatio, blanditiæ, pessimum veri affectus veneum, sua cuique utilitas. Et jam ego ac tu simplicissime 8 inter nos hodie loquimur: ceteri libentius cum fortuna nostra quam nobiscum. Nam suadere principi quod 9 oporteat, multi laboris: assentatio erga quemcunque principem sine affectu peragit. Si immensum imperii 16

corpus stare ac librari sine rectore posset, dignus eram a quo res publica inciperet: nunc eo necessitatis jam pridem ventum est, ut nec mea senectus conferre plus populo Romano possit quam bonum successorem, nec tua plus juventa quam bonum principem. Sub Tiberio et Caio et Claudio unius familie quasi hereditas fuimus: loco libertatis erit quod eligi coepimus. Et finita Juliorum Claudiorumque domo optimum quemque adoptio inveniet. Nam generari et nasci a principibus fortuitum, nec ultra aestimatur: adoptandi judicium integrum; et si velis eligere, consensu monstratur. Sit ante oculos Nero, quem longa Cæsarum serie tumentem non Vindex cum inermi provincia aut ego cum una legione, sed sua immanitas, sua luxuria cervicibus publicis depulerunt; neque erat adhuc damnati principis exemplum. Nos bello et ab aestimantibus adsciti cum invidia, quamvis egregii, erimus. Ne tamen territus fueris, si duæ legiones in hoc concussi orbis motu nondum quiescunt. Ne ipse quidem ad securas res accessi; et audita adoptione desinam videri senex, quod nunc mihi unum objicitur. Nero a pessimo quoque semper desiderabitur: mihi ac tibi providendum est ne etiam a bonis desideretur. Mouere diutius neque temporis hujus, et impletum est omne consilium, si te bene elegi. Utilissimus idem ac brevissimus bonarum malarumque rerum delectus est, cogitare quid aut volueris sub alio principe aut nolueris. Neque enim hic, ut gentibus quae regnantur, certa dominorum domus et ceteri servi: sed imperaturus es hominibus qui nec totam servitutem pati possunt nec totam libertatem." Et Galba quidem haec ac talia, tanquam principem faceret, ceteri tanquam cum facto loquebantur. Pisonem ferunt statim intuentibus, et mox conjectis in

A.D. 69.]

eum omnium oculis, nullum turbati aut exultantis animi motum prodidisse. Sermo erga patrem imperatoremque reverens, de se moderatus; nihil in vultu habituque mutatum, quasi imperare posset magis quam vellet. Consultatum inde, pro Rostris an in senatu an in castris adoptio nuncuparetur. Iri in castra placuit: honorificum id militibus fore, quorum favorem ut largitione et ambitu male acquiri, ita per bonas artes haud spernendum. Circumsteterat interim Palatium publica expectatio, magni secreti impatiens; et male coërcitam famam suppressimenter augebant. Quartum Idus Januarias, 18 foedum imbribus diem, tonitrua et fulgura et cœlestes minæ ultra solitum turbaverant. Observatum id anti- 2 quitus comitiis dirimendis non terruit Galbam quo minus in castra pergeret, contemptorem talium ut fortuitarum; seu quæ fato manent, quamvis significata, non vitantur. Apud frequentem militum concionem, imperatoria bre- 3 vitate, adoptari a se Pisonem more divi Augusti et exemplo militari, quo vir virum legeret, pronuntiat. Ac 4 ne dissimulata seditio in majus crederetur, ultiro asseverat quartam et duodevicesimam legiones, paucis seditionis auctoribus, non ultra verba ac voces errasse, et brevi in officio fore. Nec ullum orationi aut lenocium 5 addit aut pretium. Tribanni tamen centurionesque et proximi militum grata auditu respondent: per ceteros mæstitia ac silentium, tanquam usurpatam etiam in pace donativi necessitatem bello perdidissent. Constat potuisse conciliari animos quantulacunque parci senis liberalitate: nocuit antiquus rigor et nimia severitas, cui jam pares non sumus. Inde apud senatum non 19 comptior Galbæ, non longior quam apud militem sermo: Pisonis comis oratio. Et patrum favor aderat: multi voluntate effusius; qui noluerant, medie; ac plurimi

obvio obsequio, privatas spes agitantes sine publica  
 3 cura. Nec aliud sequenti quatriduo (quod medium inter  
 adoptionem et cædem fuit,) dictum a Pisone in publico  
 4 factumve. Crebrioribus in dies Germanicæ defectionis  
 nuntiis, et facili civitate ad accipienda credendaque  
 omnia nova, cum tristia sunt, censuerant patres mitten-  
 5 dos ad Germanicum exercitum legatos. Agitatum se-  
 creto num et Piso proficisceretur, majore prætextu, illi  
 auctoritatem senatus, hic dignationem Cæsaris laturus.  
 6 Placebat et Lacouem prætorii præfectum simul mitti :  
 is consilio intercessit. Legati quoque (nam senatus  
 electionem Galbæ permiserat,) foeda inconstantia nomi-  
 nati, excusati, substituti, ambitu remanendi aut eundi,  
 20 ut quemque metus vel spes impulerat. Proxima pecu-  
 niæ cura ; et cuncta scrutantibus justissimum visum est  
 2 inde repeti ubi inopisæ causa erat. Bis et vicies millies  
 sestertium donationibus Nero effuderat. Appellari sin-  
 gulos jussit, decima parte liberalitatis apud quemque  
 3 eorum relictæ. At illis vix decimæ super portiones  
 erant, isdem erga aliena sumptibus quibus sua prode-  
 gerant, cum rapacissimo cuique ac perditissimo non agri  
 aut fenus, sed sola instrumenta vitiorum manerent.  
 4 Exactioni trigiuta equites Romani præpositi, novum  
 officii genus et ambitu ac numero onerosum. Ubique  
 hasta et sector, et inquieta urbs actionibus. Ac tameu  
 grande gaudium, quod tam pauperes forent quibus do-  
 5 uasset Nero quam quibus abstulisset. Exauctorati per  
 eos dies tribuni, e prætorio Antonius Taurus et Anto-  
 nius Naso, ex urbanis cohortibus Æmilius Pacensis, e  
 6 vigiliis Julius Fronto. Nec remedium in ceteros fuit,  
 sed metus initium, tanquam per artem et formidinem  
 singuli pellerentur omnibus suspectis.  
 21 Iuterea Othonem, cui compositis rebus nulla spes,

A. D. 69.]

omne in turbido consilium, multa simul exstimulabant,  
luxuria etiam principi onerosa, inopia vix privato tole-  
randa, in Galbam ira, in Pisonem invidia. Fingebat et 2  
metum, quo magis concupisceret. Prägravem se Ne-  
roni fuisse, nec Lusitaniam rursus et alterius exilii  
honorem exspectandum. Suspectum semper invisumque 3  
dominantibus qui proximus destinaretur. Nocuisse id  
sibi apud senem principem; magis nocitum apud  
juvenem ingenio trucem et longo exilio efferatum.  
Occidi Othonem posse. Proinde agendum audendum-4  
que, dum Galbæ auctoritas fluxa, Pisonis nondum coa-  
luisset. Opportunos magnis conatibus transitus rerum; 5  
nec cunctatione opus, ubi perniciosior sit quies quam  
temeritas. Mortem omnibus ex natura æqualem, obli- 6  
vione apud posteros vel gloria distingui. Ac si nocen-  
tem innocentemque idem exitus maneat, acrioris viri esse  
merito perire. Non erat Othonis mollis et corpori similis 22  
animus. Et intimi libertorum servorumque, corruptius  
quam in privata domo habiti, aulam Neronis et luxus,  
adulteria, matrimonia ceterasque regnorum libidines  
avido talium, si auderet, ut sua ostentantes, quiescenti ut  
aliena exprobabant, urgentibus etiam mathematicis,  
dum novos motus et clarum Othoni annum observatione  
siderum affirmant, genus hominum potentibus infidum,  
sperantibus fallax, quod in civitate nostra et vetabitur  
semper et retinebitur. Multos secreta Poppææ mathe- 2  
maticos, pessimum principalis matrimonii instrumentum,  
habuerant; e quibus Ptolemæus Otoni in Hispania  
comes, cum superfuturum eum Neroni promisisset,  
postquam ex eventu fides, conjectura jam et rumore  
senium Galbæ et juventam Othonis computantium per-  
suaserat fore ut in imperium adscisceretur. Sed Otho 3  
tanquam peritia et monitu fatorum prædicta accipiebat,

cupidine ingenii humani libentius obscura credendi.

23 Nec deerat Ptolemæus, jam et sceleris instinctor, ad quod facillime ab ejusmodi voto transitur. Sed sceleris cogitatio incertum an repens: studia militum jam pridem spe successionis aut paratu facinoris affectaverat, in itinere, in agmine, in stationibus vetustissimum quemque militum nomine vocans, ac memoria Neroniaui comitatus contubernales appellando; alios agnoscere, quosdam requirere, et pecunia aut gratia juvare, inserendo saepius querelas et ambiguos de Galba sermones,

2 quæque alia turbamenta vulgi. Labores itinerum, inopia commeatum, duritia imperii atrocious accipiebantur, cum Campaniæ lacus et Achaïæ urbes classibus adire soliti Pyrenæum et Alpes et immensa viarum spatia

24 ægre sub armis eniterentur. Flagrantibus jam militum animis velut faces addiderat Mævius Pudens, e proximus Tigellini. Is mobilissimum quemque ingenio aut pecuniæ indigum et in novas cupiditates præcipitem alliciendo, eo paulatim progressus est ut per speciem convivii, quotiens Galba apud Othonem epularetur, cohorti excubias agenti viritim centenos nummos divideret; quam velut publicam largitionem Otho secretoriibus apud singulos præmiis intendebat, adeo animosus corruptor ut Cocceio Proculo speculatori, de parte finium cum vicino ambigenti, universum vicini agrum sua pecunia emptum dono dederit, per socordiam præfecti, quem nota pariter et occulta fallebant. Sed tum e libertis Onomastum futuro sceleri præfecit, a quo Barbium Proculum tesserarium speculatorum et Vetus optionem eorundem perductos, postquam vario sermone callidos audacesque cognovit, pretio et promissis onerat, data pecunia ad pertentandos plurium

2 animos. Suscepere duo manipulares imperium populi

A. D. 69.]

Romani transferendum, et transtulerunt. In conscientiam facinoris pauci adsciti. Suspensos ceterorum 3 animos diversis artibus stimulant, primores militum per beneficia Nymphidii ut suspectos, vulgus et ceteros ira et desperatione dilati toties donativi. Erant quos 4 memoria Neronis ac desiderium prioris licentiae accenderet. In commune omnes metu mutandae militiae 5 terrebantur. Infecta ea tabes legionum quoque et 26 auxiliarum motas jam mentes, postquam vulgatum erat labare Germanici exercitus fidem. Adeoque parata 2 apud malos seditio, etiam apud integros dissimulatio fuit, ut postero Iduum [dierum] redeuntem a coena Othonem rapturi fuerint, ni incerta noctis et tota urbe sparsa militum castra nec facilem inter temulentos consensum timuissent, non rei publicae cura, quam foedare principis sui sanguine sobrii parabant, sed ne per tenebras, ut quisque Pannonici vel Germanici exercitus militibus oblatus esset, ignorantibus plerisque, pro Othone destinaretur. Multa erumpentis seditionis indicia per concios oppressa: quædam apud Galbae aures præfectus Laco elusit, ignarus militarium animorum, consiliique quamvis egregii, quod non ipse afferret, inimicus, et adversus peritos pervicax. Octavo decimo 27 Kalendas Februarias sacrificanti pro æde Apollinis Galbae haruspex Umbricius tristia exta et instantes insidias ac domesticum hostem prædictit, audiente Othone (nam proximus adstiterat,) idque ut lætum e contrario et suis cogitationibus prosperum interpretante. Nec multo 2 post libertus Onomastus nuntiat exspectari eum ab architecto et redemptoribus; quæ significatio coëntium jam militum et paratae conjurationis convenerat. Otho, causam digressus requirentibus, cum emi sibi 3 prædia vetustate suspecta eoque prius exploranda finx-

isset, innixus liberto per Tiberianam domum in Velabrum, inde ad milliarium aureum sub ædem Saturni 4 pergit. Ibi tres et viginti speculatores consalutatum imperatorem, ac paucitate salutantium trepidum, et sellæ festinanter impositum strictis mucronibus 5 piunt. Totidem ferme milites in itinere aggregantur, alii conscientia, plerique miraculo, pars clamore et gaudiis, pars silentio, animum ex eventu sumpturi.

28 Stationem in castris agebat Julius Martialis tribunus.

Is magnitudine subiti sceleris, an corrupta latius castra, et, si contra tenderet, exitium metueus, præbuit pleris- 2 que suspicionem conscientiæ. Anteposuere ceteri quoque tribuni centurionesque præsentia dubiis et honestis. 3 Isque habitus animorum fuit ut pessimum facinus auderent pauci, plures vellent, omnes paterentur.

29 Ignarus interim Galba et sacris intentus fatigabat alieni jam imperii deos, cum affertur rumor rapi in castra incertum quem senatorem, mox, Othonem esse qui raperetur; simul ex tota urbe, ut quisque obvius fuerat, alii formidine augentes, quidam minora vero, ne tum 2 quidem oblii adulacionis. Igitur consultantibus placuit pertentari animum cohortis quæ in Palatio stationem agebat, nec per ipsum Galbam, cuius integra 3 auctoritas majoribus remediis servabatur. Piso pro gradibus domus vocatos in hunc modum allocutus est: —“ Sextus dies agitur, commilitones, ex quo ignarus futuri, et sive optandum hoc nomen sive timendum 4 erat, Cæsar adscitus sum. Quo domus nostræ aut rei publicæ fato, in vestra manu positum est, non quia meo nomine tristiorum casum paveam, ut qui adversas res expertus cum maxime discam ne secundas quidem minus discriminis habere: patris et senatus et ipsius imperii vicem doleo, si nobis aut perire hodie necesse

A. D. 69.]

est aut, quod æque apud bonos miserum est, occidere. Solatum proximi motus habebamus incruentam urbem 5 et res sine discordia translatas. Provisum adoptione videbatur, ut ne post Galbam quidem bello locus esset. Nihil arrogabo mihi nobilitatis aut modestiæ. Neque 30 enim relatu virtutum in comparatione Othonis opus est. Vitia, quibus solis gloriatur, evertere imperium, 2 etiam cum amicum imperatoris ageret. Habitune et incessu, an illo muliebri ornatu mereretur imperium? falluntur quibus luxuria specie liberalitatis imponit. Perdere iste sciet, donare nesciet. Stupra nunc et 3 comissiones et feminarum cœtus volvit animo: hæc principatus præmia putat, quorum libido ac voluptas penes ipsum sit, rubor ac dedecus penes omnes. Nemo 4 enim unquam imperium flagitio quæsitum bonis artibus exercuit. Galbam consensus generis humani, me Galba 5 consentientibus vobis Cæsarem dixit. Si res publica et senatus et populus vacua nomina sunt, vestra, com-militones, interest ne imperatorem pessimi faciant. Legionum seditio adversus duces suos audita est ali-6 quando: vestra fides famaque illæsa ad hunc diem mansit. Et Nero quoque vos destituit, non vos Nero-7 nem. Minus triginta trans fugæ et desertores, quos centurionem aut tribunum sibi eligentes nemo ferret, imperium assignabunt? admittitis exemplum? et quies-cendo commune crimen facitis? transcendet hæc licentia in provincias; et ad nos scelerum exitus, bellorum ad vos pertinebunt. Nec est plus quod pro cæde 8 principis quam quod innocentibus datur, sed perinde a nobis donativum ob fidem quam ab aliis pro facinore accipietis." Dilapsis speculatoribus, cetera cohors non 31 aspernata concionantem, ut turbidis rebus evenit, forte magis et nullo adhuc consilio parat signa *quam*, quod

2 postea creditum est, insidiis et simulatione. Missus et  
 Celsus Marius ad electos Illyrici exercitus, Vipsania in  
 3 porticu tendentes. Praeceptum Amulio Sereuo et Do-  
 mitio Sabino primipilaribus ut Germanicos milites e  
 4 Libertatis atrio accerserent. Legioni classicæ diffidebat,  
 infestæ ob cædem commilitonum, quos primo statim  
 5 introitu trucidaverat Galba. Pergunt etiam in castra  
 prætorianorum tribuni, Cetrius Severus, Subrius Dexter,  
 Pompeius Longinus, si incipiens adhuc et neendum  
 6 adulta seditio melioribus consiliis flecteretur. Tribuno-  
 rum Subrium et Cetrum adorti milites minis, Longium  
 manibus coërcent exarmantque, quia non ordine militiæ,  
 sed e Galbæ amicis, fidus principi suo et desciscentibus  
 7 suspectior erat. Legio classicæ nihil cunctata prætoria-  
 nis adjungitur. Illyrici exercitus eleeti Celsum ingestis  
 8 pilis proturbant. Germanica vexilla diu nutavere,  
 invalidis adhuc corporibus et placatis animis, quod eos  
 a Nerone Alexandriam præmissos atque inde rursus  
 longa navigatione ægros impensiore cura Galba refove-  
 32 bat. Universa jam plebs Palatum implebat, mixtis  
 servitiis, et dissono clamore cædem Othonis et con-  
 juratorum exitium poscentium, ut si in circo ac theatro  
 ludicruū aliquod postularent: neque illis judicium aut  
 veritas, quippe eodem die diversa pari certamine pos-  
 tularis, sed tradito more quemcunque principem  
 adulandi licentia acclamacionum et studiis inanibus.  
 2 Interim Galbam duæ sententiæ distinebant. Titus  
 Vinius manendum intra domum, opponenda servitia, fir-  
 3 mandos aditus, non eundum ad iratos censebat. Daret  
 malorum pænitentiæ, daret bonorum consensui spatium.  
 4 Scelera impetu, bona consilia mora valescere. Denique  
 eundi ultro, si ratio sit, eandem mox facultatem; re-  
 33 gressus, si pæniteat, in aliena potestate. Festinandum

A. D. 69.]

ceteris videbatur, antequam cresceret invalida adhuc conjuratio paucorum. Trepidaturum etiam Othonem, 2 qui furtim digressus, ad ignaros illatus, cunctatione nunc et segnitia tercutium tempus imitari principem discat. Non exspectandum, ut compositis castris forum 3 invadat et prospectante Galba Capitolium adeat, dum egregius imperator cum fortibus amicis janua ac limine tenuis domum cludit. Obsidionem nimirum toleraturos : 4 et præclarum in servis auxilium, si consensus tantæ multitudinis, et, quæ plurimum valet, prima indignatio elanguescat. Proinde intuta quæ indecora. Vel si ca- 5 dere necesse sit, occurrentum discrimini : id Othoni invidiosius et ipsis honestum. Repugnantem huic sen- 6 tentiæ Vinium Laco minaciter invasit, stimulante Ieelo privati odii pertinacia in publicum exitium. Nec diutius 34 Galba cunctatus speciosiora suadentibus accessit. Præmissus tamen in castra Piso ut juvenis magno nomine, 2 recenti favore, et infensus Tito Vinio, seu quia erat, seu quia irati ita volebant ; et facilius de odio creditur. Vixdum egresso Pisone occisum in castris Othonem vagus primum, et incertus rumor : mox, ut in magnis meudaciis, interfuisse se quidam et vidisse affirmabant, credula fama inter gaudentes et incuriosos. Multi 3 arbitrabantur compositum auctumque rumorem mixtis jam Othonianis, qui ad evocandum Galbam læta falso vulgaverint. Tum vero non populus tantum et imperita 35 plebs in plausus et immodica studia, sed equitum plerique ac senatorum, posito metu incauti, refractis Palatii foribus ruere intus ac se Galbæ ostentare, præreptam sibi ultionem querentes. Ignavissimus quisque, et, ut res 2 docuit, in periculo non ausurus, nimii verbis, linguae feroce; nemo scire, et omnes affirmare, donec inopia veri, et consensu errantium victus, sumpto thorace

Galba, irruenti turbæ neque ætate neque corpore sistens, 3 sella levaretur. Obvius in Palatio Julius Atticus speculator, cruentum gladium ostentans, occisum a se Othonem exclamavit ; et Galba, "Commilito," inquit, "quis jussit?" insigni animo ad coercendam militarem licentiam, minantibus intrepidus, adversus blandientes incorruptus.

36 Haud dubia jam in castris omnium mentes ; tantusq[ue] ardor ut non contenti agmine et corporibus in suggestu, in quo paulo ante aurea Galbæ statua fucrat, medium inter signa Othonem vexillis circumdarent.

2 Nec tribunis aut centurionibus adeundi locus : gregarius miles caveri insuper præpositos jubebat. Streperere cuncta clamoribus et tumultu et exhortatione mutua, non tanquam in populo ac plebe, variis segni adulazione vocibus, sed ut quemque affluentium militum aspexerant, prensare manibus, complecti armis, collocare juxta, præire sacramentum, modo imperatorem militibus

3 modo milites imperatori commendare. Nec deerat Otho, protendens manus, adorare vulgum, jacere oscula, et

4 omnia serviliter pro dominatione. Postquam universa classicorum legio sacramentum ejus accepit, fidens viribus, et quos adhuc singulos exstimulaverat, accendendos

37 in commune ratus, pro vallo castrorum ita cœpit :— "Quis ad vos processerim, commilitones, dicere non possum, quia nec privatum me vocare sustineo princeps a vobis

2 nominatus, nec principem alio imperante. Vestrum quoque nomen in incerto erit, donec dubitabitur impera-

3 torem populi Romani in castris an hostem habeatis. Auditisne ut poena mea et supplicium vestrum simul postulentur? adeo manifestum est neque perire nos neque

4 salvos esse nisi una posse. Et, cuius lenitatis est Galba, jam fortasse promisit, ut qui nullo exposcente tot millia

5 innocentissimorum militum trucidavcrit. Horror ani-

A. D. 69.]

num subit, quotiens recordor feralem introitum et  
 hanc solam Galbæ victoriam, cum in oculis urbis de-  
 cimari deditos juberet, quos deprecantes in fidem ac-  
 ceperat. His auspiciis urbem ingressus, quam gloriam 6  
 ad principatum attulit nisi occisi Obultronii Sàbini et  
 Cornelii Marcelli in Hispania, Betui Chilonis in Gallia,  
 Fonteii Capitonis in Germania, Clodii Macri in Africa,  
 Cingonii in via, Turpiliani in urbe, Nymphidii in  
 castris? Quæ usquam provincia, quæ castra sunt, nisi 7  
 cruenta et maculata, aut ut ipse prædicat, emendata et  
 correcta? nam quæ alii scelera, hic remedia vocat, dum  
 falsis nominibus severitatem pro sævitia, parsimoniam  
 pro avaritia, supplicia et contumelias vestras discipli-  
 nam appellat. Septem a Neronis fine menses sunt, et 8  
 jam plus rapuit Icelus quam quod Polycliti et Vatinii  
 et Ægiali paraverunt. Minore avaritia ac licentia 9  
 grassatus esset T. Vinius, si ipse imperasset: nunc et  
 subjectos nos habuit tanquam suos, et viles ut alienos.  
 Una illa domus sufficit donativo, quod vobis nunquam 10  
 datur et quotidie exprobratur. Ac, ne qua saltem in 38  
 successore Galbæ spes esset, accersit ab exsilio quem  
 tristitia et avaritia sui simillimum judicabat. Vidistis, 2  
 commilitones, notabili tempestate etiam deos infaustam  
 adoptionem aversantes. Idem senatus, idem populi 3  
 Romani animus est. Vestra virtus exspectatur, apud  
 quos omne honestis consiliis robur, et sine quibus  
 quamvis egregia invalida sunt. Non ad bellum vos nec 4  
 ad periculum voco: omnium militum arma nobiscum  
 sunt. Nec una cohors togata defendit nunc Galbam, 5  
 sed detinet. Cum vos aspexerit, cum signum meum  
 acceperit, hoc solum erit certamen, quis mihi plurimum  
 imputet. Nullus cunctationis locus est in eo consilio 6  
 quod non potest laudari nisi peractum.” Aperire

7 deinde armamentarium jussit. Rapta statim arma, sine more et ordine militiae, ut prætorianus aut legionarius insignibus suis distingueretur: miscentur auxiliaribus galeis scutisque, nullo tribunorum centurionumve adhortante, sibi quisque dux et instigator; et præcipuum pessimorum incitamentum, quod boni mærebant.

39 Jam exterritus Piso fremitu crebrescentis seditionis et vocibus in urbem usque resonantibus, egressum interim Galbam et foro appropinquantem assecutus erat; jam Marius Celsus haud læta retulerat, cum alii in Palatium redire, alii Capitolium petere, plerique Rostra occupanda censerent, plurcs tantum sententiis aliorum contradicerent, utque evenit in consiliis infelici-  
bus, optima viderentur quorum tempus effugerat. Agitasse Laco ignaro Galba de occidendo Tito Vinio dicitur, sive ut pœna ejus animos militum mulceret, seu conscientium Othonis credebat, ad postremum vel odio.  
3 Hæsitationem attulit tempus ac locus, quia initio cædis orto difficilis modus. Et turbavere consilium trepidi nuntii ac proximorum diffugia, languentibus omnium studiis qui primo alacres fidem atque animum ostendaverant. Agebatur huc illuc Galba, vario turbæ fluctuantis impulsu, completis undique basilicis ac templis, lugubri prospectu. Neque populi aut plebis ulla vox, sed attoniti vultus et conversæ ad omnia 3 aures. Non tumultus, non quies, quale magni metus et magnæ iræ silentium est. Othoni tamen armari 4 plebem nuntiabatur. Ire præcipites et occupare pericula jubet. Igitur milites Romani, quasi Vologesen aut Pacorum avito Arsacidarum solio depulsuri ac non imperatorem suum inermem et senem trucidare pergerent, disjecta plebe, proculato senatu, truces armis, rapidi equis forum irrumpunt. Nec illos Capitolii

A. D. 69.]

aspectus et imminentium templorum religio et priores  
 et futuri principes terruere, quo minus facerent scelus  
 cuius ulti est quisquis successit. Viso cominus 41  
 armatorum agmine, vexillarius comitatæ Galbam co-  
 hortis (Atilium Vergilionem fuisse tradunt,) dereptam  
 Galbæ imaginem solo afflxit. Eo signo manifesta in 2  
 Othonem omnium militum studia, desertum fuga populi  
 forum, destricta adversus dubitantes tela. Juxta Curtii 3  
 lacum trepidatione ferentium Galba projectus e sella  
 ac provolutus est. Extremam ejus vocem, ut cuique 4  
 odium aut admiratio fuit, varie prodidere. Alii sup-  
 pliciter interrogasse quid mali meruisset; paucos dies  
 exsolvendo donativo deprecatum. Plures obtulisse 5  
 ultro percussoribus jugulum: agerent ac ferirent, si  
 ita *e re publica* videretur. Non interfuit occidentium 6  
 quid diceret. De percussore non satis constat. Qui-  
 dam Terentium evocatum, alii Lecanium; crebrior  
 fama tradidit Camurium quintæ decimæ legionis militem  
 impresso gladio jugulum ejus hausisse. Ceteri crura bra- 7  
 chiaque (nam pectus tegebatur,) foede laniavere; pleraque  
 vulnera feritate et sævitia trunco jam corpori adjecta.  
 Titum inde Vinium invasere. De quo et ipso ambigi- 42  
 tur, consumpseritne vocem ejus instans metus, an pro-  
 clamaverit non esse ab Othone mandatum ut occide-  
 retur. Quod seu fiuxit formidine seu conscientiam 2  
 conjurationis confessus est, huc potius ejus vita famaque  
 inclinat, ut conscius sceleris fuerit cuius causa erat.  
 Ante ædem divi Julii jacuit primo ietu in poplitem, mox 3  
 ab Julio Caro legionario milite in utrumque latus trans-  
 verberatus. Insignem illa die virum Sempronium Den- 43  
 sum ætas nostra vidit. Centurio is prætoriæ cohortis,  
 a Galba custodiæ Pisonis additus, stricto pugione oc-  
 currrens armatis et scelus exprobrans, ac modo manu

modo voce vertendo in se percussores, quanquam vul-  
 2 nerato Pisoni effugium dedit. Piso in ædem Vestæ  
 pervasit, exceptusque misericordia publici servi et con-  
 tubernio ejus abditus, non religione nec cæremoniis sed  
 latebra imminens exitium differebat, cum adveneret  
 missu Othonis, nominatim in cædem ejus ardentes,  
 Sulpicius Florus e Britannicis cohortibus, nuper a Galba  
 civitate donatus, et Statius Murcus speculator; a quibus  
 44 protractus Piso in foribus templi trucidatur. Nullam  
 cædem Otho majore lætitia excepisse, nullum caput tam  
 insatiabilibus oculis perlustrasse dicitur, seu tum primum  
 levata omni sollicitudine mens vacare gaudio cœperat,  
 seu recordatio majestatis in Galba, amicitiae in Tito Vinio  
 quamvis immitem animum imagine tristi confuderat:  
 Pisonis ut inimici et æmuli cæde lætari jus fasque cre-  
 2 debat. Præfixa contis capita gestabantur, inter signa  
 cohortium, juxta aquilam legionis, certatim ostentanti-  
 bus cruentas manus qui occiderant, qui interfuerant, qui  
 vere qui falso ut pulchrum et memorabile facinus jacta-  
 3 bant. Plures quam centum viginti libellos præmium  
 exposcentium ob aliquam notabilem illa die operam  
 Vitellius postea invenit; omnesque conquiri et interfici  
 jussit, non honore Galbæ, sed tradito principibus more,  
 munimentum ad præsens, in posterum ultionem.  
 45 Alium crederes senatum, alium populum. Ruere  
 cuncti in castra, anteire proximos, certare cum præcur-  
 rentibus, increpare Galbam, laudare militum judicium,  
 exosculari Othonis manum; quantoque magis falsa  
 2 erant quæ fiebant, tanto plura facere. Nec aspernabatur  
 singulos Otho, avidum et minacem militum animum  
 3 voce vultuque temperans. Marium Celsum consulem  
 designatum et Galbæ usque in extremas res amicum  
 fidumque ad supplicium expostulabant, industriæ ejus

A. D. 69.]

innocentiæque quasi malis artibus infensi. Cædis et 4  
prædarum initium et optimo cuique perniciem quæri  
apparebat. Sed Othoni nondum auctoritas inerat ad 5  
prohibendum scelus: jubere jam poterat. Ita simula-  
tione iræ, vinciri jussum et majores pœnas daturum  
affirmans, præsenti exitio subtraxit. Omnia deinde arbi- 46  
trio militum acta. Prætorii præfectos sibi ipsi legere,  
Plotium Firmum e manipularibus quondam, tum vigili-  
bus præpositum et incolumi adhuc Galba partes Othonis  
secutum. Adjungitur Licinius Proculus, intima familia- 2  
ritate Othonis, suspectus consilia ejus fovisse. Urbi  
Flavium Sabinum præfecere, judicium Neronis secuti,  
sub quo eandem curam obtinuerat, plerisque Vespasia-  
num fratrem in eo respicientibus. Flagitatum ut va- 3  
cationes præstari centurionibus solitæ remitterentur.  
Namque gregarius miles ut tributum annum pendebat.  
Quarta pars manipuli sparsa per commeatus aut in ipsis 4  
castris vaga, dum mercedem centurioni exsolveret,  
neque modum oneris quisquam neque genus quæstus  
pensi habebat. Per latrocinia et raptus aut servilibus 5  
ministeriis militare otium redimebant. Tum locuple-  
tissimus quisque miles labore ac sævitia fatigari, donec  
vacationem emeret. Ubi sumptibus exhaustus socordia 6  
insuper elanguerat, inops pro locuplete et iners pro  
strenuo in manipulum redibat; ac rursus aliis atque  
alius, eadem egestate ac licentia corrupti, ad seditiones  
et discordias et ad extremum bella civilia ruebant. Sed 7  
Otho ne vulgi largitione centurionum animos averteret,  
fiscum suum vacationes annuas exsoluturum promisit,  
rem hanc dubie utilem, et a bonis postea principibus  
perpetuitate disciplinæ firmatam. Laco præfetus, tan- 8  
quam in insulam seponeretur, ab evocato, quem ad

cædem ejus Otho præmiserat, confossus; in Marcianum  
Icelum ut in libertum palam animadversum.

47 Exacto per scelera die novissimum malorum fuit lætitia. Vocat senatum prætor urbanus; certant adulationibus ceteri magistratus. Accurrunt patres; decernitur Othoni tribunicia potestas et nomen Augusti et omnes principum honores, adnitentibus cunctis abolerere convicia ac probra, quæ promisce jacta hæsisse  
3 animo ejus nemo sensit. Omisisset offensas an distulisset, brevitate imperii in incerto fuit. Otho, cruento adhuc foro, per stragem jacentium in Capitolium atque iude in Palatium vectus concedi corpora sepulturæ  
4 cremarique permisit. Pisonem Verania uxor ac frater Scribonianus, Titum Vinium Crispina filia composuere, quæsitis redemptisque capitibus, quæ venalia interfec-  
48 tores servaverant. Piso unum et tricesimum ætatis annum explebat, fama meliore quam fortuna. Fratres ejus Magnum Claudius, Crassum Nero interfecerant.  
2 Ipse diu exsul, quatriduo Cæsar, properata adoptione ad hoc tantum majori fratri prælatus est, ut prior  
3 occideretur. Titus Vinius quinquaginta septem annos variis moribus egit. Pater illi præatoria familia, mater-  
4 nus avus e proscriptis. Prima militia infamis legatum Calvisium Sabinum habuerat, cujas uxor mala cupidine visendi situm castrorum, per noctem militari habitu ingressa, cum vigilias et cetera militiæ munia eadem lascivia temerasset, in ipsis principiis stuprum ausa; et  
5 criminis hujus reus Titus Vinius arguebatur. Igitur jussu C. Cæsaris oneratus catenis, mox mutatione temporum dimissus, cursu honorum inoffenso legioni post præturam præpositus probatusque, servili deinceps pro-  
bro respersus est tanquam scyphum aureum in convivio

A. D. 69.]

Claudii furatus ; et Claudius postera die soli omnium Vinio fictilibus ministrari jussit. Sed Vinius pro- 6 consulatu Galliam Narbonensem severe integreque rexit. Mox Galbae amicitia in abruptum tractus, audax, calli- 7 dus, promptus et, prout animum intendisset, pravus aut industrius, eadem vi. Testamentum Titi Vinii 8 magnitudine opum irritum ; Pisonis supremam voluntatem paupertas firmavit. Galbae corpus diu neglectum 49 et licentia tenebrarum plurimis ludibriis vexatum dispensator Argius, e prioribus servis, humili sepultura in privatis ejus hortis contexit. Caput per lixas calones- 2 que suffixum laceratumque, ante Patrobii tumulum (libertus is Neronis punitus a Galba fuerat,) postera demum die repertum et cremato jam corpori admixtum est. Hunc exitum habuit Servius Galba, tribus et 3 septuaginta annis quinque principes prospera fortuna emensus, et alieno imperio felicior quam suo. Vetus 4 in familia nobilitas, magnae opes : ipsi medium ingenium, magis extra vitia quam cum virtutibus. Famæ nec 5 incuriosus nec venditator. Pecuniæ alienæ non appetens, suæ parcus, publicæ avarus. Amicorum libertorum- 6 que, ubi in bonos incidisset, sine reprehensione patiens, si mali forent, usque ad culpam ignarus. Sed claritas 7 natalium et metus temporum obtentui, ut quod segnitia erat, sapientia vocaretur. Dum vigebat ætas, militari 8 laude apud Germanias floruit. Pro consule Africam moderate, jam senior ceteriorem Hispaniam pari justitia continuit, major privato visus, dum privatus fuit, et omnium consensu capax imperii, nisi imperasset.

Trepidam urbem, ac simul atrocitatem recentis scele- 50 ris, simul veteres Othonis mores paventem, novus insuper de Vitellio nuntius exterruit, ante cædem Galbae suppressus, ut tantum superioris Germaniæ exercitum

2 descivisse crederetur. Tum duos omnium mortalium impudicitia ignavia luxuria deterrimos velnt ad perendum imperium fataliter electos non senatus modo et eques, quis aliqua pars et cura rei publicae, sed vulgus  
 3 quoque palam mærere. Nec jam recentia sævæ pacis exempla, sed repetita bellorum civilium memoria captam totiens suis exercitibus urbem, vastitatem Italiæ, di-  
 reptiones provinciarum, Pharsaliam Philippos et Peru-  
 siam ac Mutinam, nota publicarum clodium nomina,  
 4 loquebantur. Prope eversum orbem etiam cum de principatu inter bonos certaretur; sed mansisse C.  
 Julio, mansisse Cæsare Augusto victore imperium;  
 mansuram fuisse sub Pompeio Brutoque rem publicam.  
 5 Nunc pro Othonē an pro Vitellio in templo ituros?  
 utrasque impias preces, utraqne detestanda vota, inter duos quorum bello solum id scires, deteriorem fore qui  
 6 vicisset. Erant qui Vespasianum et arma Orientis augurarentur. Et ut potior utroque Vespasianus, ita bel-  
 lum aliud atque alias clades horrebant. Et ambigua de Vespasiano fama; solusque omnium ante se princi-  
 pum in melius mutatus est.

51 Nunc initia causasque motus Vitelliani expediam. Cæso enī omnibus copiis Julio Vindice, ferox præda gloriaque exercitus, ut cui sine labore ac periculo ditissimi belli victoria evenisset, expeditionem et aciem,  
 2 præmia quam stipendia malebat. Diu infructuosam et asperam militiam toleraverant ingenio loci cælique et severitate disciplinæ, qnam in pace inexorabilem discordiae civium resolvunt, paratis utrinque corruptoribus  
 3 et perfidia impunita. Viri, arma, equi ad usum et ad decus supererant. Sed ante bellum centurias tantum suas turmasque noverant; exercitus finibus provincia-  
 4 rum discernebantur. Tum adversus Vindicem con-

A. D. 69.]

tractæ legiones, seque et Gallias expertæ, quærere rursum arma novasque discordias ; nec socios, ut olim, sed hostes et victos vocabant. Nec deerat pars Gal- 5 liarum, quæ Rhenum accolit, easdem partes secuta, ac tum acerrima instigatrix adversum Galbianos : hoc euim nomen fastidito Vindice indiderant. Igitur Se- 6 quanis Æduisque ac deinde, prout opulentia civitatibus erat, infensi, expugnationes urbium, populationes agro- rum, raptus penatiū hauserunt animo, super avaritiam et arrogantiam, præcipua validiorum vitia, contumacia Gallorum irritati, qui remissam sibi a Galba quartam tributorum partem et publice donatos in ignominiam exercitus jactabant. Accessit callide vulgatum, temere 7 creditum, decimari legiones et promptissimum quemque centurionum dimitti. Undique atroces nuntii, sinistra 8 ex urbe fama ; infensa Lugdunensis colonia, et, pertinaci pro Nerone fide, fecunda rumoribus. Sed plurima ad 9 fingendum credendumque materies in ipsis castris, odio, metu, et ubi vires suas respexerant, securitate. Sub 52 ipsas superioris anni Kalendas Decembres Aulus Vi- tellius inferiorem Germaniam ingressus, hiberna le- gionum cum cura adierat. Reddi plerisque ordines, 2 remissa ignominia, allevatae notæ, plura ambitione, que- dam judicio, in quibus sordem et avaritiam Fontei Capitonis adimendis assignandisve militiæ ordinibus integre mutaverat. Nec consularis legati mensura, sed 3 in majus omnia accipiebantur. Et *ut* Vitellius apud severos humilis, ita comitatem bonitatemque faventes vocabant, quod sine modo, sine judicio donaret sua, largiretur aliena ; simul aviditate imperandi ipsa vitia pro virtutibus interpretabantur. Multi in utroque ex- 4 ercitū, sicut modesti quietique, ita mali et strenui. Sed profusa cupidine et insigni temeritate legati le-

5 gionum, Alienus Cæcina et Fabius Valens; e quibus Valens infensus Galbae tanquam detectam a se Verginii cunctationem, oppressa Capitonis consilia ingrate tulisset, instigare Vitellium, ardorem militum ostentans.  
 6 Ipsum celebri ubique fama, nullam in Flacco Hordeonio moram; affore Britanniam, secutura Germanorum auxilia; male fidas provincias, precarium seni imperium  
 7 et brevi trausiturum. Panderet modo sinum et venienti Fortunæ occurreret. Merito dubitasse Verginium equestri familia, ignoto patre, imparem, si recepisset  
 8 imperium, tutum, si recusasset. Vitellio tres patris consulatus, censuram, collegium Cæsaris et imponere iam-pridem imperatoris dignationem et auferre privati  
 53 securitatem. Quatiebatur his segne ingenium, ut concupisceret magis quam ut speraret. At in superiore Germania Cæcina decora juventa, corpore ingens, animi immodicus, scito sermone, erecto incessu studia militum  
 2 illexerat. Hunc juvenem Galba, quæstorem in Bætica, impigre in partes suas transgressum legioni præposuit; mox compertum publicam pecuniam avertisse, ut e  
 3 culatorem flagitari jussit. Cæcina ægre passus miscere cuucta et privata vulnera rei publicæ malis operire  
 4 statuit.\* Nec deerant in exercitu semina discordiæ, quod et bello adversus Vindicem universus affuerat, nec nisi occiso Nerone translatus in Galbam, atque in eo ipso sacramento vexillis inferioris Germaniæ præ-  
 5 ventus erat. Et Treveri ac Lingones, quasque alias civitates atrocibus edictis aut damno finium Galba perculerat, hibernis legionum proprius miscentur; unde seditiosa colloquia, et inter paganos corruptior miles,  
 54 et in Verginium favor cuicunque alii profuturus. Misserat civitas Lingonum vetere instituto dona legio-  
 2 nibus, dextras, hospitii insigne. Legati eorum in

A. D. 69.]

squalorem mæstitiamque compositi, per principia per contubernia modo suas injurias modo vicinarum civitatum præmia, et ubi pronis militum auribus accipiebantur, ipsius exercitus pericula et contumelias conquerentes accendebat animos. Nec procul seditione aberant,<sup>3</sup> cum Hordeonius Flaccus abire legatos, utque occultior digressus esset, nocte castris excedere jubet. Inde<sup>4</sup> atrox rumor, affirmantibus plerisque interfectos, ac nisi ipsi consulerent, fore ut acerrimi militum et præsentia conquesti per tenebras et inscitiam ceterorum occiderentur. Obstringuntur inter se tacito fœdere legiones.<sup>5</sup> Adsciscitur auxiliorum miles, primo suspectus tanquam circumdatis cohortibus alisque impetus in legiones pararetur, mox eadem acrius volvens, faciliore inter malos consensu ad bellum quam in pace ad concordiam. Inferioris tamen Germaniae legiones sollemni Kalendarum<sup>55</sup> Januariarum sacramento pro Galba adactæ, multa cunctatione et raris primorum ordinum vocibus, ceteri silentio proximi cujusque audaciam exspectantes, insita mortaliibus natura, propere sequi quæ piget inchoare. Sed<sup>2</sup> ipsis legionibus inerat diversitas animorum. Primani quintanique turbidi adeo ut quidam saxa in Galbæ imagines jecerint: quinta decima ac sexta decima legiones nihil ultra fremitum et minas ausæ initium erumpendi circumspectabant. At in superiore exercitu quarta ac<sup>3</sup> duodevicesima legiones, isdem hibernis tendentes, ipso Kalendarum Januariarum die dirumpunt imagines Galbæ, quarta legio promptius, duodevicesima cunctanter, mox consensu. Ac ne reverentiam imperii exuere viderentur,<sup>4</sup> senatus populique Romani oblitterata jam nomina sacramento advocabant, nullo legatorum tribunorumve pro Galba nitente, quibusdam, ut in tumultu, notabilius turbantibus. Non tamen quisquam in modum concionis<sup>5</sup>

[A. U. C. 822.]

aut suggestu locutus. Neque enim erat adhuc cui im-  
**56** putaretur. Spectator flagitii Hordeonius Flaccus con-  
 sularis legatus aderat, non compescere ruentes, non  
 retinere dubios, non cohortari bonos ausus, sed segnis,  
**2** pavidus et socordia innocens. Quatuor centuriones  
 duodecimæ legionis, Nonius Receptus, Donatius  
 Valens, Romilius Marcellus, Calpurnius Repentinus,  
 cum protegerent Galbæ imagines, impetu militum ab-  
**3** repti vinctique. Nec cuiquam ultra fides aut memoria  
 prioris sacramenti, sed quod in seditionibus accidit,  
 unde plures erant, omnes fuere.

Nocte quæ Kalendas Januarias secuta est, in colo-  
 niam Agrippinensem aquilifer quartæ legionis epulanti  
 Vitellio nuntiat quartam et duodecimam legiones,  
 projectis Galbæ imaginibus, in senatus ac populi Ro-  
**4** mani verba jurasse. Id sacramentum inane visum:  
 occupari nutantem fortunam et offerri principem pla-  
**5** cuit. Missi a Vitellio ad legiones legatosque qui de-  
 scivisse a Galba superiorem exercitum nuntiarent:  
 proinde aut bellandum adversus desciscentes, aut, si  
 concordia et pax placeat, faciendum imperatorem; et  
**57** minore discrimine sumi principem quam quaeri. Prox-  
 imæ legionis primæ hiberna erant, et promptissimus e-  
**2** legatis Fabius Valens. Is die proximo coloniam Agrip-  
 pinensem cum equitibus legionis auxiliariorumque gres-  
**3** sus imperatorem Vitellium consulutavit. Secutæ in-  
 genti certamine ejusdem provinciæ legiones; et superior  
 exercitus, speciosis senatus populique Romani nominini-  
 bus relictis, tertium Nonas Januarias Vitellio accessit.  
**4** Scires illum priore biduo non penes rem publicam  
 fuisse. Ardorem exercituum Agrippinenses Treviri  
 Lingones æquabant, auxilia equos arma pecunias of-  
 ferentes, ut quisque corpore opibus ingenio validus.

A. D. 69.]

Nec principes modo coloniarum aut castrorum, quibus 5  
 præsentia ex affluent et parta victoria magnæ spes :  
 sed manipuli quoque et gregarius miles viatica sua et  
 balteos phalerasque, insignia armorum argento decora,  
 loco pecuniae tradebant, instinctu et impetu et avaritia.  
 Igitur laudata militum alacritate, Vitellius ministeria 58  
 principatus, per libertos agi solita, in equites Romanos dis-  
 ponit; vacationes centurionibus ex fisco numerat; sævi-  
 tiam militum plerosque ad pœnam exposcentium sæpius  
 approbat, partim simulatione vinculorum frustratur.  
 Pompeius Propinquus, procurator Belgicæ, statim inter- 2  
 fectus. Julium Burdonem, Germanicæ classis præfec-  
 tum, astu subtraxit. Exarserat in eum iracundia exer- 3  
 citus, tanquam crimen ac mox insidias Fonteio Capi-  
 toni struxisset. Grata erat memoria Capitonis; et apud 4  
 sævientes occidere palam, ignoscere nonnisi fallendo lice-  
 bat. Ita in custodia habitus, et post victoriam demum, 5  
 stratis jam militum odiis, dimissus est. Interim, ut pia-  
 culum, objicitur centurio Crispinus; sanguine Capitonis  
 se cruentaverat; eoque et postulantibus manifestior et  
 punienti vilius fuit. Julius deinde Civilis periculo exempl- 59  
 tus, præpotens inter Batavos, ne supplicio ejus ferox gens  
 alienaretur. Et erant in civitate Lingonum octo Bata- 2  
 vorum cohortes, quartæ decimæ legionis auxilia, tum dis-  
 cordia temporum a legione digressæ, prout inclinassent,  
 grande momentum sociæ aut adversæ. Nonium, Dona- 3  
 tium, Romilium, Calpurnium, centuriones, de quibus su-  
 pra retulimus, occidi jussit, damnatos fidei crimine, gra-  
 vissimo inter descisentes. Accessere partibus Valerius 4  
 Asiaticus, Belgicæ provinciæ legatus, quem mox Vitellius  
 generum adscivit, et Junius Blæsus, Lugdunensis Galliæ  
 rector, cum Italica legione et ala Taurina, Lugduni  
 tendentibus. Nec in Ræticis copiis mora, quo minus 5

statim adjungerentur. Ne in Britannia quidem dubitatum.

60 Præerat Trebellius Maximus, per avaritiam ac sorde contemptus exercitui invisusque. Accendebat odium ejus Roscius Cælius legatus vicesimæ legionis, olim discors, sed occasione civilium armorum atrocius proruperat.

2 Trebellius seditiouem et confusum ordinem disciplinæ Cælio, spoliatas et inopes legiones Cælius Trebellio objectabat, cum interim fœdis legatorum certamiibus modestia exercitus corrupta, eoque discordiæ ventum ut auxiliarium quoque militum conviciis proturbatus, et aggregantibus se Cælio cohortibus alisque, desertus  
3 Trebellius ad Vitellium perfugerit. Quies proviuciae quauquam remoto consulari mansit: rexerc legati legioum, pares jure, Cælius audendo potentior.

61 Adjuneto Britannico exercitu, iugeus viribus opibusque Vitellius duos duces, duo itinera bello destinavit. Fabius Valens allicere, vel, si abnuerent, vastare Gallias, et Cottianis Alpibus Italiam irrumpere, Cæciua propiore

2 transitu, Pœninis jugis degredi jussus. Valeuti inferioris exercitus clecti, cum aquila quintæ legionis et cohortibus alisque, ad quadraginta millia armatorum data; triginta millia Cæciua e superiore Germania ducebat, quorum  
3 robur legio una, prima et vicesima, fuit. Addita utriusque Germanorum auxilia, e quibus Vitellius suas quoque

62 copias supplevit, tota mole belli secuturus. Mira inter exercitum imperatoremque diversitas. Instare miles, arma poscere, dum Galliæ trepident, dum Hispaniæ

2 cunctentur. Non obstare hiemem neque ignavæ pacis moras. Invadendam Italiam, occupandam urbem. Nihil in discordiis civilibus festinatione tutius, ubi facto  
3 magis quam consulto opus esset. Torpebat Vitellius, et fortunam principatus inertí luxu ac prodigis epulis præsumbat, nœdio diei temulentus et sagina gravis,

A. D. 69.]

cum tamen ardor et vis militum ultro ducis munia implebat, ut si adesset imperator et strenuis vel ignavis spem metumque adderet. Instrueti intentique signum 4 profectionis exposcerunt. Nomen *Germanici* Vitellio statim additum: Cæsarem se appellari etiam victor prohibuit. Lætum augurium Fabio Valenti exercituique, 5 quem in bellum agebat, ipso profectionis die aquila leni meatu, prout agmen incederet, velut dux viæ prævolavit; longumque per spatum is gaudentium militum clamor, ea quies interritæ alitis fuit, ut haud dubium magnæ et prospere rei omen acciperetur. Et Treviros 63 quidem, ut socios, securi adiere. Divoduri (Mediomatricorum id oppidum est,) quanquam omni comitate exceptos subitus pavor terruit, raptis derepente armis ad cædem innoxiae civitatis, non ob prædam aut spoliandi cupidinem, sed furore et rabie et causis incertis, eoque difficilioribus remedii, donec precibus ducis mitigati ab excidio civitatis temperavere. Cæsa tamen ad quatuor 2 millia hominum. Isque terror Gallias invasit, ut venienti mox agmini universæ civitates cum magistratibus et precebus occurserent, stratis per vias feminis puerisque, quæque alia placamenta hostilis iræ, non quidem in bello sed pro pace, tendebantur. Nuntium de cæde Galbae et 64 imperio Othonis Fabius Valens in civitate Leucorum accepit. Nec militum animus in gaudium aut formidine 2 permotus: bellum volvbat. Gallis cunctatio exempta, et in Othonem ac Vitellium odium par, ex Vitellio et metus. Proxima Lingonum civitas erat, fida partibus. Benigne excepti modestia certavere. Sed brevis lætitia fuit cohortium intemperie, quas a legione quarta decima, ut supra memoravimus, digressas exercitui suo Fabius Valens adjunxerat. Jurgia primum, mox rixa 4 inter Batayos et legionarios, dum his aut illis studia

militum aggregantur, prope in prælium exarsere, ni  
 Valens animadversione paucorum oblitos jam Batavos  
 5 imperii admonuisset. Frustra adversus Æduos quæsita  
 belli causa: jussi pecuniam atque arma deferre, gratuitos  
 6 insuper commeatus præbuere. Quod Ædui formidine,  
 Lugdunenses gaudio fecere. Sed legio Italica et ala  
 Taurina abductæ: cohortem duodecimam Lugduni,  
 7 solitis sibi hibernis, relinqu placuit. Manlius Valens  
 legatus Italicæ legionis, quanquam bene de partibus  
 8 meritus, nullo apud Vitellium honore fuit. Secretis eum  
 criminacionibus infamaverat Fabius ignarum et, quo  
 incautior deciperetur, palam laudatum.

- 65 Veterem inter Lugdunenses et Viennenses discordiam proximum bellum accenderat. Multæ in vicem clades, crebrius infestiusque quam ut tantum propter Neronem  
 2 Galbamque pugnaretur. Et Galba redditus Lugdunensium occasione iræ in fiscum verterat; multus contra  
 3 in Vieunenses honor. Unde æmulatio et invidia et uno amne discretis connexum odium. Igitur Lugdunenses extimulare singulos militum et in eversionem Viennensium impellere, obsessam ab illis coloniam suam, adjutos Vindicis conatus, conscriptas nuper legiones in præsidium Galbae referendo. Et ubi causas odiorum præteuderant, magnitudinem prædæ ostendebant. Nec jam secreta exhortatio, sed publicæ preces: irent ultores, excinderent sedem Gallici belli. Cuncta illic externa et hostilia: se coloniam Romanam et partem exercitus et prosperarum adversarumque rerum socios.  
 46 Si fortuna contra daret, iratis ne relinquenteruntur. His et pluribus in eundem modum perpulerant, ut ne legati quidem ac duces partium restingui posse iracundiam exercitus arbitrarentur, cum haud ignari discriminis sui Viennenses, velamenta et infulas præferentes, ubi agmen

A. D. 69.]

incesserat, arma, genua, vestigia prensando flexere militum animos. Addidit Valens trecenos singulis militibus 2 sestertios. Tum vetustas dignitasque coloniae valuit, et verba Fabii salutem incolumentatemque Viennensium commendantis æquis auribus accepta. Publice tamen 3 armis multati, privatis et promiscuis copiis juvere militem. Sed fama constans fuit ipsum Valentem magna 4 pecunia emptum. Is diu sordidus, repente dives mutationem fortunæ male tegebat, accensis egestate longa cupidinibus immoderatus, et inopi juventa senex prodigus. Lento deinde agmine per fines Allobrogum ac 5 Vocontiorum ductus exercitus, ipsa itinerum spatia et stativorum mutationes venditante duce, foedis pacationibus adversus possessores agrorum et magistratus civitatum, adeo minaciter ut Luco (municipium id Vocontiorum est,) faces admoverit, donec pecunia mitigaretur. Quoties pecuniæ materia deasset, stupris et 6 adulteriis exorabatur. Sic ad Alpes perventum.

Plus prædæ ac sanguinis Cæcina hausit. Irritaverant 67 turbidum ingenium Helvetii, Gallica gens, olim armis virisque, mox memoria nominis clara, de cæde Galbae iguari et Vitellii imperium abnuentes. Initium bello 2 fuit avaritia ac festinatio unetvicesimæ legionis. Raperuerant pecuniam missam in stipendium castelli, quod olim Helvetii suis militibus ac stipendiis tuebantur. Ægre id passi Helvetii, interceptis epistolis quæ nomine 3 Germanici exercitus ad Pannonicas legiones ferebantur, centurionem et quosdam militum in custodia retinebant. Cæcina belli avidus proximam quamque culpam, ante- 4 quam pæniteret, ultum ibat. Mota propere castra, vastati agri, direptus longa pace in modum municipii exstructus locus, amœno salubrium aquarum usu frequens. Missi ad Rætica auxilia nuntii, ut versos in 5

- 68 legionem Helvetios a tergo aggredierentur. Illi ante discrimen feroce, in periculo pavidi, quanquam primo tumultu Claudium Severum ducem legerant, non arma noscere, non ordines sequi, non in unum consulere.
- 2 Exitiosum adversus veteranos prælium, intuta obsidio dilapsis vetustate mœnibus. Hinc Cæcina cum valido exercitu, inde Ræticæ alæ cohortesque et ipsorum Rætorum juventus, sueta armis et more militiae exercita.
- 3 Undique populatio et cædes. Ipsi *in* medio vagi, abjectis armis, magna pars saucii aut palantes, in montem
- 4 Vocetium perfugere. Ac statim immissa cohorte Thracum depulsi, et, consequantibus Germanis Rætisque, per
- 5 silvas atque in ipsis latebris trucidati. Multa hominum millia cæsa, multa sub corona venumdata. Cumque dirutis omnibus Aventicum gentis caput justo agmine peteretur, missi qui dederent civitatem; et deditio
- 6 accepta. In Julium Alpinum e principibus, ut concitorem belli, Cæcina animadvertisit: cæteros veniae vel sæ-
- 69 vitiæ Vitellii reliquit. Haud facile dictu est, legati Helvetiorum minus placabilem imperatorem an militem
- 2 iuvenerint. Civitatis excidium poscunt, tela ac manus in ora legatorum intentant. Ne Vitellius quidem minis ac verbis temperabat, cum Claudius Cossus, unus ex legatis, notæ facundiæ, sed dicendi artem apta trepidatione occultans atque eo validior, militis animum mitigavit, ut est mos vulgo, mutabilem subitis et tam prouum in misericordiam quam immodicus sævitia fuerat.
- 3 Effusis lacrimis, et meliora constantius postulando, im-
- 70 punitatem salutemque civitati impetravere. Cæcina paucos in Helvetiis moratus dies, dum sententiæ Vitellii certior fieret, simul transitum Alpium parans, lætum ex Italia nuntium accipit, alam Silianam circa Padum 2 ageutem sacramento Vitellii accessisse. Proconsulem

A. D. 69.]

Vitellium Siliani in Africa habuerant; mox a Nerone, ut in Ægyptum præmitterentur, exciti, et ob bellum Vindicis revocati, ac tum in Italia manentes, instinctu decurionum, qui Othonis ignari, Vitellio obstricti robur adventantium legionum et famam Germanici exercitus attollebant, transiere in partes, et ut donum aliquod novo principi, firmissima Transpadanæ regionis municipia Mediolanum ac Novariam et Eporediam ac Vercellas adjunxere. Id Cæcinæ per ipsos compertum. Et quia 3 præsidio alæ unius latissima Italiæ pars defendi nequibat, præmissis Gallorum Lusitanorum Britannorumque cohortibus et Germanorum vexillis cum ala Petrina, ipse paululum cunctatus num Ræticis jugis in Noricum flecteret adversus Petronium †urbi (*Urbicum?*) procuratorem, qui concitis auxiliis et interruptis fluminum poutibus fidus Othoni putabatur. Sed metu ne amitteret præmissas jam cohortes alasque, simul reputans plus gloriæ retenta Italia, et ubique certatum foret, Noricos in cætera victoriae præmia cessuros, Pœnino itinere subsignatum militum et grave legionum agmen hibernis adhuc Alpibus traduxit.

Otho interim, contra spem omnium, non deliciis neque 71 desidia torpescere. Dilatae voluptates, dissimulata luxuria, et cuncta ad decorum imperii composita. Eoque 2 plus formidinis afferebant falsæ virtutes et vitia redditura. Marium Celsum consulem designatum, per speciem vin- 3 culorum sævitiae militum subtractum, acciri in Capitolum jubet. Clementiæ titulus e viro claro et partibus 4 inviso petebatur. Celsus constanter servatæ erga Galbam fidei crimen confessus, exemplum ultro imputavit. Nec Otho quasi ignosceret, sed ne hostes metueret 5 conciliationis adhibens, statim inter intimos amicos habuit, et mox bello inter duces delegit. Mansitque 6

Celso, velut fataliter, etiam pro Othone fides integra et  
7 infelix. Læta primoribus civitatis, celebrata in vulgus  
Celsi salus ne militibus quidem ingrata fuit, eaudem  
72 virtutem admirantibus cui irascebantur. Par inde ex-  
ultatio disparibus causis consecuta, impetrato Tigellini  
2 exitio. Sophonius Tigellinus, obseuris parentibus, föda  
pueritia, impudica seuecta, præfecturam vigilum et præ-  
torii et alia præmia virtutum quia velocius erat vitiis  
adeptus, crudelitatem inox, deinde avaritiam et virilia  
scelera exercuit, corrupto ad omne facinus Nerone,  
quædam ignaro ausus, ac postremo ejusdem desertor ac  
3 proditor. Unde nou alium pertinacius ad penam fla-  
gitavere, diverso affectu, quibus odium Neronis inerat  
4 et quibus desiderium. Apud Galbam Titi Vinii potentia  
defensus, prætexentis servatam ab eo filiam. Et haud  
dubie servaverat, non clementia, quippe tot interfictis,  
sed effugium in futurum, quia pessimus quisque, diffi-  
denta præsentium mutationem pavens, adversus publi-  
cum odium privatam gratiam præparat; unde nulla inno-  
5 centiæ cura, sed vices impunitatis. Eo iufensor populus,  
addita ad vetus Tigellini odium recenti Titi Vinii invidia,  
concurrere e tota urbe in Palatum ac fora, et ubi plurima  
vulgi licentia, in circum ac theatra effusi seditionis voca-  
bus obstrepere; donec Tigellinus, accepto apud Sinues-  
sanæ aquas supremæ necessitatis nuntio, inter stupra  
concubinarum et oscula et deformes moras, sectis nova-  
cula fauibus, infamem vitam födavit etiam exitu sero et  
73 in honesto. Per idem tempus expostulata ad supplicium  
Galvia Crispinilla variis frustrationibus et, adversa dissi-  
2 mulantis principis fama, periculo exempta est. Magistra  
libidinum Neronis, transgressa in Africam ad instigan-  
dum in arma Clodium Macrum, famem populo Romano  
haud obscure molita, totius postea civitatis gratiam

A. D. 69.]

obtinuit, consulari matrimonio subnixa et apud Galbam Othonem Vitellium illæsa, mox potens pecunia et orbi-  
tate, quæ bonis malisque temporibus juxta valent.

Crebræ interim, et muliebribus blandimentis infectæ, 74  
ab Othone ad Vitellium epistolæ offerebant pecuniam et  
gratiam et quemcunque quietis locum prodigæ vitæ  
legisset. Paria Vitellius ostentabat, primo mollius, 2  
stulta utrinque et indecora simulatione: mox, quasi  
rixantes, stupra et flagitia in vicem objectavere, neuter  
falso. Otho, revocatis quos Galba miserat legatis, rursus 3  
alios ad utrumque Germanicum exercitum et ad legionem  
Italicam easque quæ Lugduni agebant copias specie se-  
natus misit. Legati apud Vitellium remansere, promptius 4  
quam ut retenti viderentur. Prætoriani, quos per si-  
mulationem officii legatis Otho adjunxerat, remissi ante-  
quam legionibus miscerentur. Addidit epistolas Fabius 5  
Valens, nomine Germanici exercitus, ad prætorias et  
urbanas cohortes, de viribus partium magnificas et con-  
cordiam offerentes. Incepabat ultiro quod tanto ante 6  
traditum Vitellio imperium ad Othonem vertissent.  
Ita promissis simul ac minis tentabantur, ut bello impa- 75  
res, in pace nihil amissuri. Neque ideo prætorianorum  
fides mutata. Sed insidiatores ab Othone in Germa- 2  
niam, a Vitellio in urbem missi. Utrisque frustra fuit,  
Vitellianis impune, per tantam hominum multitudinem  
mutua ignorantia fallentibus: Othoniani novitate vul-  
tus, omnibus in vicem gnaris, prodebantur. Vitellius li- 3  
teras ad Titianum fratrem Othonis composuit, exitium  
ipsi filioque ejus minitans, ni incolumes sibi mater ac  
liberi servarentur. Et stetit domus utraque, sub Othone 4  
incertum an metu: Vitellius victor clementiæ gloriam  
tulit. Primus Othoni fiduciam addidit ex Illyrico nun- 76  
tius, jurasse in eum Dalmatiæ ac Pannoniæ et Mœsiæ

[A. U. C. 822.]

2 legiones. Idem ex Hispania allatum, laudatusque per edictum Cluvius Rufus : et statim cognitum est con-  
 3 versam ad Vitellium Hispaniam. Ne Aquitania quidem,  
 quanquam ab Julio Cordo in verba Othonis obstricta,  
 4 diu mansit. Nusquam fides aut amor : metu ac neces-  
 sitate huc illuc mutabantur. Eadem formido provin-  
 ciam Narbonensem ad Vitellium vertit, facili transitu ad  
 5 proximos et validiores. Longinquæ provinciæ, et quic-  
 quid armorum mari dirimitur, penes Othonem manebant,  
 non partium studio; sed erat grande momentum in  
 nomine urbis ac prætexto senatus, et occupaverat ani-  
 6 mos prior auditus. Judaicum exercitum Vespasianus,  
 Syriæ legiones Mucianus sacramento Othonis adegere.  
 7 Simul Ægyptus omnesque versæ in Orientem provinciæ  
 nomine ejus tenebantur. Idem Africæ obsequium,  
 8 initio Carthagine orto. Neque exspectata Vipstani  
 Apronianii proconsulis auctoritate, Crescens Neronis  
 libertus (nam et hi malis temporibus partem se rei  
 publicæ faciunt,) epulum plebi, ob lætitiam recentis  
 imperii, obtulerat, et populus pleraque sine modo festi-  
 9 navit. Carthaginem cæteræ civitates secutæ.

77 Sic distractis exercitibus ac provinciis, Vitellio quidem  
 - ad capessendam principatus fortunam bello opus erat ;  
 Otho uero in multa pace munia imperii obibat, quædam  
 ex dignitate rei publicæ, pleraque contra decus ex præ-  
 2 senti usu properando. Consul cum Titiano fratre in  
 Kalendas Martias ipse ; proximos menses Verginio  
 destinat ut aliquod exercitui Germanico delenimentum.  
 3 Jungitur Verginio Pompeius Vopiscus prætexto veteris  
 amicitiæ ; plerique Viennensium honori datum inter-  
 4 pretabantur. Cæteri consulatus ex destinatione Neronis  
 aut Galbae mansere, Cælio ac Flavio Sabinis in Julias,  
 Arrio Antonino et Mario Celso in Septembres ; quorum

A. D. 69.]

honori ne Vitellius quidem victor intercessit. Sed Otho 5 pontificatus auguratusque honoratis jam senibus cumulum dignitatis addidit; aut recens ab exsilio reversos nobiles adulescentulos avitis ac paternis sacerdotiis in solatium recoluit. Redditus Cadio Rufo, Pedio Blæso,<sup>6</sup> Sævino Pomptinio senatorius locus. Repetundarum criminibus sub Claudio ac Nerone ceciderant: placuit ignoscentibus verso nomine, quod avaritia fuerat, videri majestatem, cuius tum odio etiam bona leges peribant. Eadem largitione civitatum quoque ac provinciarum 78 animos aggressus, Hispaliensibus et Emeritensibus familiarum adjectiones, Lingonibus universis civitatem Romanam, provinciæ Bæticæ Maurorum civitates dono dedit; nova jura Cappadociæ, nova Africæ, ostenta magis quam mansura. Inter quæ, necessitate præsentium rerum et instantibus curis excusata, ne tum quidem immemor amorum, statuas Poppææ per senatus consultum reposuit. Creditus est etiam de celebranda 3 Neronis memoria agitavisse, spe vulgum alliciendi. Et fuere qui imagines Neronis proponerent; atque etiam Othoni quibusdam diebus populus et milles, tanquam nobilitatem ac decus adstruerent, “Neroni Otoni,” acclamavit. Ipse in suspenso tenuit, vetandi metu vel 4 agnoscendi pudore.

Conversis ad civile bellum animis externa sine cura 79 habebantur. Eo audentius Rhoxolani, Sarmatica gens, priore hieme cæsis duabus cohortibus, magna spe ad Mœsiam irruperant, novem millia equitum, ex ferocia et successu prædæ magis quam pugnæ intenta. Igitur 2 vagos et incuriosos tertia legio, adjunctis auxiliis, repente invasit. Apud Romanos omnia prælio apta: Sarmatæ 3 dispersi aut cupidine prædæ graves onere sarcinarum, et lubrico itinerum adempta equorum perniciitate, velut

4 vinci cædebantur. Namque mirum dictu ut sit omnis  
 Sarmatarum virtus velut extra ipsos : nihil ad pedes-  
 trem pugnam tam ignavum ; ubi per turmas advenere,  
 5 vix ulla acies obstiterit. Sed tum humido die et soluto  
 gelu neque conti neque gladii, quos prælongos utraque  
 manu regunt, usui, lapsantibus equis et cataphractarum  
 6 pondere. Id principibus et nobilissimo cuique tegimen,  
 ferreis laminis aut præduro corio consertum, ut adversus  
 ictus impenetrabile, ita impetu hostium provolutis inha-  
 bile ad resurgendum : simul altitudine et mollitia nivis  
 7 hauriebantur. Romanus miles facilis lorica et missili  
 pilo aut lanceis assultans, ubi res posceret, levi gladio  
 inermem Sarmatam (neque enim scuto defendi mos est,) cominus fodiebat, donec pauci, qui prælio superfuerant, paludibus abderentur : ibi sævitia hiemis *et vi* vulnerum absumpti. Postquam id Romæ compertum, M. Aponius Mœsiam obtinens triumphali statua, Fulvius Aurelius et Julianus Titius ac Numisius Lupus legati legionum consularibus ornamenti donantur, læto Othonem et gloriam in se trahente, tanquam et ipse felix bello, et suis ducibus suisque exercitibus rem publicam auxisset.  
 80 Parvo interim initio, unde nihil timebatur, orta seditio prope urbi excidio fuit. Septimam decimam cohortem e colonia Ostiensi in urbem acciri Otho jusserset ; armatae ejus cura Vario Crispino, tribuno e prætorianis, 2 data. Is quo magis vacans quietis castris jussa exsequeretur, vehicula cohortis incipiente nocte onerari, 3 aperto armamentario, jubet. Tempus in suspicionem, causa in crimen, affectatio quietis in tumultum evaluit ; et visa inter temulentos arma cupidinem sui movere. Fremit milcs, et tribunos centurionesque prodigionis arguit, tanquam familie senatorum ad perniciem Othonis armarentur, pars ignari et vino graves, pessimus quis-

A. D. 69.]

que in occasionem prædarum, vulgus, ut mos est, cuius-  
cunque motus novi cupidum : et obsequia meliorum  
nox abstulerat. Resistentem seditioni tribunum et seve- 5  
ris simos centurionum obtruncant : rapta arma, nudati  
gladii : insidentes equis urbem ac Palatum petunt.  
Erat Othoni celebre convivium primoribus feminis vi- 81  
risque ; qui trepidi, fortuitusne militum furor an dolus  
imperatoris, manere ac deprehendi an fugere et dispergi  
periculosius foret, modo constantiam simulare, modo  
formidine detegi, simul Othonis vultum intueri. Utque 2  
evenit, inclinatis ad suspicionem mentibus, cum timeret  
Otho, timebatur. Sed haud secus discrimine senatus 3  
quam suo territus, et praefectos prætorii ad mitigandas  
militum iras statim miserat, et abire propere omnes e  
convivio jussit. Tum vero passim magistratus, projectis 4  
insignibus, vitata comitum et servorum frequentia, senes  
feminæque per tenebras diversa urbis itinera, rari domos,  
plurimi amicorum tecta et ut cuique humillimus cliens,  
incertas latebras petivere. Militum impetus ne fo- 82  
ribus quidem Palatii coercitus, quo minus convivium  
irrumperent, ostendi sibi Othonem expostulantes, vul-  
nerato Julio Martiale tribuno et Vitellio Saturnino,  
præfecto legionis, dum ruentibus obsistunt. Undique 2  
arma et minæ, modo in centuriones tribunosque,  
modo in senatum universum, lymphatis cæco pavore  
animis, et quia neminem unum destinare iræ poterant,  
licentiam in omnes poscentibus, donec Otho, contra  
decus imperii, toro insistens, precibus et lacrimis ægre  
cohibuit, redieruntque in castra inviti neque innocentes.  
Postera die velut capta urbe clausæ domus, rarus per 3  
vias populus, mæsta plebs ; dejecti in terram militum  
vultus, ac plus tristitiae quam pænitentiæ. Manipulatim 4  
allocuti sunt Licius Proculus et Plotius Firmus præ-

fecti, ex suo quisque ingenio mitius aut horridius. Finis sermonis in eo ut quina millia nummum singulis militibus 5 numerarentur. Tum Otho ingredi castra ausus: atque illum tribuni centurionesque circumsistunt, abjectis militiæ insignibus otium et salutem flagitantes. Sensit invidiam miles, et compositus in obsequium auctores 83 seditionis ad supplicium ultro postulabat. Otho, quamquam turbidis rebus et diversis militum animis, cum optimus quisque remedium præsentis licentiae posceret, vulgus, et plures seditionibus et ambitioso imperio læti, per turbas et raptis facilius ad civile bellum impellcrentur; simul reputans non posse principatum scelere quæsitum subita modestia et prisca gravitate retineri, sed discrimine urbis et periculo senatus anxius, pos- 2 tremo ita disseruit:—“ Neque ut affectus vestros in amo- rem mei accenderem, commilitones, neque ut animum ad virtutem cohortarer, (utraque enim egregie supersunt,) sed veni postulaturus a vobis temperamentum vestræ 3 fortitudinis et erga me modum caritatis. Tumultus proximi initium non cupiditate vel odio, quæ multos exercitus in discordiam egere, ac ne detrectatione quidem aut formidine periculorum: nimia pietas vestra acrius 4 quam considerate excitavit. Nam sœpe honestas rerum causas, ni judicium adhibeas, perniciosi exitus conse- 5 quuntur. Imus ad bellum. Num omnes nuntios palam audiri, omnia consilia cunctis præsentibus tractari ratio rerum aut occasionum velocitas patitur? tam nescire 6 quædam milites quam scire oportet. Ita se ducum auctoritas, sic rigor disciplinæ habet, ut multa etiam 7 centuriones tribunosque tantum juberi expediat. Si, ubi jubeantur, quærere singulis liceat, pereunte obsequio 8 etiam imperium intercidit. An et illic nocte intempesta rapientur arma? unus alterve perditus ac temulentus

A. D. 69.]

(neque enim plures consternatione proxima insanisse crediderim,) centurionis ac tribuni sanguine manus imbuet, imperatoris sui tentorium irrumpet? Vos quidem 84 istud pro me: sed in discursu ac tenebris et rerum omnium confusione patefieri occasio etiam adversus me potest. Si Vitellio et satellitibus ejus eligendi facultas 2 detur quem nobis animum, quas mentes imprecentur, quid aliud quam seditionem et discordiam optabunt? ne miles centurioni, ne centurio tribuno obsequatur, hinc confusi pedites equitesque in exitium ruamus. Parendo 3 potius, commilitones, quam imperia ducum sciscitando res militares continentur; et fortissimus in ipso discrimine exercitus est, qui ante discriminem quietissimus. Vobis arma et animus sit: mihi consilium et virtutis 4 vestræ regimen relinquite. Paucorum culpa fuit, duorum poena erit. Cæteri abolete memoriam fœdissimæ noctis: 5 nec illas aduersus senatum voces ullus usquam exercitus audiat. Caput imperii et decora omnium provinciarum 6 ad poenam vocare non hercule illi, quos cum maxime Vitellius in nos ciet, Germani audeant. Ullius Italæ 7 alumni, et Romana vere juventus, ad sanguinem et cædem depoposcerint ordinem, cuius splendore et gloria sordes et obscuritatem Vitellianarum partium præstrin- gimus? Nationes aliquas occupavit Vitellius, imaginem 8 quandam exercitus habet: senatus nobiscum est. Sic fit ut hinc res publica, inde hostes rei publicæ con- 9 stiterint. Quid? vos pulcherrimam hanc urbem domibus et tectis et congestu lapidum stare creditis? Muta ista et inanima intercidere ac reparari promiscua sunt: æternitas rerum et pax gentium et mea cum vestra salus incolumitate senatus firmatur. Hunc aus- 10 picato a parente et conditore urbis nostræ institutum, et a regibus usque ad principes continuum et im-

[A. U. C. 822.]

mortalem, sicut a majoribus accepimus, sic posteris tradamus. Nam ut ex vobis senatores, ita ex senatoribus principes nascuntur.” Et oratio ad perstriugendos mulcendosque militum animos, et severitatis modus (neque enim in plures quam in duos animadverti jusserrat,) grate accepta, compositique ad præsens qui coërceri non poterant. Non tamen quies urbis redierat : strepitus telorum et facies belli, et militibus ut nihil in commune turbantibus, ita sparsis per domos occulto habitu, et maligna cura in omnes, quos nobilitas aut opes aut aliqua insignis claritudo rumoribus objecerat.

Vitellianos quoque milites venisse in urbem ad studia partium noscenda plerique credebant. Unde plena omnia suspicionum, et vix secreta domuum sine formidine. Sed plurimum trepidationis in publico, ut quemque nuntium fama attulisset, animum vultumque conversis, ne diffidere dubiis ac parum gaudere prosperis viderentur. Coacto vero in curiam senatu arduus rerum omnium modus, ne contumax silentium, ne suspecta libertas. Et privato Othoni nuper atque eadem dicenti nota adulatio. Igitur versare sententias et huc atque illuc torquere, hostem et parricidam Vitellium vocantes, providentissimus quisque vulgaribus conviciis ; quidam vera probra jacere, in clamore tamen, et ubi plurimæ voces, aut tumultu verborum sibi ipsi obstrepentes.

Prodigia insuper terrebant diversis auctoribus vulgata : in vestibulo Capitolii omissas habenas bigæ cui Victoria institerat ; erupisse cella Junonis majorem humana speciem ; statuam divi Julii in insula Tiberini amnis sereno et immoto die ab Occidente in Orientem conversam ; prolocutum in Etruria bovem, insolitos animalium partus, et plura alia, rudibus sæculis etiam in pace observata, quæ nunc tantum in metu audiuntur. Sed

A. D. 69.]

præcipuuſ et cum præſenti exitio etiam futuri pavor, subita inundatione Tiberis : qui immenso auctu, proruto ponte ſublicio, ac ſtrage obſtantis molis refuſus, non modo jacentia et plana urbis loca, ſed ſecura ejusmodi caſuum implevit. Rapti e publico plerique, plures in 3 tabernis et cubilibus intercepti. Fames in vulgus, inopia quæſtus et penuria alimentorum. Corrupta stagnantibus aquis insularum fundamenta, deinceps remeante flumine, dilapsa. Utque primum vacuus a 4 periculo animus fuit, id iſum, quod paranti expeditio- nem Othoni, campus Martius et via Flaminia, iter belli, eſſet obſtructum a fortuitis vel naturalibus cauſis, in prodigium et omen imminuentium cladium vertebatur.

Otho, iuſtrata urbe, et expenſis belli consiliis, quando 87 Peninæ Cottiaeque Alpes et cæteri Galliarum aditus Vitellianis exercitibus claudebantur, Narbonensem Galliam aggredi statuit ; claſſe valida et partibus fida, quod reliquos cæſorum ad pontem Milvium, et ſævitia Galbae in custodiam habitos, in numeros legionis composuerat, facta et cæteris ſpe honoratoris in posterum militiæ. Addidit claſſi urbanas cohortes et plerosque e Præ- 2 torianis, vires et robur exercitus, atque iſis Ducibus conſilium et custodes. Summa expeditionis Antonio Novello, Suedio Clementi, primipilaribus, Æmilio Pa- censi, cui ademptum a Galba Tribunatum reddiderat, permiſſa. Curam navium Oscus libertus retinebat, ad observandam honestiorum fidem comitatus. Pedi- 3 tum equitumque copiis Suetonius Paulinus, Marius Celsus, Annius Gallus, rectores destinati. Sed plurima fides Licinio Proculo, Prætorii Præfecto. Is urbanæ 4 militiæ impiger, bellorum insolens, auctoritatem Paulini, vigorem Celsi, maturitatem Galli, ut cuique erat, crimi-

nando, quod facillimum factu est, pravus et callidus, bonos et modestos anteibat.

88 Sepositus per eos dies Cornelius Dolabella in coloniam Aquinatem, neque arcta custodia, neque obscura: nullum ob crimen, sed vetusto nomine et propinquitate Galbae monstratus. Multos e Magistratibus, magnam consularium partem, Otho, non participes aut ministros bello, sed comitum specie, secum expedire jubet: in quis et L. Vitellium, eodem quo cæteros cultu, nec ut Imperatoris fratrem, nec ut hostis. Igitur mota urbis cura: nullus ordo metu aut periculo vacuus. Primores Senatus ætate invalidi et longa pace desides: segnis et oblita bellorum nobilitas; ignarus militiae Eques: quanto magis occultare et abdere pavorem nitebantur, manifestius pavidi. Nec deerant e contrario, qui ambitione stolida, conspicua arma, insignes equos, quidam luxuriosos apparatus conviviorum et irritamenta libidinum, ut instrumenta belli, mercantur. Sapientibus quietis et rei publicæ cura: levissimus quisque et futuri improvidus, spe vana tumens: multi afflita fide in pace, ac turbatis rebus alacres, et per incerta tutissimi.

89 Sed vulgus, et magnitudine nimia communium curarum expers populus, sentire paulatim belli mala, conversa in militum usum omni pecunia, intentis alienorum pretiis: quæ motu Vindicis haud perinde plebem attriverant, secura tum urbe et provinciali bello, quod inter legiones Galliasque velut externum fuit.  
 2 Nam ex quo divus Augustus res Cæsarum composuit, procul, et in unius solicitudinem aut decus, populus Romanus bellaverat. Sub Tiberio et Caio tantum pacis adversa rei publicæ pertimuere. Scriboniani contra

A. D. 69.]

Claudium incepta simul audita et coërcita. Nero nuntiis magis et rumoribus quam armis depulsus. Tum legiones classesque et, quod raro alias, prætorianus urbanusque miles in aciem deducti: Oriens Occidensque et quicquid utrinque virium est, a tergo; si ducibus aliis bellatum foret, longo bello materia. Fuere qui proficiscenti Othoni moras religionemque nondum conditorum ancilium afferrent. Aspernatus est omnem cunctationem ut Neroni quoque exitiosam: et Cæcina jam Alpes transgressus extimulabat. Pridie Idus Martias commendata patribus re publica reliquias Neronianarum sectionum, nondum in fiscum conversas, revocatis ab exilio concessit, justissimum donum et in speciem magnificentum, sed, festinata jam pridem exactione, usu sterile. Mox vocata concione, majestatem urbis et consensum populi ac senatus pro se attollens, adversum Vitelliauas partes modeste disseruit, inscitiam potius legionum quam audaciam increpans, nulla Vitelli mentione, sive ipsius ea moderatio, seu scriptor orationis sibi metuens contumeliis in Vitellium abstinuit, quando, ut in consiliis militiæ Suetonio Paulino et Mario Celso, ita in rebus urbanis Galerii Trachali ingenio Othonem uti credebatur. Et erant qui genus ipsum orandi noscerent, crebro fori usu celebre et ad implendas populi aures latum et sonans. Clamor vocesque vulgi, ex more adulandi, nimiæ et falsæ. Quasi dictatorem Cæsarem aut imperatorem Augustum prosequerentur, ita studiis votisque certabant; nec metu aut amore, sed ex libidine servitii, ut in familiis, privata cuique stimulatio et vile jam decus publicum. Profectus Otho quietem urbis curasque imperii Salvio Titiano fratri permisit.

C. CORNELII TACITI

AB EXCESSU DIVI AUGUSTI

H I S T O R I A R U M  
LIBER SECUNDUS.

---

1 STRUEBAT jam fortuna in diversa parte terrarum initia causasque imperio, quod varia sorte laetum rei publicae aut atrox, ipsis principibus prosperum aut 2 exitio fuit. Titus Vespasianus e Judaea, incolumi adhuc Galba, missus a patre causam profectionis officium erga prineipem et maturam petendis honoribus juventam 3 ferebat. Sed vulgus singendi avidum disperserat acci-  
tum in adoptionem. Materia sermonibus senium et orbitas principis et intemperantia civitatis, donec unus 4 eligatur, multos destinandi. Augebat famam ipsius Titi ingenium quantaecunque fortunae capax, decor oris cum quadam majestate, prosperae Vespasiani res, praesaga responsa, et, inclinatis ad credendum animis, loco omi-  
5 num etiam fortuita. Ubi Corinthi Achiae urbe certos nuntios accepit de interitu Galbae, et aderant qui arma Vitellii bellumque affirmarent, anxius animo, paucis 6 amicorum adhibitis, cuneta utrinque perlustrat. Si pergeret in urbem, nullam officii gratiam in alterius honorem suscepsi; ac se Vitellio sive Othoni obsidem  
· 7 fore. Sin rediret, offensam haud dubiam victoris, sed, incerta adhuc Victoria et concedente in partes patre,

A. D. 69.]

filium excusatum. Siu Vespasianus rem publicam susciperet, obliviscendum offensarum de bello agitantibus. His ac talibus inter spem metumque jactatum spes vicit. Fuere qui accensum desiderio Berenices reginæ vertisse iter crederent. Neque abhorrebat a Berenice juvenilis animus: sed gerendis rebus nullum ex eo impedimentum. Lætam voluptatibus adolescentiam egit, suo quam patris imperio modestior. Igitur oram Achaiæ et Asiæ ac lœva maris prævectus, Rhodum et Cyprum insulas, inde Syriam audentioribus spatiis petebat. Atque illum cupidō incessit adeundi visendi que templum Paphiæ Veneris, inclitum per indigenas advenasque. Haud fuerit longum initia religionis, templi ritum, formam deæ (neque enim alibi sic habetur,) paucis disserere. Conditorem templi regem Aërian vetus memoria, quidam ipsius deæ nomen id perhibent. Fama recentior tradit a Cinyra sacratum templum, deamque ipsam conceptam mari huc appulsam. Sed scientiam artemque haruspicum accitam, et Cilicem Tamiram intulisse; atque ita pactum ut familiæ utriusque posteri cærimoniis præsiderent. Mox, ne honore nullo regium genus peregrinam stirpem antecelleret, ipsa quam intulerant scientia hospites cessere: tantum Cinyrades sacerdos consulitur. Hostiæ, ut quisque vovit, sed mares diliguntur: certissima fides haedorum fibris. Sanguinem aræ offundere vetitum: precibus et igne puro altaria adoleantur, nec ullis imbribus, quamquam in aperto, madescunt. Simulaerum deæ non effigie humana, continuus orbis latiore initio tenuem in ambitum metæ modo exsurgens; et ratio in obscuro. Titus, spectata opulentia donisque regum, quæque alia lætum antiquitatibus Græcorum genus incertæ vetustati affingit, de navigatione primum consuluit. Postquam

pandi viam et mare prosperum accepit, de se per  
 3 ambages interrogat cæsis compluribus hostiis. Sos-  
 tratus (sacerdotis id nomen erat,) ubi laeta et con-  
 gruentia exta magnisque consultis annuere deam videt,  
 pauca in præsens et solita respondens, petito secreto  
 4 futura aperit. Titus aucto animo ad patrem pervectus  
 suspensis provinciarum et exercituum mentibus ingens  
 rerum fiducia accessit.

5 Profligaverat bellum Judaicum Vespasianus, oppug-  
 natione Hierosolymorum reliqua, duro magis et arduo  
 opere ob ingenium montis et pervicaciam superstitionis,  
 quam quo satis virium obsessis ad tolerandas neces-  
 6 sitates superesset. Tres, ut supra memoravimus, ipsi  
 Vespasiano legiones erant, exercitæ bello : quatuor  
 Mucianus obtinebat in pace ; sed æmulatio et proximi  
 exercitus gloria depulerat segnitiam, quantumque illis  
 roboris discrimina et labor, tantum his vigoris addiderat  
 7 integra quies et inexperti belli + labor (*amor?*). Auxi-  
 lia utriusque cohortium alarumque, et classes regesque,  
 5 ac nomen dispari fama celebre. Vespasianus acer mil-  
 itiæ, anteire agmen, locum castris capere, noctu diuque  
 consilio ac, si res posceret, manu hostibus obniti, cibo  
 fortuito, veste habituque vix a gregario milite discre-  
 pans ; prorsus, si avaritia abesset, antiquis ducibus par.  
 2 Mucianum e contrario magnificentia et opes et cuncta  
 privatum modum supergressa extollebant ; aptior ser-  
 mone, dispositu provisuque civilium rerum peritus :  
 egregium principatus temperamentum, si, demptis utri-  
 3 usque vitiis, sole virtutes miscerentur. Cæterum hic  
 Syriae, ille Judææ præpositor, vicinis provinciarum  
 administrationibus, invidia discordes, exitu demum  
 Neronis positis odiis in medium consuluere, primum  
 per amicos : dein præcipua concordiæ fides Titus prava

A. D. 69.]

certamina communi utilitate aboleverat, natura atque arte compositus alliciendis etiam Muciani moribus. Tribuni centurionesque et vulgus militum industria,<sup>4</sup> licentia, per virtutes, per voluptates, ut cuique ingenium, adsciscebantur. Antequam Titus adventaret,<sup>6</sup> sacramentum Othonis acceperat uteisque exercitus, præcipitibus, ut assolet, nuntiis, et tarda mole civilis belli, quod longa concordia quietus Oriens tunc primum parabat. Namque olim validissima inter se civium<sup>2</sup> 3 arma in Italia Galliave viribus Occidentis cœpta; et Pompeio, Cassio, Bruto, Antonio, quos omnes trans mare secutum est civile bellum, haud prosperi exitus fuerant; auditique saepius in Syria Judeaque Cæsares quam inspecti. Nulla seditio legionum; tantum ad-<sup>3</sup> versus Parthos minæ, vario eventu. Et proximo civili bello turbatis aliis inconcussa ibi pax; dein fides erga Galbam. Mox, ut Othonem ac Vitellium scelestis<sup>4</sup> armis res Romanas raptum ire vulgatum est, ne penes cæteros imperii præmia, penes ipsos tantum servitii necessitas esset, fremere miles et vires suas circumspicere. Septem legiones statim et cum ingentibus auxi-<sup>5</sup> liis Syria Judeaque; inde continua Ægyptus duæque legiones, hinc Cappadocia Pontusque et quicquid castrorum Armeniis prætenditur. Asia et cæteræ pro-<sup>6</sup> vinciae nec virorum inopes et pecuniæ opulentæ. Quantum insularum mari cingitur, et parando interim bello<sup>7</sup> secundum tutumque ipsum mare. Non fallebat duces impetus militum: sed bellantibus aliis placuit exspectari belli exitum. Victores victosque nunquam solida fide coalescere. Nec referre, Vitellium an Othonem<sup>2</sup> superstitem fortuna faceret. Rebus secundis etiam egregios duces insolescere: discordiam his, ignaviam, luxuriem; et suismet vitiis alterum bello, alterum

3 victoria peritum. Igitur arma in occasionem distulere, Vespasianus Mucianusque nuper, cæteri olim mixtis consiliis; optimus quisque amore rei publicæ: multos dulcedo prædarum stimulabat, alios ambiguæ  
4 domi res. Ita boni malique causis diversis, studio pari, bellum omnes cupiebant.

8 Sub idem tempus Achaia atque Asia falso exterritæ velut Nero adventaret, vario super exitu ejus rumore, eoque pluribus vivere eum fingentibus credentesque. Cæterorum casus conatusque in contextu operis dicemus: tunc servus e Ponto sive, ut alii tradidere, libertinus ex Italia, citharæ et cantus peritus, (unde illi super similitudinem oris propior ad fallendum fides,) adjunctis desertoribus quos inopia vagos ingentibus promissis corruperat, mare ingreditur; ac, vi tempestatum Cythnum insulam detrusus, et militum quosdam ex Oriente commeantium adscivit, vel abnuentes interfici jussit, et, spoliatis negotiatoribus, mancipationemque  
3 Sisenam, dextras, concordiae insignia, Syriaci exercitus nomine ad prætorianos ferentem, variis artibus aggressus est, donec Sisenna, elam reicta insula, trepidus et vim  
4 metuens aufugeret. Inde late terror, multis ad celebritatem nominis erectis rerum novarum cupidine et odio  
9 præsentium. Gliscentem in dies famam fors discussit. Galatiam ac Panpliyiam provincias Calpurnio Asprennati regendas Galba permiserat. Datae e classe Misennensi duæ triremes ad prosequendum, cum quibus  
2 Cythnum insulam tenuit. Nec defuere qui trierarchos nomine Neronis accirent. Is, in mæstitiam compositus et fidem suorum quondam militum invocans, ut eum in  
3 Syria aut Ægypto sisterent orabat. Trierarchi nutantes, seu dolo, alloquendos sibi milites et paratis omnium

A. D. 69.]

animis reversuros firmaverunt. Sed Asprenati cuncta 4 ex fide nuntiata ; cujus cohortatione expugnata navis et interfectus quisquis ille erat. Corpus, insigne oculis 5 comaque et torvitate vultus, in Asiam atque inde Romam pervectum est.

In civitate discordi, et ob crebras principum mutatio- 10 nes inter libertatem ac licentiam incerta, parvæ quoque res magnis motibus agebantur. Vibius Crispus, pecunia, 2 potentia, ingenio, inter claros magis quam inter bonos, Annium Faustum, equestris ordinis, qui temporibus Nerouis delationes factitaverat, ad cognitionem senatus vocabat. Nam recens, Galbae principatu, censuerant patres ut 3 accusatorum causæ noscerentur. Id senatus consultum varie jactatum et, prout potens vel inops reus inciderat, infirmum aut validum retinebatur. Ad hoc terroris et 4 propria vi Crispus incubuerat delatorem fratri sui pervertere ; traxeratque magnam senatus partem, ut indefensum et inaubitum dedi ad exitium postularent. Contra apud alios nihil æque reo proderat quam nimia 5 potentia accusatoris : dari tempus, edi crimina, quamvis invisum ac nocentem more tamen audiendum, censebant. Et valuere primo, dilataque in paucos dies cognitio. Mox damnatus est Faustus, nequaquam eo assensu 6 civitatis quem pessimis moribus meruerat. Quippe ipsum Crispum easdem accusationes cum præmio exercuisse meminerant, nec poena criminis sed ultor displiebat.

Læta interim Othoni principia belli, motis ad impe- 11 rium ejus e Dalmatia Pannoniaque exercitibus. Fuere 2 quatuor legiones, e quibus bina millia præmissa ; ipsæ modicis intervallis sequebantur, septima a Galba conscripta, veteranæ undecima ac tertia decima et præcipui fama quartadecimani, rebellione Britanniæ

3 compressa. Addiderat gloriam Nero eligendo ut potissimum  
 simos; unde longa illis erga Neronem fides et erecta in  
 Othonem studia. Sed quo plus virium ac roboris, e  
 4 fiducia tarditas inerat. Agmen legionum alæ cohortes-  
 que præveniebant. Et ex ipsa urbe haud spernenda  
 manus, quinque prætoriæ cohortes et equitum vexilla  
 cum legione prima, ac deforme insuper auxilium, duo  
 millia gladiatorum, sed per civilia arma etiam severis  
 5 ducibus usurpatum. His copiis rector additus Annius  
 Gallus, cum Vestricio Spurinna ad occupandas Padi  
 ripas præmissus, quoniam prima consiliorum frustra  
 ceciderant, transgresso jam Alpes Cæcina, quem sisti  
 6 intra Gallias posse speraverat. Ipsum Othonem comita-  
 bantur speculatorum lecta corpora, cum cæteris præ-  
 toriis cohortibus, veterani e prætorio, classicorum  
 ingens numerus. Nec illi segne aut corruptum luxu  
 iter, sed lorica ferrea usus est, et ante signa pedester,  
 12 horridus, incomptus, famæque dissimilis. Blandie-  
 batur cœptis fortuna, possessa per mare et naves  
 majore Italæ parte penitus usque ad initium ma-  
 2 ritimarum Alpium. Quibus tentandis aggrediendæ-  
 que provinciæ Narbonensi Suedium Clementem, Anto-  
 nium Novellum, Æmilium Pacensem duces dederat.  
 3 Sed Pacensis per licentiam militum vinctus; Antonio No-  
 vello nulla auctoritas: Suedius Clemens ambitioso impe-  
 rio regebat, ut adversus modestiam disciplinæ corruptus,  
 4 ita præliorum avidus. Non Italia adiri nec loca sedes-  
 que patriæ videbantur: tanquam externa litora et urbes  
 hostium urere, vastare, rapere, eo atrocius quod nihil  
 usquam pro visum adversum metus. Pleni agri, apertæ  
 5 domus. Occursantes domini juxta conjuges et liberos  
 securitate pacis et belli malo circumveniebantur. Ma-  
 ritimas tum Alpes tenebat procurator Marius Maturus.

A. D. 69.]

Is concita gente (nec deest *juventus*,) arcere provinciæ finibus Othonianos intendit. Sed primo impetu cæsi 6 disjectique montani, ut quibus temere collectis, non castra, non ducem noscitantibus, neque in victoria decus esset neque in fuga flagitium. Irritatus eo 13 prælio Othonis miles vertit iras in municipium Albintimilium. Quippe in acie nihil prædæ, inopes agrestes et vilia arma; nec capi poterant, pernix genus et gnari locorum. Sed calamitatibus insolentum expleta avaritia. 2 Auxit invidiam præclaro exemplo fœmina Ligus, quæ, filio abdito, cum simul pecuniam occultari milites credidissent, eoque per cruciatus interrogarent ubi filium occuleret, uterum ostendens, “latere” respondit; nec ullis deinde terroribus aut morte constantiam vocis egregiæ mutavit. Imminere provinciæ Narbonensi, in 14 verba Vitellii adactæ, classem Othonis trepidi nuntii Fabio Valenti attulere. Aderant legati coloniarum 2 auxilium orantes. Duas Tungrorum cohortes, quatuor equitum turmas, universam Trevirorum alam cum Julio Classico præfecto misit; e quibus pars in colonia Foro Juliensi retenta, ne, omnibus copiis in terrestre iter versis, vacuo mari classis acceleraret. Duodecim equi- 3 tum turmæ et lecti e cohortibus adversus hostem iere; quibus adjuncta Ligurum cohors, vetus loci auxilium, et quingenti Pannonii, nondum sub signis. Nec mora 4 prælio, sed acie ita instructa ut pars classicorum, mixtis paganis, in colles mari propinquos exsureret, quantum inter colles ac litus æqui loci, prætorianus miles exploret, in ipso mari ut annexa classis et pugnæ parata, conversa et minaci fronte prætenderetur: Vitelliani, quibus minor peditum vis, in equite robur, Alpinos proximis jugis, cohortes densis ordinibus post equitem locant. Trevirorum turmæ obtulere se hosti incaute, cum 5

exciperet contra veteranus miles, simul a latere saxis  
urgeret apta ad jaciendum etiam paganorum manus, qui  
sparsi inter milites, strenui ignavique, in victoria idem  
6 audebant. Additus perculsis terror invecta in terga  
pugnantium classe. Ita undique clausi; deletaeque  
omnes copiae forent, ni victorem exercitum attinuisset  
15 obscurum noctis, obtentui fugientibus. Nec Vitelliani,  
quanquam victi, quievere. Accitis auxiliis securum  
hostem ac successu rerum socordius agentem invadunt.  
2 Cæsi vigiles, perrupta castra, trepidatum apud naves,  
donec, sidente paulatim metu, occupato juxta colle de-  
3 fensi, mox irrupere. Atrox ibi cædes, et Tungrarum  
cohortium præfecti, sustentata diu acie, telis obruuntur.  
Ne Othonianis quidem incruenta victoria fuit, quorum  
improvide secutos conversi equites circumvenerunt.  
4 Ac velut pactis induciis, ne hinc classis inde eques  
subitam formidinem inferrent, Vitelliani retro Antipo-  
lim Narbouensis Galliæ municipium, Othoniani Albin-  
gaunum interioris Liguriæ revertere.  
16 Corsicam ac Sardiniam cæterasque proximi maris  
insulas fama victricis classis in partibus Othonis tenuit.  
Sed Corsicam prope affixit Decumi Pacarii procuratoris  
temeritas, tanta mole belli nihil in summa profutura,  
2 ipsi exitiosa. Namque Othonis odio juvare Vitellium  
Corsorum viribus statuit, inani auxilio, etiam si pro-  
venisset. Vocatis principibus insulæ consilium aperit,  
et contra dicere ausos, Claudium Pyrrhicum trierarchum  
Liburnicarum ibi navium, Quintium Certum equitem  
3 Romanum, interfici jubet. Quorum morte exterriti  
qui aderant, simul ignara et alieni metus socia imperito-  
4 rum turba, in verba Vitellii juravere. Sed ubi delectum  
agere Pacarius et inconditos homines fatigare militiæ  
muneribus ocepit, laborem insolitum perosi infirmitatem

A. D. 69.]

suam reputabant: insulam esse quam incolerent, et longe Germaniam viresque legionum; direptos vastatosque classe etiam quos cohortes alæque protegerent. Et 5 aversi repente animi; nec tamen aperta vi, aptum tempus insidiis legere. Digressis qui Pacarium frequabant, nudus et auxilii inops balineis interficitur; trucidati et comites. Capita, ut hostium, ipsi interfectores 6 ad Othonem tulere; neque eos aut Otho præmio affecit aut puniit Vitellius, in multa colluvie rerum majoribus flagitiis permixtos.

Aperuerat jam Italiam bellumque transmiserat, ut 17 supra memoravimus, ala Siliana, nullo apud quemquam Othonis favore, nec quia Vitellium mallent: sed longa pax ad omne servitium fregerat, faciles occupantibus et melioribus incuriosos. Florentissimum Italiae 2 latus, quantum inter Padum Alpesque camporum et urbium, armis Vitelli (namque et præmissæ a Cæcina cohortes advenerant,) tenebatur. Capta Pannoniorum cohors apud Cremonam; intercepti centum equites ac mille classici inter Placentiam Ticinumque. Quo suc- 3 cessu Vitellianus miles non jam flumine aut ripis arcebatur. Irritabat quin etiam Batavos Transrhenanosque Padus ipse; quem repente contra Placentiam transgressi, raptis quibusdam exploratoribus ita cæteros terruere ut adesse omnem Cæcinæ exercitum trepidi ac falsi nuntiarent. Certum erat Spurinnæ (is enim Pla- 18 centiam obtinebat,) needum venisse Cæcinam, et, si propinquaret, coercere intra munimenta militem, nec tres prætorias cohortes et mille vexillarios cum paucis equitibus veterano exercitui objicere. Sed indomitus 2 miles et belli ignarus correptis signis vexillisque ruere, et retinenti duci tela intentare, spretis centurionibus tribunisque: quin prodi Othonem et accitum Cæcinam

3 clamitabant. Fit temeritatis alienæ comes Spurinna, primo coactus, mox velle simulans, quo plus auctoritatis 19 inesset consiliis, si seditio mitesceret. Postquam in conspectu Padus et nox appetebat, vallari castra plau- cuit. Is labor urbano militi insolitus contundit animos.

2 Tum vetustissimus quisque castigare credulitatem suam, metum ac discrimen ostendere, si cum exercitu Cæcina, patentibus campis, tam paucas cohortes circumfudisset.

3 Jamque totis castris modesti sermones, et inserentibus se centuriouibus tribunisque laudari providentia ducis, quod coloniam virium et opum validam robur ac sedem

4 bello legisset. Ipse postremo Spurinna, non tam cul- pam exprobrans quam ratione ostendens, relictis explo- ratoribus cæteros Placentiam reduxit minus turbidos et

5 imperia accipientes. Solidati muri, propugnacula addita, auctæ turres, provisa parataque non arma modo sed obsequium et parendi amor; quod solum illis partibus defuit, cum virtutis haud pæniteret.

20 At Cæcina, velut reicta post Alpes sævitia ac licentia, modesto agmine per Italiam incessit. Ornatum ipsius municipia et coloniae in superbiam trahebant, quod versicolori sagulo, bracas barbarum tegmen indutus,

2 togatos alloqueretur. Uxorem autem ejus Salonianam, quanquam in nullius injuriam insigni equo ostroque veheretur, tanquam læsi gravabantur, insita mortalibus natura recentem aliorum felicitatem acribus oculis introspicere, modumque fortunæ a nullis magis exigere

3 quam quos in æquo viderunt. Cæcina Padum trans- gressus, tentata Othonianorum fide per colloquium et promissa, iisdem petitus, postquam pax et concordia speciosis et irritis nominibus jactata sunt, consilia curasque in oppugnationem Placentiæ magno terrorc vertit, gnarus, ut initia belli provenissent, famam in

A. D. 69.]

cætera fore. Sed primus dies impetu magis quam vete- 21  
 rani exercitus artibus transactus : aperti incautique  
 muros subiere, cibo vinoque prægraves. In eo certa- 2  
 mine pulcherrimum amphitheatri opus, situm extra  
 muros, conflagravit, sive ab oppugnatoribus incensum,  
 dum faces et glandes et missilem ignem in obsessos  
 jaculantur, sive ab obsessis, dum retorta ingerunt.  
 Municipale vulgus, prouum ad suspicione, fraude illata 3  
 ignis alimenta credidit a quibusdam e vicinis coloniis,  
 invidia et æmulatione, quod nulla in Italia moles tam  
 capax foret. Quocunque casu accidit, dum atrociora 4  
 metuebantur, in levi habitum ; reddita securitate, tan-  
 quam nihil gravius pati potuissent, mærebant. Cæte-  
 rum multo suorum cruento pulsus Cæcina ; et nox  
 parandis operibus assumpta. Vitelliani pluteos crates- 5  
 que et vineas suffodiendis muris protegendisque oppug-  
 natoribus, Othoniani sudes et immensas lapidum ac  
 plumbi ærisque moles perfringendis obruendisque hos-  
 tibus expedient. ✓ Utrinque pudor, utrinque gloria, et 6  
 diversæ exhortationes, hinc legionum et Germanici  
 exercitus robur, inde urbanæ militiae et prætoriarum  
 cohortium decus attollentium ; illi ut segnem et desi-  
 dem et circo ac theatris corruptum militem, hi peregri-  
 num et externum increpabant. Simul Othonem ac 7  
 Vitellium celebrantes culpantesve, uberioribus inter se  
 probris quam laudibus stimulabant. ✓ Vixdum orto die 22  
 plena propugnatoribus mœnia, fulgentes armis viris-  
 que campi, densum legionum agmen, sparsa auxiliorum  
 manus, altiora murorum sagittis aut saxis incessere,  
 neglecta aut ævo fluxa comminus aggredi. Ingerunt 2  
 desuper Othoniani pila, librato magis et certo ictu,  
 adversus temere subeuntes cohortes Germanorum cantu  
 truci et more patrio nudis corporibus super humeros

3 scuta quatientium. Legionarius pluteis et cratibus tectus subruit muros, instruit aggerem, molitur portas. Contra prætoriani dispositos ad id ipsum molares in-  
 4 genti pondere ac fragore provolvunt. Pars subeuntium obruti; pars confixi et exsangues aut laceri, cum augeret stragem trepidatio, eoque acrius e mœnibus vulneraren-  
 5 tur, rediere infracta partium fama. Et Cæcina, pudore cœptæ temere oppugnationis, ne irrisus ac vanus iisdem castris assideret, trajecto rursus Pado Cremonam petere  
 6 intendit. Tradidere sese abeunti Turullius Cerialis cum compluribus classicis, et Julius Breganicus cum paucis equitum, hic præfectus alæ, in Batavis genitus, ille primipilaris, et Cæciuæ haud alienus, quod ordines in Germania duxerat.

23 Spurinna, comperto itinere hostium, defensam Placentiam quæque acta et quid Cæcina pararet, Annium 2 Gallum per literas docet. Gallus legionem primam in auxilium Placeutiæ ducebat, diffisus paucitate cohortium, ne longius obsidium et vim Germanici exercitus 3 parum tolerarent. Ubi pulsum Cæcinam pergere Cremonam accepit, ægre coërcitam legionem et pugnandi ardore usque ad seditionem progressam, Bedriaci sistit. Inter Veronam Cremonamque situs est vicus, duabus jam Romanis cladibus notus infaustusque.

4 Iisdem diebus a Marcio Macro haud procul Cremona prospere pugnatum. Namque promptus animi Marcius transvectos navibus gladiatores in adversam Padi ripam 5 repente effudit. Turbata ibi Vitellianorum auxilia, et, cæteris Cremonam fugientibus, cæsi qui restiterant. Sed repressus vincentium impetus, ne novis subsidiis 6 firmati hostes fortunam prælii mutarent. Suspectum id Othonianis fuit, omnia ducum facta prave æstima-  
 bus. Certatim, ut quisque animo ignavus, procax ore,

A. D. 69.]

Annium Gallum et Suetonium Paulinum et Marium Celsum († nam eos quoque Otho præfecerat,) variis criminibus incesserant. Acerrima seditionum ac dis- 6 cordiae incitamenta interfectores Galbæ. Scelere et metu vecordes miscere cuncta, modo palam turbidis vocibus, modo occultis ad Othonem literis ; qui humilimo cuique credulus, bonos metuens trepidabat, rebus prosperis incertus et inter adversa melior. Igitur Titianum fratrem accitum bello præposuit.

Interea Pauliui et Celsi ductu res egregiæ gestæ. 24  
 Angebant Cæcinam nequicquam omnia cœpta et senescens exercitus sui fama. Pulsus Placentia, cæsis nuper 2 auxiliis, etiam per concursum exploratorum, crebra magis quam digna memoratu prælia, inferior, propinquante Fabio Valente, ne omne belli decus illuc concederet, recuperare gloriam avidius quam consultius properabat. Ad duodecimum a Cremona (locus Castorum 3 vocatur,) ferocissimos auxiliarium imminentibus viæ lucis occultos componit. Equites procedere longius jussi, et, irritato prælio sponte refugi, festinationem sequentium elicere, donec insidiæ coörerentur. Prodi- 4 tum id Othonianis ducibus, et curam peditum Paulinus, equitum Celsus sumpsere. Tertiæ decimæ legiōnis vexillum, quatuor auxiliorum cohortes et quingenti equites in sinistro locantur ; aggerein viæ tres prætoriæ cohortes altis ordinibus obtinuere ; dextra fronte prima legio incessit cum duabus auxiliaribus cohortibus et quingentis equitibus. Super hos e præ- 5 torio auxiliisque mille equites, cumulus prosperis aut subsidium laborantibus, ducebantur. Antequam mis- 25 cerentur acies, terga vertentibus Vitellianis, Celsus doli prudens repressit suos. Vitelliani temere exsurgententes

cedente sensim Celso, longius seuti ultro in insidias præcipitantur. Nam a lateribus cohortes, † legionum (*legionariorum?*) adversa frons, et subito discursu terga 2 cinxerant equites. Signum pugnæ non statim a Suetonio Paulino pediti datum. Cunctator natura, et cui cauta potius consilia cum ratione quam prospera ex casu placerent, compleri fossas, aperiri campum, pandi aciem jubebat; satis eito incipi victoriam ratus, ubi 3 provisum foret ne vincerentur. Ea cunctione spatium Vitellianis datum in vineas, nexus traducum impeditas, refugiendi. Et modica silva adhærebat; unde rursus ausi promptissimos prætorianorum equitum interfecere. Vulneratur rex Epiphanes, impigre pro Othonē pugnam 26 cieus. Tum Othonianus pedes erupit. Protrita hostium acie, versi in fugam etiam qui subveniebant. Nam Cæcina non simul cohortes sed singulas acciverat; quæ res in prælio trepidationem auxit, cum dispersos 2 nec usquam validos pavor fugientium abriperet. Orta et in castris seditio, quod non universi ducerentur. Vinctus præfectus castrorum Julius Gratus, tanquam fratri apud Othonem militanti proditionem ageret, cum fratrem ejus, Julium Frontonem tribunum, Othoniani 3 sub eodem crimine vinxisse. Cæterum ea ubique formido fuit apud fugientes, occursantes, in acie, pro vallo, ut deleri cum universo exercitu Cæcinam potuisse, ni Suetonius Paulinus receptui eecinisset, utrisque in 4 partibus percrebruerit. Timuisse se Paulinus ferebat tantum insuper laboris atque itineris, ne Vitellianus miles recens e castris fessos aggredieretur, et perculis nullum retro subsidium foret. Apud paucos ea ducis ratio probata, in vulgus adverso rumore fuit.

27 Haud perinde id damnum Vitellianos in metum compulit quam ad modestiam composit; nec solum apud

A. D. 69.]

Cæcinam, qui culpam in militem conferebat seditioni magis quam prælio paratum: Fabii quoque Valentis copiæ (jam enim Ticinum venerat,) posito hostium contemptu et recuperandi decoris cupidine reverentius et æqualius duci parebant. Gravis alioquin seditio 2 exarserat, quam altiore initio (neque enim rerum a Cæcina gestarum ordinem interrumpi oportuerat,) repeatam. Cohortes Batavorum, quas, bello Neronis a quarta 3 decima legione digressas, cum Britanniam peterent, auditio Vitellii motu in civitate Lingonum Fabio Valenti adjunctas retulimus, superbe agebant, ut cujusque legionis tentoria accessissent, coërcitos a se quartadecimanos, ablatam Neroni Italiam, atque omnem belli fortunam in ipsorum manu sitam jactantes. Contume- 4 liosum id militibus, acerbum duci; corrupta jurgiis aut rixis disciplina; ad postremum Valens e petulantia etiam perfidiam suspectabat. Igitur nuntio allato 28 pulsam Trevirorum alam Tungrosque a classe Othonis, et Narbonensem Galliam circumiri, simul cura socios tuendi et militari astu cohortes turbidas ac, si una forent, prævalidas dispergendi, partem Batavorum ire in subsidium jubet. Quod ubi auditum vulgatumque, 2 mærere socii, fremere legiones. Orbari se fortissimorum virorum auxilio; veteres illos et tot bellorum victores, postquam in conspectu sit hostis, velut ex acie abduci. Si provincia urbe et salute imperii potior sit, 3 omnes illuc sequerentur: sin victoriæ sanitas, sustentaculum, columen in Italia verteretur, non abrumpendos, ut corpori, validissimos artus. Hæc ferociter jactando, 29 postquam, immisis lictoribus, Valens coërcere seditiōnem coepit, ipsum invadunt, saxa jaciunt, fugientem sequuntur. Spolia Galliarum et Viennensium aurum 2 et pretia laborum suorum occultare clamitantes, direptis

sarcinis, tabernacula ducis ipsamque humum pilis et lanceis rimabantur. Nam Valens servili veste apud 3 decurionem equitum tegebatur. Tum Alfenius Varus præfectus castrorum, deflagrante paulatim seditione, addit consilium, vetitis obire vigilias centurionibus, 4 omissa tubæ sono, quo miles ad belli munia cietur. Igitur torpere cuncti, circumspectare inter se attoniti et id ipsum, quod nemio regeret, paventes. Silentio, patientia, postremo precibus ac lacrimis veniam quærebant. 5 Ut vero deformis et flens et præter spem incolumis Valens processit, gaudium, miseratio, favor: versi in lætitiam, ut est vulgus utroque immodicum. Laudantes gratantesque circumdatum aquilis signisque in tribunal 6 ferunt. Ille utili moderatione non supplicium eujusquam poposcit; ac, ne dissimulans suspectior foret, paucos incusavit; gnarus civilibus bellis plus militibus 30 quam ducibus licere. Munientibus castra apud Ticinum de adversa Cæcinæ pugna allatum, et prope renovata seditio, tanquam fraude et cunetationibus Valentis prælio defuissent. Nolle requiem, non exspectare ducem, anteire signa, urgere signiferos. Rapido agmine 2 Cæcinæ junguntur. Improspera Valentis fama apud exercitum Cæcinæ erat: expositos se tanto pauciores integris hostium viribus querebantur, simul in suam excusationem, et adventantium robur per adulationem 3 attollentes, ne ut victi et ignavi despectarentur. Et quanquam plus virium, prope duplicatus legionum auxiliorumque numerus erat Valenti, studia tamen militum in Cæcinam inclinabunt, super benignitatem animi, qua promptior habebatur, etiam vigore ætatis, proceritate 4 corporis et quodam inani favore. Hinc æmulatio ducibus; Cæcina ut fœdum ac maculosum, ille ut tumidum 5 ac vanum irridebant. Sed condito odio eandem utilita-

A. D. 69.]

tem fovere, crebris epistolis, sine respectu veniae, probra Othoni objectantes, cum duces partium Othonis quamvis uberrima convictorum in Vitellium materia abstinerent. Sane ante utriusque exitum, quo egregiam Otho famam, 31 Vitellius flagitiosissimam meruere, minus Vitellii ignavæ voluptates quam Othonis flagrantissimæ libidines timebantur. Addiderat huic terrorem atque odium 2 cædes Galbae: contra illi initium belli nemo imputabat. Vitellius ventre et gula sibi in honestus, Otho luxu, sævitia, audacia, rei publicæ exitiosior duecebatur.

Conjunctis Cæcinæ ac Valentis copiis nulla ultra 3 penes Vitellianos mora quin totis viribus certarent. Otho consultavit, trahi bellum an fortunam experiri placeret. Tunc Suetonius Paulinus dignum fama sua 4 ratus, qua nemo illa tempestate militaris rei callidior habebatur, de toto genere belli censere, “festinationem hostibus, moram ipsis utilem” disseruit: “Exercitum 32 Vitellii universum advenisse, nec multum virium a tergo, quoniam Galliæ tumeant, et deserere Rheni ripam, irrupturis tam infestis nationibus, non conducat. Britannicum militem hoste et mari distineri; Hispanias 2 armis non ita redundare; provinciam Narbonensem incursu classis et adverso prælio contremuisse; clausam Alpibus, et nullo maris subsidio, transpadanam Italiam, atque ipso transitu exercitus vastam; non frumentum usquam exercitui, nec exercitum sine copiis retineri posse. Jam Germanos, quod genus militum apud 3 hostes atrocissimum sit, tracto in æstatem bello, fluxis corporibus, mutationem soli cælique haud toleraturos. Multa bella, impetu valida, per taedia et moras evanuisse. Contra ipsis omnia opulenta et fida, Pannonia, Moesiam, Dalmatiam, Orientem, cum integris exercitibus, Italiam et caput rerum urbem, seuatumque

et populum, nunquam obscura nomina, etsi aliquando obumbrentur; publicas privatasque opes et immensam pecuniam, inter civiles discordias ferro validiorem; 5 corpora militum aut Italiæ sueta aut æstibus. Objacere flumen Padum, tutas viris murisque urbes; e quibus nullam hosti cessuram Placentiæ defensione exploratum.

6 Proinde duceret bellum. Paucis diebus quartam decimam legionem, magna ipsam fama, cum Mœsiacis copiis affore: tum rursus deliberaturuni, et, si prælium 33 placuisset, auctis viribus certaturos." Accedebat sententiæ Paulini Marius Celsus; idem placere Annio Gallo, paucos ante dies lapsu equi afflito, missi qui 2 consilium ejus sciscitarentur retulerant. Otho pronus ad decertandum; frater ejus Titianus, et præfectus prætorii Proculus, imperitia properantes, fortunam et deos et numen Othonis adesse consiliis, affore conati- 3 bus testabantur. Neu quis obviam ire sententiæ auderet, in adulationem concesserant. Postquam pugnari placitum, interesse pugnæ imperatorem an seponi 4 melius foret dubitavere. Paulino et Celso jam non adversantibus, ne principem objectare periculis viderentur, iidem illi deterioris consilii auctores perpulere ut Brixellum concederet, ac, dubiis præliorum exemptus, 5 sumimæ rerum et imperii se ipsum reservaret. Is primus dies Othonianas partes afflixit. Namque et cum ipso prætoriarum cohortium et speculatorum equitumque valida manus discessit, et remanentium fractus animus, quando suspecti duces, et Otho, cui uni apud militem fides, dum et ipse nonnisi militibus credit, imperia ducum *in* incerto reliquerat.

34 Nihil eorum Vitellianos fallebat, crebris, ut in civili bello, transfugiis: et exploratores, cura diversa scisci- 2 tandi, sua non occultabant. Quieti intentique Cæcina

A. D. 69.]

ac Valeus, quando hostis imprudentia rueret, quod loco sapientiae est, alienam stultitiam opperiebantur, inchoato ponte transitum Padi simulantes adversus oppositam gladiatorum manum, ac ne ipsorum miles segue otium tereret. Naves pari inter se spatio, validis utrinque 3 trabibus connexæ, adversum in flumen dirigebantur, jactis super ancoris, quæ firmitatem pontis continerent. Sed ancorarum func̄s non extenti fluitabant, ut, augescente flumine, inoffensus ordo navium attolleretur. Claudebat pontem imposta turris et in extremam 4 navem educta, unde tormentis ac machinis hostes propulsarentur. Othoniani in ripa turrim struxerant, saxaque et faces jaculabantur. Et erat insula amne 35 medio, in quam gladiatores, navibus molieentes, Germani nando prælabebantur. Ac forte plures transgressos, completis Liburnicis, per promptissimos gladiatorum Macer aggreditur. Sed neque ea constantia gladiatori- 2 bus ad prælia quæ militibus; nec perinde nutantes e navibus quam stabili gradu e ripa vulnera dirigebant. Et cum variis trepidantium inclinationibus mixti remiges 3 propugnatoresque turbarentur, desilire in vada ultiro Germani, retentare puppes, scandere foros, aut comminus mergere. Quæ cuncta in oculis utriusque 4 exercitus, quanto lætiora Vitellianis, tanto acrius Othoniani causam auctoremque cladis detestabantur. Et 36 prælium quidem, abreptis quæ supererant navibus, fuga diremptum: Macer *ad exitum* poscebatur. Jamque 2 vulneratum eminus lancea strictis gladiis invaserant, cum intercursu tribunorum centurionumque protegitur. Nec multo post Vestricius Spurinna jussu Othonis, 3 reliquo Placentiae modico præsidio, cum cohortibus subvenit. Dein Flavium Sabinum, consulem designatum, 4 Otho rectorem copiis misit quibus Macer præfuerat,

læto milite ad mutationem ducum, et ducibus ob crebras  
seditiones tam infestam militiam aspernantibus.

- 37 Invenio apud quosdam auctores pavore belli, seu fastidio utriusque principis, quorum flagitia ac dedecus apertiore in dies fama noscebantur, dubitasse exercitus num, posito certamine, vel ipsi in medium consultarent,  
 2 vel senatui permitterent legere imperatorem. Atque eo duces Othonianos spatium ac moras suasisse, præcipua spe Paulini, quod vetustissimus consularium, et militia clarus, gloriam nomenque Britannicis expeditio-  
 3 nibus meruisse. Ego ut concesserim apud paucos tacito voto quietem pro discordia, bonum et innocentem principem pro pessimis ac flagitosissimis expetitum, ita neque Paulinum, qua prudentia fuit, sperasse corruptissimo sæculo tantam vulgi moderationem reor, ut qui pacem belli amore turbaverant, bellum pacis caritate deponereut; neque aut exercitus linguis moribusque dissonos in hunc consensum potuisse coalescere, aut legatos ac duces, magna ex parte luxus, egestatis, scele-  
 rum sibi concios, nisi pollutum obstrictumque meritis  
 38 suis principem passuros. Vetus ac jam pridem insita mortalibus potentiae cupido cum imperii magnitudine  
 2 adolevit eruptique. Nam rebus modicis æqualitas facile habebatur: sed ubi, subacto orbe et æmulis urbibus regibusve excisis, securas opes concupiscere vacuum fuit, prima inter patres plebemque certamina  
 3 exarsere. Modo turbulenti tribuni, modo consules prævalidi, et in urbe ac foro tentamenta civilium bellorum; mox e plebe infima C. Marius et nobilium saevis-  
 simus Lucius Sulla victam armis libertatem in domina-  
 4 tionem verterunt. Post quos Cn. Pompeius occultior, non melior. Et nunquam postea nisi de principatu  
 5 quæsitum. Non discessere ab armis in Pharsalia ac

A. D. 69.]

Philippis eivium legiones: nedum Othonis ac Vitellii exereitus sponte posituri bellum fuerint. Eadem illos deūm ira, eadem hominum rabies, eadem seelerum causæ in discordiam egere. Quod singulis velut ictibus<sup>6</sup> transacta sunt bella, ignavia principum factum est. Sed me veterum novorumque morum reputatio longius tulit: nunc ad rerum ordinem venio.

Profecto Brixellum Othone honor imperii penes<sup>39</sup> Titianum fratrem, vis ac potestas penes Proculum præfetum. Celsus et Paulinus, cum prudentia eorum<sup>2</sup> nemo uteretur, inani nomine ducum alienæ culpæ prætendebantur. Tribuni centurionesque ambigui, quod,<sup>3</sup> spretis melioribus, deterrimi valebant. Miles alacer; qui tamen jussa ducum interpretari quam exsequi mallet. Promoveri ad quartum a Bedriaco castra<sup>4</sup> placait, adeo imperite ut, quanquam verno tempore anni et tot circum amnibus, penuria aquæ fatigarentur. Ibi<sup>5</sup> de prælio dubitatum, Othone per literas flagitante ut maturarent, militibus ut imperator pugnæ adesset possentibus. Plerique copias trans Padum agentes acciri<sup>6</sup> postulabant. Nec perinde dijudicari potest quid optimum factu fuerit, quam pessimum fuisse quod faetum est. Non ut ad pugnam sed ad bellandum profecti,<sup>40</sup> confluentes Padi et Adduæ fluminum, sedecim inde millium spatio distantes, petebant. Celso et Paulino<sup>2</sup> abnuentibus militem itinere fessum, sarcinis gravem, objicere hosti, non admissuro quo minus expeditus et vix quatuor millia passuum progressus, aut incompositos in agmine, aut dispersos et vallum molientes aggredetur, Titianus et Proeulus, ubi consiliis vineerentur, ad jus imperii transibant. Aderat sane citus equo Numida<sup>3</sup> cum atrocibus mandatis, quibus Otho, increpita ducum

segnitia, rem in discrimen mitti jubebat, æger mora et spei impatiens.

41 Eodem die ad Cæcinam operi pontis intentum duo prætoriarum cohortium tribuni, colloquium ejus postulantes, venerunt. Audire conditiones ac reddere parabat, cum præcipites exploratores adesse hostem 2 nuntiavere. Interruptus tribunorum sermo; eoque incertum fuit, insidias an proditionem vel aliquod 3 honestum consilium cœptaverint. Cæcina, dimissis tribunis, revectus in castra, datum jussu Fabii Valentis 4 pugnæ signum et militem in armis invenit. Dum legiones de ordine agminis sortiuntur, equites prorupere; et, mirum dictu, a paucioribus Othonianis, quo minus in vallum impingerentur, Italicæ legionis virtute 5 deterriti sunt. Ea, strictis mucronibus, redire pulsos et pugnam resumere coëgit. Disposita Vitellianarum legionum acies sine trepidatione: etenim, quanquam vicino hoste, aspectus armorum densis arbustis pro 6 hibebatur. Apud Othonianos pavidi duces, miles ducibus infensus, mixta vehicula et lixæ, et, præruptis utrinque fossis, via quieto quoque agmini angusta. Circumsistere alii signa sua, quærere alii; incertus 7 undique clamor accurrentium, vocantium. Ut cuique audacia vel formido, in primam postremamve aciem 42 prorumpebant aut relabebantur. Attonitas subito terrore mentes falsum gaudium in languorem vertit, repertis qui descivisse a Vitellio exercitum ementirentur. 2 Is rumor, ab exploratoribus Vitellii dispersus, an in ipsa Othonis parte seu dolo seu forte surrexerit, parum compertum. Omisso pugnæ ardore Othoniani ultro salutavere; et hostili murmure excepti, plerisque suorum ignaris quæ causa salutandi, metum proditionis

A. D. 69.]

fecere. Tum incubuit hostium acies, integris ordini- 3  
bus, robore et numero præstantior: Othoniani, quan-  
quam dispersi, pauciores, fessi, prælium tamen acriter  
sumpsere. Et per locos arboribus ac vineis impeditos 4  
non una pugnæ facies: comminus eminus, catervis et  
cuneis concurrebant. In aggere viæ collato gradu  
corporibus et umbonibus niti, omisso pilorum jactu,  
gladiis et securibus galeas loricasque perrumpere: nos-  
centes inter se, cæteris conspicui, in eventum totius  
belli certabant. Forte inter Padum viamque, patenti 43  
campo, duæ legiones congressæ sunt, pro Vitellio unet-  
vicesima, cui cognomen Rapaci, vetere gloria insignis;  
e parte Othonis prima Adjutrix, non ante in aciem  
deducta, sed ferox et novi decoris avida. Primani, 2  
stratis unetvicesimanorum principiis, aquilam abstulere;  
quo dolore accensa legio et impulit rursus primanos,  
interfecto Orfido Beuigno legato, et plurima signa  
vexillaque ex hostibus rapuit. A parte alia propulsa 3  
quintanorum impetu tertia decima legio; circumventi  
plurium accusu quartadecimani. Et ducibus Othonis  
jam pridem profugis, Cæcina ac Valens subsidiis suos  
firmabant. Accessit recens auxilium, Varus Alfenius 4  
cum Batavis, fusa gladiatorum manu, quam navibus  
transvectam oppositæ cohortes in ipso flumine trucida-  
verant. Ita victores latus hostium invecti. Et media 44  
acie perrupta fugere passim Othoniani, Bedriacum  
petentes. Immensum id spatium; obstructæ strage  
corporum viæ. Quo plus cædis fuit: neque enim civi-  
libus belli capti in prædam vertuntur. Suetonius 2  
Pauliuus et Licinius Proculus diversis itineribus cas-  
tra vitavere. Vedium Aquilam, tertiae decimæ legio-  
nis legatum, iræ militum inconsultus pavor obtulit.  
Multo adhuc die vallum ingressus claniore seditioso-

rum et fugacium circumstrepitur; non probris, non manibus abstinent; desertorem proditoremque increpant, nullo proprio crimine ejus, sed more vulgi suum  
 3 quisque flagitium aliis objectantes. Titianum et Celsum nox juvit, dispositis jam excubii compressisque militibus, quos Annus Gallus consilio, precibus, auctoritate flexerat, ne super cladem adversae pugnæ suis met ipsi cœdibus sœvirent: sive finis bello venisset seu resumere arma mallent, unicum victis in consensu levamentum.  
 4 Cæteris fractus animus: prætorianus miles non virtute se sed proditione victimum fremebat. Ne Vitellianis quidem incruentam fuisse victoriam, pulso equite, raptâ legionis aquila; superesse cum ipso Othonem militum quod trans Padum fuerit; venire Mœsicas legiones; magnam exercitus partem Bedriaci remansisse: hos certe nondum victos, et si ita ferret, honestius in acie  
 5 perituros. His cogitationibus truces aut pavidi, extrema desperatione ad iram sæpius quam in formidinem stimulabantur.

45 At Vitellianus exercitus ad quintum a Bedriaco lapidem consedit, non ausis ducibus eadem die oppugnationem castrorum; simul voluntaria deditio sperabatur.  
 2 Sed expeditis, et tantum ad prælium egressis, munimentum fuere arma et victoria. Postera dic, haud  
 3 ambigua Othoniani exercitus voluntate, et qui ferociores fuerant ad pœnitentiam inclinantibus, missa legatio; nec apud duces Vitellianos dubitatum quo minus pacem  
 4 concederent. Legati paulisper retenti. Ea res hæsitationem attulit ignaris adhuc an impetrâssent. Mox remissa legatione patuit vallum. Tum victi victoresque in lacrimas effusi, sortem civilium armorum misera  
 5 lætitia detestantes. Iisdem tentoriis alii fratribus, alii propinquorum vulnera fovebant. Spes et præmia in

A. D. 69.]

ambiguo, certa funera et luctus, nec quisquam adeo mali expers, ut nou aliquam mortem mæreret. Requi-<sup>6</sup> situm Orfidii legati corpus honore solito crematur; paucos necessarii ipsorum sepelivere; cæterum vulgus super humum relictum.

Opperiebatur Otho nuntium, pugnæ nequaquam tre-<sup>46</sup> pidus, et consilii certus. Mæsta primum fama, dein profugi e prælio perditas res patefaciunt. Non ex-<sup>2</sup> spectavit militum ardor vocem imperatoris. Bonum haberet animum jubebant: superesse adhuc novas vires, et ipsos extrema passuros ausurosque. Neque erat<sup>3</sup> adulatio: ire in aciem, excitare partium fortunam furore quodam et instinctu flagrabant. Qui procul adstiterant, tendere manus, et proximi prensare genua, promptissimo Plotio Firmo. Is prætorii præfectus identidem orabat<sup>4</sup> ne fidissimum exercitum, ne optime meritos milites desereret: majore animo tolerari adversa quam relinqui; fortes et strenuos etiam contra fortunam insistere spei, timidos et ignavos ad desperationem formidine properare. Quas inter voces ut flexerat vultum aut induraverat<sup>5</sup> Otho, claimor et gemitus. Nec prætoriani tantum, pro-<sup>6</sup> prius Othonis miles, sed præmissi e Mœsia eandem obstinationem adventantis exercitus, legiones Aquileiam ingressas nuntiabant; ut nemo dubitet potuisse renovari bellum atrox, lugubre, incertum victis et victoribus. Ipse, aversus a consiliis belli, "Hunc,"<sup>47</sup> inquit, "animum, hanc virtutem vestram ultra periculis objicere nimis grande vitæ meæ pretium puto. Quanto plus spei ostenditis, si vivere placeret, tanto pulchrior mors erit. Experti in vicem sumus, ego ac fortuna.<sup>2</sup> Nec tempus computaveritis: difficilius est temperare felicitati, qua te non putas diu usurum. Civile bellum<sup>3</sup> a Vitellio cœpit, et ut de principatu certaremus armis,

initium illic fuit : ne plus quam semel certemus, penes me exemplum erit. Hinc Othonem posteritas aestimet.

**4** Fruetur Vitellius fratre, conjuge, liberis : mihi non ultiōne neque solatiis opus est. Alii diutius imperium tenuerint : nemo tam fortiter reliquerit. An ego tantum Romanæ pubis, tot egregios exercitus sterni rursus 5 et rei publicæ cripī patiar? Eat hic mecum animus, tanquam perituri pro me fueritis. Sed este superstites. Nec diu moremur, ego incolumitatem ves-

**6** tram, vos constantiam meam. Plura de extremis loqui pars ignaviae est. Præcipuum destinationis meæ documentum habete, quod de nemine queror : nam incusare deos vel homines, ejus est qui vivere velit."

**48** Talia locutus, ut cuique ætas aut dignitas, comiter appellatos, irent propere neu remanendo iram victoris asperarent, juvenes auctoritate, senes precibus movebat, placidus ore, intrepidus verbis, intempestivas suorum 2 lacrimas coërcens. Dari naves ac vehicula abeuntibus jubet ; libellos epistolasque studio erga se aut in Vitellium contumeliis insignes abolet ; pecunias distribuit,

**3** parce, nec ut periturus. Mox Salvium Cocceianum fratris filium, prima juventa, trepidum et marentem ultro solatus est, laudando pietatem ejus, castigando formidinem : an Vitellium tam immitis animi fore, ut pro incolumi tota domo ne hanc quidem sibi gratiam redderet ? Mereri se

**4** festinato exitu clementiam victoris. Non enim ultima desperatione, sed poscente prælium exercitu, remisisse rei publicæ novissimum casum. Satis sibi nominis,

**5** satis posteris suis nobilitatis quæsitum. Post Julios, Cladios, Servios, se primum in familiam novam imperium intulisse. Proinde erecto animo capesseret vitam, neu patruuni sibi Othonem fuisse aut oblivisceretur

**49** unquam aut nimium meminisset. Post quæ, dimo-

A. D. 69.]

tis omnibus, paulum requievit. Atque illum, supremas jam curas animo volutantem, repens tumultus avertit, nuntiata consternatione ac licentia militum. Namque abeuntibus exitium minitabantur, atrocissima in Verginium vi, quem clausa domo obsidebant. In- 2 crepitis seditionis auctoribus, regressus vacavit abeuntium alloquiis, donee omnes inviolati digrederentur. Vesperascente die, sitim haustu gelidæ aquæ sedavit. Tum allatis pugionibus, cum utrumque pertentâasset, 3 alterum capiti subdidit. Et explorato jam profectos amicos, noctem quietam, utque affirmatur, non insomnem egit. Luce prima in ferrum pectore incubuit. Ad gemitum morientis ingressi liberti servique, et 4 Plotius Firmus prætorii præfectorus unum vulnus invenere. Funus maturatum. Ambitiosis id precibus petierat, ne amputaretur caput ludibrio futurum. Tulere 5 corpus prætoriæ cohortes, cum laudibus et lacrimis, vulnus manusque ejus exosculantes. Quidam militum 6 juxta rogum interfecere se, non noxa neque ob metum, sed æmulatione decoris et caritate principis. Ac postea 7 promiscue Bedriaci, Placentiæ, aliisque in castris, celebratum id genus mortis. Othoni sepulcrum exstructum 8 est modicum et mansurum. Hunc vitæ finem habuit septimo et tricesimo ætatis anno. Origo illi e munici- 50 pio Ferentino, pater consularis, avus prætorius; maternum genus impar, nec tamen indecorum. Pueritia ac 2 juventa, qualem monstravimus. Duobus facinoribus, altero flagitosissimo, altero egregio, tantundem apud posteros meruit bonæ famæ quantum malæ. Ut con- 3 quirere fabulosa et fictis oblectare legentium animos procul gravitate cœpti operis crediderim, ita vulgatis traditisque demere fidem non ausim. Die quo Bedriaci 4 certabatur, avem invisitata specie apud Regium Lepi-

dum celebri luco consedisse incolæ memorant, nec deinde cœtu hominum aut circumvolitantium alitum territam pulsamve, donec Otho se ipse interficeret; tum ablatam ex oculis; et tempora reputantibus initium finemque miraculi cum Othonis exitu competitisse.

- 51 Iu funere ejus novata luctu ac dolore militum sceditio: nec erat qui coërccret. Ad Verginium versi, modo ut reciperet imperium, nunc ut legatione apud Cæcina ac Valentem fungeretur, minitantes orabant.
- 2 Verginius, per aversam domus partem furtim degressus, 3 irrumptentes frustratus est. Earum quæ Brixelli egerant cohortium preces Rubrius Gallus tulit, et vevia statim impetrata, concedentibus ad victorem per Flavianum Sabinum iis copiis quibus præfuerat.
- 52 Posito ubique bello, magna pars senatus extremum discrimen adiit, profecta cum Othone ab urbe, dein Mutinæ reicta. Illuc adverso de prælio allatum.
- 2 Sed milites, ut falsum, rumorem aspernantes, quod infensum Othoni senatum arbitrabantur, custodire sermones, vultum habitumque trahere in deterius; conviciis postremo ac probris causam et initium cædis quærebant, cum aliis insuper metus senatoribus instaret, ne, prævalidis jam Vitellii partibus, cunctanter excepsisse 3 victoriam crederentur. Ita trepidi, et utrinque auxii, coëunt, nemo privatum expedito consilio, inter multos societate culpæ tutior. Onerabat paventium curas ordo Mutinensis arma et pecuniam offerendo, appellabatque
- 53 patres conscriptos intempestivo honore. Notabile jurgium fuit, quo Licinius Cæcina Marcellum Eprium ut ambigua disserentem invasit. Nec cæteri sententias aperiebant: sed invisum memoria delationum, expositumque ad invidiam, Marcelli nomen irritaverat Cæcina, ut novus adhuc, et in scutatum nuper adscitus,

A. D. 69.]

magnis inimicitiis claresceret. Moderatione meliorum dirempti. Et rediere omnes Bononiam, rursus consiliaturi ; simul medio temporis plures nuntii sperabantur. Bononiæ, divisis per itinera qui recentissimum quemque pereunctarentur, interrogatus Othonis libertus causam digressus, habere se supra ejus mandata respondit ; ipsum viventem quidem relictum, sed sola posteritatis cura et abruptis vitæ blandimentis. Hinc admiratio et plura interrogandi pudor ; atque omnium animi in Vitellium inclinavere. Intererat consiliis frater ejus L. Vitellius, seque jam adulantibus offerebat, cum repente Cœnus, libertus Neronis, atroci mendacio universos perculit, affirmans superventu quartæ decimæ legionis, junctis a Brixello viribus, cæsos victores, versam partium fortunam. Causa fingendi fuit, ut diplomata Othonis, quæ negligebantur, lætiore nuntio revalcscent. Et Cœnus quidem rapide in urbem vectus paucos post dies jussu Vitelli pœnas luit. Senatorum periculum auctum, credentibus Othonianis militibus vera esse quæ afferebantur. Intendebat formidinem, quod publici consilii facie discessum Mutina, desertæque partes forent. Nec ultra in commune congressi sibi quisque consuluere, donec missæ a Fabio Valente epistolæ demerent metum. Et mors Othonis quo laudabilior, eo velocius audita.

At Romæ nihil trepidationis ; Ceriales ludi ex more spectabantur. Ut cessisse Othonem, et a Flavio Sabino præfecto urbis, quod erat in urbe militum, sacramento Vitelli adactum, certi auctores in theatrum attulcrunt, Vitellio plausere ; populus cum lauru ac floribus Galbae imagines circum templo tulit, congestis in modum tumuli coronis juxta lacum Curtii, quem locum Galba

3 moriens sanguine infecerat. In senatu cuncta longis  
aliorum principatibus composita statim decernuntur.  
Additæ erga Germanicum exercitum laudes gratesque,

4 et missa legatio quæ gaudio fungeretur. Recitatæ Fabii  
Valentis epistolæ ad consules scriptæ haud immoderate:  
gratior Cæcinae modestia fuit, quod non scripsisset.

56 Cæterum Italia gravius atque atrocius quam bello afflic-  
tabatur. Dispersi per municipia et colonias Vitelliani  
spoliare, rapere, vi et stupris polluere. In omne fas  
nefasque avidi aut venales non sacro, non profano absti-  
2 nebant. Et fuere qui inimicos suos specie militum in-  
terficerent. Ipsique milites, regionum gnari, refertos  
agros, dites dominos in prædam aut, si repugnatum  
foret, ad excidium destinabant, obnoxiiis dueibus et pro-  
3 hibere non ausis. Minus avaritiæ in Cæcina, plus am-  
bitionis: Valens ob lucra et quæstus infamis, eoque  
4 alienæ etiam culpæ dissimulator. Jam pridem attritis  
Italiae rebus, tantum peditum equitumque, vis dam-  
naque et injuriæ ægre tolerabantur.

57 Interim Vitellius, victoriæ suæ nescius, ut ad in-  
tegrum bellum reliquas Germanici exercitus vires  
trahebat. Pauci veterum militum in hibernis relictæ,  
festinatis per Gallias delectibus, ut remauentium  
2 legionum nomina supplerentur. Cura ripæ Hordeonio  
Flacco permitta; ipse e Britannico delectu octo millia  
sibi adjunxit. Et paucorum dierum iter progressus,  
prosperas apud Bedriacum res, ac morte Othonis con-  
3 cidiisse bellum, accepit. Vocata concione virtutem  
militum laudibus cumulat. Postulante exercitu ut  
libertum suum Asiaticum equestri dignitate donaret,  
4 inhonestam adulatioñem compescit. Dein mobilitatē  
ingenii, quod palam abuuerat, inter secreta conviviū

A. D. 69.]

largitur, honoravitque Asiaticum annulis, fœdum mancipium et malis artibus ambitiosum.

Iisdem diebus accessisse partibus utramque Mauritaniam, interfecto procuratore Albino, nuntii venere. Luceius Albinus, a Nerone Mauritaniae Cæsariensi præpositor, addita per Galbam Tingitanæ provinciæ administratione, haud spernendis viribus agebat. De cem novem cohortes, quinque alae, ingens Maurorum numerus aderat, per latrocinia et raptus apta bello manus. Cæso Galba, in Othonem pronus, nec Africa contentus, Hispaniæ, angusto freto dirempta, imminebat. Inde Cluvio Rufo metus; et decimam legionem propinquare litori ut transmissurus jussit. Præmissi centuriones qui Maurorum animos Vitellio conciliarent. Neque arduum fuit, magna per provincias Germanici exercitus fama. Spargebatur insuper, spreto procuratoris vocabulo, Albinum insigne regis et Jubæ nomen usurpare. Ita mutatis animis, Asinius Pollio, alae præfector, e fidissimis Albino, et Festus ac Scipio, cohortium præfecti, opprimuntur. Ipse Albinus, dum e Tingitana provinicia Cæsariensem Mauritaniam petit, appulu litoris trucidatus; uxor ejus, cum se percussoribus obtulisset, simul interfecta est, nihil eorum quæ fierent Vitellio anquirente. Brevi auditu quamvis magna transibat, impar curis gravioribus.

Exercitum itinere terrestri pergere jubet: ipse Arare flumine devehitur, nullo principali paratu, sed vetere egestate conspicuus, donec Junius Blæsus, Lugdunensis Galliæ rector, genere illustri, largus animo et par opibus, circumdaret principi ministeria, comitaretur liberaliter, eo ipso ingratus, quamvis odium Vitellius vernilibus blanditiis velaret. Præsto fuere Lugduni vetricium victarumque partium duces Valentem et Cæcinam, pro concione

5 laudatos, curuli suæ circumposuit. Mox universum exercitum occurrere infanti filio jubet; perlatumque et paludamento opertum sinu retinens Germanicum appellavit, cinxitque cunctis fortunæ principalis insignibus. Nimius honos inter secunda, rebus adversis in solatium  
 60 cessit. Tum interfecti centuriones promptissimi Othonianorum; unde præcipua in Vitellium alienatio per  
 2 Illyricos exercitus. Simul cæteræ legiones contactu, et adversus Germanicos milites invidia, bellum meditabantur. Suetonium Paulinum ac Licinium Proculum tristi mora squalidos tenuit, donec auditи necessariis  
 3 magis defensionibus quam honestis uterentur. Productionem ultro imputabant, spatium longi ante prælium itineris, fatigationem Othonianorum, permixtum vehiculis agmen ac pleraque fortuita fraudi suæ assignantes. Et Vitellius credidit de perfidia, et fidem absolvit.  
 4 Salvius Titianus, Othonis frater, nullum discrimen adiit, pietate et ignavia excusatus. Mario Celso consulatus servatur. Sed creditum fama, objectumque mox in senatu Cæcilio Simplici, quod eum honorem pecunia mercari, nec sine exitio Celsi, voluisse.  
 5 Restitit Vitellius, deditque postea consulatum Simplici innoxium et inemptum. Trachalum adversus criminantes Galeria uxor Vitelli protexit.  
 61 Inter magnorum virorum discribina (pudendum dictu,) Mariccus quidam, e plebe Boiorum, inserere sese fortunæ et provocare arma Romana simulatione numerum ausus est. Jamque assertor Galliarum et deus, (nam id sibi indiderat,) concitis octo millibus hominum, proximos Aduorum pagos trahebat, cum gravissima civitas electa juventute, adjectis a Vitellio cohortibus,  
 2 faneticam multitudinem disjecit. Captus in eo prælio Mariccus, ac mox feris objectus quia non laniabatur,

A. D. 69.]

stolidum vulgus inviolabilem credebat, donec spectante Vitellio interfactus est.

Nec ultra in defectores aut bona cujusquam sævitum: rata fuere eorum qui acie Othoniana ceciderant testameuta, aut lex intestatis. Prorsus, si luxuriæ temperaret, avaritiam non timeres. Epularum fœda et 2 inexploris libido: ex urbe atque Italia irritamenta gulæ gestabautur, strepentibus ab utroque mari itineribus; exhausti conviviorum apparatus principes civitatum; vastabantur ipsæ civitates; degenerabat a labore ac virtute miles assuetudine voluptatum, et contemptu ducis. Prämisit in urbem edictum quo 3 vocabulum Augusti differret, Cæsaris non reciperet, cum de potestate nihil detraheret. Pulsi Italia mathematici. Cautum severe ne equites Romani ludo et arena polluerentur. Priores id principes pecunia et 4 sæpius vi perpulerant; ac pleraque municipia et coloniae æmulabantur corruptissimum quemque adolescentium pretio illicere.

Sed Vitellius, adventu fratri, et, irrepentibus do- 63 minationis magistris, superbior et atrocior, occidi Dolabellam jussit, quem in coloniam Aquinatem sepositum ab Othone retulimus. Dolabella, audita morte 2 Othonis, urbem introierat. Id ei Plancius Varus, prætura functus, ex intimis Dolabellæ amicis, apud Flavium Sabinum præfectum urbis objecit, tanquam erupta custodia ducem se victis partibus ostentasset. Addidit tentatam cohortem, quæ Ostiæ ageret; nec 3 ullis tantorum criminum probationibus, in pænitentiam versus seram veniam post scelus quærebat. Cunctan- 4 tem super tanta re Flavium Sabinum Triaria L. Vitellii uxor, ultra feminam ferox, terruit, ne periculo principis

5 famam clementiae affectaret. Saonius, suopte ingenio  
mitis, ubi formido incessisset, facilis mutatu, et in alieno  
discrimine sibi pavens, ne allevasse videretur, impulit  
64 ruentem. Igitur Vitellius, metu et odio, quod Pe-  
troniam uxorem ejus mox Dolabella in matrimonium  
acepisset, vocatum per epistolas, vitata Flaminiae viæ  
celebritate, devertere Interamnium atque ibi interfici  
2 jussit. Longum intersectori visum: in itinere ac ta-  
berna projectum humi jugulavit, magna cum invidia  
novi principatus, cuius hoc primum specimen nosce-  
3 batur. Et Triariæ licentiam modestum e proximo ex-  
emplum onerabat, Galeria imperatoris uxor, non im-  
mixta tristibus; et pari probitate mater Vitelliorum  
4 Sextilia, antiqui moris. Dixisse quinetiam ad primas  
filii sui epistolas ferebatur non Germanicum a se sed  
5 Vitellium genitum. Nec ullis postea fortunæ illecebris  
aut ambitu eivitatis in gaudium evicta, domus suæ  
tantum adversa sensit.

65 Digressum a Lugduno Vitellium M. Cluvius Rufus  
assequitur, omissa Hispania, lætitiam et gratulationem  
vultu ferens, animo anxius, et petitum se criminatio-  
2 bus gnarus. Hilarius, Cæsaris libertus, detulerat, tan-  
quam, auditio Vitelli et Othonis principatu, propriam  
ipse potentiam et possessionem Hispaniarum tentasset,  
eoque diplomatibus nullum principem præscripsisset.  
3 Interpretabatur quædam ex orationibus ejus, contume-  
liosa in Vitellium et pro se ipso popularia. Auctoritas  
Cluvii prævaluit, ut puniri ultro libertum suum Vitellius  
4 juberet. Cluvius comitatui princepis adjectus, non ad-  
empta Hispania, quam rexit absens exemplo L. Ar-  
runtii. Eum Tiberius Cæsar ob metum, Vitellius  
5 Cluvium nulla formidine retinebat. Non idem Trebellio

A. D. 60.]

Maximo honos. Profugerat Britannia ob iracundiam militum: missus est in locum ejus Vettius Bolanus e præsentibus.

Angebatur Vitellium victarum legionum haudquaquam 66 fractus animus. Sparsæ per Italiam et victoribus permixtæ hostilia loquebantur, præcipua quartadecimanorum ferocia, qui se victos abnuebant: quippe Bedriacensi acie, vexillariis tantum pulsis, vires legionis non affuisse. Remitti eos in Britanniam, unde a Neroni exciti erant, placuit, atque interim Batavorum cohortes una tendere ob veterem adversus quartadecimanos discordiam. Nec diu in tantis armatorum 3 odiis quies fuit. Augustæ Taurinorum, dum opificem quendam Batavus ut fraudatorem insectatur, legionarius ut hospitem tuctur, sui cuique commilitones aggregati a conviciis ad cædem transiere. Et prælium atrox 4 arsisset, ni duæ prætoriæ cohortes, causam quartadecimanorum secutæ, his fiduciam et metum Batavis fecissent. Quos Vitellius agmini suo jungi ut fidos, 5 legionem Graiis Alpibus traductam eo flexu itineris ire jubet quo Viennam vitarent: namque et Viennenses timabantur. Nocte qua proficiscebatur legio, relictis 6 passim ignibus, pars Taurinæ coloniæ ambusta; quod damnum, ut pleraque belli mala, majoribus aliarum urbium cladibus oblitteratum. Quartadecimani post- 7 quam Alpibus degressi sunt, seditiosissimus quisque signa Viennam ferebant. Consensu meliorum compressi, et legio in Britanniam transvecta. Proximus 67 Vitellio e prætoriis cohortibus metus erat. Separati primum, deinde, addito honestæ missionis lenimento, arma ad tribunos suos deferebant, donec motum a Vespasiano bellum crebesceret: tum, resumpta militia, robur Flavianarum partium fuere. Prima classicorum 2.

[A. U. C. 822.]

legio in Hispaniam missa, ut pace et otio mitesceret; undecima ac septima suis hibernis redditæ; tertia-<sup>3</sup> decimani struere amphitheatra jussi. Nam Cæcina Cremonæ, Valens Bononiæ spectaculum gladiatorum edere parabant, nunquam ita ad curas intento Vitellio ut voluptatum oblivisceretur.

68 Et quidem partes modeste distraxerat: apud victores orta seditio, ludicro initio, *ni* numerus cæsorum invidiam bello auxisset. Discubuerat Vitellius Ticini,  
2 adhibito ad epulas Verginio. Legati tribunique, ex moribus imperatorum, severitatem æmulantur vel tempestivis conviviis gaudent; perinde miles intentus aut licenter agit. Apud Vitellium omnia indisposita, tumultuosa, pervigiliis ac bacchanalibus quam disciplinæ et  
3 castris propiora. Igitur duobus militibus, altero legionis quintæ, altero e Gallis auxiliaribus, per lasciviam ad certamen luetandi accensis, postquam legionarius prociderat, insultante Gallo, et iis qui ad spectandum convenerant in studia diductis, erupere legionarii in  
4 perniciem auxiliorum, ac duæ cohortes interfectæ. Remedium tumultus fuit alias tumultus. Pulvis procul et arma aspiciebantur: conclamatum repente quartam decimam legionem, verso itinere, ad prælium venire.  
5 Sed erant agminis coactores: agniti dempsere sollicitudinem. Interim Verginii servus forte obvius ut percussor Vitelli insimulatur. Et ruebat ad convivium miles, mortem Verginii exposcens. Ne Vitellius quidem, quanquam ad omnes suspiciones pavidus, de inno-  
6 centia ejus dubitavit. Aegre tamen colibiti, qui exi-  
tium consularis, et quondam dueis sui, flagitabant. Nec quemquam sæpius quam Verginium omnis seditio infestavit. Manebat admiratio viri et fama: sed ode-  
69 rant ut fastiditi. Postero dic Vitellius, senatus lega-

A. D. 69.]

tione quam ibi opperiri jusserset audita, transgressus in castra, ultiro pietatem militum collaudavit, frementibus auxiliis, tantum impunitatis atque arrogantiæ legionariis accessisse. Batavorum cohortes ne quid truculentius 2 auderent, in Germaniam remissæ, principium interno simul externoque bello parantibus fatis. Reddita civi-3 tatibus Gallorum auxilia, ingens numerus et prima statim defectione inter inania belli assumptus. Cætc-4 rum ut largitionibus affectæ jam imperii opes sufficerent, amputari legionum auxiliorumque numeros jubet, vetitis supplementis; et promiscuae missiones offerbantur. Exitiable id reipublicæ, ingratum militi, eui eadem 5 munia inter paucos, periculaque ac labor crebrius redibant. Et vires luxu corrumpebantur, contra veterem disciplinam et instituta majorum, apud quos virtute quam pecunia res Romana melius stetit.

Inde Vitellius Cremonam flexit, et, spectato munere 70 Cæcinae, insistere Bedriacensibus campis ac vestigia recentis victoriæ lustrare oculis concupivit. Fœdum 2 atque atrox spectaculum. Intra quadragesimum pugnæ diem lacera corpora, trunci artus, putres virorum equorumque formæ, infecta tabo humus, protritis arboribus ac frugibus dira vastitas. Nec minus inhumana pars 3 viæ, quam Cremoneuses lauru rosaque constraverant, exstructis altaribus cæsisque victimis regium in morem; que, læta in præscens, mox perniciem ipsis fecere. Ade-4 rant Valens et Cæcina, monstrabantque pugnæ locos: hinc irrupisse legionum agmen, hinc equites coortos, inde circumfusas auxiliorum manus. Jam tribuni præfectique, sua quisque facta extollentes, falsa, vera, aut majora vero miscebant. Vulgus quoque militum elati-5 more et gaudio deflectere via, spatia certaminum recognoscere, aggerem armorum, strucs corporum intueri,

mirari. Et erant quos varia fors rerum lacrimaeque et misericordia subiret. At non Vitellius flexit oculos, nec tot millia insepultorum civium exhorruit. Laetus ultiro, et tam propinquae sortis ignarus, instaurabat sacrum dñs loci.

71 Exin Bononiæ a Fabio Valente gladiatorum spectaculum editur, advecto ex urbe cultu. Quantoque magis propinquabat, tanto corruptius iter, immixtis histrionibus et spadonum gregibus et cætero Neronianæ aulæ ingenuo. Namque et Neronem ipsum Vitellius admiratione celebrabat, sectari cantantem solitus, non necessitate, qua honestissimus quisque, sed luxu et saginæ mancipatus emptusque. Ut Valenti et Cæcinæ vacuos honoris menses aperiret, coaretati aliorum consulatus, dissimulatus Marcii Macri, tanquam Othonianarum partium ducis; et Valerium Marinum destinatum a Galba consulem distulit, nulla offensa, sed mitem et injuriam segniter laturum. Pedanius Costa omittitur, ingratus principi, ut adversus Neronem ausus, et Virginii extimulato: sed alias protulit causas. Actæque insuper Vitellio gratiæ, consuetudine servitii.

72 Non ultra paucos dies, quanquam acribus initiis cœptum, mendacium valuit. Extiterat quidam Scribonianum se Camerinum ferens, Neronianorum temporum metu in Histria occultatum, quod illic clientelæ et agri veterum Crassorum ac nominis favor mauebat. Igitur deterrimo quoque in argumentum fabulæ assumpto, vulgus credulum et quidam militum, errore veri seu turbarum studio, certatim aggregabantur; cum pertractus ad Vitellium, interrogatusque quisnam mortalium esset, postquam nulla dictis fides et a domino noscebatur, conditione fugitivus, nomine Geta, sumptum de eo supplicium in servilem modum.

A. D. 69.]

Vix credibile memoratu est quantum superbiæ socor- 73  
 diaeque Vitellio adoleverit, postquam speculatores e Syria  
 Judæaque adactum in verba ejus Orientem nuntiavere.  
 Nam etsi vagis adhuc et incertis auctoribus, erat tamen 2  
 in ore famaque Vespasianus, ac plerumque ad nomen  
 ejus Vitellius excitabatur. Tum ipse exercitusque, ut  
 nullo æmulo, sævitia, libidine, raptu in externos mores  
 proruperant. At Vespasianus bellum armaque, et pro- 74  
 eul vel juxta sitas vires, circumspectabat. Miles ipsi  
 adeo paratus, ut præeuntem sacramentum, et fausta  
 Vitellio omnia precantem, per silentium audierint. Mu- 2  
 ciani animus nec Vespasiano alienus et in Titum pronior.  
 Præfectus Ægypti *Ti.* Alexander consilia sociaverat.  
 Tertiam legionem, quod e Syria in Moesiam transisset,  
 suam numerabat. Cæteræ Illyrici legiones secuturæ 3  
 sperabantur; namque omnes exercitus flammaverat  
 arrogantia venientium a Vitellio militum, quod truces  
 corpore, horridi sermone, cæteros ut impares irridebant.  
 Sed in tanta mole belli plerumque cunctatio; et Vespa- 4  
 sianus, modo in spem erectus, aliquando adversa repu-  
 tabat:—"Quis ille dies foret, quo sexaginta ætatis annos  
 et duos filios juvenes bello permitteret? Esse privatis  
 cogitationibus progressum, et prout velint, plus minusve  
 sumi ex fortuna: imperium cupientibus nihil medium  
 inter summa aut præcipitia." Versabatur ante oculos 75  
 Germanici exercitus robur, notum viro militari: suas  
 legiones civili bello inexpertas, Vitellii vietrices, et  
 apud victos plus querimoniarum quam virium. Fluxam 2  
 per discordias militum fidem, et periculum ex sim-  
 gulis: quid enim profuturas cohortes alasque, si unus  
 alterque præsenti facinori paratum ex diverso præ-  
 mium petat? Sic Scribonianum sub Claudio inter- 3  
 fectum; sic percussorem ejus Volaginium e gregario.

ad summa militiae provectum. Facilius universos impelli quam singulos vitari. His favoribus nutantem et alii legati amicique firmabant, et Mucianus, post multos secerdosque sermones jam et coram ita locutus :—

2 “ Omnes qui magnarum rerum consilia suscipiunt, aestimare debent an quod inchoatur reipublicæ utilc, ipsis gloriosum, aut promptum effectu, aut certe non arduum sit. Simul ipse qui suadet considerandus est, adjiciatue consilio periculum suum, et, si fortuna cœptis affuerit, 3 cui summum decus acquiratur. Ego te, Vespasiane, ad imperium voco, tam salutare reipublicæ, quam tibi magnificum. Juxta deos in tua manu positum est. Nec speciem adulantis expaveris. A contumelia quam a 4 laude propius fuerit post Vitellium eligi. Non adversus divi Augusti acerrimam mentem, nec adversus cautissimam Tiberii senectutem, ne contra Caii quidem, aut Claudii, vel Neronis, fundatam longo imperio domum exsurgimus. Cessisti etiam Galbae im- 5 ginibus. Torpere ultra, et polluendam perdendam que rempublicam relinquere, sopor et iguavia videtur, etiam si tibi, quam inhonesta, tam tuta servitus 6 esset. Abiit jam et transvectum est tempus, quo posses videri concupisse: confugiendum est ad imperium. An excidit trucidatus Corbulo? splendi- dior origine quam nos sumus, fateor; sed et Nero 7 nobilitate natalium Vitellium anteibat. Satis clarus est apud timentem quisquis timetur. Et posse ab exercitu principem fieri sibi ipse Vitellius documento, nullis stipendiis, nulla militari fama, Galbae odio provectus. 8 Ne Othonem quidem ducis artc aut exercitus vi, sed præpropera ipsius desperatione victum, jam desiderabilem et magnum principem fecit, cum interim spargit legiones, exarmat cohortes, nova quotidie bello semina

A. D. 69.]

ministrat. Si quid ardoris ac ferociæ miles habuit, popinis et comissionibus et principis imitatione deteritur. Tibi e Judea et Syria et Ægypto novem legiones 9 integræ, nulla acie exhaustæ, non discordia corruptæ, sed firmatus usu miles, et belli domitor externi; clas-  
sium, alarum, cohortium robora, et fidissimi reges, et tua ante omnes experientia. Nobis nihil ultra arrogabo, 77 quam ne post Valentem et Cæcinam numeremur. Ne tamen Mucianum socium spreveris, quia æmulum non experiris. Me Vitellio antepono, te mihi. Tuæ domui 2 triumphale nomen, duo juvenes, capax jam imperii alter, et primis militie annis apud Germanicos quoque exercitus clarus. Absurdum fuerit non cedere imperio ei, cuius filium adoptaturus essem, si ipse imperarem. Cæterum inter nos non idem prosperarum 3 adversarumque rerum ordo erit. Nam si vincimus, honorem quem dederis habebo: disserimen ac pericula ex æquo patiemur. Immo, ut melius est, tuos exercitus rege, mihi bellum et præliorum incerta trade. Acriore hodie disciplina victi quam victores agunt. 4 Hos ira, odium, ultiōnis cupiditas ad virtutem accedit: illi per fastidium et contumaciam hebescunt. Aperiet et recludet coniecta et tumescentia victricium partium vuluera bellum ipsum. Nec mihi major in tua vigilan- 5 tia, parsimonia, sapientia, fiducia est quam in Vitellii torpore, inscitia, sævitia. Sed meliorem in bello causam quam in pace habemus: nam qui deliberant, desciverunt.” Post Muciani orationem cæteri audentius 78 circumsistere, hortari, responsa vatum et siderum motus referre. Nec erat intactus tali superstitione, ut 2 qui mox, rerum dominus, Seleucum quemdam mathematicum, rectorem et præscium palam habuerit. Recursabant animo vetera omina. Cupressus arbor in agris 3

ejus, conspicua altitudine, repente prociderat, ac postera die, eodem vestigio resurgens, procera et latior virebat. Grande id prosperumque consensu haruspicum, et summa claritudo juveni admodum Vespasiano promissa.

4 Sed primo triumphalia et consulatus et Judaicæ victoriæ decus implèsse fidem ominis videbantur: ut hæc adeptus 5 est, porteudi sibi imperium credebat. Est Judæam inter Syriamque Carmelus: ita vocant montem deumque. Nec simulacrum deo aut templum: sic tradidere ma-  
6 jores, aram tantum et reverentiam. Illic sacrificanti Vespasiano, cum spes occultas versaret animo, Basilides sacerdos, inspectis identidem extis, "Quicquid est," inquit, "Vespasiane, quod paras, seu domum exstruere, seu prolatare agros, sive ampliare servitia, datur tibi magua sedes, ingeentes termini, multum hominum."  
7 Has ambages et statim exceperat fama et tunc aperiebat. Nec quicquam magis in ore vulgi. Crebriores apud ipsum sermones, quanto sperantibus plura dicun-  
79 tur. Haud dubia destinatione discessere, Mucianus Antiochiam, Vespasianus Cæsaream: illa Syriae, hæc Judææ caput est.

Initium ferendi ad Vespasianum imperii Alexandriæ cœptum, festinante Tiberio Alexandro, qui Kalendis 2 Juliis sacramento ejus legiones adegit. Isque primus principatus dies in posterum celebratus, quamvis Judæus exercitus quinto Nonas Julias apud ipsum jurasset, eo ardore ut ne Titus quidem filius exspectaretur, Syria remeans, et consiliorum inter Mucianum ac patrem nuntius. Cuncta impetu militum acta, non parata con-  
80 cione, non conjunctis legionibus. Dum quæritur tempus, locus, quodque in re tali difficillimum est, priua vox, dum animo spes, timor, ratio, casus obversantur, egressum cubiculo Vespasianum pauci milites, solito assisten-

A. D. 69.]

tes ordine ut legatum salutaturi, "Imperatorem" salutare. Tum cæteri accurrere, Cæsarem et Augustum et omnia principatus vocabula cumulare. Mens a metu ad fortunam transierat. In ipso nihil tumidum, arrogans, aut in rebus novis novum fuit. Ut primum tantæ mutationis offusam oculis caliginem disjecit, militariter locutus læta omnia et affluentia excepit. Namque id ipsum opperiens Mucianus alacrem militem in verba Vespasiani adegit. Tum Antiochenium theatrum ingressus, ubi illis consultare mos est, concurrentes et in adulationem effusos alloquitur, satis decorus etiam Græca facundia, omniumque quæ diceret atque ageret arte quadam ostentator. Nihil æque provinciam exercitum que accedit quam quod asseverabat Mucianus statuisse Vitellium, ut Germanicas legiones in Syriam ad militiam opulentam quietamque transferret, contra Syriacis legionibus Germanica hiberna, cælo ac laboribus dura, mutarentur. Quippe et provinciales sueto militum contubernio gaudebant, plerique necessitudinibus et propinquitatibus mixti; et militibus vetustate stipendiorum nota et familiaria castra in modum penatiū diligebantur. Ante Idus Julias Syria omnis in eodem sacramento fuit. Accessere cum regno Sohæmus haud spernendis viribus, Antiochus vetustis opibus ingens, et inservientium regum ditissimus. Mox per occultos suorum numeros excitus ab urbe Agrippa, ignaro adhuc Vitellio, celeri navigatione properaverat. Nec minore animo regina Berenice partes juvabat, florens ætate formaque, et seni quoque Vespasiano magnificentia munerum grata. Quicquid provinciarum alluitur mari Asia atque Achaia tenuis, quantumque introrsus in Pontum et Armenios patescit, juravere. Sed inermes legati regebant, nondum additis Cappadociæ legionibus. Consilium de sum-

ma rerum Beryti habitum. Illuc Mucianus cum legatis  
tribunisque et splendidissimo quoque centurionum ac mi-  
litum venit, et e Judaico exercitu lecta decora. Tantum  
simul peditum equitumque, et aemulantium inter se re-  
gum paratus, speciem fortunae principalis effecerant. Pri-  
ma belli cura, agere delectus, revocare veteranos. Des-  
tinantur validae civitates exercendis armorum officinis;  
apud Antiochenses aurum argentumque signatur; eaque  
cuneta per idoneos ministros, suis quaque locis, festina-  
bantur. Ipse Vespasiauus adire, hortari, bonos laude,  
segnes exemplo incitare, saepius quam coercere, vitia  
magis amicorum quam virtutes dissimulans. Multos  
praefecturis et prourationibus, plerosque senatorii or-  
dinis honore percoluit, egregios viros et mox summa  
adeptos; quibusdam fortuna pro virtutibus fuit. Do-  
nativum militi neque Mucianus prima concione, nisi  
modice, ostenderat; ne Vespasianus quidem plus civili  
bello obtulit, quam alii in pace, egregie firmus adversus  
militarem largitionem, eoque exercitu meliore. Missi  
ad Parthum Armeniumque legati, provisumque ne,  
versis ad civile bellum legionibus, terga nudarentur.  
Titum instare Judaeæ, Vespasianum obtainere clausa  
Ægypti placuit. Sufficere videbantur adversus Vitel-  
lium pars copiarum et dux Mucianus et Vespasiani  
nomen, ac nihil arduum fatis. Ad omnes exercitus  
legatosque scriptæ epistolæ, præceptumque, ut prætori-  
anos Vitellio infensos recuperandæ militiae præmio invi-  
tarent. Mucianus cum expedita manu, socium magis  
imperii quam ministrum agens, non lento itinere, ne  
cunctari videretur, neque tamen properans, gliscere  
famam ipso spatio sinebat, gnarus modicas vires sibi, et  
majora credi de absentibus. Sed legio sexta et tredecim  
vexillariorum millia ingenti agmine sequebantur. Clas-

A. D. 69.]

sem e Ponto Byzantium adigi jusserset, ambiguus consilii, num, omissa Mœsia, Dyrrhachium pedite atque equite, simul longis navibus versum in Italiam mare clauderet, tuta pone tergum Achaia Asiaque, quas inermes exponi Vitellio, ni præsidiis firmarentur; atque ipsum Vitellium in incerto fore quam partem Italiam protegeret, si sibi Brundisium Tarentumque et Calabriæ Lucaniæque litora infestis classibus peterentur. Igitur 84 navium, militum, armorum paratu strepere provinciæ. Sed nihil æque fatigabat quam pecuniarum conquisitio: eos esse belli civilis nervos dictitans Mucianus, non jus aut verum in cognitionibus, sed solam magnitudinem opum spectabat. Passim delationes, et locupletissimus 2 quisque in prædam correpti. Quæ gravia atque intolleranda, sed necessitate armorum excusata, etiam in pace mansere, ipso Vespasiano, inter initia imperii, ad obtinendas iniquitates haud perinde obstinante, donec indulgentia fortunæ et pravis magistris didicit aususque est. Propriis quoque opibus Mucianus bellum juvit, largus 3 privatim, quod avidius de re publica sumeret. Cæteri conferendarum pecuniarum exemplum secuti: rarissimus quisque eandem in recuperando licentiam habuerunt.

Accelerata interim Vespasiani cœpta Illyrici exercitus 85 studio, transgressi in partes. Tertia legio exemplum cæteris Mœsiæ legionibus præbuit. Octava erat ac septima Cladiana imbutæ favore Othonis, quamvis prælio non interfuerint. Aquileiam progressæ, proturbatis qui de Othone nuntiabant, laceratisque vexillis nomen Vitellii præfcrentibus, rapta postremo pecunia et inter se divisa, hostiliter egerant. Unde metus, et ex metu consilium: posse imputari Vespasiano quæ apud Vitellium excusanda erant. Ita tres Mœsicæ 3

legiones per epistolas alliciebant Pannonicum exercitum, aut abnuenti vim parabaut. In eo motu Aponius Saturninus, Mœsiæ rector, pessimum facinus audet, misso centurione ad interficiendum Tettium Julianum, septimæ legionis legatum, ob simultates, quibus causam partium prætendebat. Julianus, comperto discrimine, et guaris locorum adscitis, per avia Mœsiæ ultra montem Hænum profugit. Nec deinde civili bello interfuit, per varias moras susceptum ad Vespasianum iter trahens, et ex 86 nuntiis cunctabundus aut properans. At in Pannonia tertia decima legio ac septima Galbiana, dolorem iramque Bedriacensis pugnæ retinentes, haud cunctanter 2 Vespasiano accessere, vi præcipua Primi Antonii. Is legibus nocens et tempore Neronis falsi damnatus, inter alia belli mala, senatorium ordinem recuperaverat. Præpositus a Galba septimæ legioni scriptitâssc Othoni credebatur, ducem se partibus offerens; a quo neglectus in nullo Othoniani belli usu fuit. Labantibus Vitelli rebus Vespasianum secutus grande momentum addidit, strenuus manu, sermone promptus, serendæ in alios invidiæ artifex, discordiis et seditionibus potens, raptor, largitor, pace pessimus, bello non spernendus.

4 Juncti inde Mœsici ac Pannonicci exercitus Dalmaticum militem traxere, quanquam consularibus legatis nihil turbantibus. Titus Ampius Flavianus Pannoniam, Pompeius Silvanus Dalmatiæ tenebant, divites senes.

5 Sed procurator aderat Cornelius Fuscus, vigens ætate, claris natalibus. Prima juventa, quietis cupidine, senatoriū ordinem exuerat. Idem pro Galba dux coloniæ suæ, eaque opera procreatione in adeptus, susceptis Vespasiani partibus, acerrimam bello facem prætulit: non tam præmiis periculorum quam ipsis periculis lætus, pro certis et olim partis, nova, ambigua,

A. D. 69.]

ancipitia malebat. Igitur movere et quatere, quicquid 7 usquam ægrum foret, aggrediuntur. Scriptæ in Britanniam ad quartadecimanos, in Hispaniam ad primanos epistolæ, quod utraque legio pro Othonে adversa Vitellio fuerat. Sparguntur per Gallias literæ; mo-8 mentoque temporis flagrabat ingens bellum, Illyricis exercitibus palam desciscentibus, cæteris fortunam seguturis.

✓ Dum hæc per provincias a Vespasiano ducibusque 87 partium geruntur, Vitellius contemptior in dies segniorque, ad omnes municipiorum villarumque amœnitates resistens, gravi urbem agmine petebat. Sexa-2 ginta millia armatorum sequebantur, licentia corrupta; calonum numerus amplior, procacissimis etiam inter servos lixarum ingenii; tot legatorum amicorumque comitatus inhabilis ad parendum, etiam si summa modestia regeretur. *J*Onerabant multitudinem obvii 3 ex urbe senatores equitesque, quidam metu, multi per adulationem, cæteri ac paulatim omnes, ne, aliis proficiiscentibus, ipsi remanerent. Aggregabantur e plebe, 4 flagitiosa per obsequia Vitellio cogniti, scurræ, histriones, aurigæ, quibus ille amicitiarum dehonestamentis mire gaudebat. Nec coloniæ modo aut municipia, con-5 gestu copiarum, sed ipsi cultores arvaque, maturis jam frugibus, ut hostile solum vastabantur. Multæ et 88 atroces inter se militum cædes, post seditionem Ticini cœptam manente legionum auxiliorumque discordia; ubi adversus paganos certandum foret, consensu. Sed 2 plurima strages ad septimum ab urbe lapidem. Singulis ibi militibus Vitellius paratos cibos ut gladiatoriæ saginam dividebat; et effusa plebes totis se castris miscuerat. Incuriosos milites (vernacula utebantur 3 urbanitate,) quidam spoliavere, abscisis furtim balteis,

an accincti forent rogitantes. Non tulit ludibrium insolens contumeliæ animus: iuermem populum gladiis <sup>4</sup> invasere. Cæsus inter alios pater militis, cum filium comitaretur; deinde agnitus, et, vulgata cæde, temperatum ab innoxiiis. In urbe tamen trepidatum, præcurrentibus passim militibus. Forum maxime petebant, <sup>5</sup> cupidine visendi locum in quo Galba jacuisset. Nec minus sævum spectaculum erant ipsi, tergis ferarum et ingentibus telis horrentes, cum turbam populi per inscitiam parum vitareut, aut, ubi lubrico viæ vel occursu alicujus procidissent, ad jurgium, mox ad manus et ferrum transirent. Quin et tribuni præfectique cum <sup>89</sup> terrore et armatorum catervis volitabant. Ipse Vitellius a ponte Mulvio, insigni equo, paludatus accinctusque, senatum et populum ante se ageus, quo minus ut captam urbem ingrederetur, amicorum consilio deterritus, sumpta prætexta et composito ag- <sup>2</sup> mine incessit. Quatuor legionum aquilæ per frontem, totideinque circa e legionibus aliis vexilla, mox duodecim alarum signa, et post peditum ordines eques; dein quatuor et triginta cohortes, ut nomina gentium <sup>3</sup> aut species armorum forent, discretæ. Ante aquilam præfæcti castrorum tribunique et primi centurionum, candida veste; cæteri juxta suam quisque centuriam, armis donisque fulgentes. Et militum phaleræ torquesque splendebant. Decora facies, et non Vitellio prin- <sup>4</sup> cipe dignus exercitus. Sic Capitolium ingressus, atque ibi matrem complexus, Augustæ nomine honoravit. <sup>90</sup> Postera die, tanquam apud alterius civitatis senatum populumque, magnificam orationem de semet ipso prompsit, industriam temperantianque suam laudibus attollens, consciis flagitiorum ipsis qui aderant omnique Italia, per quam somno et luxu pudendus incesserat,

A. D. 69.]

Vulgus tamen, vacuum curis, et sine falsi verique dis- 2  
 crimine solitas adulationes edoctum, clamore et vocibus  
 adstrepebat; abnuentique nomen Augusti expressere  
 ut assumeret, tam frustra quam recusaverat. Apud 91  
 civitatem, cuncta interpretantem, funesti ominis loco  
 acceptum est, quod maximum pontificatum adeptus  
 Vitellius de cærimoniis publicis XV. Kalendas Augustas  
 edixisset, antiquitus infausto die Cremerensi Alliensique  
 cladibus. Adeo omnis humani divinique juris expers, 2  
 pari libertorum, amicorum socordia, velut inter tem-  
 lulentos agebat. Sed comitia consulum cum caudidatis  
 civiliter celebrans, omnem infimæ plebis rumorem, in  
 theatro ut spectator, in circœ ut fautor, affectavit.  
 Quæ grata sane et popularia, si a virtutibus pro- 3  
 ficiucerentur, memoria vitæ prioris indecora et vilia  
 accipiebantur. Ventitabat in senatum, etiam cum  
 parvis de rebus patres consulerentur. Ac forte Priscus 4  
 Helvidius, prætor designatus, contra studium ejus  
 censuerat. Commotus primo Vitellius, non tamen  
 ultra quam tribuuos plebis in auxilium spretæ potestatis  
 advocavit. Mox mitigautibus amicis, qui altiorem 5  
 iracundiam ejus verebantur, nihil novi accidisse, re-  
 spondit, quod duo senatores in re publica dissentirent;  
 solitum se etiam Thraseæ contradicere. Irrisere pleri- 6  
 que impudentiam æmulationis; aliis id ipsum placebat,  
 quod neminem ex præpotentibus, sed Thrascam, ad  
 exemplar veræ gloriæ legisset. Præposuerat prætoria- 92  
 nis Publum Sabinum, a præfectura cohortis, Julium  
 Priscum tum centurionem: Priscus Valentis, Sabinus  
 Cæcinæ gratia pollebant. Inter discordes Vitellio nihil 2  
 auctoritatis. Munia imperii Cæcina ac Valens obibant,  
 olim anxii odiis, quæ bello et castris male dissimulata  
 pravitas amicorum et secunda gignendis inimicitiis

civitas auxerat, dum ambitu, comitatu, et immensis  
 3 salutantium agminibus contendunt comparanturque,  
 variis in hunc aut illum Vitellii inclinationibus. Nec  
 unquam satis fida potentia, ubi nimia est. ✓ Simul ipsum  
 Vitellium, subitis offensis aut intempestivis blanditiis  
 4 mutabilem, contemnebant metuebantque. Nec co segnius  
 invaserant domos, hortos, opesque imperii, cum  
 flebilis et egens nobilium turba, quos ipsos liberosque  
 patriæ Galba reddiderat, nulla principis misericordia  
 5 juvarentur. Gratum primoribus civitatis etiam plebs  
 approbavit, quod reversis ab exilio jura libertorum  
 concessisset, quanquam id omni modo servilia ingenia  
 corrumpebant, abditis pecuniis per occultos aut ambicio-  
 nos sinus, et quidam in domum Cæsaris transgressi,  
 atque ipsis dominis potentiores. ✓

93 Sed miles, plenis castris et redundantie multitudine,  
 in porticibus aut delubris et urbe tota vagus, non prin-  
 cipia noscere, non servare vigilias, neque labore  
 firmari: per illecebras urbis et, in honesta dictu, corpus  
 2 otio, animum libidinibus imminuebant. Postremo, ne  
 salutis quidem cura, infamibus Vaticani locis magna  
 pars tetendit; unde crebræ in vulgus mortes. Et  
 adiacente Tiberi, Germanorum Gallorumque obnoxia  
 morbis corpora fluminis aviditas et aestus impatientia  
 3 labefecit. Insuper confusus pravitate vel ambitu ordo  
 militiae. Sedecim prætoriæ, quatuor urbanæ cohortes  
 scriebantur, quis singula millia inessent. Plus in eo  
 delectu Valens audebat, tanquam ipsum Cæcinam pe-  
 4 riculo exemisset. Sane adventu ejus partes convaluerant,  
 et sinistrum lenti itineris rumorem prospero  
 prælio verterat. Omnisque inferioris Germaniae miles  
 Valentem assectabatur; unde primum creditur Cæcinæ  
 94 fides fluitâssc. Cæterum non ita ducibus iudulxit

A. D. 69.]

Vitellius ut non plus militi liceret. Sibi quisque militiam sumpscere: quamvis indignus, si ita maluerat, urbanæ militiæ ascribebatur; rursus bonis remanere inter legionarios aut alares volentibus permissum. Nec 2 decrant qui vellent, fessi morbis et intemperie in cæli incusantes. Robora tamen legionibus alisque subtræcta, convulsum castrorum decus, viginti millibus e toto exercitu permixtis magis quam electis.

Concionante Vitellio, postulantur ad supplicium 3 Asiaticus et Flavius et Rufinus, duces Galliarum, quod pro Vindice bellâssent. Nec coërcebat ejusmodi voces Vitellius: super insitam marcenti animo ignaviam, conscius sibi instare donativum, et deesse pecuniam, omnia alia militi largiebatur. Liberti principum con- 4 ferre pro numero manciorum, ut tributum, jussi. Ipse, sola perdendi cura, stabula aurigis exstruere, circum gladiatorum ferarumque spectaculis opplere, tanquam in summa abundantia pecuniæ illudere. Quin et natalem Vitellii diem Cæcina ac Valens, editis 95 tota urbe vicatim gladiatoribus, eelebravere, ingenti paratu et ante illum diem insolito. Lætum fœdissimo 2 cuique, apud bonos invidiæ fuit, quod exstructis in campo Martio aris inferias Neroni fecisset. Cæsæ 3 publice victimæ crematæque; facem Augustales subdividere: quod sacerdotium, ut Romulus Tatio regi, ita Cæsar Tiberius Juliae genti sacravit. Nondum quartus + a victoria mensis, et libertus Vitellii, Asiaticus, Polyclitos, Patrobios, et vetera odiorum nomina æquabat. Nemo in illa aula probitate aut industria certavit; unum ad potentiam iter, prodigiis epulis et sumptu ganeaque satiare inexplebiles Vitellii libidines. Ipse abunde 5 ratus si præsentibus frueretur, nec in longius consultans, novies millies scstertium paucissimis mensibus

6 intervertisse creditur. Magna et misera civitas, eodem anno Othonem Vitelliumque passa, inter Vinios, Fabios, Icelos, Asiaticos, varia et pudenda sorte agebat, donec successere Mucianus et Marcellus, et magis alii homines quam alii mores.

96 Prima Vitellio tertiae legionis defectio nuntiatur, missis ab Aponio Saturnino epistolis, antequam is quo-  
2 que Vespasiani partibus aggregaretur. Sed neque Apo-  
nius cuncta, ut trepidans re subita, perscripserat, et  
amici adulantes mollius interpretabantur: unius le-  
gionis eam seditionem, cæteris exercitibus constare  
3 fidem. In hunc modum etiam Vitellius apud milites  
disserruit, prætorianos nuper exauktoratos insectatus, a  
quibus falsos rumores dispergi, nec ullum civilis belli  
metum, asseverabat, suppresso Vespasiani nomine, et  
vagis per urbem militibus qui sermones populi coër-  
97 cerent. Id præcipuum alimentum famæ erat. Auxilia  
tamen e Germania Britanniaque et Hispaniis excivit,  
segniter et necessitatem dissimulans. Perinde legati  
provinciaeque cunctabantur, Hordeonius Flaccus sus-  
pectis jam Batavis anxius proprio bello, Vettius Bo-  
lanus nunquam satis quieta Britannia, et uterque am-  
2 bigui. Neque ex Hispaniis properabatur, nullo tum  
ibi consulari: trium legionum legati, pares jure et,  
prosperis Vitellii rebus, certaturi ad obsequium, ad-  
3 versam ejus fortunam ex æquo detrectabant. In Africa  
legio cohortesque, delectæ a Clodio Macro, mox a Galba  
dimissæ, rursus jussu Vitellii militiam cepere. Simul  
4 cætera juventus dabat impigre nomina. Quippe inte-  
grum illic ac favorabilem proconsulatum Vitellius, fa-  
mosum invisumque Vespasianus egerat: proinde socii  
de imperio utriusque conjectabant. Sed experimen-  
98 tum contra fuit. Ac primo Valerius Festus, legatus,

A. D. 69.]

studia provincialium cum fide juvit; mox nutabat, palam epistolis edictisque Vitellium, occultis nuntiis Vespasianum fovens, et hæc illave defensurus, prout invaluerent. Deprehensi cum literis edictisque Vespasiani per Rætiam et Gallias militum et centurionum quidam, ad Vitellium missi necantur: plures fecellere, fide amicorum aut suomet astu occultati. Ita Vitelli 3 paratus noscebantur, Vespasiani consiliorum pleraque ignota, primum socordia Vitellii; dein Pannonicæ Alpes præsidiis insessæ nuntios retinebant. Mare quoque Etesiarum flatu in Orientem navigantibus secundum, inde adversum erat. Tandem irruptione hostium, 99 atrocius undique nuntiis exterritus, Cæcinam ac Valentem expedire ad bellum jubet. Præmissus Cæcina: Valentem e gravi corporis morbo tum primum assurgentem infirmitas tardabat. Longe alia proficiscentis 2 ex urbe Germanici exercitus species: non vigor corporibus, non ardor animis; lentum et rarum agmen, fluxa arma, segnes equi; impatiens solis, pulveris, tempestatum, quantumque liebes ad sustinendum laborem miles, tanto ad discordias promptior. Accedebat 3 hue Cæciuae ambitio vetus, torpor recens nimia fortunæ indulgetia soluti in luxum: seu perfidiam meditanti infringere exercitus virtutem inter artes erat. Credere 4 plerique Flavii Sabini consiliis concussam Cæcinæ mentem, ministro sermonum Rubrio Gallo: rata apud Vespasianum fore pacta transitionis. Simul odiorum 5 invidiæque erga Fabium Valentem admonebatur, ut impar apud Vitellium, gratiam viresque apud novum priuicipem pararet.

Cæcina e complexu Vitellii multo cum honore digressus, partem equitum ad occupandam Cremonam præmisit. Mox + vexilla in quatuor decum XIII. legi-

ouum, dein quinta et duodevicesima secutæ; postremo agmine unactvicesima Rapax et prima Italica incessere, cum vexillariis trium Britannicarum legionum et electis auxiliis. Profecto Cæcina scripsit Fabius Valens exercitu quem ipse duetaverat, ut in itinere opperiretur: sic sibi cum Cæcina convenisse; qui præsens, eoque validior, immutatum id consilium finxit, ut ingruenti bello tota mole occurreretur. Ita accelerare legiones Cremonam, pars Hostiliam petere jussæ: ipse Ravennam devertit, prætexto classem alloquendi. Mox Patavii secretum componendæ proditionis quæsitum. Namque Lucilius Bassus, post præfecturam alæ, Ravennati simul ac Misenensi classibus a Vitellio præpositus, quod non statim præfecturam prætorii adeptus foret, iniquam iracundiam flagitiosa perfidia ulciscebatur. Nec sciri potest traxeritne Cæcinam, an (quod evenit inter malos, ut et similes sint,) eadem illos pravitas impulerit. Scriptores temporum, qui potiente rerum Flavia domo monumenta belli hujusce composuerunt, curam pacis et amorem reipublicæ, corruptas in adulationem causas, tradidere. Nobis, super insitam levitatem, et prodi Galba vilem mox fidem, æmulatione etiam invidiaque, ne ab aliis apud Vitellium anteirentur, pervertisse ipsum videntur. Cæcina legiones assecutus, centurionum militumque animos obstinatos pro Vitellio variis artibus subruebat. Basso eademi molienti minor difficultas erat, lubrica ad mutandum fidem classe ob memoriam recentis pro Othonem militiæ.

C. CORNELII TACITI

AB EXCESSU DIVI AUGUSTI

H I S T O R I A R U M

LIBER TERTIUS.

---

MELIORE fato fideque partium Flavianarum duces consilia belli tractabant. Pœtovionem in hiberna tertiae decimæ legionis convenerant. Illic agitavere, placet retne obstrui Pannoniæ Alpes, donec a tergo vires universæ consurgerent, an ire comminus et certare pro Italia constantius foret. Quibus opperiri auxilia et trahere bellum videbatur, Germanicarum legionum vim famamque extollebant, et advenisse mox cum Vitellio Britannici exercitus robora: ipsis nec numerum parcm pulsarum nuper legionum; et quanquam atrociter loquerentur, minorem esse apud victos animuni. Sed, insessis interim Alpibus, venturum cum copiis Orientis Mucianum. Superesse Vespasiano marc, classes, studia provinciarum, per quas velut alterius belli molem cieret. Ita salubri mora novas vires affore, et præsentibus nihil periturum. Ad ea Antonius Primus (is acerrimus belli concitor,) festinationem ipsis utilem, Vitellio existiosam disseruit. Plus socordiæ quam fiduciæ accessisse victoribus. Neque enim in procinctu et castris habitos: per omnia Italæ municipia desides, tantum hospitibus metuendos, quanto ferocius ante se egerint,

3 tanto cupidius insolitas voluptates hausisse. Circo  
 quoque ac theatris et amoenitate urbis emollitos, aut  
 valetudinibus fessos. Sed, addito spatio, redditum et  
 4 his robur meditatione belli. Nec procul Germaniam,  
 unde vires; Britanniam freto dirimi; juxta Gallias  
 Hispaniasque; utrinque viros, equos, tributa; ipsamque  
 Italiam et opes urbis; ac si inferre arma ultiro velint,  
 5 duas classes vacuumque Illyricum mare. Quid tum  
 claustra montium profutura? quid tractum in æstatem  
 aliam bellum? unde interim pecuniam et commeatus?  
 6 Quin potius eo ipso uterentur, quod Pannonicæ legiones,  
 deceptæ magis quam victæ, resurgere in ultionem pro-  
 7 perent, Mœsici exercitus integras vires attulerint. Si  
 numerus militum potius quam legionum putetur, plus  
 hinc roboris, nihil libidinum; et profuisse disciplinæ  
 ipsum pudorem. Equites vero ne tum quidem victos,  
 sed quanquam rebus adversis disjectam Vitellii aciem.  
 8 "Duæ tunc Pannonicæ ac Mœsicæ alæ perrupere  
 hostem: nunc sedecim alarum conjuncta signa pulsu-  
 sonituque et nube ipsa operient ac superfundent oblitos  
 præliorum equites equosque. Nisi quis retinet, idem  
 9 suasor auctorque consilii ero. Vos, quibus fortuna in  
 integro est, legiones continete: mihi expeditæ cohortes  
 sufflcient. Jam reseratam Italianam, impulsas Vitellii res  
 audietis. Juvabit sequi et vestigiis vinceutis insistere."  
 3 Hæc ac talia flagrans oculis, truci voce, quo latius audire-  
 tur (etenim se centuriones et quidam militum consilio mis-  
 cuerant,) ita effudit ut cautos quoque ac providos per-  
 moveret, vulgus et cæteri unum virum dueemque, spreta  
 2 aliorum segnitia, laudibus ferrent. Hane sui famam ea  
 statim concione commoverat, qua, recitatis Vespasiani  
 epistolis, non ut plerique incerta disseruit, huc illuc  
 tracturus interpretatione, prout conduxisset: aperte

A. D. 69.]

descendisse in causam videbatur, eoque gratior militibus erat, culpæ vel gloriæ socius. Proxima Cornelii Fusci 4 procuratoris auctoritas. Is quoque, inclementer in Vitellium invehi solitus, nihil spei sibi inter adversa reliquerat. T. Ampius Flavianus, natura ac senecta 2 cunctatior, suspicione militum irritabat, tanquam affinitatis cum Vitellio meminisset; idemque quod, cœptante legionum motu, profugus, dein sponte remeaverat, perfidiae locum quæsisse credebatur. Nam Flavianum, 3 omissa Pannonia, ingressum Italiam, et discrimini exemptum, rerum novarum cupido legati nomen resumere et misceri civilibus armis impulerat, suadente Cornelio Fusco, non quia industria Flaviani egebat, sed ut consulare nomen surgeutibus cum maxime partibus honesta specie prætenderetur. Cæterum ut trans- 5 mittere in Italiam impune et usui foret, scriptum Aponio Saturnino, cum exercitu Mœsico celeraret. Ac 2 ne inermes provinciæ barbaris nationibus exponerentur, principes Sarmatarum Iazygum, penes quos civitatis regimen, in commilitum adsciti. Plebem quoque et 3 vim equitum, qua sola valent, offerebant: remissum id munus, ne inter discordias externa molirentur, aut, majore ex diverso mercede, jus fasque exuerent. Tra- 4 huntur in partes Sido atque Italicus, reges Suevorum, quis vetus obsequium erga Romanos, et gens fidei commissæ patientior. Posita in latus auxilia, infesta Rætia, cui Porcius Septiminus procurator erat, incorruptæ erga Vitellium fidei. Igitur Sextilius Felix, cum ala Auriana 5 et octo cohortibus ac Noricorum juventute, ad occupandam ripam Æni fluminis, quod Rætos Noricosque interfluit, missus. Nec his aut illis prælium tentantibus, 6 fortuna partium alibi transacta.

Antonio, vexillarios e cohortibus et partem equitum 6

[A. U. C. 822.]

ad invadendam Italiam rapienti, comes fuit Arrius  
 Varus, strenuus bello; quam gloriam et dux Corbulo  
 2 et prosperæ in Armenia res addiderant. Idem secretis  
 apud Neronem sermonibus ferebatur Corbulonis virtutes  
 criminatus; unde, infami gratia primum pilum adepto,  
 læta ad præsens male parta, mox in perniciem verteret.  
 3 Sed Primus ac Varus, occupata Aquileia, *per* proxima  
 quæque et Opitergii et Altini lætis animis accipiuntur.  
 Relictum Altini præsidium adversus classem Ravennati-  
 tem, nondum defectione ejus audita. Inde Patavium et  
 4 Ateste partibus adjunxere. Illic cognitum tres Vitel-  
 lianas cohortes et alam, cui Sebonianæ nomen, ad  
 5 Forum Alieni ponte juncto consedisse. Placuit occasio  
 invadendi incuriosos: nam id quoque nuntiabatur.  
 Luce prima inermos plerosque oppressere. Prædictum  
 ut paucis interfectis cæteros pavore ad mutandam  
 6 fidem cogerent. Et fuere qui se statim dederent.  
 Plures, abrupto ponte, instanti hosti viam abstulerunt.  
 7 Vulgata Victoria, post principia belli secundum Fla-  
 vianos duæ legiones, septima Galbiana, tertia decima  
 Gemina, cum Vedio Aquila legato Patavium alacres  
 2 veniunt. Ibi pauci dies ad requiem sumpti, et Minu-  
 cius Justus præfектus castrorum legionis septimæ, quia  
 adductius quam civili bello imperitabat, subtractus  
 3 militum iræ ad Vespasianum missus est. Desiderata  
 diu res interpretatione gloriaque *in* majus accipitur,  
 postquam Galbæ imagines discordia temporum sub-  
 versas in omnibus municipiis recoli jussit Antonius,  
 decorum pro causa ratus, si placere Galbæ principatus  
 8 et partes revirescere crederentur. Quæsitum inde  
 quæ sedes bello legeretur. Verona potior visa, paten-  
 tibus circum campis ad pugnam equestrem, qua præ-  
 valchant: simul coloniam copiis validam auferre Vitellio,

A. D. 69.]

in rem famamque videbatur. Possessa ipso transitu 2 Vicetia; quod per se parum (etenim modicæ municipio vires,) magni momenti locum obtinuit, reputantibus illic Cæcinam genitum et patriam hostium duci ereptam. In Veronensibus pretium fuit: exemplo opibusq[ue] partes juvere. Et interjectus exercitus *per* Raetiam Juliasque 3 Alpes; ac ne pervium illa Germanicis exercitibus foret, obsepserat. Quæ ignara Vespasiano aut vetita: quippe Aquileiæ sisti bellum exspectarique Mucianum jubebat, adjiciebatque imperio consilium, quando Ægyptus, clausa annonæ, vectigalia opulentissimarum provinciarum obtinerentur, posse Vitellii exercitum egestate stipendii frumentique ad deditio[n]em subigi. Eadem Mucianus 4 crebris epistolis monebat, incruentam et sine luctu victoram et alia hujuscemodi prætexendo, sed gloriæ avidus atque omne belli decus sibi retinens. Cæterum ex distantibus terrarum spatiis consilia post res afferebantur. Igitur repantino incursu Antonius stationes 9 hostium irrupit, tentatisque levi prælio animis ex æquo discessum. Mox Cæcina inter Hostiliam, vicum Vero- 2 nensium, et paludes Tartari fluminis castra permuniit, tutus loco, cum terga flumine, latera objectu paludis tegerentur. Quodsi affuisset fidcs, aut opprimi universis Vitellianorum viribus duæ legiones, nondum conjuncto Mœsico exercitu, potuere, aut, retro actæ, deserta Italia, turpem fugam concivissent. Sed Cæ- 3 cina per varias moras prima hostibus prodidit tempora belli, dum quos armis pellere promptum erat, epistolis increpat, donec per nuntios pacta perfidiæ firmaret. Interim Aponius Saturninus cum legione septima Clau- 4 diana advenit. Legioni tribunus Vipstanus Messalla præerat, claris majoribus, egregius ipse, et qui solus ad id bellum artes bonas attulisset. Has ad copias nc- 5

[A. U. C. 822.]

quaquam Vitellianis pares, (quippe tres adhuc legiones erant,) misit epistolas Cæcina, temeritatem victa arma tractantium incusans. Simul virtus Germanici exercitus laudibus attollebatur, Vitelli modica et vulgari mentione, nulla in Vespasianum contumelia: nihil prorsus quod aut corruumperet hostem aut terneret.

6 Flavianarum partium duces, omissa prioris fortunæ defensione, pro Vespasiano magnifice, pro causa fidenter, de exereitu securi, in Vitellium ut inimici præsumpsere, facta tribunis centurionibusque retinendi quæ Vitellius indulsisset spe. Atque ipsum Cæcinam non obscure  
7 ad transitionem hortabantur. Recitatæ pro concione epistolæ addidere fiduciam, quod submisse Cæcina, velut offendere Vespasianum timens, ipsorum duces contemptim, tanquam insultantes Vitellio, scripsissent.

10 Adventu deinde duarum legionum, e quibus tertiam Dillius Aponianus, octavam Numisius Lupus ducebant, ostentare vires et militari vallo Veronam circumdare placuit. Forte Galbianæ legioni in adversa fronte valli opus cesscrat, et visi procul sociorum equites vanam  
2 formidiuem, ut hostes, feccre. Rapiuntur armia, et ut prodigionis ira militum in T. Ampium Flavianum iucubuit, nullo criminis arguimento, sed jam pridem invisus, turbine quodam ad exitium poscebatur: propinquum Vitelli, proditorem Othonis, interceptorem  
3 donativi clamitabant. Nec defensioni locus, quanquam supplices manus tenderet, humi plerumque stratus, lacera veste, pectus atque ora singultu quatiens. Id ipsum apud infensos incitamentum erat, tanquam ni-  
4 mius favor conscientiam argueret. Obturbatur militum vocibus Aponius, cum loqui cœptaret; fremitu et clamore cæteros aspernautur. Uni Antonio apertæ militum aures: namque et facundia aderat mulcendi-

A. D. 69.]

que vulgum artes et auctoritas. Ubi crudescere seditio, 5  
 et a conviciis ac probris ad tela et manus transibant,  
 injiei catenas Flaviano jubet. Sensit ludibrium miles,  
 disjectisque qui tribunal tuebantur, extrema vis pa-  
 rabatur. Opposuit sinum Antonius, stricto ferro, aut 6  
 militum se manibus aut suis moriturum obtestans ;  
 ut quemque notum et aliquo militari decore insignem  
 aspexerat, ad ferendam opem nomine ciens. Mox 7  
 conversus ad signa et bellorum deos, hostium potius  
 exercitibus illum furorem, illam discordiam injieerent  
 orabat, donec fatiseeret seditio, et, extremo jam die,  
 sua quisque in tentoria dilaberentur. Profectus eadem 8  
 nocte Flavianus obviis Vespasiani literis discrimini  
 exemptus est. Legiones, velut tabe infectæ, Aponium 11  
 Saturninum, Mœsici exerceitus legatum, eo atrocius  
 aggrediuntur, quod non, ut prius, labore et opere  
 fessæ, sed medio diei exarserant, vulgatis epistolis  
 quas Saturninus ad Vitellium scripsisse credebatur.  
 Ut olim virtutis modestiæque, tunc procacitatis et 2  
 petulantia certamen erat, ne minus violenter Aponium  
 quam Flavianum ad supplicium deposcerent. Quippe  
 Mœsieæ legiones adjutam a se Pannonicorum ultionem  
 referentes, et Pannonici, velut absolverentur aliorum  
 seditione, iterare culpam gaudebant. In hortos, in 3  
 quibus devertebatur Saturninus, pergunt. Nec tam  
 Primus et Aponianus et Messala, quanquam omni  
 modo nisi, eripuere Saturninum, quam obscuritas  
 latebrarum quibus oculabatur, vacantium forte bal-  
 nearum fornacibus abditus. Mox, omissis lictoribus, 4  
 Patavium concessit. Digressu consularium uni An-  
 tonio vis ac potestas in utrumque exercitum fuit,  
 cedentibus collegis et obversis militum studiis. Nec

deerant qui crederent utramque seditionem fraude Antonii cœptam, ut solus bello frucretur.

- 12 Ne in Vitellii quidem partibus quietæ mentes exitiosiore discordia, non suspicionibus vulgi sed per fidia ducum, turbabantur. Lucilius Bassus, classis Ravennatis præfектus, ambiguos militum animos, quod magna pars Dalmatæ Pannoniique eraut, quæ provinciæ Vespasiano tenebantur, partibus ejus aggregaverat.
- 3 Nox proditioni clecta, ut, cæteris ignarisi, soli in principia defectores coirent. Bassus pudore, seu metu quisnam exitus foret, intra domum opperiebatur. Tricrarchi magno tumultu Vitellii imagines invadunt; et paucis resistentium obtruncatis cæterum vulgus rerum novarum studio in Vespasianum inclinabat.
- 4 Tum progressus Lucilius auctorem se palam præbet. Classis Cornelium Fuscum præfectum sibi destinat qui propere accucurrit. Bassus honorata custodia Liburnicis navibus Atriam pervectus, a præfeeto alæ Vivienio Rufino, præsidium illie agitante, vineitur. Sed exsoluta statim vincula interventu Hormi Cæsaris 13 liberti: is quoque iuter duces habebatur. At Cæcina, defectione classis vulgata, primores centurionum et paucos militum, cæteris per militæ munera dispersis,
- 2 secretum castrorum affectans in principia vocat. Ibi Vespasiani virtutem viresque partium extollit: trans fugisse classem; in arcto commeatum, adversas Gallias Hispaniasque, nihil in urbe fidum; atque omnia de 3 Vitellio in dexterius. Mox incipientibus qui consciū aderant, cæteros re nova attonitos in verba Vespasiani adigit. Simul Vitellii imagines dereptæ, et missi qui 4 Antonio nuntiarent. Sed ubi totis castris in fama proditio, recurrens in principia miles præscriptum

A. D. 69.]

Vespasiani nomen, projectas Vitellii effigies aspexit, vastum primo silentium, mox cuncta simul erupunt. “ Huc cecidisse Germanici exercitus gloriam, ut sine 5 prælio, sine. vulnere vincetas manus et capta traderent arma ? quas enim ex diverso legiones ? nempe victas. Et abesse unicum Othoniani exercitus robur, primanos quartadecimanosque ; quos tamen iisdem illis campis fuderint straverintque, ut armatorum millia, velut grex vernalium, exsuli Antonio donum darentur. Octo ni- 6 mirum legiones unius classis accessionem fore. Id Bassus, id Cæcinæ visum : postquam domos, hortos, opes principi abstulerint, etiam militibus principem auferre. Integros incruentosque, Flavianis quoque partibus viles, quid dicturos reposcentibus aut prospera aut adversa ? ” Hæc singuli, hæc universi, ut quemque dolor impulerat, 14 vociferantes, initio a quinta legione orto, repositis Vitellii imaginibus vincla Cæcinæ injiciunt ; Fabium Fabulum, quintæ legionis legatum, et Cassium Longum, præfectum castrorum, duces deligunt ; forte oblatos trium Liburnicarum milites, ignaros et iusontes, trucidant ; relictis castris, abrupto ponte Hostiliam rursus, 2 inde Cremonam pergunt, ut legionibus primæ Italicæ et unietvicesimæ Rapaci jungerentur, quas Cæcina ad obtinendam Cremonam cum parte equitum præmiserat.

Ubi hæc comperta Antonio, discordes animis, dis- 15 cretos viribus hostium exercitus aggredi statuit, antequam ducibus auctoritas, militi obsequium et junctis legionibus fiducia rediret. Namque Fabium Valentem 2 profectum ab urbe acceleraturumque cognita Cæcinæ proditione conjectabat ; et fidus Vitellio Fañius, nec militiæ ignarus. Simul ingens Germanorum vis per 3 Rætiā timebatur ; et Britannia Galliaque et Hispania

[A. U. C. 822.]

auxilia Vitellius acciverat, immensam belli luem, ni  
 Antonius, id ipsum metuens, festinato prælio victorian  
 præcepisset. Universo cum exercitu secundis a Verona  
 4 castris Bedriacum venit. Postero die, legionibus ad  
 muniendum retentis, auxiliares cohortes in Cremonen-  
 sem agrum missæ, ut, specie parandarum copiarum,  
 5 civili præda miles imbueretur. Ipse cum quatuor  
 millibus equitum ad octavum a Bedriaco progressus,  
 quo licentius popularentur. Exploratores, ut mos est,  
 16 longius curabant. Quinta ferme hora dici erat, cum  
 citus eques adventare hostes, prægredi paucos, motum  
 2 fremitumque late audiri nuntiavit. Dum Antonius  
 quidnam agendum consultat, aviditate navandæ operæ  
 Arrius Varus cum promptissimis equitum prorupit,  
 impulitque Vitellianos, modica cæde: nam plurimum  
 accrui versa fortuna, et accrimus quisque sequentium  
 fugæ ultimus erat. Nec sponte Antonii properatum, et  
 3 fore quæ acciderant rebatur. Hortatus suos ut magno  
 animo capesserent pugnam, diductis in latera turmis,  
 vacuum medio reliquit iter, quo Varum equitesque ejus  
 reciperet; jussæ armari legiones; datum per agros sig-  
 num ut, qua cuique proximum, omissa præda, prælio  
 4 occurrèret. Pavidus interim Varus turbæ suorum mis-  
 ectetur, intulitque formidinem. Pulsi cum sauciis integri  
 suomet ipsi metu et angustiis viarum conflictabantur.  
 17 Nullum in illa trepidatione Antonius constantis ducis  
 aut fortissimi militis officium omisit. Occursarc pa-  
 ventibus, retinere cedentes, ubi plurimus labor, unde  
 aliqua spes, consilio manu voce insignis hosti, conspi-  
 2 cuus suis. Eo postremo ardoris proiectus est, ut  
 vexillarium fugientem hasta trausverberaret. Mox rap-  
 tum vexillum in hostem vertit. Quo pudore haud

A. D. 69.]

plures quam centum equites restitere. Juvit locus, arctiore illic via, et fracto interfluentis rivi ponte, qui incerto alveo et præcipitibus ripis fugam impedibat. Ea necessitas, seu fortuna, lapsas jam partes restituit. 3 Firmati inter se densis ordinibus excipiunt Vitellianos temere effusos. Atque illi consternatur. Antonius instare perculis, sternere obvios. Simul cæteri, nt 4 cuique ingenium, spoliare, capere, arma equosque abripere. Et exciti prospero clamore, qui modo per agros fuga palabantur, victoriæ se miscerant. Ad quartum a 18 Cremona lapidem fulscre legionum signa Rapacis atque Italicæ, læto inter initia equitum suorum prælio illuc usque proiecta. Sed ubi fortuna contra fuit, non 2 laxare ordines, non recipere turbatos, non obviam ire ultroque aggredi hostem, tantum per spatum cursu et pugnando fessum. Forte victi, haud perinde rebus prosperis ducem desideraverant, atque in adversis decesse intelligebant. Nutantem aciem victor equitatus 3 incursat; et Vipstanus Messala tribunus cum Mœsicis auxiliaribus assequitur, quos † militiae (*multi e?*) legioniariis quanquam raptim ductos æquabant. Ita mixtus 4 pedes equesque rupere legionum agmen. Et propinqua Cremonensium mœnia, quanto plus spei ad effugiuni, minorem ad resistendum animum dabant. Nec Anto- 19 nius ultra institit, memor laboris ac vulnerum, quibus tam anceps prælii fortuna, quamvis prospero fine, equites equosque afflictaverat. Inumbrante vespera universum 2 Flaviaui exercitus robur advenit. Utque cumulos super et recentia cæde vestigia incessere, quasi debellatum foret, pergere Cremonam, et victos in ditionem accipere aut expugnare depositunt. Hæc in medio, 3 pulchra dictu. Illa sibi quisque, “posse coloniam plano sitam impetu capi. Idem audaciæ per tenebras

irrumpentibus, et majorem rapiendi licentiam. Quodsi lucem opperiantur, jam pacem, jam preces et pro labore ac vulneribus clementiam et gloriam, inania, laturos: sed opes Cremonensium in sinu præfectorum legatorumque fore. Expugnatæ urbis prædam ad militem,  
 4 deditæ ad duces pertinere.” Spernuntur centuriones tribunique, ac ne vox cujusquam audiatur, quatiunt  
 20 arma, rupturi imperium, ni ducantur. Tum Antonius, inserens se manipulis, ubi aspectu et auctoritate silentium fecerat, non se deus neque pretium eripere tam bene meritis affirmabat, “sed divisa inter exercitum ducesque munia: militibus cupidinem pugnandi convenire; duces providendo, consultando, cunctatione sæ-  
 2 pius quam temeritate, prodesse. Ut pro virili portione, armis ac manu, victoriam juverit, ratione et consilio, propriis ducis artibus, profuturum. Neque enim ambigua esse quæ occurrant, noctem et ignotæ situm urbis, intus hostes et cuncta insidiis opportuna.  
 3 Non si pateant portæ, nisi explorato, nisi die, intrandum. An oppugnationem inchoatueros, adempto omni prospectu, quis æquus locus, quanta altitudo mœnium, tormentisne et telis an operibus et vineis  
 4 aggredienda urbs foret.” Mox conversus ad singulos, “num secures dolabrasqne et cætera expugnandis urbibus secum attulissent” rogitabat. Et cum abnuerent, “gladiisne,” inquit, “et pilis perfringere  
 5 ac subruere muros ullæ manus possunt? Si aggerem struere, si pluteis cratibusve protegi necesse fuerit, ut vulgus improvidum, irriti stabimus, altitudinem turrium et aliena munimenta mirantes? Quin potius mora noctis unius, advectis tormentis machinisque, vim  
 6 victoriamque nobiscum ferimus?” Simul lixas calonesque, cum recentissimis equitum, Bedriacum mittit,

A. D. 69.]

copias cœteraque usui allatueros. Id vero ægre tolerante 21  
 milite, prope seditionem ventum, cum progressi equites  
 sub ipsa mœnia vagos ex Cremonensibus corripiunt,  
 quorum indicio noscitur sex Vitellianas legiones, om-  
 nemque exercitum qui Hostiliae egerat, eo ipso die  
 trigesinta millia passuum emeum, comperta suorum  
 clade in prælium accendi ac jam affore. Is terror 2  
 obstructas mentes consiliis duecis aperuit. Sistere  
 tertiam decimam legionem in ipso viæ Postumiæ aggere  
 jubet, cui juncta a lævo septima Galbiana pateuti campo  
 stetit, dein septima Claudiana, agresti fossa (ita locus  
 erat,) præmunita; dextro octava per apertum limitem,  
 mox tertia deusis arbustis intersepta. Hic aquilarum 3  
 signorumque ordo: milites mixti per tenebras, ut fors  
 tulerat; prætorianum vexillum proximum tertianis,  
 cohortes auxiliarum in cornibus; latera ac terga equite  
 circumdata; Sido atque Italicus, Suevi, cum delectis  
 popularium primori in acie versabantur. At Vitellianus 22  
 exercitus (cui acquiescere Cremonæ, et, recuperatis cibo  
 somnoque viribus, confectum algore atque inedia hostem  
 postera die profligare ac proruere ratio fuit,) indigus  
 rectoris, inops consilii, tertia ferme noctis hora paratis  
 jam dispositisque Flavianis impingitur. Ordinem ag- 2  
 minis disjecti per iram ac tenebras asseverare non  
 ausim, quanquam alii tradiderint quartam Macedonicam  
 dextro suorum cornu, quintam et quintam decimam,  
 cum vexillis nonæ secundæque et vicesimæ Britannica-  
 rum legionum, medianam acicm, sextadecimanos duodevi-  
 cesimanosque et primanos lævum cornu complèsse.  
 Rapaces atque Italici omib[us] se manipulis miscuerant. 3  
 Eques auxiliaque sibi ipsi locum legere. Præliuni  
 tota nocte varium, anceps, atrox; his, rursus illis  
 exitiabilc. Nihil animus aut manus, ne oculi quidem

4 provisu juvabant. Eadem utraque acie arma; crebris interrogationibus notum pugnæ signum; permixta vexilla, ut quisque globus capta ex hostibus hue vel illuc raptabat. Urguebatur maxime septima legio,  
 5 nuper a Galba conscripta. Occisi sex primorum ordinum centuriones, abrepta quædam signa: ipsam aquilam Atilius Verus, primipili centurio, multa cum hostium strage, et ad extremum moriens, servaverat.

23 Sustinuit labantem aciem Antonius accitis prætorianis. Qui ubi excepero pugnam, pellunt hostem, dein pelluntur. Namque Vitelliani tormenta in aggerem viæ contulerant, ut tela vacuo atque aperto excuterentur, dispersa primo et arbustis sine hostium noxa illisa. Magnitudine eximia quintæ decimæ legionis ballista  
 3 ingentibus saxis hostilem aciem proruebat. Lateque cladem intulissent, ni duo milites præclarum facinus ausi, arreptis e strage scutis ignorati, vincla ac libramenta tormentorum abscidissent. Statim confossi sunt, eoque intercidere nomina: de facto haud ambigitur. Neutro inclinaverat fortuna, donec adulta nocte luna  
 5 surgens ostenderet acies falleretque. Sed Flavianis æquior a tergo; hinc majores equorum virorumque umbræ, et falso, ut in corpora, ictu tela hostium citra cadebant: Vitelliani adverso lumine colluentes, velut  
 24 ex occulto jaculantibus, incauti offerebantur. Igitur Antonius, ubi noscere suos noscique poterat, alios pudore et probris, multos laude et hortatu, omnes spe promissisque accendens, "cur rursum sumpsissent arma," Pannonicas legiones interrogabat: "illos esse campos in quibus abolere labem prioris ignominiæ,  
 2 ubi recuperare gloriam possent." Tum ad Mœsicos conversus principes auctoresque belli ciebat: "frustra minis et verbis provocatos Vitellianos, si manus

A. D. 69.]

corum oculosque non tolercent." Hæc, ut quosque accesserat; plura ad tertianos, veterum recentiumque admonens, ut sub M. Antonio Parthos, sub Corbulone Armenios, nuper Sarmatas pepulissent. Mox 3 infensius prætorianis, "Vos," inquit, "nisi vincitis, pagani, quis alius imperator, quæ castra alia excipient? Illic sigua armaque vestra sunt, et mors victis: nam ignominiam consumpsistis." Undique clamor; et ori-4 centem solem (ita in Syria mos est,) tertiani salutavere. Vagus inde, an consilio ducis subditus rumor, advenisse 25 Mucianum, exercitus in vicem salutâsse. Gradum inferunt quasi recentibus auxiliis aucti, rariore jam Vitelliauorum acie, ut quos nullo rectore suus quemque impetus vel pavor contraheret diduceretve. Postquam 2 pulsos sensit Antonius, denso agmiue obturbabat. Laxati ordines abrumpuntur; nec restitui quivere impedientibus vehiculis tormentisque. Per limitem viæ sparguntur festiuatione consecandi victores. Eo 3 notabilior cædes fuit, quia filius patrem interfecit. Rem nominaque, auctore Vipstano Messala, tradam. Julius Mansuetus ex Hispania, Rapaci legioni additus, impubem filium domi liquerat. Is mox adultus, inter 4 septimanos a Galba conscriptus, oblatum forte patrem et vuluere stratum dum semianimem scrutatur, agnitus agnoscensque et exsanguem amplexus, voce flebili precabatur piatos patris mæzes, neve se ut parricidani aversarentur: publicum id facinus; et unum militem quotam civilium armorum partem? Simul attollere 5 corpus, aperire humum, supremo erga parentem officio fungi. Advertere proximi, deinde plures: hinc per omnem aciem miraculum et questus et sævissimi belli exsecratio. Nec eo segnius propinquos, affines, fratres

trucidatos spoliant; factum esse scelus loquuntur faciuntque.

26 Ut Cremonam venere, novum immensumque opus occurrit. Othoniano bello Germanicus miles mœnibus Cremonensium castra sua, castris vallum circumjecerat, 2 ea quæ munimenta rursus auxerat. Quorum aspectu hæsere victores, incertis ducibus quid juberent. Incipere oppugnationem, fesso per diem noctemque exercitu, 3 arduum et, nullo juxta subsidio, auceps. Sin Bedriacum redirent, intolerandus tam longi itineris labor, et victoria ad irritum revolvebatur. Munire castra, id quoque, propinquis hostibus, formidolosum, ne dispersos, 4 et opus molientes, subita eruptione turbarent. Quæ super cuncta terrebat ipsorum miles periculi quam moræ patientior: quippe ingrata quæ tuta, ex temeritate spes; omnisque cædes et vulnera et sanguis avidi-

27 tate prædæ pensabantur. Huc inclinavit Antonius, cinqüe vallum corona ussit. Primo sagittis saxisque eminus certabant, majore Flavianorum pernicie, in quos 2 tela desuper librabantur. Mox vallum portasque legionibus attribuit, ut discretus labor fortis ignavosque distingueret, atque ipsa contentione decoris accedenterentur. Proxima Bedriacensi viæ tertiani septimanique sumpsere, dexteriora valli octava ac septima Cladiana; tertiadecimanos ad Brixianam portam impetus tulit. 3 Paulum inde moræ, dum ex proximis agris ligones, dolabras, et alii falces scalasque convectant. Tum, elatis super capita scutis, densa testudine succedunt. 4 Romanæ utrinque artes: pondera saxonum Vitelliani provolvunt, disjectam fluitantemque testudinem lanceis contisque scrutantur, donec, soluta compage scutorum, exsangues aut laceros prosternerent multa cum strage.

A. D. 69.]

Incesserat cunctatio, ni duces fesso militi et velut 5  
irritas exhortationes abnuenti Cremonam monstrassent.  
Hormine id ingenium, ut Messala tradit, an potior 28  
auctor sit C. Plinius, qui Antonium incusat, haud facile  
discreverim, nisi quod neque Antonius neque Hormus  
a fama vitaque sua, quamvis pessimo flagitio, degene-  
ravere. Non jam sanguis neque vulnera morabantur, 2  
quin subruerent vallum quaterentque portas, innixi  
humeris et super iteratam testudinem scandentes pren-  
sarent hostium tela brachiaque. Integri cum sauciis, 3  
semincces cum exspirantibus volvuntur, varia pereun-  
tium forma et omni imagine mortium. Acerrimum 29  
tertiæ septimæque legionum certamen; et dux Antonius  
cum delectis auxiliaribus eodem ineubuerat. Obstinatos 2  
inter se cum sustinere Vitelliani nequirent et superjacta  
tela testudine laberentur, ipsam postremo ballistam in  
subeentes propulere, quæ ut ad præsens disjecit obruit-  
que quos inciderat, ita pinnas ac summa valli ruina sua  
traxit. Simul juncta turris ictibus saxorum cessit. 3  
Qua septimani dum nituntur cuneis, tertianus securi-  
bus gladiisque portam perfregit. Primum irrupisse  
C. Volusium tertiae legionis militem inter omnes auc-  
tores constat. Is in vallum egressus, deturbatis qui 4  
restiterant, conspicuus manu ac voce, capta castra  
conclamavit. Cæteri, trepidis jam Vitellianis, seque-  
re vallo præcipitantibus, perrupere. Completur cæde  
quantum inter castra murosque vacui fuit. Ac rursus 30  
nova laborum facies, ardua urbis mœnia, saxeæ tur-  
res, ferrati portarum objices, vibrans tela miles, fre-  
quens obstrictusque Vitellianis partibus Cremonensis  
populus, magna pars Italæ, stato in eosdem dies  
mercatu congregata; quod defensoribus auxilium ob  
multitudinem, oppugnantibus incitamentum ob prædam

2 erat. Rapi ignes Antonius inferrique amoenissimis extra urbem ædificiis jubet, si damno rerum suarum Cremonenses ad mutandam fidem traherentur. Propinqua muris tecta, et altitudinem moenium egressa, fortissimo quoque militum complet; illi trabibus tegu-  
 31 lisque et facibus propugnatores deturbant. Jam legiones in testudinem glomerabantur, et alii tela saxaque iuicabant, cum languescere paulatim Vitellianorum 2 animi. Ut quis ordine anteibat, cedere fortunæ, ne, Cremona quoque excisa, nulla ultra venia, omnisque ira victoris non in vulgus inops sed in tribunos centuriones-  
 3 que, ubi pretium cædis erat, reverteretur. Gregarius miles, futuri socors et ignobilitate tutior, perstabat. Vagi per vias, in domibus additi, pacem ne tum quidem orabant eum bellum posuissent. Primores castrorum  
 4 nomen atque imagines Vitellii amoliuntur. Catenas Cæcinae (nam etiam tum vincetus erat,) exsolvunt, orantque ut causæ suæ deprecator adsistat. Aspernante tumentemque lacrimis fatigant, extremum malorum,  
 5 tot fortissimi viri proditoris ope in invocantes. Mox velainenta et infulas pro muris ostentant. Cum Antonius inhiberi tela jussisset, signa aquilasque extulere: mæstum inermium agmen, dejectis in terram oculis,  
 6 sequebatur. Circumstiterant victores, et primo ingerebant probra, intentabant ictus: mox, ut præberi ora contumeliis, et, posita omni ferocia, cuncta victi patiebantur, subit recordatio illos esse qui nuper Bedriaci  
 7 victoriae temperassent. Sed ubi Cæcina prætexta lictoribusque insignis, dimota turba, consul incessit, exarsere victores: superbiam sævitiamque, (adeo iuvisa scelerata sunt,) etiam persidiam objectabant. Obstitit Antonius, datisque defensoribus, ad Vespasianum dimisit.  
 32 Plebs interim Cremonensium inter armatos conflic-

A. D. 69.]

tabatur; nec procul cæde aberant, cum precibus dum mitigatus est miles. Et vocatos ad concionem Antonius alloquitur, magnifice victores, victos clementer, de Cremona in neutrum. Exercitus, præter insitam prædandi cupidinem, vetere odio ad excidium Cremonensium incubuit. Juvisse partes Vitellianas Othonis quoque bello credebantur; mox tertiadecimanos ad exstruendum amphitheatum relictos, ut sunt procacia urbanæ plebis ingenia, petulantibus jurgiis illuserant. Auxit invidiam editum illic a Cæcina gladiatorum spectaculum, eademque rursus belli sedes, et præbiti in acie Vitellianis cibi, cæsæ quædam seminæ studio partium ad prælium progressæ. Tempus quoque mercatus ditemi alioqui coloniam majorum opum specie complebat. Cæteri duces in obscuro: Antonium fortuna famaque omnium oculis exposuerat. Is balineas abluendo crux propere petit. Excepta vox est, cum tempore incusaret, “statim futurum ut incalescerent.” Vernile dictum omnem invidiam in eum vertit, tanquam signum incendendæ Cremonæ dedisset, quæ jam flagrabat.) Quadraginta armatorum millia irrupere, calonum lixarumque amplior numerus, et in libidinem ac sævitiam corruptior. Non dignitas, non ætas protegebat, quo minus stupra cædibus, cædes stupris miscerentur. Grandævos scenes, exacta ætate feminas, viles ad prædam, in ludibrium trahebant. Ubi adulta virgo aut quis forma conspicuus incidisset, vi manibusque rapientium divulsus ipsos postremo direptores in mutuan perniciem agebat. Dum pecuniam, vel gravia auro templorum dona, sibi quisque trahunt, majore aliorum vi truncabantur. Quidam, obvia aspernati, verberibus tormentisque dominorum abdita scrutari, defossa eruere. Faces in manibus, quas, ubi prædam egesserant, in

[A. U. C. 822.]

vacuas domos et inania templa per lasciviam jaculabantur; utque exercitu vario linguis, moribus, cui cives, socii, externi interessent, diversæ cupidines, et aliud 5 cuique fas, nec quidquam illicitum. Per quatriduum Cremona suffecit. Cum omnia sacra profanaque in igne considerent, solum Mefitis templum stetit ante moenia, 34 loco seu numine defensum. Hic exitus Cremonæ, anno ducentesimo octogesimo sexto a primordio sui. Condita erat Ti. Sempronio et Cornelio consulibus. Ingruente in Italiam Hannibale, propugnaculum adversus Gallos trans 2 Padum agentes, et si qua alia vis per Alpes rueret. Igitur numero colonorum, opportunitate fluminum, ubere agri, annexu connubiisque gentium adolevit floruitque, 3 bellis externis intacta, civilibus infelix. Antonius pudore flagitii, crebescente invidia, edixit, ne quis Cremonensem captivum detineret. Irritamque prædam militibus efficerat consensus Italæ, emptionem talium mancipiorum aspernantis. Occidi cœpere. Quod ubi enotuit, a 4 propiuquis affinibusqne occulte redemptabantur. Mox rediit Cremonam reliquus populus. Reposita fora templaque munificentia municipum; et Vespasianus 35 hortabatur. Cæterum assidere sepultæ urbis ruinis noxia tabo humus haud diu permisit. Ad tertium lapidem progressi vagos paventesque Vitellianos, sua quemque apud signa, componunt. Et victæ legiones ne, manente adhuc civili bello, ambiguæ agerent, per 2 Illyricum dispersæ. In Britanniam inde et Hispanias nuntios famamque, in Galliam Julium Calenum tribunum, in Germaniam Alpinum Montanum, præfectum cohortis, quod hic Trevir, Calenus Æduus, uterque 3 Vitelliani fuerant, ostentui misere. Simul transitus Alpium præsidiis occupati, suspecta Germania, tanquam in auxilium Vitellii accingeretur.

A. D. 69.]

At Vitellius, profecto Cæcina, cum Fabium Valentem 36 paucis post diebus ad bellum impulisset, curis luxuri obtendebat. Non parare arma, non alloquio exercitioque militem firmare, non in ore vulgi agere ; sed umbraculis hortorum abditus (ut ignava animalia, quibus si cibum suggeras, jacent torpentque,) præterita, instantia, futura, pari oblivious dimiserat. Atque illum in nemore Aricino 2 desidem et marcentem proditio Lucilii Bassi, ac defectio classis Ravennatis perculit. Nec multo post de Cæcina 3 affertur mixtus gaudio dolor, et descivisse et ab exercitu vinctum. Plus apud socordem animum lætitia 4 quam cura valuit. Multa cum exsultatione in urbem revector, frequenti concione, pietatem militum laudibus cumulat. Publum Sabinum, prætorii præfectum, ob amicitiam Cæcinæ vinciri jubet, substituto in locum ejus Alfenio Varo. Mox senatum, composita in magnificeen- 37 tiam oratione, allocutus, exquisitis patrum adulationibus attollitur. Initium atrocis in Cæcinam sententiae a L. Vitellio factum ; dein cæteri, composita indignatione, quod consul rempublicam, dux imperatorem, tantis opibus, tot honoribus, cumulatus, amicum prodidisset, velut pro Vitellio conquerentes, suum dolorem proferebant. Nulla in oratione cujusquam erga Flavianos 2 duces obtrectatio : errorem imprudentiamque exercituum culpantes, Vespasiani noīnen suspensi et vitabundi circumibant. Nec defuit qui unum consulatus diem (is enim in locum Cæcinæ supererat,) magno cum irrisu tribuentis accipientisque eblandiretur. Pridie Kalendas 3 Novembres Rosius Regulus iniit ejuravitque. Annotabant periti, nunquam antea, non abrogato magistratu, neque lege lata, alium suffectum. Nam consul uno die et ante fuerat Caninius Rebilus, C. Cæsare dictatore, cum belli civilis præmia festinarentur.

38 Nota per eos dies Junii Blæsi mors et famosa  
 2 fuit; de qua sic accepimus. Gravi corporis morbo  
 æger Vitellius, Servilianis hortis, turrim vicino sitam  
 collucere per noctem crebris luminibus animadver-  
 tit. Sciscitanti causam, apud Cæcinam Tuscum epu-  
 lari multos, præcipuum honore Junium Blæsum nun-  
 3 tiatur. Cætera in majus, de apparatu et solutis in  
 lasciviam animis. Nec defuere qui ipsum Tuscum  
 et alios, sed criminiosius Blæsum, incusarent, quod,  
 4 ægro principe, lætos dies ageret. Ubi asperatum  
 Vitellium, et posse Blæsum perverti, satis patuit  
 iis qui principum offensas acriter speculantur, datæ  
 L. Vitellio delationis partes. Ille, infensus Blæso  
 æmulatione prava, quod eum, omni dedecore macu-  
 losum, egregia fama anteibat, cubiculum imperatoris  
 reserat, filium ejus sinu complexus et genibus acci-  
 5 dens. Causam confusionis quærenti, non se proprio  
 metu nec sui anxium, sed pro fratre, pro liberis fratris  
 preces lacrimasque attulisse. Frustra Vespasianum  
 timeri, quem tot Germanicæ legiones, tot provinciæ  
 virtute ac fide, tantum denique terrarum ac maris  
 6 immensis spatiis arceat. In urbe ac sinu cavendum  
 hostem, Junios Antoniosque avos jactantem, qui se  
 stirpe imperatoria, comem ac magnificum militibus  
 ostentet. Versas illuc omnium mentes, dum Vitellius,  
 amicorum inimicorumque neglegens, fovet æmulum  
 7 principis labores e convivio prospectantem. Redden-  
 dam pro intempestiva lætitia mæstam et funebrem  
 noctem, qua sciat et sentiat vivere Vitellium et impe-  
 39 rare, et, si quid fato accidat, filium habere. Trepidanti  
 inter scelus metumque, ne dilata Blæsi mors maturam  
 perniciem, palam jussa atrocem invidiam ferret, placuit  
 2 veneno grassari. Addidit facinori fidem nobili gaudio,

A. D. 69.]

Blæsum visendo. Quin et audita est sævissima Vitellii vox, qua se (ipsa enim verba referam,) pavisse oculos spectata iunici morte jactavit. Blæso, super claritatem natalium et elegantiam morum, fidei obstinatio fuit. Integris quoque rebus, a Cæcina et primoribus partium, jam Vitellium aspernautibus, ambitus, abnuere perseveravit. Sanctus, inturbidus, nullius repentinae honoris, adeo non principatus appetens, parum effugerat ne dignus crederetur.

Fabius interim Valens, multo ac molli concubinarum spadonumque agmine segnius quam ad bellum incedens, proditam a Lucilio Basso Ravennatem classem perniciibus nuntiis accepit. Et si cœptum iter properasset, 2 nutantem Cæcinam prævenire aut ante discrimen pugnæ assequi legiones potuisset. Nec deerant qui monerent, 3 ut cum fidissimis per occultos tramites, vitata Ravenna, Hostiliam Cremonamve pergeret. Aliis placebat, accitis ex urbe prætoriis cohortibus, valida manu per rumpere. Ipse, inutili cunctatione, agendi tempora consultando consumpsit: mox utrumque consilium aspernatus, (quod inter aucipitia deterrium est,) dum media sequitur, nec ausus est satis nec providit.

Missis ad Vitellium literis auxilium postulat. Venere 41 tres cohortes cum ala Britannica, neque ad fallendum aptus numerus neque ad penetrandum. Sed Valens 2 ne in tanto quidem discrimine infamia caruit, quo minus rapere illicitas voluptates, adulteriisque ac stupris polluere hospitum domus crederetur. Aderant vis et pecunia et ruentis fortunæ novissima libido. Adventu demum peditum equitumque pravitas consilii 3 patuit, quia nee vadere per hostes tam parva manu poterat, etiam si fidissima foret, nec integrum fidem attulerant. Pudor tamen et præsentis ducis reverentia

morabatur, haud diuturna vincla apud avidos periculorum et dedecoris securos. Eo metu et paucis, quos adversa non mutaverant, comitantibus, cohortes Ariminum præmittit, alam tueri terga jubet: ipse flexit in Umbriam atque inde Etruriam, ubi, cognito pugnæ Cremonensis eventu, non ignavum, et, si provenisset, atrox consilium iniit, ut, arreptis navibus, in quamcunque partem Narbonensis provinciæ egressus, Gallias et exercitus et Germaniæ gentes novumque bellum cieret.

42 Digresso Valente, trepidos qui Ariminum tenebant, Cornelius Fuscus, admoto exercitu et missis per proxima litorum Liburnicis, terra marique circumvenit. 2 Occupantur plana Umbriæ et qua Picenus ager Hadria alluitur. Omnisque Italia inter Vespasiandum ac Vitellium Apennini jugis dividebatur. Fabius Valens e sinu Pisano, segnitia maris aut adversante vento, portum Herculis Monœci depellitur. Haud procul inde agebat Marius Maturus, Alpium maritimarum procurator, fidus Vitellio, ejus sacramentum cunctis circa 4 hostilibus nondum exuerat. Is Valentem comiter exceptum, ne Galliam Narbonensem temere ingredieretur, monendo terruit; simul cæterorum fides metu infracta. Namque circumjectas civitates procurator Valerius Paulinus, strenuus militiæ, et Vespasiano ante fortunam 43 amicus, in verba ejus adegerat:

Concitsisque omnibus qui exauctorati a Vitellio bellum sponte sumebant, Forojuliensem coloniam, claustra maris, præsidio tuebatur, eo gravior auctor, quod Paulino patria Forum Iuli, et honos apud prætorianos, quorum quondam tribunus fuerat. Ipsique pagani, favore municipali et 2 futuræ potentiae spe, juvare partes annitebantur. Quæ ubi paratu firma et aucta rumore apud varios Vitellianorum animos increbruere, Fabius Valens, cum quatuor

A. D. 69.]

speculatoribus et tribus amicis, totidem centurionibus, ad naves regreditur; Maturo cæterisque remanere et in verba Vespasiani adigi volentibus fuit. Cæterum ut 3 mare tutius Valenti quam litora aut urbes, ita futuri ambiguus, et magis quid vitaret quam cui fideret certus, adversa tempestate Stœchadas, Massiliensium insulas, affertur Ibi eum missæ a Paulino Liburnicæ oppressere.

Capto Valentc cuncta ad victoris opes conversa, 44 initio per Hispaniam a prima Adjutrice legione orto, quæ, memoria Othonis infensa Vitellio, decimam quoque ac sextam traxit. Nec Galliæ cunctabantur. Et 2 Britanniam † inditus (*insitus?*) erga Vespasianum favor, quod illic secundæ legioni a Claudio præpositus et bello clarus egerat, non sine motu adjuvxit cæterarum, in quibus plerique centuriones ac milites a Vitellio proiecti expertum jam principem anxii mutabant. Ea 45 discordia, et crebris belli civilis rumoribus, Britanni sustulere animos, auctore Venutio, qui, super insitam ferociam et Romani nominis odium, propriis in Cartismanduam reginam stimulis accendebatur. Cartisman-2 dua Brigantibus imperitabat, pollens nobilitate; et auxerat potentiam, postquam, capto per dolum rege Caractaco, instruxisse triumphum Claudii Cæsaris videbatur. Inde opes et rerum secundarum luxus. Spreto Venutio (is fuit maritus,) armigerum ejus Vel-3 locatum in matrimonium regnumque accepit. Cencussa statim flagitio domus. Pro marito studia civitatis, pro adultero libido regiæ et sævitia. Igitur Venutius, accitis auxiliis, simul ipsorum Brigantum defectione, in extremum disserimen Cartismanduam adduxit. Tum 4 petita a Romanis præsidia. Et cohortes alæque nostræ, variis præliis, exemere tamen periculo reginam. Reg-

46 num Venutio, bellum nobis relictum. Turbata per eosdem dies Germania et socordia dueum *et* seditione legionum. Externa vi, persidia sociali, prope afflita Romana res. Id bellum cum causis et eventibus (etenim longius provectum est,) mox memorabimus.  
 2 Mota et Dacorum gens, nunquam fida, tunc sine metu, abducto e Mœsia exercitu. Sed prima rerum quieti speculabantur: ubi flagrare Italiam bello, cuncta in vicem hostilia accepere, expugnatis cohortium alarum-  
 3 que hibernis utraque Danubii ripa potiebantur. Jamque castra legionum exscindere parabant, ni Mucianus sextam legionem opposuisset, Cremonensis victoriæ gnarus, ac ne externa moles utrimque ingrueret, si  
 4 Dacus Germanusque diversi irrupissent. Aſſuit, ut ſæpe alias, fortuna populi Romani, quæ Mucianum viresque Orientis illue tulit; et quod Cremonæ interim  
 5 transegimus. Fonteius Agrippa ex Asia (pro consule eam provinciam annuo imperio tenerat,) Mœsiæ præpositorus est, additis copiis e Vitelliano exercitu, quem spargi per provincias et externo bello illigari  
 47 pars consilii pacisque erat. Nec cæteræ nationes silebant. Subita per Pontum arma barbarum mancipium, regiæ quondam classis præfectus, moverat. Is fuit Anicetus, Polemonis libertus, præpotens olim, et, postquam regnum in formam provinciæ verterat, mutationis  
 2 impatiens. Igitur Vitelli nomine adscitis gentibus quæ Pontum accolunt, corrupto in spem rapinarum egentissimo quoque, haud temnendæ manus ductor, Trapezunt-tem vetusta fama civitatem, a Græcis in extremo  
 3 Ponticæ oræ conditam, subitus irruptit. Cæsa ibi cohors, regium auxilium olim; mox donati civitate Romana signa armaque in nostrum modum, desidiam licentiamque Græcorum retinebant. Classi quoque

A. D. 69.]

faces intulit, vacuo mari cludens, quia lectissimas Liburnicarum omnemque militem Mucianus Byzantium adegerat. Quin et barbari contemptim vagabantur, <sup>4</sup> fabricatis repente navibus. Camaras vocant, arctis lateribus, latam alvum sine vinculo æris aut ferri connexas; et tumido mari, prout fluctus attollitur, summa navium tabulis augent, donec in modum tecti claudantur. Sic inter undas volvuntur, pari utrimque prora et mutabili remigio, quando hinc vel illinc appellere indiscretum et inuoxium est. Advertit ea res Vespasiani animum, <sup>48</sup> ut vexillarios e legionibus ducemque Virdium Geminum, spectatae militiae, deligeret. Ille incompositum <sup>2</sup> et prædæ cupidine vagum hostem adortus coegerit in naves; effectisque raptim Liburnicis, assequitur Anicetus in ostio fluminis Cohibi, tutum sub Sedochezorum regis auxilio, quem pecunia donisque ad societatem perpulerat. Ac primo rex minis armisque supplicem <sup>3</sup> tueri: postquam merces proditionis aut bellum ostendebatur, fluxa, ut est barbaris, fide, pactus Aniceti exitium, perfugas tradidit, belloque servili finis impositus.

Lætum ea victoria Vespasianum, cunctis super vota <sup>4</sup> fluentibus, Cremonensis prælia nuntius in Ægypto assequitur. Eo properantius Alexandriam pergit, ut, fracto Vitellii exercitu, urbem quoque externæ opis indigam fame urgeret. Namque et Africam, codem <sup>5</sup> latere sitam, terra marique invadere parabat, clausis annonæ subsidiis, inopiam ac discordiam hosti facturus. Dum hac totius orbis nutatione fortuna imperii transit, <sup>49</sup> Primus Antonius nequaquam pari innocentia post Cremonam agebat, satisfactum bello ratus et cætera ex facili, seu felicitas in tali ingenio avaritiam, superbiam, cæteraque occulta mala patefecit. Ut captam, Italiam <sup>2</sup>

persultare; ut suas, legiones colere; omnibus dictis  
 factisque viam sibi ad potentiam strucere. Utque li-  
 centia militem imbueret, interactorum centurionum  
 3 ordines legionibus offerebat. Eo suffragio turbidissi-  
 simus quisque delecti; nec miles in arbitrio dueum,  
 sed duces militari violentia trahebantur. Quæ sedi-  
 tiosa, et corrumpendæ disciplinæ, mox in prædam ver-  
 tebat, nihil adventantem Mucianum veritus; quod ex-  
 50 itiosius erat quam Vespasianum sprevissc. Cæterum  
 propinquæ hieme, et humentibus Pado campis, expedi-  
 tum agmen incedere. Signa aquilæque victricium le-  
 gionum, milites vulneribus aut ætate graves, plerique  
 etiam integri, Veronæ relictæ: sufficere cohortes alæque  
 et e legionibus lecti, profligato jam bello, videbau-  
 2 tur. Undecima legio sese adjunxerat, initio cunctata,  
 sed prosperis rebus anxia quod defuisset. Sex millia  
 Dalmatarum, recens delectus, comitabantur. Ducebat  
 Pompeius Silvanus consularis: vis consiliorum penes  
 3 Annium Bassum legionis legatum. Is Silvanum so-  
 cordem bello, et dies rerum verbis terentem, specie  
 obsequii regebat, *ad* omniaque quæ agenda forent  
 quieta cum industria aderat. Ad has copias e classicis  
 Ravennatibus, legionarium militiam poscentibus, optimus  
 quisque adsciti: classem Dalmatæ supplevere.  
 4 Exercitus ducesque ad Fanum Fortunæ iter sistunt, de  
 summa rerum cunctantes, quod motas ex urbe præ-  
 torias cohortes audierant, et teneri præsidiis Apenninum  
 5 rebantur. Et ipsos, in regione bello attrita, inopia et  
 seditionesæ militum voces terrebant, clavarium (donativi  
 nomen est,) flagitantium. Nec pecuniam aut frumentum  
 providerant; et festinatio atque aviditas præpedicabant,  
 51 dum quæ accipi poterant rapiuntur. Celeberrimos  
 auctores habeo, tantam victoribus adversus fas nefas-

A. D. 69.]

que irreverentiam fuisse, ut gregarius eques, occisum a se proxima acie fratrem professus, præmium a ducibus petierit. Nec illis aut honorare eam cædem jus homi-<sup>2</sup> num aut ulcisci ratio belli permittebat. Distulerant tanquam majora meritum quam quæ statim exsolverentur; nec quidquam ultra traditur. Cæterum et pri-<sup>3</sup> oribus civium bellis par scelus inciderat. Nam prælio quo apud Janiculum adversus Cinnam pugnatum est, Pompeianus miles fratrem suum, dein, cognito facinore, se ipsum interfecit, ut Sisenna memorat. Tanto acrior<sup>4</sup> apud majores, sicut virtutibus gloria, ita flagitiis pænitentia fuit. Sed hæc aliaque ex vetere memoria petita, quoties res locusque exempla recti aut solatia mali poscat, haud absurde memorabimus. Antonio duci-<sup>52</sup> busque partium præmitti equites oīnūemque Umbriam explorari placuit, si qua Apennini juga clementius adirentur; acciri aquilas signaque et quidquid Veronæ militum foret, Padumque et mare commeatibus compleri. Erant inter duces qui necterent moras: quippe nimius jam Antonius, et certiora ex Muciano sperabantur. Namque Mucianus, tam celeri victoria<sup>2</sup> anxius, et, ni præsens urbe potiretur, expertem se belli gloriæque ratus, ad Primum et Varum media scriptitabat, instandum cœptis aut rursus cunctandi utilitates edisserens, atque ita compositus ut ex eventu rerum adversa abnueret vel prospera agnosceret. Plo-<sup>3</sup> tium Griphum, nuper a Vespasiano in senatorium ordinem additum ac legioni præpositum, cæterosque sibi fidos apertius monuit. Hique omnes de festina-<sup>4</sup> tione Primi ac Vari sinistre et Muciano volentia rescripsere. Quibus epistolis Vespasiano missis efficerat, ut non pro spe Antonii consilia factaque ejus aestimarentur. Ægre id pati Antonius, et culpam in Mu-<sup>53</sup>

cianum conferre, cuius criminatioibus eviliuissent pericula sua. Nec sermonibus temperabat, immodicus 2 lingua et obsequii insolens. Literas ad Vespasianum composuit jactantius quam ad principem, nec sine occulta in Mucianum insectatione: se Pannonicas legiones in arma egisse; suis stimulis excitos Mœsiæ duees, sua constantia perruptas Alpes, occupatam Italiam, in 3 tersepta Germanorum Rætorumque auxilia. Quod discordes dispersasque Vitellii legiones equestri procella, mox peditum vi per diem noctemque fudisset, id 4 pulcherrimum et sui operis. Casum Cremonæ bello imputandum: majore damno, plurium urbium excidiis, veteres civium discordias rei publicæ stetisse. Non se nuntiis neque epistolis, sed manu et armis imperatori 5 suo militare. Neque officere gloriae eorum qui Asiam interim composuerint. Illis Mœsiæ pacem, sibi salutem securitatemque Italæ cordi fuisse; suis exhortationibus Gallias Hispaniasque, validissimam terrarum par- 6 tem, ad Vespasianum conversas. Sed eecidisse in irritum labores, si præmia periculorum soli assequantur qui periculis non affuerint. Nec fefellere ea Mucianum: inde graves simultates, quas Antonius simplius, Mueianus eoque implacabilius nutritabat.

54 At Vitellius, fractis apud Cremonam rebus, nuntios cladis occultans, stulta dissimulatione remedia potius malorum quam mala differebat. Quippe consitenti consultantique supererant spes viresque; eum e contra- 2 río læta omnia fingeret, falsis ingravescebat. Mirum apud ipsum de bello silentium; prohibiti per civitatem sermones, eoque plures, ae, si liceret, vere narraturi, 3 quia vetabantur, atrociora vulgaverant. Nec duces nostium augendæ famæ deerant, captos Vitellii exploratores circumductosque, ut robora victoris exerci-

A. D. 69.]

tus noscerent, remittendo; quos omnes Vitellius secreto percunctatus interfici jussit. Notabili constantia 4 centurio Julius Agrestis, post multos sermones quibus Vitellium ad virtutem frustra accendebat, perpulit ut ad vires hostium spectandas, quæque apud Cremonam acta forent, ipse mitteretur. Nec exploratione occulta 5 fallere Antonium tentavit, sed mandata imperatoris suumque animum professus, ut cuncta viseret, postulat. Missi qui locum prælia, Cremonæ vestigia, captas legiones ostenderent. Agrestis ad Vitellium re- 6 meavit, abnuentique vera esse quæ afferret, atque ulti corruptum arguenti, "Quandoquidem," inquit, "magno documento opus est, nec aliis jam tibi aut vitæ aut mortis meæ usus, dabo cui credas." Atque ita digres- 7 sus voluntaria morte dicta firmavit. Quidam jussu Vitellii interfectum, de fide constantiaque eadem tradidere. Vitellius, ut e somno excitus, Julium Priscum 55 et Alfenium Varum cum quatuordecim prætoriis cohortibus et omnibus equitum alis obsidere Apenninum jubet. Secuta e classicis legio. Tot millia armatorum, lecta equis virisque, si dux alius foret, inferendo quoque bello satis pollebant. Cæteræ cohortes ad tuendam 2 urbem L. Vitellio fratri datæ. Ipse nihil e solito luxu remittens, et diffidentia properus, festinare comitia, quibus consules in multos annos destinabat; fœdera sociis, Latium externis dilargiri; his tributa dimittere, alios immunitatibus juvare; denique nulla in posterum cura lacerare imperium. Sed vulgus ad magnitudinem 3 beneficiorum aderat; stultissimus quisque pecuniis mercabatur; apud sapientes cassa habebantur, quæ neque dari neque accipi, salva republica, poterant. Tandem 4 flagitante exercitu, qui Mevaniam insederat, magno senatorum agmine, quorum multos ambitione, plures

formidine trahebat, in castra venit, incertus animi, et  
 56 infidis consiliis obnoxius. Concionanti (prodigiosum  
 dictu,) tantum foedarum volucrum supervolitavit, ut nube  
 atra diem obtenderent. Accessit dirum omen, profugus  
 altaribus taurus, disjecto sacrificii apparatu, longe, nec  
 2 ubi feriri hostias mos est, confossus. Sed præcipuum  
 ipse Vitellius ostentum erat, ignarus militiæ, impro-  
 vidus consilii, quis ordo agminis, quæ cura explorandi,  
 quantus urguendo trahendove bello modus, alios ro-  
 gitans, et ad omnes nuntios vultu quoque et incessu  
 3 trepidus, dein temulentus. Postremo tædio castrorum,  
 et audita defectione Misenensis classis, Romam rever-  
 tit, recentissimum quodque vulnus pavens, summi dis-  
 4 criminis incuriosus. Nam cum transgredi Apenni-  
 num integro exercitus sui robore et fessos hieme atque  
 inopia hostes aggredi in aperto foret, dum dispergit  
 vires, acerrimum militem et usque in extrema obstina-  
 tum trucidandum capiendumque tradidit, peritissimis  
 centurionum dissentientibus et, si consularentur, vera  
 5 dicturis. Arcuere eos intimi amicorum Vitellii, ita for-  
 matis principis auribus ut aspera, quæ utilia, nec quid-  
 quam nisi jucundum et læsurum acciperet.

57 Sed classem Misenensem (tantum civilibus discordiis  
 etiam singulorum audacia valet,) Claudius Faventius  
 centurio, per ignominiam a Galba dimissus, ad defec-  
 tionem traxit, fictis Vespasiani epistolis pretium pro-  
 2 ditionis ostentans. Præerat classi Cladius Apollinaris,  
 neque fidei constans neque strenuus in perfidia. Et  
 Apinius Tiro, prætura functus, ac tum forte Minturnis  
 agens, ducem se defectoribus obtulit. A quibus muni-  
 cipia coloniæque impulsæ, præcipuo Puteolanorum in  
 Vespasianum studio, contra Capua Vitellio fida, muni-  
 3 cipalem æmulationem bellis civilibus miscebant. Vitel-

A. D. 69.]

lius Claudium Julianum (is nuper classem Misenensem molli imperio rexerat,) permulcendis militum animis delegit. Data in auxilium urbana cohors et gladiatores, quibus Julianus praererat. Ut collata utrimque castra,<sup>4</sup> haud magna cunctatione Juliano in partes Vespasiani transgresso, Tarracinam occupavere, mœnibus situque magis quam ipsorum ingenio tutam. Quæ ubi Vitellio<sup>58</sup> cognita, parte copiarum Narniæ cum præfectis prætorii relictæ, L. Vitellium fratrem, cum sex cohortibus et quingentis equitibus, ingruenti per Campaniam bello opposuit. Ipse, æger animi, studiis militum et clamoribus populi arma poscentis, rœfovebatur, dum vulgus iguavum, et nihil ultra verba ausurum, falsa specie exercitum et legiones appellat. Hortautibus libertis<sup>3</sup> (nam amicorum ejus quanto quis clarior, minus fidus,) vocari tribus jubet, dantes uomina sacramento adigit. Superfluente multitudine curam delectus in consules partitur. Servorum numerum et pondus argenti senatoribus indicit. Equites Romani obtulere operam pecuniasque, etiam libertinis idem munus ultro flagitantibus. Ea simulatio officii a metu profecta verterat in favorem; ac plerique haud perinde Vitellium quam easum locumque principatus miserabantur. Nec deerat<sup>5</sup> ipse vultu, voce, lacrimis misericordiam elicere, largus promissis, et quæ natura trepidauſum est, immodicus. Quin et Cæsarem se dici voluit, aspernatus antea; sed tunc superstitione nominis, et quia in metu consilia prudentium et vulgi rumor juxta audiuntur. Cæterum<sup>6</sup> ut omnia inconsulti impetus cœpta initiis valida spatio languescunt, dilabi paulatim senatores equitesque, primo cunctanter et ubi ipse non aderat, mox contemptim et sine discriminé, donec Vitellius, pudore irriti conatus, quæ non dabantur, remisit.

- 59 Ut terrorem Italiæ possessa Mevania ac velut renatum ex integro bellum intulerat, ita haud dubium erga Flavianas partes studium tam pavidus Vitellii discessus addidit. Erectus Samnis Pelignusque et Marsi æmulatione, quod Campania prævenisset, ut in novo obsequio, ad cuncta belli munia acres erant. Sed foeda hieme per transitum Apennini conflietatus exercitus; et vix quieto agmine nives eluctantibus patuit quantum discriminis adeundum foret, ni Vitellium retro fortuna vertisset, quæ Flavianis ducibus non minus sæpe quam ratio affuit. Obvium illic Petilium Ceriale habuere, agresti cultu et notitia locorum custodias Vitellii elapsum. Propinqua affinitas Ceriali cum Vespasiano, nec ipse inglorius militiæ; eoque inter duces assump-  
5 tus est. Flavio quoque Sabino ac Domitiano patuisse effugium multi tradidere; et missi ab Antonio nuntii per varias fallendi artes penetrabant, locum ac præsi-  
6 dium monstrantes. Sabinus inhabilem labori et audaciæ valetudinem causabatur: Domitiano aderat animus; sed custodes a Vitellio additi, quanquam se socios fugæ promitterent, tanquam insidiantes timebantur. Atque ipse Vitellius, respectu suarum neces-  
sitatum, nihil in Domitianum atrox parabat.
- 60 Duces partium, ut Carsulas venere, paucos ad requiem dies sumunt, donec aquilæ signaque legionum assequerentur, et locus ipse castrorum placebat, late prospectans, tuto copiarum aggestu, florentissimis pone  
2 tergum municipiis. Simul colloquia cum Vitellianis decem millium spatio distantibus et proditio sperabatur. Ægre id pati miles, et victoram inalle quam pacem. Ne suas quidem legiones opperiebantur, ut prædæ quam  
3 periculorum socias. Vocatos ad concionem Antonius docuit esse adhuc Vitellio vires, ambiguas, si delibera-

A. D. 69.]

rent, acres, si desperassent. Initia bellorum civilium fortunæ permittenda: victoram consiliis et ratione perfici. Jam Misenensem classem et pulcherrimam 4 Campaniæ oram descivisse; nec plus e toto terrarum orbe reliquum Vitellio quam quod inter Tarraciam Narniamque jaceat. Satis gloriæ prælio Cremonensi partum, et exitio Cremonæ nimium invidiæ. Ne con-5 cupiscerent Romam capere potius quam servare. Ma-jora illis præmia, et multo maximum decus, si iuclumitatem seuatui populoque Romano sine sanguine quæsissent. His ac talibus mitigati animi. Nec multo 61 post legiones venere. Et terrore famaque aucti exer-citus Vitellianæ cohortes nutabant, nullo in bellum adhortante, multis ad transitionem, qui suas centurias turmasque tradere, donum victori, et sibi in posterum gratiam, cœtabant. Per eos cognitum est Interamnam 2 proximis campis præsidio quadringentorum equitum teneri. Missus extemplo Varus cum expedita manu panceos repugnantium interfecit; plures, abjectis armis, veniam petivere. Quidam in castra refugi cuncta 3 formidine inplebant, augendo rumoribus virtutem copiasque hostium, quo amissi præsidii dedecus lenirent. Nec ulla apud Vitellianos flagitiæ pena, et præmiis defectorum versa fides, ac reliquum perfidiæ certameu. Crebra transfugia tribunorum centurionumque. Nam 4 gregarius miles induruerat pro Vitellio, donec Priscus et Alsenius, desertis castris, ad Vitellium regressi pu-dore proditionis cunctos exsolverent.

Iisdem diebus Fabius Valens Urbini in custodia 62 interficitur. Caput ejus Vitellianis cohortibus ostenta-tum, ne quam ultra spem foverent: nam pervasisse in Germanias Valentem et veteres illic novosque exercitus ciere credebant. Visa cæde in desperationem versi. 2

[A. U. C. 822.]

Et Flavianus exercitus immane quantum animo exitium Valentis ut finem belli accepit. Natus erat Valens  
 3 Anagniæ, equestri familia. Procax moribus, neque absurdus ingenio, famam urbanitatis per lasciviam petere. Ludicro juvenum sub Nerone velut ex necessitate, mox sponte mimos actitavit, scite magis quam probc.  
 4 Legatus legionis et fovit Verginium et infamavit. Fonteum Capitoneum corruptum, seu quia corrumpere nequiverat, interfecit. Galbae proditor, Vitellio fidus et aliorum perfidia illustratus.

63 Abrupta undique spe, Vitellianus miles, transiturus in partes, id quoque non sine decore, sed sub signis vexillisque in subjectos Narniæ campos descendere. Flavianus exercitus, ut ad prælium intentus ornatusq;,  
 2 densis circa viam ordinibus adstiterat. Accepti in medium Vitelliani, et circumdatos Primus Antonius clementer alloquitur. Pars Narniæ, pars Interamnæ subsistere jussi. Relictæ simul e victricibus legiones, neque quiescentibus graves et adversus contumaciam  
 3 validæ. Non omisere per eos dies Primus ac Varus crebris nuntiis salutem et pecuniam et secreta Campaniæ offerre Vitellio, si, positis armis, sequac ac  
 4 liberos suos Vespasiano permisisset. In eundem modum et Mucianus composuit epistolas; quibus plerumque fidere Vitellius, ac de numero servorum, eleccione litorum, loqui. Tanta torpedo invaserat animum ut, si principem eum fuisse cæteri non memi-  
 64 nissent, ipse oblivisceretur. At primores civitatis Flavium Sabinum, præfectum urbis, secretis sermonibus incitabant, victoriae famæq; partem capesseret. Esse illi proprium militem cohortium urbanarum, nec defuturas vigilum cohortes, servitia ipsorum, fortunam  
 2 partium, et omnia prona victoribus. Ne Antonio Va-

A. D. 69.]

roque de gloria concederet. Paucas Vitellio cohortes, et mæstis undique nuntiis trepidas; populi mobilem animum, et si duceni se præbuisset, easdem illas adulationes pro Vespasiau fore. Ipsum Vitellium 3 ne prosperis quidem parem: adeo ruentibus debilitatum. Gratiam patrati belli penes eum qui urbem occupâsset. Id Sabino convenire, ut imperium fratri reservaret; id Vespasiano, ut cæteri post Sabinum haberentur. Haud- 65 quamquam erecto animo eas voces accipiebat, invalidus seneeta. Erant qui occultis suspicionibus incesserent, tanquam invidia et æmulatione fortunam fratris moraretur. Namque Flavius Sabinus, ætate prior, privatis 2 utriusque rebus auctoritate pecuniaque Vespasianum anteibat, et eredebatur affectam ejus fidem præjuvisse, domo agrisque pignori acceptis; unde, quanquam manente in speciem concordia, offendarum opera metuebantur. Melior interpretatio, mitem virum abhorrere 3 a sanguine et cædibus, eoque crebris cum Vitellio sermonibus de pace ponendisque per conditionem armis agitare. Sæpe domi congressi, postremo in æde Apollinis, ut fama fuit, pepigere. Verba vocesque duos 4 testes habebant, Cluvium Rufum et Silium Italicum. Vultus procul visentibus notabantur, Vitellii projectus et degener, Sabinus non insultans et miseranti propior. Quodsi tam facile suorum mentes flexisset Vitellius 66 quani ipse cesserat, incruentam urbem Vespasiani exercitus iutrâsset. Cæterum ut quisque Vitellio fidus, ita pacein et conditiones abnuebant, discrimen ac dedecus ostentantes, et fidem in libidine victoris. Nec tantam 2 Vespasiano superbiam ut privatum Vitellium pateretur: ne victos quidem latus. Ita periculum ex misericordia. Ipsum sane senem et prosperis adversisque satiatum: sed quod nomen, quem statum filio ejus

3 Germanico forc? Nunc pecuniam et familiam et beatos  
 Campaniæ sinus promitti: sed ubi imperium Vespasianus invaserit, non ipsi, non amicis ejus, non denique  
 exercitibus sceuritatem, nisi exstincto æmulator, redi-  
 4 turam. Fabium illis Valentem, captivum et easibus  
 dubiis reservatum, prægravem fuisse: nedum Primus ac  
 Fuscus et specimen partium Mucianus ullam in Vitel-  
 5 lium nisi oceidendi licentiam habeant. Non a Cæsar  
 Pompeium, non ab Augusto Antonium incolumes relic-  
 tos, nisi forte Vespasianus altiores spiritus gerat,  
 Vitellii cliens, cum Vitellius collega Claudio foret.  
 6 Quin, ut censuram patris, ut tres consulatus, ut tot  
 egregiæ domus honores deceret, desperatione saltem in  
 audaciau accingeretur. Perstare militem, superesse  
 7 studia populi. Denique nihil atrocius eventurum quam  
 in quod sponte ruaut. Moriendum victis, moriendum  
 deditis: id solum referre, novissimum spiritum per  
 lubibrium et contumelias effundant an per virtutem.  
 67 Surdæ ad fortia consilia Vitellio aures. ✓ Obrucbatur  
 animus miseratione curaque, ne pertinacibus armis  
 minus placabilem victorem relinqueret conjugi ac liberis.  
 2 Erat illi et fessa ætate parens; quæ tamen, paucis ante  
 diebus, opportuna morte excidium domus prævenit,  
 nihil principatu filii assecuta nisi luctum et bonam  
 famam. XV. Kalendas Januarias, audita defectione legi-  
 onis cohortiunque, quæ se Narniæ dediderant, pullo  
 3 amictu Palatio degreditur, mæsta circum familia. Si-  
 mul ferebatur lecticula parvulus filius, velut in fune-  
 breim pompa. Voces populi blandæ et intempestivæ;  
 68 miles minaci silentio. Nec quisquam adeo rerum hu-  
 manarum immemor quem non commoveret illa facies,  
 Romanum principem et generis humani paulo ante  
 dominum, relicita fortunæ suæ sede, per populum, per

A. D. 69.]

urbem exire de imperio. Nihil tale viderant, nihil audierant. Repentina vis dictatorem Cæsarem oppre- 2 serat, occultæ Caium insidiæ; nox et ignotum rus fugam Neronis absconderant; Piso et Galba tanquam in acie cecidere. Iu sua concione Vitellius, inter 3 suos milites, prospectantibus etiam feminis, pauca et præsenti mæstitia congruentia locutus, cedere se pacis et reipublicæ causa—retinerent tantum memorian sui, fratremque et conjugem et innoxiam liberorum ætatem miserarentur—, simul filium protendens, modo singulis modo universis commendans, postremo fletu præp- diente, adsistenti consuli (Cæcilius Simplex erat,) ex- solutum a latere pugionem, velut jus necis vitæque civium, reddebat. Aspernante consule, reclamantibus 4 qui in concione adstiterant, ut in æde Concordiæ po- siturus insignia imperii, domumque fratri petiturus discessit. Major hic clamor obsidentium penatibus 5 privatis, in Palatum vocantium. Interclusum aliud iter, idque solum quod in Sacram viam pergeret patebat. Tum consilii inops in Palatum rediit. Præ- 6 venerat rumor ejurari ab eo imperium, scripseratque Flavius Sabinus cohortium tribunis ut militem cohibe- rent. Igitur tanquam omnis respublica in Vespasiani 69 sinum cessisset, primores senatus et plerique eques- tris ordinis omnisque miles urbanus et vigiles domum Flavii Sabiui complevere. Illuc de studiis vulgi et minis Germanicarum cohortium affertur. Longius jam 2 progressus erat quam ut regredi posset; et suo quis- que metu, ne disjectos eoque minus validos Vitelliani consecarentur, cunctantem iu arma impellebant. Sed, 3 quod in ejusmodi rebus accidit, consilium ab omnibus datum est, periculum pauci sumpsere. Circa lacum Fundani descendenteribus, qui Sabinum comitabantur,

armatis occurunt promptissimi Vitellianorum. Modicūm ibi praelium improviso tumultu, sed prosperum  
**4** Vitellianis fuit. Sabinus re trepida, quod tutissimum  
 e praesentibus, arcem Capitolii iusedit mixto milite et  
 quibusdam senatorum equitumque; quorum nomina  
 tradere haud promptum est, quoniam, victore Vespasiano,  
 multi id meritum erga partes simulavere. Subierunt obsidium etiam feminæ, inter quas maxime  
 insignis Verulana Gratilla, neque liberos neque propin-  
**5** quos sed bellum secuta. Vitellianus miles socordi cus-  
 todia clausos circumdedit; eoque, concubia nocte, suos  
 liberos Sabinus et Domitianum fratris filium in Capito-  
 lium accivit, misso per neglecta ad Flavianos duces  
 nuntio, qui circunsideri ipsos et, ni subveniretur, arctas  
**6** res nuntiaret. Noctem adeo quietam egit, ut digredi  
 sine noxa potuerit: quippe miles Vitelli, adversus peri-  
 cula ferox, laboribus et vigiliis parum intentus erat, et  
 hibernus imber repente fusus oculos auresque impedi-  
**70** bat. Luce prima Sabinus, antequam in vicem hostilia  
 cœptarent, Cornelium Martialem e primipilaribus ad  
 Vitellium misit cum mandatis et questu quod pacta  
 turbarentur. Simulationem prorsus et imaginem de-  
 poneendi imperii fuisse, ad decipiendos tot illustres viros.  
**2** Cur enim e Rostris fratris domum, imminentem foro et  
 irritandis hominum oculis, quam Aventinum et peuates  
 uxoris petisset? Ita privato, et omnem principatus  
**3** speciem vitanti, convenisse. Contra Vitellium in Pa-  
 latium, in ipsam imperii arcem regressum; inde arma-  
 tum agmen emissum; stratam innocentium cœdibus  
 eccebellrimam urbis partem; ne Capitolio quidem abs-  
**4** tineri. Togatum nempe se et unum e senatoribus,  
 dum inter Vespasianum ac Vitellium præliis legionum,  
 captivitatibus urbium, deditibus cohortium judica-

A. D. 69.]

tur, jam Hispaniis Germaniisque et Britannia desciscentibus, fratrem Vespasiani mansisse in fide, donec ultro ad conditiones vocaretur. Pacem et concordiam victis utilia, victoribus tantum pulchra esse. Si conventionis pœnitentia<sup>5</sup> non se, quem perfidia deciperit, ferro peteret, non filium Vespasiani vix puberem: quantum occisis uno sene et uno juvne profici? Iret obviam legionibus, et de summa rerum illic certaret: cætera secundum eventum prælii cessura. Trepidus 6 ad hæc Vitellius pauca purgandi sui causa respondit, culpan in militem conferens, cujus nimio ardori imparem esse modestiam suam. Et monuit Martialem ut per secretam ædium partem occulte abiret, ne *a* militibus internuntius invisæ pacis interficeretur. Ipse neque jubendi neque vetandi potens, non jam imperator sed tantum belli causa erat. Vixdum regresso in 71 Capitolium Martiale furens miles aderat, nullo duce, sibi quisque auctor. Cito agmine forum et imminentia foro templo prætervecti erigunt aciem per adversum collem usque ad primas Capitolineæ arcis forces. Erant 2 antiquitus porticus in latere elivi, dextræ subeuntibus; in quarum tectum egressi saxis tegulisque Vitellianos obrucabant. Neque illis manus nisi gladiis armatæ; et arcessere tormenta aut missilia tela longum videbatur. Faces in prominentem porticum jecere. Et seque- 3 bantur ignem, ambustasque Capitolii fores penetrâssent, ni Sabinus revulsas undique statuas, decora majorum, in ipso aditu vice muri objecisset. Tum diversos Capitolii aditus invadunt, juxta lucum asyli et qua Tarpeia rupes centum gradibus aditur. Improvisa utra- 4 que vis; propior atque aerior per asylum ingruebat. Nec sisti poterant scandentes per conjuncta aedificia, quæ, ut in multa pace, in altum edita solum Capitolii

5 æquabant. Hic ambigitur, ignem tectis oppugnatores injecerint an obsessi, quæ crebrior fama, nitentes ac progiessos depulerint. Inde lapsus ignis in porticus appositas ædibus; mox sustinentes fastigium aquilæ vetere ligno traxerunt flammam alueruntque. Sic Capitolium, clausis foribus, indefensum et indireptum  
 72 conflagravit. Id facinus post conditam urbem luctuosissimum foedissimumque recipublicæ populi Romani accidit, nullo externo hoste, propitiis, si per mores nostros licet, deis, sedem Jovis Optimus Maximi auspicio a majoribus, pignus imperii, conditam, quam non Porsenna dedita urbe, neque Galli capta, temerare  
 2 potuisserent, furore principum exscindi. Arscrat et ante Capitolium civili bello, sed fraude privata: nunc palam obsesum, palam incensum, quibns armorum causis, quo  
 3 tantæ cladis pretio stetit? Pro patria bellavimus? Verat Tarquinius Priscus rex bello Sabino, jeceratque fundamenta spe magis futuræ magnitudinis quam quo  
 4 modicæ adhuc populi Romani res sufficerent. Mox Servius Tullius sociorum studio, dein Tarquinius Superbus, capta Suessa Pometia, hostium spoliis ex  
 5 struxere. Sed gloria operis libertati reservata: pulsis regibus Horatius Pulvillus iterum consul dedicavit, ea magnificientia quam immensæ postea populi Romani  
 6 opes ornarent potius quam augerent. Iisdem rursus vestigiis situm est, postquam, interjecto quadringentorum quindecim annorum spatio, L. Scipione C. Nor  
 7 bano consulibus flagraverat. Curam victor Sulla suscepit, ueque tamen dedicavit: hoc solum felicitati ejus negatum. Lntatii Catuli nomen inter tot Cæsarum opera usque ad Vitellium mansit. Ea tunc ædes cre  
 73 mabatur. Sed plus pavoris obsessis quam obsessoribus intulit. Quippe Vitellianus miles neque astu neque

A. D. 69.]

constantia inter dubia indigebat: ex diverso trepidi milites, dux segnis et velut captus animi, non lingua non auribus competere; neque alienis consiliis regi, neque sua expedire; huc illuc clamoribus hostium circumagi; quæ juss erat, vetare, quæ vetuerat, jubere. Mox (quod in perditis rebus accidit,) omnes præcipere,<sup>2</sup> nemo exsequi. Postremo, abjectis armis, fugam et fallendi artes circumspectabant. Irrumpunt Vitelliani et cuncta sanguine, ferro, flammisque miscent. Pauci<sup>3</sup> militarium virorum, inter quos maxime insignes Cornelius Martialis, Æmilius Pacensis, Casperius Niger, Didius Scæva, pugnam ausi obtruncantur. Flavium<sup>4</sup> Sabinum inermem neque fugam cœptantem circumsistunt, et Quintum Atticum consulem, umbra honoris et suamet vanitate monstratum, quod edicta in populum, pro Vespasiano magnifica, probrosa adversus Vitellium jecerat. Cæteri per varios casus elapsi, qui<sup>5</sup> dam servili habitu, alii fide clientium contecti et inter sarcinas abditi. Fuere qui, excepto Vitellianorum signo, quo inter se noscebantur, ultiro rogiantes respondentesve audaciam pro latebra haberent. Domitiauus prima<sup>74</sup> irruptione apud ædituum occultatus, sollertia liberti lineo amictu turbæ sacrícolarum immixtus ignoratusque, apud Cornelium Primum, paternum clientem, juxta Velabrum delituit. Ac potiente rerum patre disjecto<sup>2</sup> æditui contubernio, modicum sacellum Jovi Conservatori aramque posuit casus suos in marmore expressam; mox imperium adeptus Jovi Custodi templum ingens seque in sinu dei sacravit. Sabinus et Atticus,<sup>3</sup> onerati catenis et ad Vitellium ducti, nequaquam infesto sermone vultuque excipiuntur, frementibus qui jus cædis et præmia enavatæ operæ petebant. Clamore & proximis orto, sordida pars plebis supplicium Sabini

4 exposcit, minas adulacionesque miscet. Stantonem pro gradibus Palatii Vitellium et preces parantem pervicere, ut absisteret. Tum confossum collaceratumque et absciso capite truncum corpus Sabini in Gemonias  
 75 trahunt. Hie exitus viri haud sane spernendi. Quinque et triginta stipendia in republica fecerat, domi militiaeque clarus. Innocentiam justitiamque ejus non argueres; sermonis nimius erat: id unum septem annis quibus Moesiam, duodecim quibus praefecturam urbis  
 2 obtinuit, calumniatus est rumor. In fine vitae alii segnem, multi moderatum et civium sanguinis parcum credidere. Quod inter omnes constiterit, ante principatum Vespasiani deus domus penes Sabinum erat.  
 3 Cædem ejus lætam fuisse Muciano accepimus. Ferebant plerique etiam paci consultum, dirempta æmulatione inter duos, quorum alter se fratrem imperatoris,  
 4 alter consortem imperii cogitaret. Sed Vitellius consulis supplicium poscenti populo restitit, placatus ac velut vicem reddens, quod interrogantibus quis Capitolium incendisset se reum Atticus obtulerat, eaque confessione, sive aptum tempori mendacium fuit, invidiā crimenque agnoscisse et a partibus Vitelli amolitus videbatur.

76 Iisdem diebus L. Vitellius, positis apud Feroniam castris, excidio Tarracinæ imminebat, clausis illic gladiatoriis remigibusque, qui non egredi moenia neque  
 2 periculum iu aperto audebant. Praeerat, ut supra memoravimus, Julianus gladiatoriis, Apollinaris remigibus, lascivia socordiaque gladiatorum magis quam ducum similes. Non vigilias agere, non intuta mœnium firmare: noctu dieque fluxi et amena litorum personantes, in ministerium luxus dispersis militibus,  
 3 de bello tantum inter convivia loquebantur. Paucos

A. D. 69.]

ante dies discesserat Apinius Tiro, donisque ac pecuniis acerbe per municipia conquirendis plus invidiae quam virium partibus addebat. Interim ad L. Vitellium ser- 77  
vus Verginii Capitonis perfugit, pollicitusque, si præsi-  
dium acciperet, vacuam areem traditurum. Multa nocte  
cohortes expeditas summis montium jugis super caput  
hostium sistit. Inde miles ad eadem magis quam ad  
pugnam decurrit. Sternunt inermos aut arma ca-  
pientes, et quosdam somno excitos, cum tenebris, pa-  
vore, sonitu tubarum, clamore hostili turbarentur.  
Pauci gladiatorum resistentes neque inulti eecidere. 3  
Cæteri ad naves ruebant, ubi cuncta pari formidine  
implicabantur, permixtis paganis, quos nullo discrimine  
Vitelliani trucidabant. Sex Liburnicæ inter primum  
tumultum evasere, in quib[us] præfectus classis Apolli-  
naris; reliquæ in litore captæ, aut nimio ruentium  
onere pressas mare hausit. Julianus, ad L. Vitellium 4  
perductus, et verberibus fœdatus, in ore ejus jugulatur.  
Fuere qui uxorem L. Vitellii Triariam incesserent,  
tanquam gladio militari cincta inter luctum cladesque  
expugnatæ Tarracinae superbe sæveque egisset. Ipse  
lauream gestæ prospere rei ad fratrem misit, percunc-  
tatus statim regredi se an perdomandæ Campaniæ  
insistere juberet. Quod salutare non modo partibus 5  
Vespasiani sed reipublicæ fuit. Nam si recens vic-  
toria miles, et super insitam pervicaciam secundis ferox,  
Romam contendisset, hand parva mole certatum nec  
sine exitio urbis foret. Quippe L. Vitellio, quamvis  
infami, inerat industria; nec virtutibus, ut boui, sed  
quomodo pessimus quisque, vitiis valebat.

Dum hæc in partibus Vitellii geruntur, digressus 78  
Narnia Vespasiani exercitus festos Saturni dies Oericuli  
per otium agitabat. Causa tam pravæ moræ, ut Mu-

2 cianum opperirentur. Nec defuere qui Antonium suspicionibus arguerent tanquam dolo cunctantem, post secretas Vitellii epistolas, quibus consulatum et nubilem filiam et dotales opes pretium proditionis offerebat. Alii facta haec et in gratiam Muciani composita. Quidam omnium id ducum consilium fuisse, ostentare potius urbi bellum quam inferre, quando validissimae cohortes a Vitellio deceivissent, et, abscisis 4 omnibus praesidiis, cessurus imperio videbatur. Sed cuneta festinatione, deinde ignavia Sabini corrupta, qui, sumptis temere arnis, munitissimam Capitolii arcem, et ne magnis quidem exercitibus expugnabilem, adversus tres cohortes tueri nequivisset. Haud facile quis uni 5 assignaverit culpam, quæ omnium fuit. Nam et Mucianus ambiguis epistolis victores morabatur, et Antonius præpostero obsequio, vel dum regerit invidiam, crimen meruit; cæterique duces, dum peractum bellum putant, 6 finem ejus insignivere. Ne Petilius quidem Cerialis, cum mille equitibus præmissus, ut transversis itineribus per agrum Sabinum Salaria via urbem introiret, satis maturaverat, donec obsessi Capitolii fama cunctos simul 79 exciret. Antonius per Flaminiam ad Saxa rubra, multo jam noctis, serum auxilium venit. Illuc interfectum Sabinum, conflagrâsse Capitolium, trenere urbem, maesta omnia accepit; plebem quoque et servitia pro Vitellio 2 armari nuntiabatur. Et Petilio Ceriali equestre prælium adversum fuerat. Namque incautum et tanquam ad victos ruentem Vitellianui, interjectus equiti pedes, 3 excepere. Pugnatum haud procul urbe, inter aedificia hortosque et aufractus viarum; quæ, gnara Vitellianis, incomperta hostibus metum fecerant. Neque omnis eques concors, adjunctis quibusdam qui nuper apud Narniam dediti fortunam partium speculabantur. Ca-

A. D. 69.]

pitur præfектus alæ Tullius Flavianus ; cæteri fœda fuga  
 conſternantur, non ultra Fidenas ſecutis victoribus.  
 Eo ſuccesſu ſtudia populi aucta ; vulgus urbanum arma 80  
 cepit. Paucis ſcuta militaria ; plures, raptis, quod cui-  
 que obvium, telis, ſignum pugnæ expoſcunt. Agit  
 grates Vitellius, et ad tuendam urbem prorumpere jubet.  
 Mox, vocato ſenatu, deliguntur legati ad exercitus, ut 2  
 prætexto reipublicæ concordiam pacemque ſuaderent.  
 Varia legatorum ſors fuit. Qui Petilio Ceriali occur- 3  
 rerant, extreſum diſcrimen adicere, aspernante milite  
 conditiones pacis. Vulneratur prætor Arulenus Rus-  
 ticus. Auxit invidiam, ſuper violatum legati prætoris-  
 que nomen, propria dignatio viri. Palantur comites, 4  
 occiditur proximus lictor, dimovere turbam ausus : et  
 ni dato a duce præſidio defensi forent, ſacrum etiam in  
 exterias gentes legatorum jus ante ipsa patriæ moenia  
 civilis rabies uſque in exitium temerasset. Aequioribus 5  
 animis accepti ſunt qui ad Antonium venerant, non quia  
 modestior miles, ſed duci plus auctoritatis. Miscuerat 81  
 ſe legatis Muſonius Rufus, equeſtris ordinis, ſtudium  
 philoſophiæ et placita Stoicorum ænūlatus ; cœpta-  
 batque permixtus manipulis, bona pacis ac belli diſcri-  
 mina diſſerens, armatos monere. Id plerisque ludibrio, 2  
 pluribus tædio ; nec deerant qui propeſſerent proculea-  
 rentque, ni admonitu moſteſiſſimi cujusque, et aliis mi-  
 nitantibus, omiſſiſet intempeſtivam ſapientiam. Obviæ 3  
 fuere et virgines Vestales cum epiftolis Vitelli ad  
 Antonium ſcriptis. Eximi ſupremo certamini unum  
 diem poſtulabat : ſi morai interjeciſſent, facilius omnia  
 conuentura. Virgines cum honore dimiſſæ ; Vitellio 4  
 reſcriptum, Sabini cœde et incendio Capitolii dirempta  
 belli commercia. Tentavit tamen Antonius vocatas ad 82  
 concionem legiones mitigate, ut caſtris juxta pontem

Mulvium positis, postera die urbem ingrederentur. Ratio cunctandi, ne asperatus prælio miles, non populo, non senatui, ne templis quidem ac delubris deorum 2 consuleret. Sed omnem prolationem ut inimicam victoriæ suspectabant. Simul fulgentia per colles vexilla, quanquam imbellis populus sequeretur, speciem hostilis 3 exercitus fecerant. Tripertito agmine pars, ut adstiterat, Flaminia via, pars juxta ripam Tiberis incessit; tertium agmen per Salariam Collinæ portæ propinquabat. Plebs, invectis equitibus, fusa; miles Vitellianus trinis 4 et ipse præsidiis occurrit. Prælia ante urbem multa et varia, sed Flavianis, consilio ducum præstantibus, sæpius prospera. Ii tantum conflictati sunt qui in partem sinistram urbis ad Sallustianos hortos, per 5 angusta et lubrica viarum flexerant. Superstantes maceriis hortorum Vitelliani ad serum usque diem saxis pilisque subeuntes arcebant, donec ab equitibus, qui 6 porta Collina irruperant, circumvenirentur. Concurrere et in campo Martio infestæ acies. Pro Flavianis fortuna et parta toties victoria: Vitelliani desperatione sola ruebant; et, quanquam pulsi, rursus in urbe con- 83 gregabantur. Aderat pugnantibus spectator populus, utque in ludicro certamine, hos, rursus illos clamore et plausu fovebat. Quoties pars altera inclinâisset, abditos in tabernis aut si quam in domum perfugerant, erui jugularique expostulantes parte majore prædæ potiebantur: nam, milite ad sanguinem et cædes ob- 2 verso, spolia in vulgus cedebant. Sæva ac deformis urbe tota facies. Alibi prælia et vulnera, alibi balineæ popinæque; simul crux et strues corporum, juxta scorta et scortis similes; quantum in luxurioso otio libidinum, quidquid in acerbissima captivitate scelerum, prorsus ut eandem civitatem et furere crederes et

A. D. 69.]

lascivire. Conflixerant ante armati exercitus in urbe, 3  
bis Lucio Sulla, semel Cinna victoribus; nec tunc  
minus crudelitatis: nunc inhumana securitas, et ne  
minimo quidem temporis voluptates intermissæ. Velut  
festis diebus id quoque gaudium accederet, exsultabant,  
fruebantur, nulla partium cura, malis publicis lati. .

Plurimum molis in oppugnatione castrorum fuit, 84  
quæ accrimus quisque ut novissimam spem retinebant.  
Eo intentius victores, præcipuo veterum cohortium  
studio, cuncta validissimarum urbium excidiis reperta  
simul admovent, testudinem, tormenta, aggeres, fa-  
cesque, quidquid tot præliis laboris ac periculi hau-  
sissent, opere illo consummari clamitantes. Urbem 2  
senatui ac populo Romano, templa dñs redditæ: pro-  
prium esse militis decus in castris. Illam patriam, illos  
penates. Ni statini recipiantur, noctem in armis agen-  
dam. Contra Vitelliani, quanquam numero fatoque 3  
disparæ, inquietare victoriam, morari pacem, domos  
arasque cruento foedare, suprema victis solatia amplec-  
tebantur. Multi semianimes super turres et propug-  
nacula mœnium exspiraverc. Convulsis portis reliquus  
globus obtulit se victoribus; et cecidere omnes con-  
trariis vulneribus, versi in hostem: ea cura etiam  
morientibus decori exitus fuit. Vitellius, capta urbe, 4  
per aversam Palatii partem Aventinum in domum uxoris  
sellula defertur, ut, si diem latebra vitavisset, Tarracinam  
ad cohortes fratremque perfugeret. Dein mobilitate in- 5  
genii, et (quæ natura pavoris est,) cum omnia metuenti  
præsentia maxime displicerent, in Palatium regreditur  
vastum desertumque, dilapsis etiam infimis servitiorum  
aut occursum ejus declinantibus. Terret solitudo et 6  
tacentes loci; tentat clausa, inhorrescit vacuis; fes-  
susque misero errore, et pudenda latebra semet occul-  
tans, ab Julio Placido, tribuno cohortis, protrahitur.

[A. U. C. 822.]

- 7 Vinctæ pone tergum manus; laniata veste, fœdum spectaculum, ducebatur, multis increpantibus, nullo illacrimante: deformitas exitus misericordiam abstulerat. Obvius e Germanicis militibus Vitellium infesto ictu, per iram, vel quo maturius ludibrio eximeret, an tribunum appetierit, in incerto fuit: aurem tribuni 85 amputavit ac statim confossum est. Vitellium, infestis inueronibus coactum, modo erigere os et offerre contumeliis, nunc cadentes statuas suas, plerumque Rostra ant Galbæ occisi locum contueri, postremo ad Gemonias, 2 ubi corpus Flavii Sabini jacuerat, propulere. Una vox non degeneris animi excepta, cum tribuno insultanti se tamen imperatorem ejus fuisse respondit. Ac deinde iugestis vulneribus concidit. Et vulgus eadem pravitate 86 insectabatur interfectum, qua foverat viventem. Patria illi Luceria. Septimum et quinquagesimum ætatis annum explebat. Consulatum, sacerdotia, nomeu locumque inter primores nulla sua industria, sed cuncta 2 patris claritudine adeptus. Priucipatum ei detulere qui ipsum non noverant. Studia exercitus raro cuiquam bonis artibus quæsita perinde affuere quam huic 3 per ignaviam. Inerat tamen simplicitas ac liberalitas; quæ, ni adsit modus, in exitium vertuntur. Amicitias dum magnitudine munerum, non constantia morum 4 contineri putat, meruit magis quam habuit. Reipublicæ haud dubic intererat Vitellium vinci: sed imputare perfidiam non possunt, qui Vitellium Vespasiano prodidere, cum a Galba descivissent.
- 5 Præcipiti in occasum die, ob pavorem magistratum senatorumque, qui dilapsi ex urbe aut per domos clientium semet occultabant, vocari senatus non potuit. Domitianum, postquam nihil hostile metuebatur, ad duces partium progressum et Cæsarem consalutatum, miles frequens, utque erat in armis, in paternos penates deduxit.

C. CORNELII TACITI

AB EXCESSU DIVI AUGUSTI

H I S T O R I A R U M  
LIBER QUARTUS

---

INTERFECTO Vitellio, bellum magis desierat quam pax 1  
cœperat. Armati per urbem victores implacabili odio  
victos consecabantur. Plenæ cœdibus viæ, cruenta fora  
templaue, passim trucidatis, ut quemque fors obtulerat. Ac mox, augescenti licentia, scrutari ac protra-2  
here abditos; si quem procerum habitu et juventa  
conspicerant, obtruncare, nullo militum aut populi  
discrimine. Quæ sœvitia recentibus odiis sanguine  
explebatur, dein verterat in avaritiam. Nihil usquam 3  
secretum aut clausum sinebant, Vitellianos occultari  
simulantes. Initium id perfringendarum domuum, vel,  
si resisteretur, causa cœdis; nec deerat egentissimus  
quisque e plebe et pessimi servitorum prodere ultro  
dites dominos: alii ab amicis monstrabantur. Ubique 4  
lamenta, conclamations et fortunæ captæ urbis, adeo  
ut Othoniani Vitellianique militis invidiosa antea petu-  
lantia desideraretur. Duces partium accendendo civili 5  
bello acres, temperandæ victoriæ impares: quippe in  
turbas et discordias pessimo cuique plurima vis; pax et  
quies bonis artibus indigent. Nomen sedemque Cœ- 2  
sarialis Domitianus acceperat, nondum ad curas intentus,

[A. U. C. 822.]

2 sed stupris et adulteriis filium principis agebat. Præfectura prætorii penes Arrium Varum, summa potentiae in Primo Antonio. Is pecuniam familiamque e principiis domo quasi Cremonensem prædam rapere. Cæteri modestia vel ignobilitate ut in bello obscuri, ita præmiorum expertes. Civitas, pavida et servitio parata, occupari redenentem Tarracina L. Vitellium cum cohortibus extinguique reliqua belli postulabat. Præmissi Ariciam equites; agmen legionum intra Bovillas stetit. Nec cunctatus est Vitellius seque et cohortes arbitrio victoris permittere, et miles infelicia arma haud minus 5 ira quam metu abjecit. Longus deditorum ordo, septus armatis, per urbem incessit, nemo supplici vultu, sed tristes et truces et adversum plausus ac lasciviam 6 insultantis vulgi immobiles. Paucos erumpere ausos circumjecti pressere; cæteri in custodiam conditi, nihil quisquam locutus indignum, et, quanquam inter adversa, 7 salva virtutis fama. Dein Lueius Vitellius intersieitur, par vitiis fratris, in principatu ejus vigilantior, nec perinde prosperis socius quam adversis abstractus.

3 Iisdem diebus Lucilius Bassus cum expedito equite ad compendiam Campaniam mittitur, discordibus municiporum animis magis inter semet quam contumacia adversus principem. Viso milite quies; et minoribus 2 coloniis impunitas. Capuae legio tertia hiemandi causa locatur, et domus illustres afflictæ, cum contra Tarracinnenses nulla ope juvarentur. Tanto proclivius est injuriæ quam beneficio vicem exsolvere, quia gratia 3 oneri, ultio in quæstu habetur. Solatio fuit servus Virginii Capitonis, quem proditorem Tarracineum diximus, patibulo affixus in iisdem annulis quos, acceptos 4 a Vitellio, gestabat. At Romæ senatus cuncta principibus solita Vespasiano decernit, lætus et spei certus,

A. D. 69.]

quippe sumpta per Gallias Hispaniasque civilia arma, motis ad bellum Germanis, mox Illyrico, postquam Ægyptum, Judæam, Syriamque et omnes proviucias exercitusque lustraverant, velut expiato terrarum orbe, cepisse finem videbantur. Addidere alacritatem Vespa-<sup>5</sup> siani literæ, tanquam manente bello scriptæ. Ea prima specie forma: cæterum ut princeps loquebatur, civilia de se et reipublicæ egregia. Nec senatus obsequium deerat: ipsi consulatus cum Tito filio, prætura Domitiano et consulaire imperium decernuntur. Miserat et <sup>4</sup> 4 Mucianus epistolas ad senatum, quæ materiam sermonibus præbuere. Si privatus esset, cur publice loquetur? Potuisse eadem paucos post dies loco sententiæ dici. Ipsa quoque insectatio in Vitellium sera et sine <sup>2</sup> libertate. Id vero erga rempublicam superbum, erga principem contumeliosum, quod in manu sua fuisse imperium donatumque Vespasiano jactabat. Cæterum iuvidia in occulto, adulatio in aperto erant. Multo cum <sup>3</sup> honore verborum Muciano triumphalia de bello civium data: sed in Sarmatas expeditio fingebatur. Adduntur Primo Antonio consularia, Cornelio Fusco et Arrio Varo prætoria iusignia. Mox deos respexere; restitui <sup>4</sup> 4 Capitolium placuit. Eaque omnia Valerius Asiaticus, consul designatus, censuit: cæteri vultu manuque, pauci, quibus conspicua dignitas aut ingeuium adulazione exercitum, compositis orationibus assentiebantur. Ubi <sup>5</sup> 5 ad Helvidium Priseum, prætorem designatum, ventum, pronpsit seutentiam ut honorificam in bonum principem, falsa aberant, et studiis senatus attollebatur. Isque præcipuus illi dies, magnæ offensæ initium et magnæ gloriæ fuit.

Res poscere videtur, quia iterum in mentione in-<sup>5</sup> dimus viri saepius memorandi, ut vitam studiaque ejus,

2 et quali fortuna sit usus, paucis repetam. Helvidius  
 Priscus † [regione Italiae,] Carecinæ (*Tarracina?*) mu-  
 nicipio, Cluvio patre, qui ordinem primipili duxisset,  
 ingenium illustre altioribus studiis juvenis admodum  
 dedit, non ut plerique, *ut* nomine magnifico segne otium  
 velaret, sed quo firmior adversus fortuita rempublicam  
 3 capesseret. Doctores sapientiæ secutus est qui sola  
 bona quæ honesta, mala tautum quæ turpia, potentiam,  
 nobilitatem, cæteraque extra aumum, neque bonis neque  
 4 malis annumerant. Quæstorius adhuc, a Pæto Thrasea  
 gener delectus, e moribus socii nihil æque ac liber-  
 tatem hausit, civis, senator, maritus, gener, amicus,  
 cunctis vitæ officiis æquabilis, opum contemptor, recti  
 6 pervicax, constans adversus metus. Erant quibus ap-  
 petentior famæ videretur, quando etiam sapientibus  
 cupidio gloriæ novissima exuitur. Ruina socii in  
 exsilium pulsus, ut Galbæ principatu rediit, Marcellum  
 2 Eprium, delatorem Thraseæ, accusare aggreditur. Ea  
 ultiō, incertum major an justior, senatum in studia  
 diduxerat: nam si caderet Marcellus, agmen reorum  
 sternebatur. Primo minax certamen, et egregiis utrius-  
 3 que orationibus testatum. Mox dubia voluntate Galbæ,  
 multis senatorum deprecantibus, omisit Priscus, variis,  
 ut sunt hominum ingenia, sermonibus moderationem  
 laudantium aut constantiam requirentium.

4 Cæterum eo senatus die quo dc imperio Vespasiani  
 censebant, placuerat mitti ad principem legatos. Hinc  
 inter Hclvidium et Eprium acre jurgium. Priscus  
 eligi nominatim a magistratibus juratis, Marcellus  
 urnam postulabat; quæ consulis designati sententia  
 7 fuerat. Sed Marcelli studium proprius rubor excita-  
 bat, ne, aliis electis, posthabitus crederetur. Paulat-  
 imque per altercationem ad continuas et infestas

A. D. 69.]

orationes proiecti sunt, quærente Helvidio quid ita Marcellus judicium magistratum pavesceret: esse illi pecuniam et eloquentiam, quis multos anteiret, ni memoria flagitiorum urgueretur. Sorte et urna mores non discerni: suffragia et existimationem senatus reperta, ut in cujusque vitam famamque penetrarent. Pertinere ad utilitatem reipublicæ, pertinere ad Vespasiani honorem, occurrere illi quos innocentissimos senatus habeat, qui honestis sermonibus aures imperatoris imbuant. Fuisse Vespasiano amicitiam cum Thrasea, Sorano, Sentio; quorum accusatores, etiamsi puniri non oporteat, ostentari non debere. Hoc senatus judicio velut admoneri principem quos probet, quos reformidet. Nullum majus boni imperii instrumentum quam bonos amicos esse. Satis Marcello quod Neronem in exitium tot innocentium impulerit: frueretur præmiis et impunitate, Vespasianum melioribus relinququeret. Marcellus non suam sententiam impugnari, sed consulem designatum censuisse dicebat, secundum vetera exempla, quæ sortem legationibus possissent, ne ambitioni aut inimiciis locus foret. Nihil evenisse cur antiquitus instituta exolescerent, aut principis honor in eujusquam contumeliam verteretur; sufficere omnes obsequio. Id magis vitandum, ne pervicacia quorumdam irritaretur animus novo principatu suspepus, et vultus quoque ac sermones omnium circumspectans. Se meminisse temporum quibus natus sit, quam civitatis formam patres avique instituerint; ulteriora mirari, praesentia sequi; bonos imperatores voto expetere, qualescunque tolerare. Non magis sua oratione Thraseam quam judicio senatus afflictum: saevitiam Neronis per ejusmodi imagines illusisse, nec

minus sibi anxiam talem amicitiam quam aliis exsilium.  
**5** Denique constantia, fortitudine, Catonibus et Brutis  
 æquaretur Helvidius: se unum esse ex illo senatu qui  
 simul servierit. Suadere etiam Prisco ne supra princi-  
 pem scanderet, ne Vespasianum senem triumphalem,  
**6** juvēnum liberorum patrem, præceptis coërceret. Quo-  
 modo pessimis imperatoribus sine fine dominationem,  
 ita quamvis egregiis modum libertatis placere. Hæc,  
 magnis utrimque contentionibus jactata, diversis studiis  
**7** accipiebantur. Vicit pars quæ sortiri legatos malebat,  
 etiam mediis patrum annitentibus retinere morem. Et  
 splendidissimus quisque eodem inclinabat, metu in-  
 vidiæ, si ipsi eligerentur.

**9** Secutum aliud certamen. Prætores ærarii, (nam tum  
 a prætoribus tractabatur ærarium,) publicam pauper-  
 tam questi, modum impensis postulaverant. Eam  
 curam consul designatus, ob magnitudinem oneris et  
 remedii difficultatem, principi reservabat: Helvidius  
**2** arbitrio senatus agendum censuit. Cum perrogarent  
 sententias consules, Volcatius Tertullinus, tribunus  
 plebis, intercessit, ne quid super tanta re, principe  
**3** absente, statueretur. Censuerat Helvidius ut Capi-  
 tolium publice restitueretur, adjuvaret Vespasianus.  
 Eam sententiam modestissimus quisque silentio, deinde  
**10** oblivio transmisit: fuere qui et meminissent. Tum  
 iuvectus est Musonius Rufus in Publum Celerem, a  
 quo Baream Soranum falso testimonio circumventum  
 arguebat. Ea cognitione renovari odia accusationum  
**2** videbantur. Sed vilis et nocens reus protegi non  
 poterat: quippe Sorani sancta memoria; Celer profes-  
 sus sapientiam, dein testis in Baream, proditor corrup-  
**3** torque amicitiae, cuius se magistrum ferebat. Proxi-

A. D. 69.]

mus dies causæ destinatur. Nec tam Musonius aut Publius quani Priscus et Marcellus cæterique, motis ad ultionem animis, exspectabantur.

Tali rerum statu, cum discordia inter patres, ira apud 11 victos, nulla in victoribus auctoritas, non leges, non princeps in civitate essent, Mucianus, urbem ingressus, cuncta simul in se traxit. Fracta Primi Antonii Varique Arrii potentia, male dissimulata in eos Muciani iracundia, quamvis vultu tegeretur. Sed civitas, ri-2 mandis offensis sagax, verterat se transtuleratque. Ille unus ambiri, coli. Nec deerat ipse, stipatus armatis, domos hortosque permutans, apparatu, incessu, excubiis, vim principis amplecti, nomen remittere. Plu-3 rimum terroris intulit cædes Calpurnii Galeriani. Is fuit filius Caïi Pisonis, nihil ausus: sed noineu iusigne et decora ipsi juventa rumore vulgi celebrabantur, erantque in civitate adhuc turbida et novis sermonibus læta qui principatus inanem ei famam circumdarent. Jussu Muciani custodia militari cinctus, 4 ne in ipsa urbe conspectior mors foret, ad quadragesimum ab urbe lapidem, Appia via, fuso per venas sanguine extinguitur. Julius Priscus, prætoriarum 5 sub Vitellio cohortium præfectus, se ipse interfecit, pudore magis quam necessitate. Alfenius Varus ignaviae infamiæque suæ superfuit. Asiaticus enim (is libertus,) malam potentiam servili supplicio expiavit.

Iisdem diebus crebrescentem cladis Germanicæ famam 12 nequaquam mæsta civitas excipiebat; cæsos exercitus, capta legionum hiberna, descivisse Gallias, non ut mala loquebantur. Id bellum quibus causis ortum, quanto externarum sociarumque gentium motu flagraverit, altius expediam. Batavi donec trans Rhenum agebant, 2 pars Chattorum, seditione domestica pulsi, extrema

Gallicæ oræ, vacua cultoribus, simulque iusulam juxta sitam occupaverc, quam mare Oceanum a fronte, Rhenus amnis tergum ac latera circumluit; nec opibus Romanis, societate validiorum, attriti viros tantum armaque imperio ministrant, diu Germanicis bellis exerciti, mox aucta per Britanniam gloria, transmissis illuc cohortibus, quas vetere instituto nobilissimi popularium 3 regebant. Erat et domi delectus eques, præcipuo nandi studio, arma equosque retinens, integris turmis 13 Rhenum perrumpere. Julius Faulus et Claudius Civilis, regia stirpe, multo cæteros anteibant. Paulum Fonteius Capito falso rebellionis criminè interfecit. Injectæ Civili catenæ, missusque ad Neronem et a Galba absolutus sub Vitellio rursus discrimen adit, flagitante supplicium ejus exercitu. Inde causæ irarum, spesque 2 ex malis nostris. Sed Civilis ultra quam barbaris solitum ingenio sollers, et Sertorium se aut Hannibalem ferens simili oris dehonestamento, ne ut hosti obviam iretur, si a populo Romano palam descivisset, Vespasiani amicitiam studiumque partium prætendit, missis sane ad eum Primi Antonii literis, quibus avertcre accita Vitellio auxilia et tumultus Germanici specie 3 retinare legiones jubebatur. Eadem Hordeonius Flaccus præseus monuerat, inclinato in Vespasianum animo et reipublicæ cura, cui excidium adventabat, si redintegratum bellum et tot armatorum millia Italiam 14 irrupissent. Igitur Civilis, desciscendi certus, occultato interim altiore consilio, cætera ex eventu judicaturus, novare res hoc modo cœpit: jussu Vitelli Batavorum juventus ad delectum vocabatur, quem, snapte natura gravem, onerabant ministri avaritia ac luxu, senes aut 2 invalidos conquirendo, quos pretio dimitterent. Rursus impubes sed forma conspicui (et est plerisque procera

A. D. 69.]

pueritia,) ad stuprum trahebantur. Hinc invidia; et compositæ seditionis auctores perpulere ut delectum abnuerent. Civilis primores gentis et promptissimos 3 vulgi, specie epularum sacrum in nemus vocatos, ubi nocte ac lætitia incaluisse videt, a laude gloriaque geutis orsus injurias et raptus et cætera servitii mala enumerat. “Neque enim societatem, ut olim, sed tan-4 quam mancipia haberi. Quando legatum, gravi quidem comitatu et superbo cum imperio, venire? Tradi se præfectis centurionibusque; quos ubi spoliis et sanguine expleverint, mutari, exquirique novos sinus et varia prædandi vocabula. Instare delectum, quo liberi 5 a parentibus, fratres a fratribus velut supremum dividantur. Nunquam magis afflictam rem Romanam, nec aliud in hibernis quam prædam et senes. Attollerent tantum oculos, et inania legionum nomina ne pavescerent. At sibi robur peditum equitumque, consanguineos 6 Germanos, Gallias idem cupientes. Ne Romanis qui-dem ingratum id bellum, cuius ambiguam fortunam Vespasiano imputaturos: victoriæ rationem non redi.”<sup>1</sup> Magno cum assensu auditus, barbaro ritu et patriis 15 exsecrationibus universos adigit. Missi ad Cannine-fates qui consilia sociarent. Ea gens partem insulæ colit, origine, lingua, virtute, par Batavis; numero superantur. Mox occultis nuntiis pellexit Britannica 2 auxilia, Batavorum cohortes missas in Germaniam, ut supra retulimus, ac tum Mogontiaci agentes. Erat in Canninefatibus stolidæ audaciæ Brinuo, claritate natalium insigni. Pater ejus, multa hostilia ausus, Caiaua- 3 rum expeditionum ludibrium impune spreverat. Igitur ipso rebellis familiæ nomine placuit, impositusque scuto, more gentis, et sustinentium humeris vibratus, dux deligitur. Statimque accitis Frisiis (Transrhenana gens 4.

est,) duarum cohortium hiberna, proxima occupatu, Oceano irrumpt. Nec præviderant impetum hostium milites; nec, si prævidissent, satis virium ad arcendum erat. Capta igitur ac direpta castra. Dein vagos, et pacis modo effusos, lixas negotiatoresque Romanos invadunt. Simul excidiis castellorum imminebant; quæ a præfectis cohortium incensa sunt, quia defendi nequibant. Signa vexillaque et quod militum in superiorem insulæ partem congregantur, duce Aquilio primipilari, nomen magis exercitus quam robur: quippe, viribus cohortium abductis, Vitellius e proximis Nerviorum Germanorumque pagis segnem numerum armis oneraverat. Civilis, dolo grassandum ratus, iucusavit ultro præfectos quod castella deseruissent: "sese cum cohorte, cui præerat, Canninefatem tumultum compressuimus; illi sua quisque hiberna repeterent." Subesse fraudem consilio et dispersas cohortes facilius opprimi, nec Brinnonem ducem ejus belli sed Civilem esse patuit, erumpentibus paulatim indiciis, quæ Germani, læta bello gens, non diu occultaverant. Ubi insidiae parum cessere, ad vim transgressus Canninefates, Frisos, Batavos propriis cuneis componit. Directa ex diverso acies haud procul a flumine Rheno, et obversis in hostem navibus, quas, incensis castellis, illuc appulerant. Nec diu certato Tungrorum cohors signa ad Civilem transluit; percusisque milites improvisa proditione a sociis hostibusque cædeabantur. Eadem etiam navibus perfidia. Pars remigum e Batavis, tanquam imperitia, officia nautarum propugnatorumque impediebant. Mox contra tendere, et puppes hostili ripæ objicere. Ad postremum gubernatores centurionesque, nisi eadem volentes, trucidant donec universa quatuor et viginti navium classis transfugeret aut caperetur. Clara ea

A. D. 69.]

victoria in præsens, in posterum usui; armaque et naves, quibus indigebant, adepti magna per Germanias Galliasque fama libertatis auctores celerabantur. Ger- 2 maniæ statim misere legatos auxilia offerentes. Gallia-  
ruin societatem Civilis arte donisque affectabat, captos cohortium præfectos suas in civitates remittendo, cohortibus, abire an manere mallent, data potestate. Manen- 3 tibus honorata militia, digredientibus spolia Romanorum offerebantur. Simul secretis sermonibus admonebat malorum quæ tot annis perpessi miseram scrvitutem falso pacem vocarent. “ Batavos, quanquam tributo- 4 rum expertes, arma contra communes dominos cepisse. Prima acie fusum victumque Romanum. Quid si Galliæ jugum exuant? Quantum in Italia reliquum? Provinciarum sanguine provincias vinci. Ne Vindicis 5 aciem cogitarent: Batavo equite protritos Æduos Ar- vernosque; fuisse inter Virginii auxilia Belgas, verque reputantibus Galliam suismet viribus concidisse. Nunc easdem omnium partes, addito, si quid militaris disciplinæ in castris Romanorum viguerit. Esse secum 6 veteranas cohortes, quibus nuper Othonis legiones procubuerint. Servirent Syria Asiaque et suetus regi- bus Oriens: multos adhuc in Gallia vivere ante tributa genitos. Nuper certe, cæso Quintilio Varo, pulsam e 7 Germania servitutem, nec Vitellium principem, sed Cæsarem Augustum bello provocatum. Libertatem natura etiam mutis animalibus datam, virtutem proprium hominum bonum. Deos fortioribus adesse. Proinde arriperent vacui occupatos, integri fessos. Dum alii Vespasianum alii Vitellium foveant, patere locum adver- sus utrumque.” Sic in Gallias Germaniasque intentus, si destinata provenissent, validissimarum ditissimarum- que nationum regno imminebat. At Flaccus Horde-

- onius primos Civilis conatus per dissimulationem aluit.
- 2** Ubi expugnata castra, deletas cohortes, pulsum Batavorum insula Romanum nomen trepidi nuntii afferebant, Munium Lupercum legatum (is duarum legionum  
**3** hibernis praeerat,) egredi adversus hostem jubet. Lupercus legionarios e præsentibus, Ubios e proximis, Treverorum equites, haud longe agentes, raptim transmisit, addita Batavorum ala, quæ, jam pridem corrupta, fidem simulabat, ut, proditis in ipsa acie Romanis,  
**4** majore pretio fugeret. Civilis captarum cohortium signis circumdatus, ut suo militi recens gloria ante oculos, et hostes memoria cladis terrorentur, matrem suam sororesque, simul omnium conjuges parvosquo liberos consistere a tergo jubet, hortamenta victoriæ vel  
**5** pulsis pudorem. Ut virorum cantu, feminarum ululatu sonuit acies, nequaquam par a legionibus cohortibusque redditur clamor. Nudaverat sinistrum cornu Batavorum ala transfugiens, statimque in nos versa. Sed legionarius miles, quanquam rebus trepidis, arma ordinesque  
**6** retinebat. Ubiorum Treverorumque auxilia, fœda fuga dispersa, totis campis palantur. Illuc incubuere Germani; et fuit interim effugium legionibus in castra  
**7** quibus Veterum nomen est. Præfectus alæ Batavorum Claudius Labeo, oppidano certamine æmulus Civili, ne imperfectus iuvicidiam apud populares, vel, si retineretur, semina discordiæ præberet, in Frisios avehitur.
- 19** Iisdem diebus Batavorum et Canninefatum cohortes, cum jussu Vitellii in urbem pergerent, missus a Civile nuntius assequitur. Intumuere statim superbia ferociaque, et pretium itineris donativum, duplex stipendum, augeri equitum numerum, promissa sane a Vitellio, postulabaut, non ut assequerentur, sed causam seditioni.  
**2** Et Flaccus multa concedendo nihil aliud effecerat, quan-

A. D. 69.]

ut acrius exposcerent quæ sciebant negaturum. Spreto Flacco inferiorem Germaniam petivere, ut Civili jungerentur. Hordeonius, adhibitis tribunis centurionibusque, consultavit num obsequium abnuentes vi coërceret. Mox insita ignavia et trepidis ministris, quos ambiguus 3 auxiliarum animus et subito delectu suppletæ legiones angebant, statuit continere intra castra militem : dein pænitentia, et arguentibus ipsis qui suaserant, tanquam secuturus, scripsit Herennio Gallo, legionis primæ legato, qui Bonnam obtinebat, ut arceret transitu Batavos : se cum exercitu tergis eorum hæsurum. Et opprimi 4 poterant, si hinc Hordeonius, inde Gallus, motis utrimque copiis, medios clausissent. Flaccus omisit inceptum, aliisque literis Gallum monuit ne terreret abeentes. Unde suspicio sponte legatorum excitari bellum, cunctaque quæ acciderant aut metuebantur, non inertia militis neque hostium vi sed fraude ducum evenire. Batavi, 5 cum castris Bonnensibus propinquarent, præmisere qui Herennio Gallo mandata cohortium exponeret. “ Nullum sibi bellum adversus Romanos, pro qnibus toties bellâssent : longa atque irrita militia fessis patriæ atque otii cupidinem esse. Si nemo obsisteret, innoxium iter fore : sin arma occurrant, ferro viam inventuros.” Cunctantem legatum milites perpulerant, fortunam 2 prælia experiretur. Tria millia legionariorum et tumultuarie Belgarum cohortes, simul paganorum lixarumque ignava, sed procax ante periculum, manus, omnibus portis rumpunt, ut Batavos numero impares circumfundant. Illi, veteres militiæ, in cuneos con- 3 gregantur, densi undique et frontem tergaque ac latus tuti. Sic tenuem nostrorum aciem perfringunt. Cendentibus Belgis pellitur legio, et vallum portasque trepidi petebant. Ibi plurimum cladis : eumulatæ cor-

poribus fossæ; nec cæde tantum et vulneribus, sed  
 4 ruina et suis plerique telis interiere. Victores, colonia  
 Agrippineusium vitata, nihil cætero in itinere hostile  
 ausi, Bonnense prælium excusabant, tanquam petita  
 pacc, postquam negabatur, sibimet ipsi consuluisserent.

- 21 Civilis, adventu veteranarum cohortium justi jam  
 exercitus ductor, sed consilii ambiguus et vim Romanam  
 reputans, cunctos qui aderant in verba Vespasiani  
 adigit, mittitque legatos ad duas legiones, quæ, priore  
 acie pulsæ, in Vetera castra concesserant, ut idem  
 2 sacramentum acciperent. Redditur responsum, "ne-  
 que proditoris neque hostium se consiliis uti: esse sibi  
 Vitellium principem, pro quo fidem et arma usque  
 ad supremum spiritum retenturos; proinde perfuga  
 Batavus arbitrium rerum Romanarum ne ageret, sed  
 3 meritas sceleris pœnas exspectaret." Quæ ubi relata  
 Civili, incensus ira universam Batavorum gentem in  
 arma rapit. Junguntur Bructeri Tencterique et excita  
 22 nuntiis Germania ad prædam famamque. Adversus has  
 concurrentes belli minas legati legionum, Munius Lu-  
 percus et Numisius Rufus, vallum murosque firmabant.  
 Subversa longæ pacis opera, haud procul castris in mo-  
 2 dum muuicipii exstructa, ne hostibus usui forent. Sed  
 parum provisum ut copiæ in castra conveherentur: rapi  
 permisere. Ita paucis diebus per licentiam absumpta  
 sunt, quæ adversus necessitates in longum suffecissent.  
 3 Civilis, medium agmen cum robore Batavorum obtinens,  
 utramque Rheni ripam, quo truculentior visu foret,  
 Germanorum catervis complet, assaultante per campos  
 equite. Simul naves in adversum amnem agebantur.  
 4 Hinc veteranarum cohortium signa, inde depromptæ  
 silvis lucisque ferarum imagines, ut cuique genti inire  
 prælium mos est, mixta belli civilis externique facie

A. D. 69.]

obstupefecerant obsessos. Et spem oppugnantium au- 5  
 gebat amplitudo valli, quod, duabus legionibus situm,  
 vix quinque millia armatorum Romauorum tuebantur.  
 Sed lixarum multitudo, turbata pace illuc congregata,  
 et bello ministra aderat. Pars castrorum in collein 23  
 leniter exsurgens, pars æquo adibatur. Quippe illis  
 hibernis obsideri premique Germanias Augustus credi-  
 derat, neque unquam id malorum ut oppugnatum ultro  
 legiones nostras vcnirent. Inde non loco neque muni- 2  
 mentis labor additus: vis et arma satis placebant.  
 Batavi Transrhenanique, quo discreta virtus manifes-  
 tius spectaretur, sibi quæque geus consistunt, eminus  
 lacescentes. Post, ubi pleraque telorum turribus pin- 3  
 nisqne mœnium irrita hærebant, et desuper saxis vul-  
 nerabantur, clamore atque impetu invasere vallum,  
 appositis plerique scalis, alii per testudinem suorum.  
 Scandebantque jam quidam, cum, gladiis et armorum 4  
 incussu præcipitati, sudibus et pilis obruuntur, præfe-  
 roces initio et rebus secundis nimii. Sed tum, prædæ  
 cupidine, adversa quoque tolerabant. Machinas etiam,  
 insolitum sibi, ausi. Nec ulla ipsis sollertia: perfugæ 5  
 captivique docebant struere materias in modum pontis,  
 mox subjectis rotis propellere, ut alii superstantes tan-  
 quam ex aggere præliarentur, pars intus occulti muros  
 subruerent. Sed excussa ballistikis saxa stravere in- 6  
 forme opus. Et crates vineasque parantibus adactæ  
 tormentis ardentes hastæ, ultiisque ipsi oppugnatores  
 igubus petebantur, donec, desperata vi, verterent con-  
 silium ad moras, haud ignari paucorum dierum inesse  
 alimenta et multum imbellis turbæ. Simul ex inopia 7  
 proditio et fluxa servitorum fides ac fortuita belli  
 sperabantur. Flaccus interim, cognito castrorum obsi- 24  
 dio, et missis per Gallias qui auxilia concirent, lectos e

[A. U. C. 822.]

legionibus Dillio Voculæ, duodevicesimæ legionis legato, tradit, ut quam maximis per ripam itineribus celera-  
 2 ret, ipse navibus, invalidus corpore, invisus militibus. Neque enim ambigue fremebant, "emissas a Mogontiaco Batavorum cohortes, dissimulatos Civilis conatus, adsciri in societatem Germanos. Non Primi Antonii neque Muciani ope Vespasianum magis adolevisse.  
 3 Aperta odia armaque palam depelli: fraudem et dolum obscura, eoque inevitabilia. Civilem stare contra, struere aciem: Hordeonium e cubiculo et lectulo jubere quidquid hosti conduceat. Tot armatas fortissimorum virorum manus unius senis valetudine regi. Quin potius, imperfecto traditore, fortunam virtutemque suam  
 4 malo omine exsolverent." His inter se vocibus instinctosflammavere insuper allatae a Vespasiano literæ, quas Flaccus, quia occultari nequibant, pro concione recitavit, vincosque qui attulerant ad Vitellium misit.  
 25 Sic mitigatis animis, Bonnam, hiberna primæ legionis, ventum. Infensor illic miles culpam cladis in Hordeonum vertebat: "ejus jussu directam adversus Batavos aciem, tanquam a Mogontiaco legiones sequerentur; ejusdem proditione cæsos, nullis supervenientibus auxiliis. Ignota hæc cæteris exercitibus, neque imperatori suo nuntiari, cum accursu tot provinciarum extingui  
 2 repens perfidia potuerit." Hordeonius exemplares omnium literarum, quibus per Gallias Britanniamque et Hispanias auxilia orabat, exercitui recitavit, instituitque pessimum facinus, ut epistolæ aquiliferis legionum traderentur; a quib[us] ante mili[ti] quam ducibus  
 3 legebantur. Tum e sceditiosis unum vinciri jubet, magis usurpandi juris quam quia unius culpa foret. Motusque Bonna exercitus in coloniam Agrippinensem, affluentibus auxiliis Gallorum, qui primo rem Romanam

A. D. 69.]

enixe juvabant: mox, valescentibus Germanis, pleræque civitates adversum nos armatæ spe libertatis et, si exuissent servitium, cupidine imperitandi. Gliscebat 4 iracundia legionum, nec terrorem unius miltis vincula indiderant. Quin idem ille arguebat ultro conscientiam ducis, tanquam nuntius inter Civilem Flaccumque falso crimine testis veri opprimeretur. Conscendit 5 tribunal Voclæ mira constantia, prensuunque militem ac vociferantem duci ad supplicium jussit. Et dum mali pavent, optimus quisque jussis paruere. Exin consensu ducem Voclam poscentibus, Flaccus summam rerum ei permisit. Sed discordes animos multa 26 efferabant, inopia stipendi frumentique, et simul delectum tributaque Galliæ aspernantes, Rhenus incognita illi cælo siccitate vix navium patiens, arcti commeatus, dispositæ per omnem ripam stationes, quæ Germanos vado arcerent, eademque de causa minus frugum et plures qui consumerent. Apud imperitos prodigi loco 2 accipiebatur ipsa aquarum penuria, tanquam nos amnes quoque et vetera imperii munimenta desererent. Quod in pace fors seu natura, tunc fatum et ira dei vocabatur.

Ingressis Novesium sexta decima legio conjungitur. 3 Additus Voclæ in partem curarum Herennius Gallus legatus; nec ausi ad hostem pergere, loco *cui* Gelduba nomen est castra fecere. Ibi struenda acie, muniendo vallandoque, et cæteris belli meditamentis, militem firmabant. Utque præda ad virtutem accenderetur, in 4 proximos Gugernorum pagos, qui societatem Civilis acceperant, ductus a Voclæ exercitus. Pars cum Herennio Gallo permansit. Forte navem haud procul 27 castris, frumento gravem, cum per vada hæsisset, Germani in suam ripam trahelant. Non tulit Gallus, misitque subsidio cohortem. Auctus et Germanorum

numeris, paulatimque aggregantibus se auxiliis acie certatum. Germani multa cum strage nostrorum nam  
 2 veni abripiunt. Victi (quod tum in morem verterat,) non suam ignaviam, sed perfidiam legati culpabant. Protractum e tentorio, scissa veste, verberato corpore, quo pretio, quibus consciis, prodidisset exercitum, dicere  
 3 jubent. Redit in Hordeonium invidia. Illum auctorem sceleris, hunc ministrum vocant, donec, exitium militibus, exterritus proditionem et ipse Hordeonio objicit; vincetusque adventu demum Vocabæ exsolvitur.  
 4 Is postera die auctores seditios morte affecit. Tanta illi exercitui diversitas inerat licentiae patientiaeque. Haud dubie gregarius miles Vitellio sidus, splendidissimus quisque in Vespasianum proni. Inde scelerum ac suppliciorum vices et mixtus obsequio furor, ut contineri non possent qui puniri poterant.

28 At Civilem immensis auctibus universa Germania extollebat, societate nobilissimis obsidum firmata. Ille, ut cuique proximum, vastari Ubios Treviroisque, et alia manu Mosam amnem transiri jubet, ut Menapios et  
 2 Morinos et extrema Galliarum quateret. Actæ utробique prædæ, infestius in Ubiis, quod gens Germanicæ originis, ejurata patria, Romanorum nonen, Agrippi-  
 3 nenses, vocareuntur. Cæsæ cohortes eorum in vicino Marcoduro incuriosius agentes, quia procul ripa aberrant. Nec quievere Ubii, quo minus prædas e Germania peterent, primo impune, dein circumventi sunt, per  
 4 omne id bellum meliore usi fide quam fortuua. Constitus Ubiis, gravior et successu rerum ferocior Civilis obsidum legionum urgebat, intentis custodiis, ne quis  
 5 occultus nuntius venientis auxillii penetraret. Machinas molemque operum Batavis delegat: Transrheuanos, prælium poscentes, ad scindendum vallum ire, detru-

A. D. 69.]

sosque redintegrare certamen jubet, superante multitudine et facili damno. Nec finem labori nox attulit. Congestis circum lignis accensisque, simul epulantes, 29 ut quisque vino incaluerat, ad pugnam temeritate inani ferebantur. Quippe ipsorum tela per tenebras vana: Romani conspicuam barbarorum aciem, et si quis audacia aut insignibus effulgens, ad ictum destinabant. Intellectum id Civili, et, restincto igne, misceri cuncta 2 tenebris et armis jubet. Tum vero strepitus dissoni, casus incerti, neque feriendi neque declinandi providentia. Unde clamor acciderat, circummagere corpora, tendere † arcus (*acrius?*). Nihil prodesse virtus, fors 3 cuncta turbare, et ignavorum saepe telis fortissimi cadere. Apud Germanos inconsulta ira: Romanus miles, periculorum gnarus, ferratas sudes, gravia saxa non forte jaciebat. Ubi sonus molientium aut appositæ 4 scalæ hostem in manus dederant, propellere umbone, pilo sequi; multos in mœnia egressos pugionibus fodere. Sic exhausta nocte novam aciem dies aperuit. Eduxe- 30 rant Batavi turrim duplici tabulato, quam prætoriæ portæ (is æquissimus locus,) propinquantem promoti contra validi asseres et incussæ trabes perfregere, multa superstantium pernicie. Pugnatumque in pereulso subita et prospera eruptione. Simul a legionariis peritia et arte præstantibus plura struebatur. Præcipuum pavorem 2 intulit suspensum et nutans machinamentum, quo repente demisso præter suorum ora singuli pluresve hostium, sublime rapti, verso pondere intra castra effundebantur. Civilis, omissa oppugnandi spe, rursus 3 per otium assidebat, nuntiis et promissis fidem legionum convellens.

Hæc in Germania ante Cremonense prælium gesta, 31 cuius eventum literæ Primi Antonii docuere, addito

Cæciuæ edicto. Et præfectus cohortis e victis, Alpinius  
 2 Montanus, fortunam partium præsens fatebatur. Di-  
 versi hinc motus animorum. Auxilia e Gallia, quïs nec  
 amor neque odium in partes, militia sine affectu, hor-  
 tantibus præfectis statim a Vitellio desciscunt: vetus  
 3 miles cunctabatur. Sed adigente Hordeonio Flacco,  
 instantibus tribunis, dixit sacramentum, non vultu  
 neque animo satis affirmans; et cum cætera juris ju-  
 randi verba conciperent, Vespasiani nomen hæsitantes,  
 aut levi murmure et plerumque silentio, transmittebant.  
 32 Lectæ deinde pro concione epistolæ Antonii ad Civilem  
 suspiciones militum irritavere, tanquam ad socium par-  
 tium scriptæ, et de Germanico exercitu hostiliter.  
 2 Mox, allatis Geldubam in castra nuutiis, eadem dicta  
 factaque, et missus cum mandatis Montanus ad Civilem,  
 ut absisteret bello neve externa armis falsis velaret:  
 si Vespasianum juvare aggressus foret, satisfactum  
 3 cœptis. Ad ea Civilis primo callide: post ubi videt  
 Montanum præferocem ingenio paratumque in res novas,  
 orsus a questu periculisque quæ per quinque et viginti an-  
 4 nos in castris Romanis exhausisset, "Egregium," inquit,  
 " pretium laborum recepi, necem fratris et vincula mea  
 et sævissimas hujus exercitus voces, quibus ad suppli-  
 5 cium petitus jure gentium pœnas reposco. Vos autem  
 Treviri cæteræque servientium animæ, quod præmium  
 effusi toties sanguinis exspectatis nisi ingratam mili-  
 tiam, immortalia tributa, virgas, secures et dominorum  
 6 ingenia? En ego præfectus unius cohortis et Cannine-  
 fates Batavique, exigua Galliarum portio, vana illa  
 castrorum spatia excidimus, vel septa ferro fameque  
 premimus. Denique ausos aut libertas sequetur, aut  
 7 vieti iidem erimus." Sic accensum, sed molliora referre  
 jussum dimittit. Ille ut irritus legationis reddit, cætera

A. D. 69.]

dissimulans, quæ mox erupere. Civilis, parte copiarum 33  
 retenta, veteranas cohortes, et quod e Germanis maxime  
 promptum, adversus Vocabam exercitumque ejus mittit,  
 Julio Maximo et Claudio Victore, sororis suæ filio, du-  
 cibus. Rapiunt in transitu hiberna alæ Asciburgii 2  
 sita; adeoque improvisi castra involavere ut non allo-  
 qui, non pandere aciem Vocula potuerit. Id solum,  
 ut in tumultu, monuit, subsignano milite media firmare.  
 Auxilia passim circumfusa sunt. Eques prorupit, ex-  
 ceptusque compositis hostium ordinibus terga in suos  
 vertit. Cædes inde, non prælium. Et Nerviorum 3  
 cohortes, metu seu perfidia, latera nostrorum nudaverunt.  
 Sic ad legiones perventum; quæ, amissis signis, intra  
 vallum sternebantur, cum repente novo auxilio fortuna  
 pugnæ mutatur. Vasconum lectæ a Galba cohortes 4  
 ac tum accitæ dum castris propinquant, auditu præ-  
 liantium clamore, intentos hostes a tergo invadunt,  
 latioremque quam pro numero terrorem faciunt, aliis a  
 Novesio, aliis a Mogontiaco, universas copias advenisse  
 credentibus. Is error addit animos, et dum alienis  
 viribus confidunt, suas recepere. Fortissimus quisque 5  
 e Batavis, quantum peditum erat, funduntur: eques  
 evasit cum signis captivisque, quos prima acie corri-  
 puerant. Cæsorum eo die in partibus nostris major  
 numerus et imbellior; e Germanis ipsa robora. Dux 34  
 uterque pari culpa meritus adversa, prosperis defuere.  
 Nam Civilis si majoribus copiis instruxisset aciem,  
 circumiri a tam paucis cohortibus nequisset, castraque  
 perrupta exscidisset. Vocula nec adventum hostium 2  
 exploravit, eoque simul egressus victusque; dein vic-  
 toriae parum confisus, tritis frustra diebus, castra in  
 hostem movit, quem si statim impellere cursumque  
 rerum sequi maturasset, solvere obsidium legionum

3 eodem impetu potuit. Tentaverat interim Civilis ob-  
sessorum animos, tanquam perditæ apud Romanos res  
et suis victoria provenisset. Circumferebantur signa  
vexillaque; ostentati etiam captivi. Ex quibus unus,  
egregium facinus ausus, clara voce gesta patefecit, con-  
fossus illico a Germanis; uide major indici fides.  
4 Simul vastatione incendiisque flagrantium villarum  
venire victorem exercitum intellegebatur. In con-  
spectu castrorum constitui signa, fossamque et vallum  
circumdari Vocula jubet: depositis impedimentis sarcin-  
isque expediti certarent. Hinc in ducem clamor  
5 pugnam poscentium; et minari assueverant. Ne tem-  
pore quidem ad ordinandam aciem capto, incompositi  
fessique prælium sumpsere. Nam Civilis aderat, non  
minus vitiis hostium quam virtute suorum fretus.  
6 Varia apud Romanos fortuna, et seditionissimus quis-  
que ignavus. Quidam recentis victoriæ memores re-  
tinere locum, ferire hostem, seque et proximos hortari,  
et, redintegrata acie, manus ad obsessos tendere, ne  
7 tempori deessent. Illi cuncta e muris cernentes, omni-  
bus portis prorumpunt. Ac forte Civilis lapsu equi  
prostratus, credita per utrumque exercitum fama vul-  
neratum aut imperfectum, immane quantum suis pavoris  
8 et hostibus alacritatis indidit. Sed Vocula, omissis  
fugientium tergis, vallum turrisque castrorum augebat,  
tanquam rursus obsidium immineret, corrupta toties  
35 victoria non falso suspectus bellum malle. Nihil æque  
exercitus nostros quam egestas copiarum fatigabat.  
Impedimenta legionum cum imbelli turba Novesium  
missa, ut inde terrestri itinere frumentum advehherent:  
2 nam flumine hostes potiebantur. Primum agmen se-  
curum incessit, nondum satis firmo Civile. Qui ubi  
rursum missos Novesium frumentatores, datasq[ue] in

A. D. 69.]

præsidium cohortes, velut multa pace ingredi accepit, rarum apud signa militem, arma in vehiculis, cunctos licentia vagos, compositus invadit, præmissis qui pontes et viarum angusta insiderent. Pugnatum longo agmine 3 et incerto Marte, donec prælium nox dirimeret. Cohortes Geldubam perrexere, manentibus, ut fuerant, castris, quæ relictorum illic militum præsidio tenebantur. Non erat dubium quantum in regressu discriminis adeundum foret frumentatoribus onustis perculsisque. Addit exercitu suo Voclæ mille delectos e quinta et 4 quinta decima legionibus apud Vetera obsessis, indomitum militem et ducibus infensum. Plures quam jussum erat profecti palam in agmine fremebant non se ultra famem, insidias legatorum toleratuos. At qui reman- 5 serant, desertos se abducta parte legionum querebantur. Duplex hinc seditio, aliis revocantibus Voclæ, aliis redire in castra abnuentibus. Interim Civilis Vetera 36 circumsedit. Voclæ Geldubam atque inde Novesium concessit. Civilis capit Geldubam; mox haud procul Novesio equestri prælio prospere certavit. Sed miles 2 secundis adversisque perinde in exitium ducum accen-debatur. Et adventu quintanorum quindecimano-rumque auctæ legiones donativum exposcunt, comperto pecuniam a Vitellio missam. Nec diu cunctatus Hor- 3 deonius nomine Vespasiani dedit. Idque præcipuum fuit seditionis alimentum. Effusi in luxum et epulas et nocturnos cœtus veterem in Hordeonium iram re-novant, nec ullo legatorum tribunorumve obsistere auso (quippe omnem pudorem nox ademerat,) protractum e cubili interficiunt. Eadem in Voclæ parabantur, nisi servili habitu per tenebras ignoratus evasisset. Ubi, 4 sedato impetu, metus rediit, centuriones cum epistolis ad civitates Galliarum misere, auxilia ac stipendia ora-

[A. U. C. 823.]

37 tuos. Ipsi, ut est vulgus sine rectore præceps, pavidum, socors, adventante Civile, raptis temere armis ac statim omissis, in fugam vertuntur. Res adversæ discordiam peperere, iis qui e superiore exercitu erant causam suam dissociantibus. Vitellii tamen imagines in castris et per proximas Belgarum civitates repositæ, cum jam Vitellius occidisset. Dein mutati in pænitentiam primani quartanique et duodevicesimani Vocabulam sequuntur; apud quem resumpto Vespasiani sacramento ad liberandum Mogontiaci obsidium ducebantur.

4 Discesserant obsessores, mixtus ex Chattis, Usipiis, Mattiacis exercitus, satietate prædæ nec incruenti. In via dispersos et nescios miles noster invaserat. Quin et loricam vallumque per fines suos Treveri struxere, magnisque in vicem cladibus cum Germanis certabant, donec egregia erga populum Romanum merita mox rebelles fœdarent.

38 Interea Vespasianus iterum ac Titus consulatum ab sentes inierunt, mæsta et multiplici metu suspensa 823. civitate, quæ super instantia mala falsos pavores indu-  
70. erat, descivisse Africam res novas moliente L. Pisone.

2 Is *præerat* provinciæ, nequaquam turbidus ingenio: sed quia naves sævitia hiemis prohibebantur, vulgus alimenta in dies mercari solitum, cui una ex re publica annouæ cura, clausum litus, retineri commeatus, dum timet, credebat; augentibus famam Vitellianis, qui studium partium nondum posuerant; ne victoribus quidem ingrato rumore, quorum cupiditates, externis quoque bellis inexplebiles, nulla unquam civilis victoria 39 satiavit. Kalendis Januariis in senatu, quem Julius Frontinus, prætor urbanus, vocaverat, legatis exercitibusque ac regibus laudes gratesque decretæ; et Tettio Juliano prætura, tanquam transgredientem in partes

A. D. 70.]

Vespasiani legionem deseruisset, ablata, ut in Plotium Griphum transferretur. Hormo dignitas equestris 2 data. Et mox ejurante Frontino Cæsar Domitianus præturam cepit. Ejus nomen epistolis edictisque præponebatur, vis penes Mucianum erat, nisi quod pleraque Domitianus, instigantibus amicis aut propria libidine, audebat. Sed præcipius Muciano metus e Primo An- 3 tonio Varoque Arrio, quos recentes clarosque rerum fama ac militum studiis etiam populus fovebat, quia in neminem ultra aciem sævierant. Et ferebatur An- 4 tonius Scribonianum Crassum, egregiis majoribusque et fraterna imagine fulgentem, ad capessendam rem publicam hortatus, haud defutura conscientia manu, ni Scribonianus abnuisset, ne paratis quidem corrumpi facilis, adeo metuens incerta. Igitur Mucianus, quia 5 propalam opprimi Antonius nequibat, multis in senatu laudibus cumulatum secretis promissis onerat, cite- riorem Hispaniam ostentans discessu Cluvii Rufi vacuam; simul amicis ejus tribunatus præfecturasque largitur. Dein postquam inanem animum spe et cupi- 6 dine impleverat, vires abolet dimissa in hiberna legione septima, cuius flagrantissimus in Antonium amor. Et tertia legio, familiaris Arrio Varo miles, in Syriam remissa. Pars exercitus in Germanias ducebatur. Sic egesto quidquid turbidum, redit urbi sua forma leges- que et munia magistratum.

Quo die senatum ingressus est Domitianus, de ab- 40 sentia patris fratrisque ac juventa sua pauca et modica disseruit, decorus habitu; et, ignotis adhuc moribus, crebra oris confusio pro modestia accipiebatur. Re- 2 ferente Cæsare de restituendis Galbae honoribus, cen- suit Curtius Montanus ut Pisonis quoque memoria celebraretur. Patres utrumque jussere: de Pisone irri-

[A. U. C. 823.]

3 tum fuit. Tum sorte ducti per quos redderentur bello  
 rapta, quique æra legum vetustate delapsa noscerent  
 figerentque, et fastos, adulatione temporum foedatos,  
 exonerarent, modumque publicis impensis facerent.  
 4 Redditur Tettio Juliano prætura, postquam cognitus  
 est ad Vespasianum confugisse: Gripho honor mansit.  
 Repeti iude cognitionem inter Musonium Rufum et  
 Publum Celerem placuit, damnatusque Publius et So-  
 5 rani manibus satisfactum. Insignis publica severitate  
 dies ne privatum quidem lande caruit. Justum indi-  
 cium explèsse Musonius videbatur: diversa fama De-  
 metrio Cynicam sectam professo, quod manifestum  
 reum ambitiosius quam honestius defendisset. Ipsi  
 Publio neque animus in periculis neque oratio suppe-  
 6 ditavit. Signo ultionis in accusatores dato, petit a  
 Cæsare Junius Mauricus, ut commentariorum princi-  
 palium potestatem senatui faceret, per quos nosceret  
 quem quisque accusandum poposcisset. Consulendum  
 41 tali super re principem respondit. Senatus, inchoan-  
 tibus, primoribus jusjurandum concepit, quo certatim  
 omnes magistratus, cæteri ut sententiam rogabantur,  
 deos testes advocabant nihil ope sua factum quo cujus-  
 quam salus læderetur, neque se præmium aut honorem  
 ex calamitate civium cepisse, trepidis et verba jurisju-  
 randi per varias artes mutantibus, quis flagitiæ con-  
 2 scientia inerat. Probabant religionem patres, perju-  
 rium arguebant. Eaque velut censura in Sariolenum  
 Vocolam et Nonium Attianum et Cestium Severum  
 acerrime incubuit, crebris apud Neronem delationibus  
 3 famosos. Sariolenum et receus crimen urgebat, quod  
 apud Vitellium molitus eadem foret. Nec destitit se-  
 natus manus intentare Vocolæ, donec curia excederet.  
 Ad Paccium Africanum transgressi cum quoque pro-

A. D. 70.]

turbant, tanquam Neroni Scribonios fratres concordia opibusque insignes ad exitium monstravisset. Afri-<sup>4</sup> canus neque fateri audebat neque abnuere poterat: in Vibium Crispum, cuius interrogationibus fatigabatur, ultiro conversus, miscendo quæ defendere nequibat, societate culpæ iuvidiam declinavit.

Magnam eo die pietatis eloquentiæque famam Vipsta-<sup>42</sup> nus Messala adeptus est, nondum senatoria ætate, ausus pro fratre Aquilio Regulo deprecari. Regulum subversa Crassorum et Orfiti domus in summum odium extulerat. Sponte [ex SC.] accusationem subisse juve-<sup>2</sup> nis admodum, nec depellendi periculi, sed in spem potentiæ videbatur. Et Sulpicia Prætextata, Crassi uxor, quatuorque liberi, si cognosceret Senatus, ultores aderant. Igitur Messala non causam, neque reum tueri, <sup>3</sup> sed periculis fratris semet opponens, flexerat quosdam. Occurrit truci oratione Curtius Montanus, eo usque progressus, ut, post cædem Galbæ, datam interfectori Pisonis pecuniam a Regulo, appetitumque morsu Pi-  
sonis caput, objectaret. “ Hoc certe,” inquit, “ Nero <sup>4</sup> non coëgit, nec dignitatem, aut salutem, illa sævitia redemisti. Sane toleremus istorum defensiones, qui perdere alios, quam periclitari ipsi, maluerunt. Te securum reliquerat exsul pater, et divisa inter creditores bona, nondum honorum capax ætas: nihil quod ex te concupiseret Nero, nihil quod timeret. Libidine <sup>5</sup> sanguinis et hiatu præmiorum ignotum adhuc ingenium, et nullis defensionibus expertum, cæde nobili imbuisti. Cum ex funere Reipublicæ raptis Consularibus spoliis, septuagies sestertio saginatus et sacerdotio fulgens, innoxios pueros, illustres senes, conspicuas feminas eadem ruina prosterneres: cum segnitiam Neronis incusares, quod per singulas domos seque et delatores fatigaret:

6 posse universum Senatum una voce subverti. Retinetе, Patres conscripti, et reservate hominem tam expediti consilii, ut omnis ætas instructa sit, et quomodo senes nostri Marcellum, Crispum, juvenes Regulum,  
 7 imitentur. Invenit etiam æmulos infelix nequitia. Quid si floreat vigeatque? Et quem adhuc Quæstorum offendere non audemus, Prætorium et Consularem visuri sumus? An Neronem extremum dominorum pu-  
 8 tatis? Idem crediderant, qui Tiberio, qui Caio, superstites fuerunt: cum interim iutestabilior et sævior exortus est. Non timemus Vespasianum: ea Principis ætas, ea moderatio. Sed diutius duraut exempla, quam mores. Elanguimus, Patres conscripti, nec jam ille Senatus sumus, qui, occiso Nerone, delatores et ministros more majorum puniendos flagitabat. Optimus est, post malum Principem, dies primus."

43 Tanto cum assensu Senatus auditus est Montanus, ut spem caperet Helvidius, posse etiam Marcellum prosterne. Igitur a laude Cluvii Rufi orsus, qui, perinde dives et eloquentia clarus, nulli unquam sub Nerone periculum facessisset, crimine simul exemploque Epri-  
 2 um urgebat, ardentibus Patrum animis. Quod ubi sensit Marcellus, velut excedens curia: "Imus," inquit, "Prisce, et relinquimus tibi Senatum tuum: regna, præsentе Cæsare." Scquebatur Vibius Crispus: ambo infensi, vultu diverso; Marcellus minacibus oculis, Crispus renidens: donec accusu amicorum retrahentur. Cum gliseret certamen, hinc multi bonique, inde pauci et validi, pertinacibus odiis tenderent, con-  
 44 sumptus per discordiam dies. Proximo Senatu, inchoante Cæsare, de abolendo dolore iraque, et priorum temporum necessitatibus, censuit Mucianus prolixe pro accusatoribus: simul eos, qui cœptam, dein omissam,

A. D. 70.]

actionem repeterent, monuit sermone molli et tanquam rogarct. Patres cœptatam libertatem, postquam ob- 2 viam itum, omisere. Mucianus, ne sperni Senatus judicium, et cunctis sub Nerone admissis data impunitas videretur, Octavium Sagittam et Antistium Sosianum, Senatorii ordinis, egressos exsilium, in casdem insulas rededit. Octavius Pontiam Postumiam, stupro 3 cognitam et nuptias suas abnuentem, impotens amoris interfecerat; Sosianus pravitate morum multis exitosus. Ambo gravi Senatus consulto damnati pulsique, quamvis concesso aliis redditu, in eadem poena retenti sunt. Nec ideo lenita erga Mucianum invidia. 4 Quippe Sosianus ac Sagitta viles, etiam si revertereuntur: accusatorum ingenia et opes et exercita malis arbitris potentia timebantur.

Reconciliavit paulisper studia Patrum habita in 45 Senatu cognitio secundum veterem morem. Manlius Patruitus, Senator, pulsatum se in colonia Seneusi cœtu multitudinis et jussu Magistratum, querebatur: nec finem injuriaæ hic stetisse: planctum et lamenta et supremorum imaginem præsenti sibi circumdata cum contumeliis et probris, quæ in Senatum universum jaccerentur. Vocati, qui arguebantur. Et, cognita causa, in convictos vindicatum. Additumque senatūs consultum quo Senensium plebes modestiæ admoneretur. Iisdem diebus Antonius Flamma Cyreneusibus damnatur lege repetundarum, et exilio ob sævitiam.

Inter quæ militaris seditio prope exarsit. Præ- 46 torianam militiam repeatebant a Vitellio dimissi, pro Vespasiano congregati: et illectus in eandem spem, e legionibus miles promissa stipendia flagitabat: ne Vitelliiani quidem sine multa cæde pelli poterant; sed immensa pecunia dicebatur, qua tanta vis hominum re-

2 tinenda erat. Ingressus castra Mucianus, quo rectius  
 stipendia singulorum spectaret, suis cum insignibus  
 armisque victores constituit, modicis inter se spatiis  
 discretos. Tum Vitelliani, quos apud Bovillas in de-  
 ditionem acceptos memoravimus, cæterique per urbem  
 et urbi vicina conquisiti producuntur prope intecto  
 3 corpore. Eos Mucianus diduci, et Germanicum Bri-  
 tannicumque militem, ac si qui aliorum exercituum,  
 separatim adsistere, jubet. Illos primus statim aspec-  
 tus obstupefecerat : cum ex diverso velut aciem, telis  
 et armis trucem, semet clausos nudosque et illuvie  
 4 deformes, aspicerent. Ut vero hoc illuc distrahi  
 cœpere, metus per omnes et præcipua Germanici militis  
 formido, tanquam ea separatione ad cædem destinaren-  
 tur: prensare commanipularium pectora, cervicibus  
 innecti, suprema oscula petere, ne desererentur soli,  
 neu, in pari causa, disparem fortunam paterentur :  
 modo Mucianum, modo absentem Principem, pos-  
 tremum cælum ac Deos obtestari : donec Mucianus,  
 cunctos ejusdem sacramenti, ejusdem Imperatoris mili-  
 5 tes appellans, falso timori obviam iret. Namque et  
 victor exercitus clamore lacrimas eorum juvabat. Isque  
 finis illa die. Paucis post diebus, alloquenter Domi-  
 tianum firmati jam excepere. Spernunt oblatos agros :  
 militiam et stipendia orant. Preces erant, sed quibus  
 6 contradici non posset. Igitur in Prætorium accepti.  
 Dein, quibus ætas et justa stipendia, dimissi cum  
 honore, alii ob culpam ; sed carptim ac singuli : quo  
 tutissimo remedio consensus multitudinis extenuatur.  
 47 Cæterum verane pauperie, an uti videretur, actum in  
 Senatu, ut sexcenties sestertium a privatis mutuum  
 acciperetur. Præpositusque ei curæ Poppæus Silvanus.  
 Nec multo post necessitas abiit, sive omissa simulatio.

A. D. 70.]

Abrogati inde, legem ferente Domitiano, Consulatus, 2  
quos Vitellius dederat. Funusque Censorium Flavio  
Sabino ductum: magna documenta instabilis Fortunæ,  
summaque et ima miscentis.

Sub idem tempus L. Piso Proconsul interficitur. 48  
Ea de cæde quam verissime expediam, si pauca supra  
repetiero, ab initio causisque talium facinorum non  
absurda. Legio in Africa auxiliaque tutandis Imperii  
finibus, sub D. Augusto Tiberioque Principibus, Pro-  
consuli parebant. Mox C. Cæsar, turbidus animi, ac 2  
M. Silanum, obtinentem Africam, metuens, ablatam  
Proconsuli legionem, misso in eam rem Legato tra-  
dedit. Æquatus inter duos beneficiorum numerus et,  
mixtis utriusque mandatis, discordia quæsita, auctaque  
pravo certamine. Legatorum vis adolevit diuturnitate 3  
officii, vel quia minoribus major æmulandi cura; Pro-  
consulum splendidissimus quisque securitati magis,  
quam potentiae consulebant. Sed tum legionem in 49  
Africa regebat Valerius Festus, sumptuosæ adolescen-  
tiæ, neque modica cupiens, et affinitate Vitelli anxius.  
Is crebris sermonibus tentaveritne Pisonem ad res  
novas, an tentanti restiterit, incertum; quoniam se-  
creto eorum nemo affuit, et, occiso Pisone, plerique ad  
gratiam interfectoris inclinavere. Nec ambigitur, pro- 2  
vinciam et militem alienato erga Vespasianum animo  
fuisse: et quidam e Vitellianis, urbe profugi, ostendebant  
Pisoni nutantes Gallias, paratam Germaniam,  
pericula ipsius et in pace suspecta tutius bellum. In 3  
ter quæ Claudio Sagitta, Præfectus alæ Petrinæ,  
prospera navigatione prævenit Papirium, Centurionem,  
a Muciano missum, asseveravitque mandata interfici-  
endi Pisonis Centurioni data. Cecidisse Galerianum, 4  
consobrinum ejus generumque. Unam in audacia spem

salutis. Sed duo itinera audendi; seu mallet statim arma, seu petita navibus Gallia, Duce se Vitellianis 5 exercitibus ostenderet. Nihil ad ea moto Pisone, Centurio a Muciano missus, ut portum Carthaginis attigit, magna voce læta Pisoni omina, tanquam Principi, continuare; oovios et subitæ rei miraculo attonitos, ut 6 eadem adstreperent, hortari. Vulgus credulum, ruere in forum: præsentiam Pisonis exposcere. Gaudio clamoribusque cuueta miscebant, indiligentia veri et adulandi libidine. Piso, indicio Sagittæ, vel insita modestia, non in publicum egressus est, neque se studiis 7 vulgi permisit. Centurionemque percunctatus, postquam, quæsitum sibi crimen cædemque, comperit, animadverti in eum jussit, haud perinde spe vitæ, quam ira in percussorem, quod idem ex interfectoribus Clodii Macri, cruentas Legati sanguine manus ad cædem Pro 8 consulis retulisset. Anxio deinde edicto Carthaginien-sibus increpitis, ne solita quidem munia usurpabat, clausus intra domum, ne qua motus novi causa vel 50 forte oriretur. Sed, ubi Festo consternatio vulgi, Centurionis supplicium, veraque et falsa, more famæ, in 2 majus immotuere, equites in necem Pisonis mittit. Illi raptim vecti, obscuro adhuc cœptæ lucis, domum Pro-consulis irrumpunt, destrictis gladiis: et magna pars, Pisonis ignari, quod Pœnos auxiliares Maurosque in eam cædem delegerat, haud procul cubiculo, obvium forte servum, quisnam et ubi esset Piso? interrogavere. 3 Servus egregio mendacio, se Pisonem esse, respondit: ac statim obtruncatur. Nec multo post Piso interficitur. Namque aderat, qui nosceret, Bebius Massa, e Procuratoribus Africæ, jam tunc optimo cuique exitiosus, et in causas malorum, quæ mox tulimus, saepius 4 redditurus. Festus Adrumeto, ubi speculabundus sub-

A. D. 70.]

stiterat, ad legionem contendit, Præfectumque castorum, Cetronium Pisanum, vinciri jussit, proprias ob simultates: sed Pisonis satellitem vocabat, militesque et Centuriones quosdam puniit, alios præmiis affecit: neutrum ex merito, sed ut oppressisse bellum crederetur. Mox Æensium, Leptitanorumque discordias 5 compouit, quæ, raptu frugum et pecorum inter agrestes, modicis principiis, jam per arma atque acies exercebantur. Nam populus Æensis, multitudine inferior, Garamantas exciverat, gentem indomitam et inter accolas latrociniis secundam. Unde arctæ Leptitanis res, 6 lateque vastatis agris intra mœnia trepidabant: donec, interventu cohortium alarumque, fusi Garamantes et recepta omnis præda, nisi quam vagi per inaccessa mapalium ulterioribus vendiderant.

At Vespasiano, post Cremonensem pugnam et pros- 51 peros undique nuntios, cecidisse Vitellium, multi eusque ordinis, pari audacia fortunaque hibernum mare aggressi, nuntiavere. Aderant legati Regis Vologesi, quadraginta Parthorum equitum millia offerentes. Mag- 2 nificum latumque, tantis sociorum auxiliis ambiri, neque indigere. Gratiae Vologeso actæ, mandatumque, ut legatos ad Senatum mitteret et pacem esse sciret. Vespasianus, in Italiam resque urbis intentus, adversam 3 de Domitiano famam accipit: tanquam terminos ætatis et concessa filio egrederetur. Igitur validissimam exercitus partem Tito tradit, ad reliqua Judaici belli perpetranda. Titum, antequam digrederetur, multo apud 52 patrem sermone orâsse dicebatur, ne criminantium nuntiis temere accenderetur: integrumque se ac placobilem filio præstaret. Non legiones, non classes, perinde firma imperii munimenta, quam numerum liberorum. Nam amicos tempore, fortuna, cupidinibus 2

[A. U. C. 823.]

aliquando, aut erroribus, imminui, transferri, desinere : suum cuique sanguinem indiscretum, sed maxime Principibus : quorum prosperis et alii fruantur, adversa ad 3 junctissimos pertineant. Ne fratribus quidem manusram concordiam, ni parens exemplum præbuisset. Vespasianus, haud æque Domitiano mitigatus, quam Titi pietate gaudens, bono esse animo jubet, belloque et armis Rempublicam attollere : sibi pacem domumque 4 curæ fore. Tum celerrimas navium, frumento onustas, sævo adhuc mari committit. Quippe tanto discrimine urbs nutabat, ut decem haud amplius dierum frumentum in horreis fuerit, cum a Vespasiano commeatus subvenere.

53 Curam restituendi capitolii in L. Vestinum confert, Equestris ordinis virum, sed auctoritate famaque inter proceres. Ab eo contracti Haruspices monuere, ut reliquiae prioris delubri in paludes aveherentur : templum iisdem vestigiis sisteretur. Nolle Deos, mutari 2 veterem formam. Undecimo Kal. Julias, serena luce spatium omne, quod templo dicabatur, evinctum vittis coronisque. Ingressi milites, quis fausta nomina, felicibus ramis. Dein virgines Vestales, cum pueris puelisque patrimis matrimisque, aqua, vivis e fontibus 3 amnibusque hausta, perluere. Tum Helvidius Priscus, Prætor, præeunte Plautio Æliano, Pontifice, lustrata suovetaurilibus area et super cespitem redditis extis, Jovem, Junonem, Minervam, præsidesque Imperii Deos precatus, uti cœpta prosperarent, sedesque suas, pietate hominum inchoatas, Divina ope attollrent ; vittas, quis 4 ligatus lapis, innexique funes erant, contigit. Simul cæteri Magistratus et Sacerdotes et Senatus et Eques et magna pars populi, studio lætitiaque connixi, saxum ingens traxere. Passimque injectæ fundamentis argenti

A. D. 70.]

aurique stipes et metallorum primitiae, nullis fornacibus victae, sed ut gignuntur. Prædixere Haruspices, ne 5 temeraretur opus saxo aurove, in aliud destinato. Altitudo ædibus adjecta. Id solum religio annuere. Et prioris templi magnificentiae defuisse creditum.

Audita interim per Gallias Germaniasque mors Vi-<sup>54</sup> tellii duplicaverat bellum. Nam Civilis, omissa dis-  
simulatione, in Populum Romanum ruere. Vitellianæ  
legiones vel externum servitium, quam Imperatorem  
Vespasianum, malle. Galli sustulerant animos, eandem 2  
ubique exercituum nostrorum fortunam rati: vulgato  
rumore, a Sarmatis Dacisque Moesica ac Pannonica  
hiberna circumsideri. Paria de Britannia fingebantur.  
Sed nihil æque, quam incendium capitolii, ut finem 3  
Imperio adesse crederent, impulerat. Captam olim a  
Gallis urbem: sed, integra Jovis sede, mansisse Im-  
perium. Fatali nunc igne signum cælestis iræ datum,  
et possessionem rerum humanarum Transalpinis geu-  
tibus portendi, superstitione vana Druidæ cauebant.  
Incesseratque fama, primores Galliarum, ab Othonē 4  
adversus Vitellium missos, antequam digrederentur,  
pepigisse, ne deessent libertati, si Populum Romanum  
continua bellorum civilium series et interna mala fre-  
gissent. Ante Flacci Hordconii cædem, nihil prorupit, 55  
quo conjuratio intelligeretur. Interfecto Hordeonio,  
commeavere nuntii inter Civilem Classicumque, Præ-  
fectum alæ Treverorum. Classicus nobilitate opibusque  
ante alios. Regium illi genus et pace belloque clara  
origo. Ipse e majoribus suis hostis Populi Romani  
quam socius, jactabat. Misceuere sese Julius Tutor et 2  
Julius Sabinus: hic Trevir, hic Lingonus. Tutor ripæ  
Rhœni a Vitellio præfектus: Sabinus, super insitam  
vanitatem, falsæ stirpis gloria incendebatur: proaviam

suam D. Julio, per Gallias bellanti, corpore atque adul-  
 3 terio placuisse. Hi secretis sermonibus animos cætero-  
 rum scrutari. Ubi, quos idoneos rebantur, conscientia  
 obstrinxere, in colonia Agrippinensi in domum privatam  
 conveniunt. Nam publice civitas talibus inceptis abhor-  
 rebat : attamen interfueret quidam Ubiorum Tungro-  
 4 rumque. Sed plurima vis penes Treveros ac Lingonas :  
 nec tulere moras consultandi. Certatim proclamant :  
 furere discordiis Populum Romanum, cæsas legiones,  
 vastatam Italiam, capi cum maxime urbem, omnes exer-  
 citus suis quemque bellis detineri. Si Alpes præsidiis  
 firmentur, coalita libertate, dispecturas Gallias, quem  
 56 virium suarum terminum velint. Hæc dicta pariter  
 probataque. De reliquïs Vitelliani exercitus dubita-  
 vere. Plerique interficiendos censebant, turbidos, infi-  
 2 dos, sanguine Ducum pollutos. Vicit ratio parcendi :  
 ne, sublata spe veniae, pertinaciam accenderent. Alli-  
 ciendos potius in societatem. Legatis tautum legionum  
 imperfectis, cæterum vulgus, conscientia scelerum et  
 3 spe impunitatis, facile accessurum. Ea primi consilii  
 forma. Missique per Gallias concitores belli. Simu-  
 latum ipsis obsequium, quo incautiorem Voculam op-  
 primerent. Nec defuere, qui Voculæ nuntiarent. Sed  
 vires ad coercendum deerant, infrequentibus infidisque  
 4 legionibus. Inter ambiguos milites et occultos hostes,  
 optimum e præsentibus ratus, mutua dissimulatione et  
 iisdem, quibus petebatur, artibus grassari ; in coloniam  
 5 Agrippinensem descendit. Illuc Claudius Labeo, quem,  
 captum et extra conventum amandatum in Frisos,  
 diximus, corruptis custodibus perfugit. Pollicitusque,  
 si præsidium daretur, iturum in Batavos et potiorem  
 civitatis partem ad societatem Romanam retracturum ;  
 accepta peditum equitumque modica manu, nihil apud

A. D. 70.]

Batavos ausus, quosdam Nerviorum Betasiorumque in arma traxit. Et furtim magis, quam bello, Canninefates 6 Marsacosque incursabat. Vocula, Gallorum fraude illectus, ad hostem contendit. Nec procul Veteribus 57 aberat, cum Classicus ac Tutor, per speciem explorandi prægressi, cum Ducibus Germanorum pacta firmaverc. Tumque primum discreti a legionibus proprio vallo 2 castra sua circumdant, obtestante Vocula, “ Non adeo turbatam civilibus armis rem Romanam, ut Treveris etiam Lingonibusque despectui sit. Superesse fidas provincias, victores exercitus, fortunam Imperii, et ultores Deos. Sic olim Sacrovirum et Æduos, nuper 3 Vindicem Galliasque, singulis præliis concidisse. Eadem rursus Numina, eadem fata, ruptores foederum exspectarent. Melius D. Julio Divoque Augusto notos eorum animos. Galbam, et infracta tributa, hostiles spiritus induisse. Nunc hostes, quia molle servitium; cum spoliati exutique fuerint, amicos fore.” Haec ferociter 4 locutus, postquam perstare in perfidia Classicum Tutorumque videt, verso itinere, Novesium concedit. Galli duum millium spatio distantibus campis consedere. Illuc commeantium Centurionum militumque emebantur 5 animi: ut (flagitium iucognitum,) Romanus exercitus in externa verba jurarent, pignusque tanti sceleris nece aut vinculis Legatorum daretur. Vocula, quanquam plerique fugam suadebant, audendum ratus, vocata concione, in hunc modum disseruit:—“ Nunquam apud vos verba 58 feci, aut pro vobis sollicitior, aut pro me securior. Nam mihi exitium parari, libens audio: mortemque in tot malis honestam, ut finem miseriarum, exspecto. Vestri me pudet miseretque, adversus quos non prælium et acies parantur; id enim fas armorum et jus hostium. Bellum cum Populo Romano vestris se manibus gestu- 2

[A. U. C. 823.]

rum, Classicus sperat, Imperiumque et sacramentum  
 Galliarum ostentat. Adeo nos, si fortuna in præsens vir-  
 tusque deseruit, etiam vetera exempla deficiunt: quoties  
 Romanæ legiones perire præoptaverint, ne loco pelleren-  
 tur. Soeiæ sæpe nostri, exscindi urbes suas, seque cum  
 conjugibus ac liberis cremari, pertulerunt: neque aliud  
 pretium exitus, quam fides famaque. Tolerant cum  
 maxime inopiam obsidiumque apud Vetera legiones, nec  
 4 terrore aut promissis demoventur. Nobis, super arma  
 et viros et egregia castrorum munimenta, frumentum et  
 commeatus, quamvis longo bello pares. Pecunia nuper  
 etiam donativo suffecit: quod sive a Vespasiano, sive a  
 Vitellio, datum interpretari mavultis, ab Imperatore  
 5 certe Romano accepistis. Tot bellorum victores, apud  
 Geldubam, apud Vetera, fuso toties hoste, si pavetis  
 aciem, indignum id quidem: sed est vallum murique  
 et trahendi artes, donec e proximis provinciis auxilia  
 exereitusque concurrant. Sanc ego displiceam. Sunt  
 6 alii Legati, Tribuni, Centurio denique, aut miles. Ne  
 hoc prodigium toto terrarum orbe vulgetur, vobis sa-  
 tellitibus, Civilem et Classicum Italianam invasuros. An,  
 si ad mœnia urbis Germani Gallique duxerint, arma  
 patriæ inferetis? Horret animus tanti flagitii imagine.  
 7 Tutorin' Trevero agentur excubiae? Signum belli Ba-  
 tavus dabit? Germanorum catervas supplebitis? Quis  
 deinde sceleris exitus? cum Romanæ legiones contra  
 direxerint: transfugæ e trans fugis, et proditores e pro-  
 ditoribus, inter reeens et vetus sacramentum invisi Deis  
 8 errabit? Te, Jupiter optime maxime, quem per oc-  
 tingentos viginti annos tot triumphis coluimus, te,  
 Quirine, Romanæ parens urbis, precor venerorque, ut,  
 si vobis non fuit cordi, me Duec hæc castra incorrupta  
 et intemerata servari, at certe pollui fœdarique a Tute  
 et Classico ne sinatis. Militibus Romanis aut innocen-

A. D. 70.] tiam detis, aut maturam et sine noxa pœnitentiam.”  
 Varie excepta oratio, inter spem metumque ac pudorem. 5  
 Digressum Vocabulam, et de supremis agitantem, liberti  
 servique prohibuere, fœdissimam mortem sponte præ-  
 venire. Et Classicus, misso Æmilio Longino, desertore  
 primæ legionis, cædem ejus maturavit. Herennium et 2  
 Numisium, Legatos, vinciri satis visum. Dein, sumptis  
 Romani Imperii insignibus, in castra venit. Nec illi,  
 quanquam ad omne facinus durato, verba ultra sup-  
 peditavere, quam ut sacramentum recitaret. Juravere,  
 qui aderant, pro Imperio Galliarum. Interfectorem 3  
 Vocabulæ altis ordinibus, cæteros, ut quisque flagitium  
 navaverat, præmiis attollit. Divisæ inde inter Tutorem  
 et Classicum curæ. Tutor valida manu circumdatos 4  
 Agrippinenses, quantumque militum apud superiorem  
 Rheni ripam, in eadem verba adigit, occisis Magontiaci  
 Tribunis, pulso castrorum Præfecto, qui detrectave-  
 runt. Classicus corruptissimum quemque e deditis per- 5  
 gere ad obsessos jubet, veniam ostentantes, si præsentia  
 sequerentur: aliter nihil spei. Famem ferrumque et  
 extrema passuros. Adjecere, qui missi erant, exem-  
 plum suum. Obsessos hinc fides, inde egestas, inter 60  
 decus ac flagitium distrahebant. Cunctantibus solita  
 insolitaque alimenta deerant; absumptis jumentis equis-  
 que et cæteris animalibus, quæ profana fœdaque in  
 usum necessitas vertit. Virgulta postremo et stirpes et 2  
 internatas saxis herbas vellentes, miseriarum patientiae-  
 que documentum fuere: donec egregiam laudem fine  
 turpi macularent, missis ad Civilem legatis, vitam oran-  
 tes. Neque ante preces admissæ, quam in verba Gal- 3  
 liarum jurarent. Tum, pactus prædam castrorum, dat  
 custodes, qui pecuniam, calones, sarcinas retentarent,  
 ac qui ipsos leves abeuntes prosequerentur. Ad quin- 4

[A. U. C. 823.]

tum fere lapidem coorti Germani incatum agmen aggrediuntur. Pugnacissimus quisque in vestigio, multi palantes, occubuere : cæteri retro in castra profugiunt ; querente sane Civili et increpante Germanos, tanquam **5** fidem per scelus abrumperent. Simulata ea fuerint, an retinere savyentes nequiverit, parum affirmatur. Di-  
**61** reptis castris, faces injiciunt : cunctosque, qui prœ-  
lio superfuerant, incendium hausit. Civilis, barbaro  
voto, post cœpta adversus Romanos arma, propexum  
rutilatumque crinem, patrata demum cæde legionum,  
depositum. Et ferebatur, parvulo filio quosdam cap-  
**2** tivorum sagittis jaculisque puerilibus figendos obtu-  
lissee. Cæterum neque se, neque quemquam Batavum,  
in verba Galliarum adegit : fisus Germanorum opibus :  
et, si certandum adversus Gallos de possessione rerum  
**3** foret, inclitus fama et potior. Mummius Lupercus, Le-  
gatus legionis, inter dona missus Veledæ. Ea virgo nati-  
onis Bructeræ late imperitabat : vetere apud Germanos  
more, quo plerasque feminarum fatidicas, et, augescente  
**4** superstitione, arbitrantur Deas. Tuncque Veledæ auc-  
toritas adolevit. Nam prosperas Germanis res et ex-  
cidium legionum prædixerat. Sed Lupercus in itinere  
interfectus. Pauci Centurionum Tribunorumque, in  
**5** Gallia geniti, reservantur, pignus societatis. Cohor-  
tium, alarum, legionum hiberna subversa cremataque :  
iis tantum relictis, quæ Magontiaci ac Vindonissæ sita  
**62** sunt. Legio sextadecima cum auxiliis simul deditis a  
Novesio in coloniam Treverorum transgredi jubetur,  
**2** præfinita die, intra quam castris excederet. Medium  
omne tempus per varias curas egere : ignavissimus  
quisque, cæsorum apud Vetera exemplo, paventes ;  
melior pars rubore et infamia : “ quale illud iter ? quis  
dux viæ ? et omnia in arbitrio eorum, quos vitæ necis-

A. D. 70.]

que dominos fecissent." Alii, nulla dedecoris cura,<sup>8</sup> pecuniam, aut carissima sibimet ipsi circumdare. Qui-dam expedire arma, telisque tanquam in aciem accingi. Haec meditautibus, advenit proficisci hora, exspectatione tristior. Quippe intra vallum deformitas haud <sup>4</sup> perinde notabilis: detexit ignominiam campus et dies. Revulsæ Imperatorum imagines, in honora signa, fulgentibus hinc inde Gallorum vexillis: silens agmen, et velut longæ exsequiæ: dux Claudius Sanctus, effosso oculo: dirus ore, ingenio debilior. Duplicatur fla-<sup>5</sup> gitium, postquam, desertis Bonnensisibus castris, altera se legio miscuerat. Et, vulgata captarum legionum fama, cuncti, qui paulo ante Romanorum nomen horrebant, procurrentes ex agris tectisque et undique effusi insolito spectaculo nimium fruebantur. Non tulit ala <sup>6</sup> Picentina gaudium insultantis vulgi: spretisque Sancti promissis aut minis, Magontiacum abeunt: ac forte obvio interfectore Voculæ, Longino, conjectis in eum telis, initium exsolvendæ in posterum culpæ fecere. Legiones, nihil mutato itinere, ante mœnia Treverorum considunt.

Civilis et Classicus, rebus secundis sublati, an colo-<sup>63</sup> niam Agrippineusem diripiendam exercitibus suis permetterent, dubitavere. Sævitia ingenii et cupidine prædae ad excidium civitatis trahebantur: obstabat ratio belli, et novum Imperium inchoantibus utilis clementiæ fama. Civilem etiam beneficij memoria flexit, <sup>2</sup> quod filium ejus, primo rerum motu, in colonia Agrip-piniensi deprehensem, honorate custodierant. Sed Trans-<sup>3</sup> rhenanis gentibus invisa civitas, opulentia auctuque. Neque alium finem belli rebantur, quam si promiscua ea sedes omnibus Germanis foret, aut, disjecta, Ubios quoque dispersisset. Igitur Tencteri, Rheno discreta <sup>64</sup>

gens, missis legatis, mandata apud concilium Agrippinensium edi jubent: quæ ferocissimus e legatis in  
 2 hunc modum protulit:—"Redisse vos in corpus nomenque Germaniæ, communibus Deis et præcipuo Deorum, Marti, grates agimus: vobisque gratulamur, quod tandem liberi inter liberos eritis. Nam ad hunc diem flumina ac terras et cælum quodammodo ipsum clauerant Romani: ut colloquia congressusque nostros arcerent: vel, quod contumeliosius est viris ad arma natis, inermes ac prope nudi, sub custode et pretio  
 3 coiremus. Sed, ut amicitia societasque nostra in æternum rata sit, postulamus a vobis, muros coloniæ, munimenta servitii, detrahatis: (etiam fera animalia, si clausa teneas, virtutis obliviscuntur:) Romanos omnes in finibus vestris trucidetis; haud facile libertas  
 4 et domini miscentur. Bona interfectorum in medium cedant, ne quis occulere quidquam aut segregare causam suam possit. Liceat nobis vobisque utramque ripam colere, ut olim majoribus nostris. Quomodo lucem diemque omnibus hominibus; ita omnes terras  
 5 fortibus viris natura aperuit. Instituta cultumque patriæ resumite, ab ruptis voluptatibus, quibus Romani plus adversus subjectos, quam armis, valent.  
 Sincerus et integer et servitutis oblitus populus, aut ex  
 65 æquo agetis, aut aliis imperitabitis." Agrippinenses, sumpto consultandi spatio, quando neque subire conditiones metus futuri, neque palam aspernari conditio  
 2 præsens, sinebat, in hunc modum respondent. "Quæ prima libertatis facultas data est, avidius quam cautius, sumpsimus, ut vobis cæterisque Germanis, consanguineis nostris, jungeremur. Muros civitatis, congregantibus se cum maxime Romanorum exercitibus,  
 3 augere nobis, quam diruere, tutius est. Si qui ex

A. D. 70.]

Italia, aut provinciis, alienigenæ in finibus nostris fuerant, eos bellum absumpsit, vel in suas quisque sedes refugere. Deductis olim et nobiscum per conubium sociatis, quique mox provenere, hæc patria est. Nec vos adeo iniquos existimamus, ut interfici a nobis 4 parentes, fratres, liberos nostros velitis. Vectigal et onera commerciorum resolvimus. Sint transitus incustoditi; sed diurni et inermes: donec nova et recentia jura in vetustatem consuetudine vertantur. Arbitrum 5 habebimus Civilem et Veledam, apud quos pacta sancientur.” Sic lenitis Tencteris, legati ad Civilem et Veledam missi cum donis, cuncta ex voluntate Agrippinensium perpetravere. Sed coram adire alloquique 6 Veledam negatum. Arcebantur aspectu, quo venerationis plus inesset. Ipsa edita in turre: delectus e propinquis consulta responsaque, ut internuntius Numinis, portabat.

Civilis, societate Agrippinensium auctus, proximas 66 civitates affectare, aut adversantibus bellum inferre, statuit. Occupatisque Sunicis, et juventute eorum per cohortes composita, quo minus ultra pergeret, Claudius Labeo Betasiorum Tungrorumque et Nerviorum tumultuaria manu restitit: fretus loco, quia pontem Mosæ fluminis anteceperat. Pugnabaturque in angustiis am- 2 bigue, donec Germani transnatantes terga Labeonis invasere. Simul Civilis, ausus, an ex composito, intulit se agmini Tungrorum, et clara voce, “Non ideo,” inquit, “bellum sumpsimus, ut Batavi et Treveri gentibus imperent. Procul haec a nobis arrogantia. Accipite societatem. Transgredior ad vos, seu me Ducem, seu militem, mavultis.” Movebatur vulgus, condebant- 3 que gladios; cum Campanus ac Juvenalis, ex primoribus Tungrorum, universam ci gentem dedidere.

Labeo, antequam circumveniretur, profugit. Civilis Betasios quoque ac Nervios, in fidem acceptos, copiis suis adjunxit: ingens rerum, perculsis civitatum animis, vel sponte inclinantibus.

67 Interea Julius Sabinus, projectis foederis Romani monumentis, Cæsarem se salutari jubet: magnamque et inconditam popularium turbam in Sequanos rapit, conterminam civitatem et nobis fidam. Nec Scuani 2 detrectavere certamen. Fortuna melioribus affuit. Fusi Lingones. Sabinus festinatum temere prælium pari formidine deseruit. Utque famam exitii sui faceret, villam, in quam perfugerat, cremavit: illic voluntaria morte interiisse creditus. Sed, quibus artibus latebrisque vitam per novem mox annos traduxerit, simul amicorum ejus constantiam et insigne Epponinæ uxoris exemplum, suo loco reddemus. Sequanorum 3 prospera acie belli impetus stetit. Resipiscere paulatim civitates, fasque et foedera respicere, principibus Remis: qui per Gallias edixere, ut missis legatis in commune consultarent, libertas an pax placeret.

68 At Romæ cuncta in deterius audita Mucianum angebant, ne, quanquam egregii Duces (jam enim Gallum Annium et Petilium Ceriale delegerat) summam belli parum tolerarent. Nec relinquenda urbs sine rectore. 2 Et Domitiani indomitæ libidines timebantur: suspectis, uti diximus, Primo Antonio Varoque Arrio. Varus, Praetorianis præpositus, vim atque arma retinebat. Eum Mucianus pulsum loco, ne sine solatio 3 ageret, annonae præfecit. Utque Domitiani animum, Varo haud alienum, deliniret, Arretinum Clementem, domui Vespasiani per affinitatem innexum et gratis-simum Domitiano, Praetorianis præposuit, patrem ejus, sub Caio Cæsare, egregie functum ea cura, dictitans:

A. D. 70.]

lætum militibus idem nomen, atque ipsum, quanquam Senatorii ordinis, ad utraque munia sufficere. As-<sup>4</sup> sumuntur e civitate clarissimus quisque, et alii per ambitionem. Simul Domitianus Mucianusque accingebantur, dispari animo: ille spe ac juventa properus, hic moras nectens, quis flagrantem retineret, ne ferocia ætatis et pravis impulsoribus, si exercitum invasisset, paci belloque male consuleret. Legiones victrices,<sup>5</sup> sexta et octava, Vitellianarum unætvicesima, e recens conscriptis secunda, Penninis Cottianisque Alpibus, pars monte Graio, traducuntur: XIV legio e Britannia, sexta ac decima ex Hispania accitæ. Igitur venientis<sup>6</sup> exercitus fama, et suopte ingenio, ad mitiora inclinantes Galliarum civitates, in Remos convenere. Treverorum legatio illic opperiebatur, accerrimo instinctore belli Tullio Valentino. Is meditata oratione cuncta, magnis<sup>7</sup> imperiis objectari solita, contumeliasque et invidiam in Populum Romanum effudit: turbidus miscendis seditionibus, et plerisque gratus vecordi facundia. At<sup>69</sup> Julius Auspex, e primoribus Remorum, vim Romanam pacisque bona dissertans, et “sumi bellum etiam ab ignavis, strenuissimi cujusque periculo geri, jamque super caput legiones,” sapientissimum quemque reverentia fideque, juniores periculo ac metu, continuit. Et Valentini animum laudabant, consilium Auspicis sequebantur. Constat, obstitisse Treveris Lingonibus-<sup>2</sup> que apud Gallias, quod, Vindicis motu, cum Virginio steterant. Deterruit plerosque provinciarum æmulationis: “quod bello caput? unde jus auspiciumque petetur? quam, si cuncta provenissent, sedem Imperio legerent?” Noudum Victoria, jam discordia erat: aliis<sup>3</sup> fœdera, quibusdam opes viresque, aut vetustatem originis, per jurgia jactantibus. Tædio futurorum præ-

sentia placuere. Scribuntur ad Treveros epistolæ, nomine Galliarum, ut abstinerent armis, impetrabili venia et paratis deprecatoribus, si poenitcret. Restitit idem Valentinus, obstruxitque civitatis suæ aures, haud perinde instruendo bello intentus, quam frequens concionibus. Igitur non Treveri, neque Lingones cæteræve rebellium civitates, pro magnitudine suscepti discriminis agere. Ne Duees quidem in unum consulere. Sed Civilis avia Belgarum circumibat: dum 2 Claudio Labeonem capere aut exturbare nititur. Clasicus, segne plerumque otium trahens, velut parto imperio fruebatur. Ne Tutor quidem maturavit superiorum Germaniæ ripam et ardua Alpium præsidiis 3 claudere. Atque interim unætviccsima legio Vindonissâ, Sextilius Felix eum auxiliariis cohortibus per Rhætiam irrupere. Accessit ala Singularium, excita olim a Vitellio, dcinde in partes Vespasiani transgressa. Præerat Julius Briganticus, sorore Civilis genitus, ut ferme acerrima proximorum odia sunt, invitus avunculo 4 infensusque. Tutor Treverorum copias, recenti Vangionum, Caracatium, Tribocorum delectu auctas, veterano pedite atque equite firmavit, corruptis spe, aut metu subaetis legionariis: qui primo cohortem, præmissam a Sextilio Felice, interficiunt; mox ubi Duces exereitusque Romanus propinquabant, honesto transfugio rediere: secutis Tribocis Vangionibusque et Ca- 5 racatibus. Tutor, Treveris comitantibus, vitato Magontiaco, Bingum concessit, fidens loco, quia pontem Navæ fluminis abruperat, sed ineursu cohortium, quas Sextilius ducebat, et reperto vado, proditus fususque. Ea clade perculti Treveri, et plebes, omissis armis, per 6 agros palatur. Quidam Princeipum, ut primi posuisse bellum vidarentur, in civitates, quæ societatem Ro-

A. D. 70.]

manam non exuerant, perfugerunt. Legiones a Novesio Bonaque in Treveros, ut supra memoravimus, traductæ, se ipsæ in verba Vespasiani adigunt. Hæc 7 Valeutino absente gesta: qui ubi adventabat furens, cunctaque rursus in turbas et exitium conversurus, legiones in Mediomaticos, sociam civitatem, abscessere. Valentinus ac Tutor in arma Treveros retrahunt: occisis Herennio ac Numisio, Legatis, quo minorc spe veniae cresceret vinculum sceleris.

Hic belli status erat, cum Petilius Cerialis Magon-71 tiacum venit. Ejus adventu erectæ spes. Ipse pugnæ avidus et contemnendis, quam cavendis, hostibus inferior, ferocia verborum militem incendebat: ubi primum congregri licuisset, nullam prælio moram facturus. De-2 lectus per Galliam habitos in civitates remittit, ac nuntiare jubet, sufficere Imperio legiones: socii ad munia pacis redirent, securi, velut confecto bello, quod Romanæ manus excepissent. Auxit ea res Gallorum obsequium. Nam, recepta juventute, facilius tributa toleravere, prionores ad officia, quod spernebantur. At 3 Civilis et Classicus, ubi pulsum Tutorem, cæsos Treveros, cuncta hostibus prospera accepere, trepidi ac properantes, dum dispersas suorum copias conducunt, crebris interim nuntiis Valentini monuere, ne summæ rei periculum ficeret. Eo rapidius Cerialis, missis 4 in Mediomaticos, qui breviore itinere legiones in hostem verterent, contracto, quod erat militum Magontiaci, quantumque secum transvexerat, tertiiis castris Rigodulum venit; quem locum magna Treverorum manu Valentinus insederat, montibus aut Mosella amne septum. Et addiderat fossas objicesque saxorum. Nec 5 deterruere ea munimenta Romanum Ducem, quo minus peditem perruinpere juberet, equitum aciem in collem

[A. U. C. 823.]

erigeret, spreto hoste ; quem, temere collectum, haud ita loco juvari, ut non plus suis in virtute foret.

**6** Paullum moræ in ascensu, dum missilia hostium prævehuntur : ut ventum in manus, deturbati ruinæ modo præcipitantur. Et pars equitum, æquioribus jugis circumvecta, nobilissimos Belgarum, in quîs Ducem **72** Valentiniū, cepit. Cerialis postero die coloniam Treverorum ingressus est, avido milite eruendæ civitatis : “hanc esse Classici, hanc Tutoris, patriam : horum scelelere clausas cæsasque legiones. Quid tantum Cremonam meruisse ; quam e gremio Italiæ raptam, quia **2** unius noctis moram victoribus attulerit ? Stare in confinio Germaniæ integrum sedem, spoliis exercituum et Ducum cædibus ovantem. Redigeretur præda in fiscum : ipsis sufficere ignes et rebellis coloniæ ruinas, **3** quibus tot castrorum excidia pensarentur.” Cerialis, a metu infamiae, si licentia sævitiaque imbuere militem crederetur, pressit iras. Et paruere, posito civium **4** bello, ad externa modestiores. Convertit inde animos accitarum e Mediomaticis legionum miserabilis aspectus. Stabant conscientia flagitiæ mæstæ, fixis in terram oculis. Nulla inter coeuntes exercitus consalutatio. Neque solantibus hortantibusve responsa dabant, abditi **5** per tentoria et lucem ipsam vitantes. Nec perinde periculum aut metus, quam pudor ac dedecus, obstupeficerat : attonitis etiam victoribus, qui vocem precesque adhibere non ausi, lacrimis ac silentio veniam poscebant : donec Cerialis mulceret animos, fato acta dictans, quæ militum Ducumque discordia, vel fraude **6** hostium, evenissent. Primum illum stipendiorum et sacramenti diem haberent : priorum facinorum neque Imperatorem neque se meminisse. Tunc recepti in eadem castra et edictum per manipulos, ne quis in cer-

A. D. 70.]

tamine jurgiove seditionem aut cladem commilitoni ob- 73  
 jectaret. Mox Treveros ac Lingones, ad coneionem  
 vocatos, ita alloquitur: “ Neque ego unquam facundiam  
 exercui; et Populi Romani virtutem armis affirmavi.  
 Sed, quia apud vos verba plurimum valent, bonaque 2  
 ac mala non sua natura, sed vocibus seditiosorum, æs-  
 timantur, statui pauca disserere, quæ, profligato bello,  
 utilius sit vobis andisse, quam nobis dixisse. Terram 3  
 vestram, cæterorumque Gallorum, ingressi sunt Duces  
 Imperatoresque Romani, nulla cupidine, sed majoribus  
 vestris invocantibus, quos discordiæ usque ad exitium  
 fatigabant. Et acciti auxilio Germani sociis pariter  
 atque hostibus servitutem imposuerant. Quot præliis 4  
 adversus Cimbros Teutonosque, quantis exereitum  
 nostrorum laboribus, quo ve eventu Germanica bella  
 tractaverimus, satis clarum. Nec ideo Rhenum inse-  
 dimus, ut Italiam tueremur; sed ne quis alias Ario-  
 vistus Regno Galliarum potiretur. An vos cariores 5  
 Civili Batavisque et Transrhenanis gentibus creditis,  
 quam majoribus eorum patres avique vestri fuerunt?  
 Eadem semper causa Germanis transcendendi in Gal-  
 lias, libido atque avaritia et mutandæ sedis amor, ut,  
 relietis paludibus et solitudinibus suis, fecundissimum  
 hoc solum vosque ipsos possiderent. Cæterum libertas 6  
 et speciosa nomina prætexuntur: nec quisquam alien-  
 um servitum et dominationem sibi concupivit, ut non  
 eadem ista vocabula usurparet. Regna bellaque per 74  
 Gallias semper fuere, donec in nostrum jus concederetis.  
 Nos, quanquam toties lacessiti, jure victoriæ id solum  
 vobis addidimus, quo pacem tueremur. Nam neque  
 quies gentium sine armis, neque arma sine stipendiis,  
 neque stipendia sine tributis haberri queunt. Cætera 2  
 in communi sita sunt. Ipsi plerumque legionibus

nostris præsidetis : ipsi has aliasque provincias regit. Nihil separatum clausumve. Et laudatorum Principum usus ex æquo, quamvis procul agentibus : sævi  
 3 proximis ingruunt. Quomodo sterilitatem, aut nimios  
 imbres et cætera naturæ mala, ita luxum vel avaritiam dominantium tolerate. Vitia erunt, donec homines : sed neque hæc continua, et meliorum interventu  
 4 pensantur. Nisi forte, Tutore et Classico regnabitibus, moderatius imperium speratis : aut minoribus,  
 quam nunc, tributis parabuntur exercitus, quibus Germani Britannique arceantur. Nam pulsis (quod Dii prohibeant,) Romanis, quid aliud, quam bella omnium  
 5 inter se gentium exsistent ? Octingentorum annorum fortuna disciplinaque compages hæc coaluit, quæ convelli, sine exitio convellentium, non potest. Sed vobis maximum discriminem, penes quos aurum et opes, præci-  
 6 puæ bellorum causæ. Proinde pacem et urbem, quam victi victoresque eodem jure, obtinemus, amate, colite. Moneant vos utriusque fortunæ documenta, ne consumtaciam cum pernicie, quam obsequium cum securitate, malitis." Tali oratione graviora metuentes composuit erexitque.

75 Telebantur victore exercitu Treveri, cum Civilis et Classicus misere epistolas ad Ceriale, quarum hæc  
 2 sententia fuit. "Vespasianum, quanquam nuntios occultarent, excessissc vita. Urbem atque Italiam interno bello consumptam. Muciani ac Domitiani vana et sine viribus nomina. Si Cerialis imperium Galliarum velit, ipsos finibus civitatum suarum contentos ; si prælium  
 3 malit, ne id quidem abnuere." Ad ea Cerialis Civili et Classico nihil : eum, qui attulerat ipsas epistolas, ad Domitianum misit. Hostes, divisis copiis, advenerunt undique. Plerique culpabant Ceriale, passum jungi,

A. D. 70.]

quos discretos intercipere licuisset. Romanus exercitus 4 castra fossa valloque circumdedit, quis temere antea intutis conserderat. Apud Germanos diversis sententiis certabatur. Civilis, opperiendas Transrhenanorum gentes, 76 quarum terrore fractae Populi Romani vires obtererentur. Gallos, quid aliud, quam prædam victoribus? Et tamen, quod roboris sit, Belgas, secum palam aut voto stare. Tutor, cunctatione crescere rem Romanam, affir- 2 inabat, coeuntibus undique exercitibus. “Transvectam e Britannia legionem: accitas ex Hispania: adventare ex Italia: nec subitum militem, sed veterem expertumque belli. Nam Germanos, qui ab ipsis sperentur, non 3 juberi, non regi, sed cuncta ex libidine agere: pecuniamque ac dona, quis solis corrumpantur, majora apud Romanos, et neminem adco in arma pronum, ut non idem pretium quietis, quam periculi, malit. Quod si 4 statim congregiantur, nullas esse Ceriali, nisi ex reliquiis Germanici exercitus, legiones, foederibus Galliarum obstrictas. Idque ipsum, quod inconditam nuper Valentini manum contra spem suam fuderint, alimentum illis Ducique temeritatis. Ausuros rursus venturosque 5 in manus, non imperiti adolescentuli, verba et conciones, quam ferrum et arma, meditantis, sed Civilis et Classici: quos ubi aspexerint, reddituram in animos formidinem, fugam famiemque ac toties captis precariam vitam, neque Treveros aut Lingonas benevolentia contineri: resumpturos arma, ubi metus abscesserit.” Diremit consilio- 6 rum diversitatem, approbata Tutoris sententia, Clas- sicus: statimque exsequuntur. Media acies ubiis Lin- 77 gonibusque data: dextro cornu cohortes Batavorum: sinistro Bructeri Tenctericque. Pars montibus, alii, viam inter Mosellamque flumen, tam improvisi assiluere, ut in cubiculo ac lectulo Cerialis (neque enim noctem in

castris egerat,) pugnari simul vincique suos audierit, increpans pavorem nuntiantium, donec universa clades in 2 oculis fuit. Perrupta legionum castra, fusi equites: medius Mosellæ pons, qui ulteriora coloniae auncetit, ab hostibus insessus. Cerialis, turbidis rebus intrepidus et fugientes manu retrahens, intecto corpore promptus inter tela, felici temeritate et fortissimi cujusque ac 3 cursu, recuperatum pontem electa manu firmavit. Mox in castra reversus, palantes captarum apud Novesium Bonnamque legionum manipulos et rarum apud signa militem ac prope circumventas aquilas videt. Incensus ira, "non Flaccum," inquit, "non Voculam deseritis. 4 Nulla hic proditio: neque aliud excusandum habeo, quam quod vos, Gallici fœderis oblitos, redisse in memoriam Romani sacramenti, temere credidi. Annumerabor Numisiis et Herenniis: ut omnes Legati vestri, aut militum manibus, aut hostium, ceciderint. 5 Ite, mutiate Vespasiano, vel, quod proprius cst, Civili et Classico, relictum a vobis in acie Ducem. Venient legiones, quæ neque me inultum, neque vos impunitos, 78 patiantur." Vera erant, et a Tribunis Præfectisque eadem ingerebantur. Consistunt per cohortes et manipulos: neque enim poterat patescere acies, effuso hoste, et impedientibus tentoriis sarcinisque, cum intra vallum 2 pugnaretur. Tutor et Classicus et Civilis, suis quisque locis, pugnam ciebant: Gallos pro libertate, Batavos pro gloria, Germanos ad prædam instigantes. Et cuncta pro hostibus erant. Donec legio unætvicesima, patentiore, quam cæteræ, spatio congregata, sustinuit 3 ruentes; mox impulit. Nec sine ope Divina, mutatis repente animis, terga victores vertere. Ipsi, territos se cohortium aspectu, ferebant, quæ, primo impetu disjectæ, summis rursus jugis congregabantur, ac speciem

A. D. 70.]

novi auxiliū fecerant. Sed obstitit vincentibus pravum inter ipsos certamen, omisso hoste, spolia consecrandi. Cerialis, ut incuria prope rem afflixit, ita constantia 5 restituit; secutusque fortunam castra hostium eodem die capit excinditque. Nec in longum quies militi data. 79 Orabant auxilium Agrippinenses, offerebantque uxorem ac sororem Civilis et filiam Classici, relictā sibi pignora societatis. Atque interim dispersos in domibus Ger- 2 manos trucidaverant; unde metus et justae preces in- vocantium, antequam hostes, reparatis viribus, ad spem vel ad ultionem accingerentur. Namque et Civilis illuc 3 intenderat, non invalidus, flagrantissima cohortium sua- rum integra, quæ e Chaucis Frisiisque composita Tol- biaci in finibus Agrippinensium agebat. Sed tristis 4 nuntius avertit, deletam cohortem dolo Agrippinensium, qui largis epulis vinoque sopitos Germanos, clausis fori- bus, igne injecto cremavere. Simul Cerialis proprio agmine subvenit. Circumsteterat Civilem et alius metus, 5 ne quarta decima legio, adjuncta Britannica classe, afflic- taret Batavos, qua Oceano ambiuntur. Sed legionem terrestri itinere Fabius Priscus legatus in Nervios Tungrosque duxit, eaque civitates in ditionem ac- ceptæ. Classem ultro Canninefates aggressi sunt, 6 majorque pars navium depressa aut capta. Et Ner- viorum multitudinem, sponte commotam ut pro Romanis bellum capesseret, iidem Canninefates fudere. Classi- cus quoque adversus equites Novesium a Ceriale præ- missos secundum prælium fecit. Quæ modica sed 7 crebra damna famam victoriæ nuper partæ lacerabant.

Iisdem diebus Mucianus Vitellii filium interfici jubet, 80 mansuram discordiam obtendens, ni semina belli re- stinxisset. Neque Autonium Primum adsciri inter co- mites a Domitiano passus est, favore militum anxius et

superbia viri, æqualium quoque, adeo superiorum intollerantis. Profectus ad Vespasianum Antonius ut non pro spe sua excipitur, ita neque averso imperatoris animo. Trahebatur in diversa, hiuc meritis Antonii, cuius ductu confectum haud dubie bellum erat, inde Muciani epistolis: simul cæteri ut infestum tumidumque insectabantur, adjuvatis prioris vitæ criminibus. Neque ipse deerat arrogantia vocare offensas, nimius commemorandis quæ meruisse. Alios ut imbelles, Cæcinam ut captivum ac dedititium increpat. Unde paulatim levior viliorque haberi, manente tamen in speciem amicitia.

81 Per eos menses, quibus Vespasianus Alexandriæ statos æstivis flatibus dies et certa maris opperiebatur, multa miracula evenere, quis cælestis favor et quædam in Vespasianum inclinatio numinum ostenderetur. E plebe Alexandrina quidam oculorum tabe notus genua ejus advolvitur, remedium cæcitatis exposcens gemitu, monitu Serapidis dei, quem dedita superstitionibus gens ante alios colit; precabaturque principem ut genas et oculorum orbes dignaretur respergere oris excremento. Alius, manum æger, eodem deo auctore, ut pede ac vestigio Cæsaris calcaretur orabat. Vespasianus primo irridere, aspernari; atque illis instantibus modo famam vanitatis metuere, modo obsecratione ipsorum et vobis adulantium in spem induci. Postremo æstimari a medicis jubet an talis cæcitas ac debilitas ope humana superabiles forent. Medici varie disserere: huic non exesam vim luminis, et reddituram, si pellerentur obstantia; illi elapsos in pravum artus, si salubris vis adhibeatur, posse integrari. Id fortasse cordi diis, et divino ministerio principem clectum; denique patrati remedii gloriam penes Cæsarem, irriti ludibrium penes

▲. D. 70.]

miseros fore. Igitur Vespasianus, cuncta fortunæ suæ 6 patere ratus nec quicquam ultra incredibile, læto ipse vultu, erecta quæ adstabat multitudine, jussa exsequitur. Statim conversa ad usum manus, ac cæco reluxit 7 dies. Utrumque, qui interfuere, nunc quoque memorant, postquam nullum mendacio pretium.

Altior inde Vespasiano cupidus adeundi sacram sedem, 82 ut super rebus imperii consuleret. Arceri templo cunctos jubet. Atque ingressus intentusque numini, re- 2 spexit pone tergum e primoribus Ægyptiorum nomine Basiliden, quem procul Alexandria plurium dierum itinere et ægro corpore detineri haud ignorabat. Per- 3 cunctatur sacerdotes num illo die Basilides templum inisset; percunctatur obvios num in urbe visus sit: denique, missis equitibus, explorat illo temporis momento octoginta millibus passuum abfuisse. Tunc divinam speciem et vim responsi ex nomine Basilidis interpretatus est. Origo dei nondum nostris auctoribus 83 celebrata: Ægyptiorum antistites sic memorant; Ptolemaeo regi, qui Macedonum primus Ægypti opes firavit, cum Alexandriae recens conditæ mœnia templaque et religiones adderet, oblatum per quietem decore eximio et majore quam humana specie juvenem, qui moneret ut, fidissimis amicorum in Pontum missis, effigiem suam acciret: lætum id regno, magnamque et inclitam sedem fore, quæ excepisset. Simul visum eundem juvenem in cælum igne plurimo attolli. Pto- 2 lemæus, omne et miraculo excitus, sacerdotibus Ægyptiorum, quibus mos talia intelligere, nocturnos visus aperit. Atque illis Ponti et externorum parum gnaris, Timotheum Atheniensem e gente Eumolpidarum, quem ut antistitem cærimoniarum Eleusine exciverat, quænam illa superstitione, quod numen, interrogat. Timotheus, 3

quæsitis qui in Pontum meâssent, cognoscit urbem illic Sinopen, nec procul templum, vetere inter accolas fama, Jovis Ditis: namque et muliebrem effigiem adsistere, 4 quam plerique Proserpinam vocent. Sed Ptolemæus, ut sunt ingenia regum, pronus ad formidinem, ubi securitas rediit, voluptatum quam religionum appetens, negligere paulatim, aliasque ad curas animum vertere, donec eadem species terribilior jam et instantior exitium 5 ipsi regnoque denuntiaret, ni jussa patrarentur. Tum legatos et dona Scydrothemidi regi (is tunc Sinopensibus imperitabat,) expediri jubet; præcepitque navigaturis ut 6 Pythicum Apollinem adeant. Illis mare secundum, sors oraculi haud ambigua: “irent, simulacrumque patris 84 sui receherent, sororis relinquerent.” Ut Sinopen vene-  
re, munera, preces, mandata regis sui Scydrothemidi allegant. Qui versus animi modo numen paves-  
cere, modo minis adversantis populi terreri; sæpe donis 2 promissisque legatorum flectebatur. Atque interim triennio exacto, Ptolemæus non studium, non preces omittere. Dignitatem legatorum, numerum navium, 3 auri pondus augebat. Tum minax facies Scydrothemidi offertur, ne destinata deo ultra moraretur. Cunctantem varia pernicies, morbique et manifesta cælestium ira, graviorque in dies fatigabat. Advocata con-  
cione jussa numinis, suos Ptolemæique visus, ingru- 4 entia mala exponit. Vulgus aversari regem, invidere Ægypto, sibi metuere templumque circumsedere. Ma-  
jor hinc fama tradidit, deum ipsum appulsas litori naves sponte concendisse. Mirum inde dictu, tertio die tantum maris emensi Alexandriam appelluntur. 5 Templum pro magnitudine urbis exstructum loco cui nomen Rhacotis. Fuerat illic sacellum Serapidi atque Isidi antiquitus sacratum. Hæc de origine et advectu

A. D. 70.]

dei celeberrima. Nec sum ignarus esse quosdam qui<sup>6</sup> Seleucia, urbe Syriæ, accitum, regnante Ptolemæo, quem tertia ætas tulit; alii auctorem eundem Ptolemæum, sedem ex qua transierit Memphim perhibent, inclitam olim et veteris Ægypti columen. Deum ipsum multi<sup>7</sup> Æsculapium, quod medeatur ægris corporibus, quidam Osirin, antiquissimum illis gentibus numen, plerique Jovem, ut rerum omnium potentem, plurimi Ditem patrem, insignibus quæ in ipso manifesta, aut per ambages conjectant.

At Domitianus Mucianusque, antequam Alpibus pro-<sup>85</sup> pinquarent, prosperos rerum in Treveris gestarum nuntios accepere. Præcipua victoriae fides dux hostium<sup>2</sup> Valentinus, nequaquam abjecto animo, quos spiritus gessisset, vultu ferebat. Auditus ideo tantum, ut nos-<sup>3</sup> ceretur ingenium ejus, damnatusque, inter ipsum supplicium exprobranti cuidam patriam ejus captam, “accipere se solatium mortis” respondit. Sed Mucianus<sup>4</sup> quod diu occultaverat, ut recens exprompsit: “quoniam benignitate deum fractæ hostium vires forent, parum decore Domitianum, confecto prope bello, alienæ gloriæ interventurum. Si status imperii aut salus Galliarum<sup>5</sup> in discrimine verteretur, debuisse Cæsarem in acie stare: Canninefates Batavosque minoribus ducibus delegandos. Ipse Lugduni vim fortunamque principatus<sup>6</sup> e proximo ostentaret, nec parvis periculis immixtus, et majoribus non defuturus.” Intelligebantur artes; sed<sup>86</sup> pars obsequii in eo, ne deprehenderentur. Ita Lugdunum ventum. Unde creditur Domitianus occultis ad Cerialem nuntiis fidem ejus tentavisse, an præsenti sibi exercitum imperiumque traditurus foret. Qua<sup>2</sup> cogitatione bellum adversus patrem agitaverit, an opes viresque adversus fratrem, in incerto fuit: nam Cerialis

[A. U. C. 823.]

salubri temperamento elusit, ut vana pueriliter cupientem. Domitianus sperni a senioribus juventam suam cernens, modica quoque et usurpata antea munia imperii omittebat, simplicitatis ac modestiae imagine in altitudinem conditus, studiumque literarum et amorem carminum simulans, quo velaret animum, et fratriis æmulationi subduceretur, cuius disparem mitiorcmque naturam contra interpretabatur.

C. CORNELII TACITI  
AB EXCESSU DIVI AUGUSTI  
H I S T O R I A R U M  
LIBER QUINTUS.

---

EJUSDEM anni principio Cæsar Titus, perdomandæ <sup>A.U.C.</sup> 823.  
Judææ delectus a patre, et privatis utriusque rebus <sup>A.D.</sup> 70.  
militia clarus, majore tum vi famaque agebat, certan-  
tibus provinciarum et exercituum studiis. Atque ipse,<sup>2</sup> ut super fortunam crederetur, decorum se promptum-  
que in armis ostendebat, comitate et alloquiis officia  
provocans, ac plerumque in opere, iu agmine gregario  
militi mixtus, incorrupto ducis honore. Tres eum in <sup>3</sup>  
Judæa legiones, quinta et decima et quintadecima,  
vetus Vespasiani miles, excepere. Addidit e Syria duo-  
decimam, et abductos Alexandria duoetvicesimanos ter-  
tianosque. Comitabantur viginti sociæ cohortes, octo <sup>4</sup>  
equitum alæ, simul Agrippa Sohaemusque reges, et  
auxilia regis Antiochi, validaque et, solito inter accolias  
odio, infensa Judæis Arabum manus; multi quos urbe  
atque Italia sua quemque spes acciverat occupandi  
principem adhuc vacuum. His cum copiis fines hostium <sup>5</sup>  
ingressus composito agmine, cuncta explorans para-  
tusque decernere, haud procul Hierosolymis castra facit.  
Sed quoniam famosæ urbis supremum diem tradituri <sup>2</sup>  
sumus, congruens videtur primordia ejus aperire.

2 Judæos, Creta insula profugos, novissima Libyæ  
 insedisse memorant, qua tempestate Saturnus vi Jovis  
 pulsus cesserit regnis. Argumentum e nomine petitur :  
 inelitum in Creta Idam montem ; aceolas Idæos aueto  
 3 in barbarum cognomento Judæos vocitari. Quidam  
 regnante Iside exundantem per Ægyptum multitudinem,  
 dueibus Hierosolymo ac Juda, proximas in terras exone-  
 ratam ; plerique Æthiopum prolem, quos, rege Cepheo,  
 4 metus atque odium mutare sedes perpulerit. Sunt qui  
 tradant Assyrios eonvenas, indigum agrorum populum,  
 parte Ægypti potitos, mox proprias urbes Hebræasque  
 terras et propiora Syriae eoluisse. Clara alii Judæorum  
 initia, Solymos, carminibus Homeri celebratam gentem,  
 3 conditæ urbi Hierosolyma nomen e suo fecisse. Plurimi  
 auctores eonsentiant, orta per Ægyptum tabe quæ  
 corpora foedaret, regem Bocchorim, adito Hammonis  
 oraculo, remedium petentem, purgare regnum et id  
 genus hominum, ut invisum diis, alias in terras avehere  
 2 jussum. Sic eonquisitum collectumque vulgus, post-  
 quam vastis loeis relietum sit, eaeteris per lacrimas  
 torpentibus, Moysen, unum exsulum, monuisse, ne  
 quam deorum hominumve opem exspectarent utrisque  
 deserti, sed sibimet, duce cælesti, erederent, primo  
 3 ejus auxilio præsentes miseras pepulissent. Assen-  
 sere atque omnium ignari fortuitum iter incipiunt. Sed  
 nihil æque quam inopia aquæ fatigabat. Jamque haud  
 procul exitio totis eampis procubuerant, cum grex  
 asinorum agrestium e pastu in rupem nemore opaeam  
 2 concessit. Secutus Moyses conjectura herbidi soli largas  
 aquarum venas aperit. Id levamen ; et continuum sex  
 dierum iter emensi, septimo, pulsis cultoribus, obtinuere  
 4 terras in quâs urbs et templum dieata. Moyses quo sibi  
 in posterum geutem firmaret, novos ritus contrariosque

A. D. 70.]

cæteris mortalibus indidit. Profana illie omnia quæ apud nos sacra; rursum concessa apud illos quæ nobis incesta. Effigiem animalis, quo monstrante errorem 2 sitimque depulerant, penetrati sacravere, cæso ariete velut in eontumeliam Hammonis. Bos quoque immolatur, quia Ægyptii Apis colunt. Sue abstinent merito 3 cladis, qua ipsos seabies quondam turpaverat, cui id animal obnoxium. Longam olim famem crebris adhuc jejuniis fatentur; et, raptarum frugum argumentum, panis Judaicus nullo fermento detinetur. Septimo die 4 otium plaeuisse ferunt, quia is finem laborum tulerit; dein, blandiente inertia, septimum quoque annum ignaviae datum. Alii honorem cum Saturno haberi, sen piane- 5 pia religionis tradentibus Idæis, quos cum Saturno pulsos et conditores gentis accepimus, seu quod de septem sideribus quîs mortales reguntur, altissimo orbe et præcipua potentia stella Saturni feratur: ac pleraque cælestium vim suam et cursum septimos per numeros comineare. Hi ritus, quoquo modo inducti, antiquitate defenduntur. 5 Cætera instituta sinistra, foeda, pravitate valuere. Nam 2 pessimus quisque, spretis religionibus patriis, tributa et stipes illuc gerebant; unde auctæ Judæorum res, et quia apud ipsos fides obstinata, misericordia in promptu, sed adversus omnes alios hostile odium. Separati epulis, 3 disereti cubilibus, projectissima ad libidinem gens, alienarum concubitu abstinent; inter se nihil illicitum. Cireumeidere genitalia instituerunt, ut diversitate nos- 4 cantur. Transgressi in morem eorum idem usurpant, nec quidquam prius imbuuntur quam contemnere deos, exuere patriam, parentes, liberos, fratres vilia habere. Augendæ tamen multitudini consultitur. Nam et ne- 5 care quemquam ex agnatis nefas, animosque prælio aut suppliis peremptorum æternos putant. Hinc gene-

randi amor et moriendi contemptus. Corpora condere quam cremare, e more Ægyptio; eademque cura et de 6 infernis persuasio. Cælestium contra. Ægyptii pleraque animalia effigiesque compositas venerantur; Judæi mente sola unumque numen intelligunt: profanos qui deum imagines mortalibus materiis in species hominum effingant; summum illud et æternum neque imitabile neque interiturum. Igitur nulla simulacra urbibus 7 suis, nedum templis sinunt. Non regibus hæc adulatio, non Cæsaribus honor. Sed quia sacerdotes eorum tibia tympanisque concinebant, hedera vinciebantur, vitisque aurea templo reperta, Liberum patrem coli, domitorem Orientis, quidam arbitrati sunt, nequaquam congruentibus institutis. Quippe Liber festos lætosque ritus posuit, Judæorum mos absurdus sordidusque.

6 Terra finesque, qua ad Orientem vergunt, Arabia terminantur; a meridie Ægyptus objacet; ab occasu Phœnices et marc; septentrionem e latere Syriæ longe 2 prospectant. Corpora hominum salubria et ferentia laborum. Rari imbres, uber solum. Fruges nostrum ad morem, præterque eas balsamum et palmæ. Pal- 3 metis proceritas et decor. Balsamum modica arbor: ut quisque ramus intumuit, (si vim ferri adhibeas, pavent venæ,) fragmine lapidis aut testa aperiuntur; humor in 4 usu medentium est. Præcipuum montium Libanum erigit, mirum dictu, tantos inter ardores opacum fidumque nivibus. Idem amnem Jordanen alit funditque. Nec Jordanes pelago accipitur, sed unum atque alterum 5 lacum integer perfluit, tertio retinetur. Lacus immenso ambitu, specie maris, sapore corruptior, gravitate odoris accolis pestifer, neque vento impellitur, neque pisces aut suetas aquis volucres patitur. Incertæ undæ superjecta, ut solido, ferunt; periti imperitique nandi perinde

A. D. 70.]

attolluntur. Certo anni bitumen egerit; cuius legendi 6 usum, ut cæteras artes, experientia docuit. Ater suapte natura liquor, et sparso aceto concretus, iunata. Hunc manu captum, quibus ea cura, in summa navis trahunt: inde, nullo juvante, influit oneratque, donec abscindas. Nec abscindere ære ferrove possis: fugit cruentem ves- 7 temque infectam sanguine quo feminæ per menses exsolvuntur. Sic veteres auctores. Sed gnari locorum 8 tradunt, undantes bitumine moles pelli manuque trahi ad litus; mox, ubi vapore terræ, vi solis inaruerint, securibus cuneisque ut trabes aut saxa discindi. Haud 7 procul inde campi, quos ferunt olim uberes, magnisque urbibus habitatos, fulminum jactu arsisse; et manere vestigia, terramque ipsam, specie torridam, vim frugi- feram perdidisse. Nam cuncta sponte edita aut manu 2 sata, sive herba tenuis aut flore, seu solitam in speciem adolevere, atra et inania velut in cinerem vanescunt. Ego sicut inclitas quondam urbes igne cælesti flagrâsse 3 concesserim, ita halitu lacus infici terram, corrupti superfusum spiritum, eoque fetus segetum et autumni putrescere reor, solo cæloque juxta gravi. Et Belus 4 amnis Judaico mari illabitur; circa cuius os lectæ arenæ, admixto nitro, in vitrum excoquuntur. Modicum id litus et egerentibus inexhaustum.

Magna pars Judææ vicis dispergitur; habent et 8 oppida. Hierosolyma genti caput. Illic immensæ opulentiae templum, et primis munimentis urbs, dein regia, templum intimis clausum. Ad fores tantum Judæo aditus; limine, praeter sacerdotes, arcebantur. Dum 2 Assyrios penes Medosque et Persas Oriens fuit, despectissima pars servientium: postquam Macedones præpotuere, rex Antiochus, demere superstitionem et mores Græcorum dare annis, quo minus teterimam gentem

[A. U. C. 823.]

in melius mutaret, Parthorum bello prohibitus est: nam  
**3** ea tempestate Arsaces desciverat. Tum Judæi, Mace-  
donibus invalidis, Parthis nondum adultis, (et Romani  
procul erant,) sibi ipsi reges imposuere; qui, mobilitate  
vulgi expulsi, resumpta per arma dominatione, fugas  
civium, urbium eversiones, fratrum, conjugum, paren-  
tum neccs aliaque solita regibus ausi superstitionem  
fovebant, quia honor sacerdotii firmamentum potentiae  
**9** assumebatur. Romanorum primus Cn. Pompeius Ju-  
dæos domuit, templumque jure victoriæ ingressus est.  
inde vulgatum, nulla intus deûm effigie vacuam sedem  
et inania arcana. Muri Hierosolymorum diruti, delu-  
**2** brum mausit. Mox civili inter nos bello, postquam in-  
ditionem M. Antonii provinciæ cesserant, rex Parthorum  
Pacorus Judæa potitus, interfactusque a P. Ventidio, et  
Parthi trans Euphraten redacti: Judæos C. Sosius sub-  
**3** egit. Regnum ab Antonio Herodi datum vicitor Au-  
gustus auxit. Post mortem Herodis, nihil exspectato  
Cæsare, Simo quidam regium nomen invaserat. Is a  
Quintilio Varo, obtinente Syriam, punitus; et gentem  
**4** coërcitam liberi Herodis tripertito rexere. Sub Tibe-  
rio quies. Dein jussi a C. Cæsare effigiem ejus in  
templo locare, arma potius sumpsere; quem motum  
**5** Cæsaris mors diremit. Claudius, defunctis regibus aut  
ad modicum redactis, Judæam provinciam equitibus  
Romanis aut libertis permisit; e quibus Antonius Felix  
per omnem sævitiam ac libidinem jus regium servili in-  
genio exercuit, Drusilla Cleopatræ et Antonii nepte in  
matrimonium accepta, ut ejusdem Antonii Felix pro-  
**10** gener, Claudius nepos esset. Duravit tamen patientia  
Judæis usque ad Gessium Florum procuratorem: sub eo  
bellum ortum. Et comprimere cœptantem Cestium  
Gallum, Syriae legatum, varia prælia ac sæpius adversa

A. D. 70.]

excepere. Qui ubi fato aut tædio occidit, missu Nero-**2**  
nis Vespasianus fortuna famaque et egregiis ministris,  
intra duas æstates, cuncta camporum omnesque præter  
Hierosolyma urbes victore exercitu tenebat. Proximus**3**  
annus, civili bello intentus, quantum ad Judæos, per  
otium transiit. Pace per Italiam parta et externæ  
cura rediere. Augebat iras quod soli Judæi non ces-  
sissent. Simul manere apud exercitus Titum ad omnes  
principatus novi eventus casusve utilius videbatur.

Igitur, castris, uti diximus, ante mœnia Hierosoly-**4**  
morum positis, instructas legiones ostentavit. Judæi**11**  
sub ipsos muros struxere aciem, rebus secundis longius  
ausuri, et, si pellerentur, parato perfugio. Missus in  
eos eques cum expeditis cohortibus ambigue certavit.  
Mox cessere hostes, et sequentibus diebus crebra pro**2**  
portis prælia serebant, donec assiduis damnis intra  
mœnia pellerentur. Romani ad oppugnandum versi.  
Neque enim dignum videbatur famem hostium opperiri ;**3**  
poscebantque pericula, pars virtute, multi ferocia et  
cupidine præmiorum. Ipsi Tito Roma et opes volup-**4**  
tatesque ante oculos ; ac ni statim Hierosolyma conci-  
derent, morari videbautur. Sed urbem arduam situ**5**  
opera molesque firmaverant, quis vel plana satis muni-  
rentur. Nam duos colles immensum editos claudebant  
muri per artem obliqui aut introrsus sinuati, ut latera  
oppugnantium ad ictus patescerent. Extrema rupis**6**  
abrupta ; et turres, ubi mons juvisset, in sexaginta  
pedes, inter devexa in centenos vicentesque attolle-  
bantur, mira specie, ac procul intuentibus pares. Alia**7**  
intus mœnia, regiae circumjecta, conspicuoque fastigio  
turris Antonia, in honorem M. Antonii ab Herode ap-  
pellata. Templum in modum arcis propriique muri, la-**12**  
bore et opere ante alios. Ipsæ porticus, quis templum

[A. U. C. 823.]

ambibatur, egregium propugnaculum. Fons perennis aquæ, cavati sub terra montes, et piscinæ cisternæque servandis imbribus. Præviderant conditores ex diversitate morum crebra bella: inde cuncta quamvis adversus longum obsidium. Et a Pompeio expugnatis metus atque usus pleraque monstravere. Atque per avaritiam Claudianorum temporum empto jure muniendi, struxere muros in pace tanquam ad bellum, magna colluvie et cæterarum urbium clade aucti: nam pervicacissimus quisque illuc perfugerat, eoque seditiosius agebant.

4 Tres duces, totidem exercitus. Extrema et latissima mœnium Simo, medianam urbem Joannes, † quem et Bargioram vocabant, templum Eleazarus firmaverat. Multitudine et armis Joannes ac Simo, Eleazarus loco pollebat. Sed prælia, dolus, incendia inter ipsos, et magna vis frumenti ambusta. Mox Joannes, missis per speciem sacrificandi qui Eleazarum manumque ejus obtruncarent, templo potitur. Ita in duas factiones civitas discessit, donec, propinquantibus Romanis belum externum concordiam parcret. Evenerant prodigia, quæ neque hostiis neque votis piare fas habet gens superstitioni obnoxia, religionibus adversa. Visæ per cælum concurrere acies, rutilantia arma, et subito nubium igne collucere templum. Exapertæ repente delubri fores, et audita major humana vox, excedere deos; simul ingens motus excedentium. Quæ pauci in metum trahebant: pluribus persuasio inerat antiquis saecidotum literis contineri, eo ipso tempore fore ut valesceret Oriens, profectique Judæa rerum potirentur.

13 2 Quæ ambages Vespasianum ac Titum prædixerat: sed vulgus, more humanæ cupidinis, sibi tantam fatorum magnitudinem interpretati, ne adversis quidem ad vera mutabantur. Multitudinem obsessorum, omnis ætatis,

A. D. 70.]

virile ac muliebre secus, sexcenta millia fuisse accepi-  
mus. Arma cunctis qui ferre possent; et plures quam 4  
pro numero audebant. Obstinatio viris feminisque par;  
ac si transferre sedes cogerentur, major vitæ metus  
quam mortis. Hanc adversus urbem gentemque Cæsar  
Titus, quando impetus et subita belli locus abnueret,  
aggeribus vineisque certare statuit. Dividuntur legi- 5  
onibus munia, et quies præliorum fuit, donec cuncta  
expugnandis urbibus reperta apud veteres aut novis  
ingeniis struerentur.

At Civilis, post malam in Treveris pugnam, reparato 14  
per Germaniam exercitu apud Vetera castra consedit,  
tutus loco, et ut memoria prosperarum illic rerum au-  
gescerent barbarorum animi. Secutus est eodem Ce- 2  
riialis, duplicatis copiis adventu secundæ et sextæ et  
quartæ decimæ legionum. Cohortesque et alæ, jam  
pridem accitæ, post victoriam properaverant. Neuter 3  
ducum cunctator. Sed arebat latitudo camporum  
suopte ingenio humentium. Addiderat Civilis obli-  
quam in Rhenum molem, cuius objectu revolutus amnis  
adjacentibus superfunderetur. Ea loci forma, incertis 4  
vadis subdola et nobis adversa: quippe miles Romanus  
armis gravis et nandi pavidus; Germanos, fluminibus  
suetos, levitas armorum et proceritas corporum attollit.  
Igitur, lacescentibus Batavis, ferocissimo cuique nos- 15  
trorum cœptum certamen; deinde orta trepidatio, cum  
præaltis paludibus arma equi haurirentur. Germani  
notis vadis persultabant, omissa plerumque fronte, la-  
tera ac terga circumvenientes. Neque ut in pedestri 2  
acie, cominus eminus certabatur; sed tanquam navalí  
pugna, vagi inter undas aut, si quid stabile occurrebat,  
totis illic corporibus nitentes, vulnerati cum integris,  
periti nandi cum ignaris in mutuam perniciem implica-

Babantur. Minor tamen quam pro tumultu cædes, quia non ausi egredi paludem Germani in castra rediere. Ejus prælii eventus utrumque ducem, diversis animi motibus, ad maturandum summae rci discrimen erexit.

**4** Civilis instare fortunæ, Cerialis abolere ignominiam. Germani prosperis feroce; Romanos pudor excitaverat. Nox apud barbaros cantu aut clamore, nostris per iram et minas acta. Postera luce Cerialis equite et auxiliariis cohortibus frontem explet; in secunda acie legiones locatae; dux sibi delectos retinuerat ad improvisa. Civilis haud porrecto agmine sed cuneis adstitit.

**2** Batavi Gugernique in dextro; læva ac propiora fluminis Transrhenani tenuere. Exhortatio ducum non more concionis apud universos, sed ut quosque suorum advehebantur. Cerialis veterem Romani nominis gloriam, antiquas recentesque victorias: ut perfidum, ignavum, victum hostem in æternum exciderent, ultione magis quam prælio opus esse. Pauciores nuper cum pluribus certasse, ac tamen fusos Germanos, quod roboris fuerit. Superesse qui fugam animis, qui vulnera tergo ferant. Proprios inde stimulus legionibus admovebat, domitores Britanniæ quartadecimanos appellans; principem Galbam sextæ legionis auctoritate factum; illa primum acie secundanos nova signa novamque aquilam dicaturos. Hinc prævectus ad Germanicum exercitum manus tendebat, ut suam ripam, sua castra sanguine hostium recuperarent. Alacrior omnium clamor, quis vel ex longa pace prælii cupido vel fessis bello pacis amor, præmiaque et quies in posterum sperabantur. Nec Civilis silentem struxit aciem, locum pugnæ testem virtutis ciens: Stare Germanos Batavosque super vestigia gloriæ, cineres ossaque legionum calcantes. Quocunque oculos Romanus inten-

A. D. 70.]

deret, captivitatem clademque et dira omnia obversari. Ne terrorentur vario Treverici prælii eventu. Suam 3 illic victoram Germanis obstitisse, dum, omissis telis, præda manus impediunt: sed cuncta mox prospera et hosti contraria evenisse. Quæ provideri astu ducis 4 oportuerit, provisa, campos madentes et ipsis gñaros, paludes hostibus noxias. Rhenum et Germaniæ deos 5 in aspectu; quorum numine capesserent pugnam, con-jugum parentum patriæ memores. Illum diem aut gloriosissimum inter majores aut ignominiosum apud posteros fore. Ubi sono armorum tripudiisque (ita 6 illis mos,) approbata sunt dicta, saxis glandibusque et cæteris missilibus prælium incipitur, neque nostro milite paludem ingrediente, et Germanis, ut elicerent, laces-sentibus. Absumptis quæ jaciuntur, et ardescente 18 pugna, procursum ab hoste infestius. Immensis cor-poribus et prælongis hastis fluitantem labantemque mi-litem eminus fodiebant; simul e mole, quam eductam in Rhenum retulimus, Bructerorum cuneus tranatavit. Turbata ibi res, et pellebatur sociarum cohortium acies, 2 cum legiones pugnam excipiunt, suppressaque hostium ferocia prælium æquatur. Inter quæ perfuga Batavus 3 adiit Ceriale, terga hostium promittens, si extremo paludis eques mitteretur: solidum illâ, et Gugernos, quibus custodia obvenisset, parum intentos. Duæ alæ 4 cum perfuga missæ incauto hosti circumfunduntur. Quod ubi clamore cognitum, legiones a fronte incu-buere, pulsique Germani Rhenum fuga petebant. De- 5 bellatum eo die foret, si Romana classis sequi ma-turâasset. Ne eques quidem institit, repente fusis im-bribus et propinqua nocte.

Postera die quartadecima legio in superiorem pro- 19 vinciam Gallo Anno missa; Cerialis exercitum decima

[A. U. C. 823.]

2 ex Hispania legio supplevit. Civili Chaucorum auxilia  
 venere. Non tamen ausus oppidum Batavorum armis  
 tueri, raptis quæ ferri poterant, cæteris injecto igni,  
 in insulam concessit, gnarus deesse naves efficiendo  
 ponti, neque exercitum Romanum aliter transmissurum.  
 3 Quin et diruit molem a Druso Germanico factam,  
 Rhenumque prono alveo in Galliam ruentem, disjectis  
 4 quæ morabantur, effudit. Sic velut abacto amne, tenuis  
 alveus insulam inter Germanosque continentium terra-  
 5 rum speciem fecerat. Transiere Rhenum Tutor quoque  
 et Classicus et centum tredecim Treverorum senatores;  
 in quib[us] fuit Alpinius Montanus, quem a Primo Antonio  
 missum in Gallias superius memoravimus. Comitabatur  
 6 eum frater D. Alpinius. Simul cæteri miseratione ac  
 donis auxilia concibant inter gentes periculorum avidas.  
 20 Tantumque belli superfuit, ut praesidia cohortium, ala-  
 rum, legionum uno die Civilis quadripartito invaserit,  
 decimam legionem Arenaci, secundam Batavoduri, et  
 Grinnes Vadamque cohortium alarumque castra, ita  
 divisis copiis ut ipse et Verax, sorore ejus genitus,  
 Classicusque ac Tutor suam quisque manum traherent;  
 nec omnina patrandi fiducia, sed multa ausis aliqua in  
 parte fortunam affore: simul Cerialem neque satis  
 cautum, et pluribus nuntiis huc illuc cursantem, posse  
 2 medio intercipi. Quibus obvenerant castra decima-  
 norum, oppugnationem legionis arduam rati, egressum  
 militem et cædeudis materiis operatum turbavere, occiso  
 præfecto castrorum, et quinque primoribus centurioum,  
 paucisque militibus: cæteri se munimentis defendere.  
 3 Et interim Germanorum manus Batavoduri rumpere  
 inchoatum pontem nitebantur. Ambiguum prælium nox  
 21 diremit. Plus discriminis apud Grinnes Vadamque. Va-  
 dam Civilis, Grinnes Classicus oppugnabant. Nec sisti

A. D. 70.]

poterant interfecto fortissimo quoque; in quis Briganticus, praefectus alæ, ceciderat, quem fidum Romanis et Civili avunculo infensum diximus. Sed ubi Cerialis 2 cum delecta equitum manu subvenit, versa fortuna præcipites Germani in amnem aguntur. Civilis, dum fugientes retentat, agnitus petitusque telis relicto equo tranatavit. Idem Veracis effugium. Tutorem Classi- 3 cumque appulsæ lintres vexere. Ne tum quidem Romana classis pugnæ affuit, ut jussum erat: sed obstitit formido, et remiges per alia militiæ munia dispersi. Sane Cerialis parum temporis ad exsequenda imperia 4 dabat, subitus consiliis, sed eventu clarus. Aderat fortuna etiam ubi artes defuissent. Hinc ipsi exercituique minor eura disciplinæ. Et paucos post dies, 5 quanquam periculum captivitatis evasisset, infamiam non vitavit. Profectus Novesium Bonnamque ad vi- 22 senda castra quæ hiematuris legionibus erigebantur, navibus remeabat, disjecto agmine, incuriosis vigiliis. Animadversum id Germanis; et insidias composuere. Electa nox atra nubibus; et prono amne rapti, nullo 2 prohibente, vallum ineunt. Prima cædes astu adjuta: incisis tabernaculorum funibus, suis met tentoriis co- opertos trucidabant. Aliud agmen turbare classem, injicere vincla, trahere puppes. Utque ad falleendum 3 silentio, ita cœpta cæde, quo plus terroris adderent, cuncta clamoribus miscebant. Romani vulneribus exciti quærunt arma, ruunt per vias, pauci ornatu militari, plerique circum brachia torta veste et strictis mucronibus. Dux semisomnus ac prope intectus errore hos- 4 tium servatur. Namque prætoriam navem vexillo insignem, illuc ducem rati, abripiunt. Cerialis alibi noctem egerat, ut plerique credidere, ob stuprum Claudiæ Sacratæ mulieris Ubiæ. Vigiles flagitium suum ducis 5

[A. U. C. 823.]

dedecore excusabant, tanquam jussi silere, ne quietem ejus turbarent; ita, intermisso signo et vocibus, se quoque in somnum lapsos. Multa luce revecti hostes, captivis navibus, prætoriam triremem flumine Luppia

- 23** donum Veledæ traxere. Civilem cupido incessit navelm aciem ostentandi. Complet quod biremium, quæque simplici ordine agebantur. Adjecta ingens lintrium vis, tricenos quadragenosque (ferre et?) armamenta Liburnicis solita; et simul captæ lintres sagulis versicoloribus haud indecore pro velis juvabantur. Spatium velut æquoris electum, quo Mosæ fluminis os amnem Rhenum Oceano affundit. Causa instruendæ classis, super insitam genti vanitatem, ut eo terrore commeatus Gallia **3** adventantes interciperentur. Cerialis miraculo magis quam metu direxit classem, numero imparem, usu remigum, gubernatorum arte, navium magnitudine potiorem. His flumen secundum; illi vento agebantur. Sic præveeti, tentato levium telorum jactu, dirimuntur. **4** Civilis nihil ultra ausus trans Rhenum concessit. Cerialis insulam Batavorum hostiliter populatus, agros vilasque Civilis intactas nota arte ducum sinebat, cum interim flexu auctumni et crebris per æquinoctium imbris superflusus amnis palustrem humilemque insulam in faciem stagni opplevit. Nec classis aut commeatus aderant, castraque in plano sita vi fluminis **24** differebantur. Potuisse tunc opprimi legiones, et voluisse Germanos, sed dolo a se flexos imputavit Civilis. Neque abhorret vero, quando paucis post diebus deditio **2** insecura est. Nam Cerialis, per occultos nuntios Batavis pacem, Civili veniam ostentans, Veledam propinquosque monebat fortunam belli, tot cladibus adversam, opportuno erga populum Romanum merito mutare. **3** Cæsos Treveros, receptos Ubios, ereptam Batavis pa-

A. D. 70.]

triām; neque aliud Civilis amicitia partum quam vulnera, fugas, luctus. Exsulem eum et extorrem recipientibus oneri; et satis peccavisse, quod toties Rhenum transcederint. Si quid ultra moliantur, inde injuriam et culpam, hinc ultionem et deos fore. Miscebantur 25 minis promissa. Et, concussa Transrhenanorum fide, inter Batavos quoque sermones orti. “Non proro- 2 gandam ultra ruinam, nec posse ab una natione totius orbis servitium depelli. Quid profectum cæde et incendiis legionum, nisi ut plures validioresque acci- rentur? Si Vespasiano bellum navaverint, Vespa- 3 num rerum potiri; sin populum Romanum armis vo- cent, quotam partem generis humani Batavos esse? Respicerent Rætos Noricosque et cæterorum onera 4 sociorum: sibi non tributa sed virtutem et viros indici. Proximum id libertati; et si dominorum electio sit, honestius principes Romanorum quam Germanorum feminas tolerari.” Hæc vulgus. Proceres atrociora : 5 “Civilis rabie semet in arma trusos; illum domesticis malis excidium gentis opposuisse. Tunc infenos Batavis deos, cum obsiderentur legiones, interficerentur legati, bellum uni necessarium, ferale ipsis sumeretur. Ventum ad extrema, ni resipiscere incipient, et noxii capitis pœna pænitentiam fateantur.” Non fefellit Ci- 26 vilem ea inclinatio, et prævenire statuit, super tedium malorum, etiam spe vitæ, quæ plerumque magnos animos infringit. Petito colloquio scinditur Nabaliæ flu- 2 minis pons; in cuius abrupta progressi duces, et Civilis ita cœpit:—“Si apud Vitellii legatum defenderer, neque 3 facto meo venia, neque dictis fides debebatur. Cuncta inter nos inimica, hostilia, ab illo cœpta, a me aucta erant. Erga Vespasianum vetus mihi observantia; et cum privatus esset, amici vocabamur. Hoc Primo An- 4

tonio notum, cuius epistolis ad bellum actus sum, ne Germanicæ legiones et Gallica juventus Alpes transcederent. Quæ Antonius epistolis, Hordeonius Flaccus præsens monebat, arma in Germania movi, quæ Mucianus in Syria, Aponius in Mœsia, Flavianus in Pannonia.” \* \* \*

C. CORNELII TACITI

DE SITU, MORIBUS,

ET

POPULIS GERMANIÆ

LIBER.

---

GERMANIA omnis a Gallis Rætisque et Pannoniis 1  
Rheno et Danubio fluminibus, a Sarmatis Dacisque  
inutuo metu aut montibus separatur. Cætera Oceanus  
ambit, latos sinus et insularum immensa spatia com-  
pleteens, nuper cognitis quibusdam gentibus ac regibus,  
quos bellum aperuit. Rhenus, Ræticarum Alpium in-2  
accesso ac præcipiti vertice ortus, modico flexu in Occi-  
dentem versus septentrionali Oceano miscetur. Danu-3  
bius, molli et clementer edito montis Abnobæ jugo  
effusus, plures populos adit, donec in Ponticum mare  
sex meatibus erumpat: septimum os paludibus hauritur.  
Ipsos Germanos indigenas crediderim, minimeque alia-2  
rum gentium adventibus et hospitiis mixtos, quia nec  
terra olim sed classibus advehabantur qui mutare sedes  
quærebant, et immensus ultra, utque sic dixerim ad-  
versus, Oceanus raris ab orbe nostro navibus aditur.  
Quis porro, præter periculum horridi et ignoti maris, 2  
Asia aut Africa aut Italia reicta, Germaniam peteret,  
informem terris, asperam cælo, tristem cultu aspec-  
tuque, nisi si patria sit?

3 Celebrant carminibus antiquis, quod unum apud illos memoriæ et annalium genus est, Tuisconem deum, terra editum, et filium Mannum, originem gentis conditorisque. Manno tres filios assignant, e quorum nominibus proximi Oceano Ingævones, medii Herminones,  
 4 cæteri Istævones vocentur. Quidam, ut in licentia vetustatis, plures deo ortos pluresque gentis appellations, Marsos, Gambrivios, Suevos, Vandilios affirmant, eaque vera et antiqua nomina. Cæterum Germaniæ vocabulum recens et nuper additum, quoniam qui primi Rhenum transgressi Gallos expulerint ac nunc Tungri,  
 5 tunc Germani vocati sint. Ita nationis nomen, non gentis, evaluisse paulatim, ut omnes, primum a victore ob metum, mox etiam a se ipsis invento nomine Germani mani vocarentur. Fuisse apud eos et Herculem memorant, primumque omnium virorum fortium ituri in prælia canunt. Sunt illis hæc quoque carmina, quorum relatu, quem baritum vocant, accendunt animos, futu  
 2 ræque pugnae fortunam ipso cantu augurantur. Ter  
rent enim trepidantve, prout sonuit acies; nec tam voces illæ quam virtutis concentus videntur. Affectatur præcipue asperitas soni et fractum murmur, objectis ad os scutis, quo plenior et gravior vox repercussu intu  
 3 mescat. Cæterum et Ulixem quidam opinantur, longo illo et fabuloso errore in hunc Oceanum delatum, adisse Germaniæ terras, Asciburgiumque, quod in ripa Rheni situm hodieque incolitur, ab illo constitutum nominatumque; aram quinetiam Ulixi consecratam, adjecto Laërtæ patris nomine, eodem loco olim repertam, monumetaque, et tumulos quosdam Græcis literis inscriptos,  
 4 in confinio Germaniæ Rætieque adhuc extare. Quæ neque confirmare argumentis neque refellere in animo est: ex ingenio suo quisque demat vel addat fidem.

Ipse corum opinionibus accedo, qui Germaniæ populos, 4 nullis aliis aliarum nationum connubiis infectos, propriam et sinceram, et tantum sui similem, gentem existisse arbitrantur. Unde habitus quoque corporum, quanquam in tanto hominum numero, idem : omnibus truces et cœrulei oculi, rutilæ comæ, magna corpora et tautum ad impetum valida. Laboris atque operum 3 non cadem patientia ; minimeque sitim æstumque tolerarc, frigora atque inediā cælo solove assueverunt. Terra, etsi aliquanto specie differt, in universum tamen 5 aut silvis horrida aut paludibus fœda, humidior, qua Gallias, ventosior, qua Noricum ac Pannoniam aspicit ; satis ferax, frugiferarum arborum impatiens, pecorum secunda, sed plerumque improcera. Ne armentis qui- 2 dem suus honor aut gloria frontis. Numero gaudent, eæque solæ et gratissimæ opes sunt. Argentum et au- 3 rum propitiine an irati dii negaverint, dubito. Nec tamen affirmaverim nullam Germaniæ venam argentum aurumve gignere : quis enim scrutatus est ? possessione et usu haud perinde afficiuntur. Est vidcre apud illos 4 argentea vasa, legatis et principibus eorum muneri data, non in alia vilitate quam quæ humo finguntur, quanquam proximi, ob usum commerciorum, aurum et argen- tum in pretio habent, formasque quasdam nostræ pecuniae agnoscunt atque eligunt : interiores simplicius et antiquius permutatione mercium utuntur. Pecuniam 5 probant veterem et diu notam, serratos bigatosque. Argeutum quoque magis quam aurum sequuntur, nulla affectione animi, sed quia numerus argenteorum facilior usui est promiscua ac vilia mercantibus. Ne ferrum 6 quidem superest, sicut ex genere telorum colligitur. Rari gladiis aut majoribus lanceis utuntur. Hastas, vel ipsorum vocabulo frameas, gerunt, angusto et brevi

ferro, sed ita acri et ad usum habili, ut eodem telo,  
prout ratio poscit, vel minus vcl eminus pugnant.

**2** Et eques quidem scuto frameaque contentus est: pedites et missilia spargunt, plura singuli, atque in immensum vibrant, nudi aut sagulo leves. Nulla cultus jactatio: scuta tantum lectissimis coloribus distinguunt.

**3** Paucis loricæ, vix uni alterive cassis aut galea. Equi non forma, non velocitate conspicui. Sed nec variare gyros in morem nostrum docentur: in rectum aut uno flexu dextros agunt, ita conjuncto orbe ut nemo posterior sit. In universum aestimanti, plus penes peditem roboris; eoque mixti præliantur, apta et congruente ad equestrem pugnam velocitate peditum, quos ex omni juventute delectos ante aciem locant. Definitur et numerus: centeni ex singulis pagis sunt; idque ipsum inter suos vocantur, et quod primo numerus fuit, jam nomen et honor est. Acies per cuneos componitur.

**6** Cedere loco, dummodo rursus instes, consilii quam formidinis arbitrantur. Corpora suorum etiam in dubiis præliis referunt. Scutum reliquisse, præcipuum flagitium, nec aut sacris adesse, aut concilium inire, ignominios fas; multique superstites bellorum infamiam laqueo finierunt. Reges ex nobilitate, duces ex virtute sumunt. Nec regibus infinita aut libera potestas; et duces exemplo potius quam imperio, si prompti, si conspicui, si ante aciem agant, admiratione præsunt. Cæterum neque animadvertere neque vincire, ne verberare quidem nisi sacerdotibus permisum, non quasi in pœnam, nec ducis jussu, sed velut deo imperante, quem adesse bellantibus credunt; effigiesque et signa quædam, detracta lucis, in prælium ferunt. Quodque præcipuum fortitudinis incitamentum est, non casus neque fortuita conglobatio turmam aut cuneum facit, sed

familiae et propinquitates. Et in proximo pignora, unde 4 feminarum ululatus audiri, unde vagitus infantium. Hi cuique sanctissimi testes, hi maximi laudatores. Ad matres, ad conjuges vulnera ferunt; nec illæ numerare aut exigere plagas pavent, cibosque et hortamina pugnantibus gestant. Memoriæ proditur, quasdam acies, 8 inclinatas jam et labantes, a feminis restitutas, constanza precum, et objectu pectorum, et monstrata cominus captivitate, quam longe impatientius feminarum suarum nomine timent, adeo ut efficacius obligentur animi civitatum quibus inter obsides puellæ quoque nobiles imperantur. Inesse quinetiam sanctum aliquid et pro- 2 vidum putant, nec aut consilia earum aspernantur aut responsa negligunt. Vidimus, sub divo Vespasiano, 3 Veledam diu apud plerosque numinis loco habitam. Sed et olim Auriniam et complures alias venerati sunt, non adulacione, neque tanquam faccrent deas.

Deorum maxime Mercenarium colunt, cui certis diebus 9 humanis quoque hostiis litare fas habent. Herculem ac Martem concessis animalibus placant. Pars Suevo- 2 rum et Isidi sacrificat: unde causa et origo peregrino sacro, parum comperi, nisi quod signum ipsum, in modum liburnæ figuratum, docet advectam religionem. Cæterum nec cohibere parietibus deos, neque in ullam 3 humaui oris speciem assimulare, ex magnitudine cælestium arbitrantur. Lucos ac nemora consecrant, deorumque nominibus appellant secretum illud quod sola reverentia vident. Auspicia sortesque ut qui maxime 10 observant. Sortium consuetudo simplex. Virgam frugiferæ arbore decisam in surculos amputant, eosque, notis quibusdam discretos, super candidam vestem temere ac fortuito spargunt. Mox, si publice consule- 2 tur, sacerdos civitatis, sin privatim, ipse pater familiae

precatus deos cælumque suspiciens, ter singulos tollit,  
 sublatos secundum impressam ante notam interpretatur.  
**3** Si prohibuerunt, nulla de cadem re in eundem diem  
 consultatio; sin permisum, auspiciorum adhue fides  
 exigitur. Et illud quidem etiam hic notum, avium  
 voces volatusque interrogare: proprium gentis equorum  
**4** quoque præsagia ac monitus experiri. Publice aluntur  
 iisdem nemoribus ac lucis candidi, et nullo mortali opere  
 contacti; quos pressos sacro curru sacerdos ac rex, vel  
 princeps civitatis, comitantur, hinnitusque ac fremitus  
**5** observant. Nec ulli auspicio major fides, non solum  
 apud plebem, apud proceres, apud sacerdotes: se enim  
 ministros deorum, illos conscos putant. Est et alia  
 observatio auspiciorum, qua gravium bellorum eventus  
**6** explorant. Ejus gentis, cum qua bellum est, captivum,  
 quoquo modo interceptum, cum electo popularium suo-  
 rum, patriis quemque armis, committunt. Victoria hu-  
 jus vel illius pro præjudicio accipitur.

- 11** De minoribus rebus principes consultant, de majori-  
 bus omnes, ita tamen ut ea quoque quorum penes  
 plebem arbitrium est, apud principes pertractentur.  
**2** Coëunt, nisi quid fortuitum et subitum incidit, certis  
 diebus, cum aut inchoatur luna aut impletur: nam  
 agendis rebus hoc auspicatissimum initium credunt.  
 Nec dierum numerum, ut nos, sed noctium computant.  
**3** Sic constituunt, sic condicunt: nox ducere dicim vi-  
 detur. Illud ex libertate vitium, quod non simul nec  
 ut jussi convenient, sed et alter et tertius dies cuncta-  
**4** tione coëuntium absumitur. Ut turbæ placuit, consi-  
 dunt armati. Silentium per sacerdotes, quibus tum et  
**5** coërcendi jus est, imperatur. Mox rex vel princeps,  
 prout ætas cuique, prout nobilitas, prout decus bel-  
 lorū, prout facundia est, audiuntur, auctoritate sua-

dendi magis quam jusbendi potestate. Si displicuit 6 sententia, fremitu aspernantur ; sin placuit, frameas concutiunt : honoratissimum assensus genus est armis laudare. Licet apud concilium accusare quoque et 12 discrimen capitis intendere. Distinctio pœnarum ex delicto. Proditores et transfugas arboribus suspendunt ; ignavos et imbelles et corpore infames cœno ac palude, injecta insuper erate, mergunt. Diversitas sup- 2 plieii illuc respicit, tanquam scelera ostendi oporteat, dum puniuntur, flagitia abscondi. Sed et levioribus delictis pro modo poena : equorum pecorumque numero convicti multantur. Pars multæ regi vel civitati, pars ipsi qui vindicatur, vel propinquus ejus, exsolvitur.

Eliguntur in iisdem conciliis et principes, qui jura 3 per pagos vicosque reddunt. Centeni singulis ex plebe comites, consilium simul et auctoritas, adsunt. Nihil 13 autem neque publicæ neque privatæ rei nisi armati agunt. Sed arma sumere non ante cuiquam moris, quam civitas suffecturum probaverit. Tum in ipso concilio vel principum aliquis vel pater vel propinquus scuto frameaque juvenem ornant. Hæc apud illos 2 toga, hic primus juventæ honos ; ante hoc domus pars videntur, mox reipublicæ. Insignis nobilitas, aut magna patrum merita, principis dignationem etiam adolescentulis assignant : cæteris robustioribus ac jam pri- dem probatis aggregantur. Nec rubor inter comites 3 aspici. Gradus quin etiam ipse comitatus habet, judicio ejus quem sectantur ; magna et comitum æmulationio, quibus primus apud principem suum locus, et principum, cui plurimi et acerrimi comites. Hæc dig- 4 nitas, hæ vires, magno semper electorum juvenum globo circumdari ; in pace decus, in bello præsidium. Nec solum in sua gente cuique, sed apud finitimas quo-

que civitates id nomen, ea gloria est, si numero ac  
virtute comitatūs emineat: expetuntur enim legationi-  
bus, et muneribus ornantur, et ipsa plerumque fama  
**14** bella profligant. Cum ventum in aciem, turpe principi  
virtute vinci, turpe comitatui virtutem principis non  
**2** adæquare. Jam vero infame in omnem vitam ac pro-  
brosum, superstitem principi suo ex acie recessisse.  
Illum defendere, tueri, sua quoque fortia facta gloriæ  
ejus assignare, præcipuum sacramentum est. Principes  
**3** pro victoria pugnant, comites pro principe. Si civitas  
in qua orti sunt longa pace et otio torpeat, plerique  
nobilium adolescentium petunt ultro eas nationes quæ  
tum bellum aliquod gerunt, quia et ingrata genti quies,  
et facilius inter ancipitia clarescunt, magnumque comi-  
**4** tatum nonnisi vi belloque tueare. Exigunt enim prin-  
cipis sui liberalitate illum bellatorem equum, illam cru-  
entam victricemque frameam. Nam epulæ et, quanquam  
incompti, largi tamen apparatus pro stipendio cedunt.  
**5** Materia munificentiae per bella et raptus. Nec arare  
terram aut exspectare annum tam facile persuaseris,  
quam vocare hostem et vulnera mereri. Pigrum quin  
immo et iners videtur sudore acquirere quod possis  
sanguine parare.

**15** Quoties bella non ineunt, non multum venatibus,  
plus per otium transigunt, dediti sonno ciboque, fortis-  
simus quisque ac bellicosissimus nihil agens, delegata  
domus et penatium et agrorum cura feminis senibusque  
et infirmissimo cuique ex familia: ipsi hebent, mira  
diversitate naturæ, cum iidem homines sic ament iner-  
**2** tiam et oderint quietem. Mos est civitatibus ultro ac  
viritim conferre principibus vel armentorum vel frugum,  
quod, pro honore acceptum, etiam necessitatibus subvenit.  
**3** Gaudent præcipue finitimarum gentium donis, quæ non

modo a singulis sed publice mittuntur, electi equi, magna arma, phalcræ torquesque. Jam et pecuniam accipere docuimus.

Nullas Germanorum populis urbes habitari satis no- **16**  
tum est; ne pati quidem inter se junctas sedes. Colunt  
discreti ac diversi, ut fons, ut campus, ut nemus placuit.  
Vicos locant non in nostrum morem, connexis et cohæ- **2**  
rentibus ædificiis: suam quisque domum spatio circum-  
dat, sive adversus casus ignis remedium, sive inscitia  
ædificandi. Ne cæmentorum quidem apud illos aut **3**  
tegularum usus: materia ad omnia utuntur informi, et  
citra speciem aut delectationem. Quædam loca dili-  
gentius illinunt terra ita pura ac splendeute, ut picturam  
ac lineamenta colorum imitetur. Solent et subterraneos **4**  
specus aperire, eosque multo insuper fimo onerant, suf-  
fugium hiemi et receptaculum frugibus, quia rigorem  
frigorum ejusmodi locis molliunt. Et si quando hostis **5**  
advenit, aperta populatur, abdita autem et defossa aut  
ignorantur, aut eo ipso fallunt quod quærenda sunt.

Tegumen omnibus sagum fibula aut, si desit, spina **17**  
consertum: cætera inecti totos dies juxta focum atque  
ignem agunt. Locupletissimi veste distinguuntur, non  
fluitante, sicut Sarmatæ ac Parthi, sed stricta et singu-  
los artus exprimente. Gerunt et ferarum pelles, proximi **2**  
ripæ negligenter, ulteriores exquisitius, ut quibus nullus  
per commercia cultus. Eligunt feras, et detracta vela-  
mina spargunt maculis pellibusque belluarum, quas ex-  
terior Oceanus atque ignotum mare gignit. Nec alias **3**  
feminis quam viris habitus, nisi quod feminæ sæpius  
lineis amictibus velantur, eosque purpura variant, par-  
temque vestitus superioris in manicas non extendunt,  
nudæ brachia ac lacertos; sed et proxima pars pectoris  
patet. Quanquam severa illic matrimonia, nec ullam **18**

morum partem magis laudaveris. Nam prope soli barbarorum singulis uxoribus contenti sunt, exceptis admodum paucis, qui non libidine, sed ob nobilitatem plurimis nuptiis ambiuntur. Dotem non uxor marito, sed uxori maritus offert. Intersunt parentes et propinqui, ac munera probant, munera non ad delicias muliebres quæsita, nec quibus nova nupta comatur, sed boves, et freuatum equum, et scutum cum framea gladioque. In hæc munera uxor accipitur, atque invicem ipsa armorum aliquid viro affert. Hoc maximum vinculum, hæc arcana sacra, hos conjugales deos arbitrantur. Ne se mulier extra virtutum cogitationes extraque bellorum casus putet, ipsis incipientis matrimonii auspiciis admonetur, venire se laborum periculorumque sociam, idem in pace, idem in prælio passuram ausuramque. Hoc juncti boves, hoc paratus equus, hoc data arma denuntiant. Sic vivendum, sic pereundum: accipere se quæ liberis inviolata ac digna reddat, quæ nurus accipiant, rursusque ad nepotes referantur. Ergo sæpta pudicitia agunt, nullis spectaculorum illecebris, nullis conviviorum irritationibus corruptæ. Literarum secreta viri pariter ac feminæ ignorant. Paucissima in tam numerosa gente adulteria; quorum pœna præsens et maritis permissa. Abscisus crinibus, nudatam, coram propinquis expellit domo maritus, ac per omnem vicum verbere agit. Publicatæ enim pudicitiae nulla venia: non forma, non ætate, non opibus maritum iuvenerit. Nemo enim illic vitia ridet, nec corrumpere et corrupti seculum vocatur. Melius quidem adhuc cæ civitates in quibus tautum virgines nubunt, et cum spe votoque uxoris semel transigitur. Sic unum accipiunt maritum quomodo unum corpus unamque vitam, ne ulla cogitatio

ultra, ne longior cupiditas, ne tanquam maritum sed tanquam matrimonium ament. Numerum liberorum finire, aut quenquam ex agnatis necare, flagitium habetur; plusque ibi boni mores valent quam alibi bona leges. In omni domo nudi ac sordidi in hos artus, in 20 hæc corpora, que miramur, excrescunt. Sua quemque mater uberibus alit, nec ancillis ac nutricibus delegantur. Dominum ac servum nullis educationis deliciis dignoscas: 2. inter eadem pecora, in eadem humo degunt, donec ætas separat ingenuos, virtus agnoscat. Sera juvenum venus, 8 eoque inexhausta pubertas. Nec virgines festinantur; eadem juventa, similis proceritas: pares validæque miscentur, ac robora parentum liberi referunt. Sororum filiis 4 idem apud avunculum qui ad patrem honor. Quidam sanctiorem arctioremque hunc nexum sanguinis arbitrantur, et in accipiendis obsidibus magis exigunt, tanquam [ii] et animum firmius et domum latius teneant. Hæredes 5 tamen successoresque sui cuique liberi; et nullum testamentum. Si liberi non sunt, proximus gradus in possessione fratres, patrui, avunculi. Quanto plus propinquorum, quo major affinium numerus, tanto gratiosior senectus; nec ulla orbitatis pretia. Susci- 21 pere tam inimicitias seu patris, seu propinqui, quam amicitias necesse est. Nec implacabiles durant: luitur enim etiam homicidium certo armentorum ac pecorum numero, recipitque satisfactionem universa domus, utiliter in publicum, quia periculosiores sunt inimicitiae juxta libertatem.

Convictibus et hospitiis non alia gens effusius in- 2 dulget. Quemcumque mortalium arcere tecto nefas habetur; pro fortuna quisque apparatis epulis excipit. Cum defecere, qui modo hospes fuerat, monstrator hos-

pitii et comes, proximam domum non invitati adeunt.  
 3 Nec interest: pari humanitate accipiuntur. Notum ignotumque, quantum ad jus hospitis, nemo discernit. Abeunti, si quid poposcerit, concedere moris; et possendi in vicem eadem facilitas. Gaudent muneribus, sed nec data imputant, nec acceptis obligantur. Victor inter hospites comis.

- 22 Statim e somno, quem plerumque in diem extrahunt, lavantur, saepius calida, ut apud quos plurimum hiems occupat. Lauti cibum capiunt: separatae singulis sedes et sua cuique mensa. Tum ad negotia, nec minus saepè  
 2 ad convivia procedunt armati. Diem noctemque continuare potando nulli probrum. Crebræ, ut inter vino-lentos, rixæ raro conviciis, saepius cæde et vulneribus  
 3 transiguntur. Sed et de reconciliandis invicem inimicis, et jungendis affinitatibus, et asciscendis principibus, de pace denique ac bello plerumque in conviviis consultant, tanquam nullo magis tempore aut ad simplices cogitationes pateat animus aut ad magnas incalescat. Gens non astuta nec callida aperit adhuc secreta pectoris licentia joci. Ergo detecta et nuda omnium mens postera die retractatur, et salva utriusque temporis ratio est. Deliberant, dum fingere nesciunt; consti-  
 23 tuunt, dum errare non possunt. Potui humor ex hordeo aut frumento, in quandam similitudinem vini corruptus: proximi ripæ et vinum mercantur. Cibi simplices, agrestia poma, recens fera aut lac concretum. Sine apparatu, sine blandimentis expellunt famem.  
 2 Adversus sitim non eadem temperantia. Si indulseris ebrietati suggerendo quantum concupiscunt, haud minus facile vitiis quam armis vincentur.  
 24 Genus spectaculorum unum atque in omni cœtu idem. Nudi juvenes, quibus id ludicum est, inter

gladios se atque infestas frameas saltu jaciunt. Exercitatio artem paravit, ars decorem, non in quæstum tamen aut mercedem : quamvis audacis lasciviæ pretium est voluptas spectantium. Aleam, quod mirere, sobrii 3 inter seria exercent, tanta lucrandi perdendive temeritate ut, cum omnia defecerunt, extremo ac novissimo jactu de libertate ac de corpore contendant. Victor 4 voluntariam servitutem adit : quamvis juvenior, quamvis robustior, alligari se ac venire patitur. Ea est in re prava pervicacia : ipsi fidem vocant. Servos conditionis hujus per commercia tradunt, ut se quoque pudore victoræ exsolvant. Cæteris servis non in nos- 25 trum morem, descriptis per familiam ministeriis, utuntur : suam quisque sedem, suos penates regit. Fru-menti modum dominus aut pecoris aut vestis, ut colou, injungit; et servus hactenus paret. Cætera domus 2 officia uxor ac liberi exsequuntur. Verberare servum, ac vinculis et opere coërcere, rarum. Occidere solent, non disciplina et severitate, sed impetu et ira, ut inimicum, nisi quod impune. Liberti non multum 3 supra servos sunt, raro aliquod momentum in domo, nunquam in civitate, exceptis duntaxat iis gentibus quæ regnantur. Ibi enim et super ingenuos et super nobiles ascendunt : apud cæteros impares libertini liber-tatis argumentum sunt.

Fenus agitare et in usuras extendere, ignotum ; ideo- 26 que magis servatur quam si vetitum esset. Agri pro numero cultorum ab universis in vices occupantur, quos mox inter se secundum dignationem partiuntur. Facilitatem partiendi camporum spatia præstant. Arva per annos mutant; et superest ager. Nec enim cum uber- 2 tate et amplitudine soli labore contendunt, ut pomaria conserant et prata separent et hortos rigent: sola

3 terræ seges imperatur. Unde annum quoque ipsum non in totidem digerunt species: hiems et ver et æstas intellectum ac vocabula habent; auctumni perinde nomen ac bona ignorantur.

27 Funerum nulla ambitio: id solum observatur ut corpora clarorum virorum certis lignis cremenatur. Struem rogi nec vestibus nec odoribus cumulant: sua cuique arma, quorumdam igni et equus adjicitur. Sepulcrum 2 cæspes erigit. Monumentorum arduum et operosum honorem, ut gravem defunctis, aspernantur. Lamenta ac lacrimas cito, dolorem et tristitiam tarde ponunt. Feminis lugere honestum est, viris meminisse.

3 Hæc in commune de omnium Germanorum origine ac moribus accepimus. Nunc singularum gentium instituta ritusque, quatenus differant, quæ nationes e Germania in Gallias commigraverint, expediam.

28 Validiores olim Gallorum res fuisse, summus auctorum divus Julius tradit; eoque credibile est etiam Gallos in Germaniam transgressos: quantulum enim amnis obstabat quo minus, ut queaque gens evaluerat, occuparet permutaretque sedes, promiscuas adhuc et 2 nulla regnum potentia divisas? Igitur inter Hercyniam silvam, Rhenumque et Mœnum amnes Helvetii, ulteriora Boii, Gallica utraque gens, tenuere. Manet adhuc Boihemi nomen, signatque loci veterem memoria, quamvis mutatis cultoribus. Sed utrum Aravisci in Pannoniam ab Osis, Germanorum natione, an Osi ab Araviscis in Germaniam commigraverint, cum eodem adhuc sermone, institutis, moribus utantur, incertum est, quia, pari olim inopia ac libertate, eadem utriusque 3 ripæ bona malaque erant. Treveri et Nervii circa affectionem Germanicæ originis ultro ambitiosi sunt, tanquam per hanc gloriam sanguinis a similitudine et

inertia Gallorum separentur. Ipsam Rheni ripam haud dubie Germanorum populi colunt, Vangiones, Triboci, Nemetes. Ne Ubii quidem, quanquam Roinana colonia 5 esse meruerint, ac libentius Agrippinenses, conditoris sui nomine, vocentur, origine erubescunt, transgressi olim et experimento fidei super ipsam Rheni ripam collocati, ut arcerent, non ut custodirentur.

Omnium harum gentium virtute præcipui Batavi non 29 multum ex ripa, sed insulam Rheni amnis colunt, Chatorum quondam populus et seditione domestica in eas sedes transgressus, in quibus pars Romani imperii fierent. Manet honos et antiquæ societatis insigne: nam 2 nec tributis contemnuntur, nec publicanus atterit. Exempti oneribus et collationibus, et tantum in usum præliorum sepositi, velut tela atque arma, bellis reser vantur. Est in eodem obsequio et Mattiacorum gens. 3 Protulit enim magnitudo populi Romani ultra Rhenum ultraque veteres terminos imperii reverentiam. Ita sede finibusque in sua ripa, mente animoque nobiscum agunt, cætera similes Batavis, nisi quod ipso adhuc terræ suæ solo et cælo acrius animantur.

Non numeraverim inter Germaniæ populos, quanquam 4 trans Rhenum Danubiumque consederint, eos qui Decumates agros exercent. Levissimus quisque Gallorum et iropia audax dubiæ possessionis solum occupavere. Mox limite acto, promotisque præsidiis, sinus imperii et pars provinciæ habentur.

Ultra hos Chatti initium sedis ab Hercynio saltu in- 30 choant, non ita effusis ac palustribus locis ut cæteræ civitates in quas Germania patescit; durant siquidem colles, paulatim rarescunt, et Chattos suos saltus Hercynius prosequitur simul atque deponit. Duriora genti corpora, stricti artus, minax vultus, et major animi vigor.

- 2 Multum, ut inter Germanos, rationis ac sollertiae: præponere electos, audire præpositos, nosse ordines, intelligere occasiones, differre impetus, disponere diem, vallare noctem, fortunam inter dubia, virtutem inter certa numerare, quodque rarissimum, nec nisi Romanæ disciplinæ concessum, plus reponere in duce quam in exercitu.
- 3 Omne robur in pedite, quem super arma ferramentis quoque et copiis onerant. Alios ad prælium ire videas, Chattos ad bellum. Rari excursus et fortuita pugna. Equestrium sane virium id proprium, cito parare victoriā, cito cedere. Velocitas juxta formidinem, cunctatio propior constantiae est. Et aliis Germanorum populis usurpatum raro et privata cujusque audentia apud Chattos in consensum vertit, ut primum adoleverint, crinem barbamque submittere, nec, nisi hoste cæso,
- 2 exuere votivum obligatumque virtuti oris habitum. Super sanguinem et spolia revelant frontem, seque tum demum pretia nascendi retulisse, dignosque patria ac
- 3 parentibus ferunt. Ignavis et imbellibus manet squalor. Fortissimus quisque ferreum insuper annulum (ignominiosum id genti,) velut vinculum gestat, donec se cæde
- 4 hostis absolvat. Plurimis Chattorum hic placet habitus; jamque canent insignes, et hostibus simul suisque monstrati. Omnium penes hos initia pugnarum; hæc
- 5 prima semper acies, visu nova. Nam ne in pace quidem vultu mitiore mansuescunt. Nulli domus aut ager aut aliqua cura: prout ad quemque venere, aluntur, prodigi alieni, contemptores sui, donec exsanguis senectus tam duræ virtuti impares faciat.
- 32 Proximi Chattis certum jam alveo Rhenum, quiq[ue] terminus esse sufficiat, Usipii ac Tencteri colunt. Tencteri super solitum bellorum decus equestris disciplinæ arte præcellunt; nec major apud Chattos pe-

ditum laus quam Tencteris equitum. Sic instituere majores: posteri imitantur. Hi lusus infantium, hæc juvenum æmulatio; perseverant senes. Inter familiam et penates et jura successionum equi traduntur: excipit filius, non, ut cætera, maximus natu, sed prout ferox bello et melior.

Juxta Tencteros Bructeri olim occurrabant: nunc 33 Chamavos et Angrivarios immigrâsse narratur, pulsis Bructeris ac penitus excisis vicinarum consensu nationum, seu superbiæ odio, seu prædae dulcedine, seu favore quodam erga nos deorum. Nam ne spectaculo quidem prælia invidere. Super sexaginta millia, non armis 2 telisque Romanis, sed quod magnificentius est, oblectationi oculisque ceciderunt. Maneat, quæso, duretque gentibus, si non amor nostri, at certe odium sui, quando, urgentibus imperii fatis, nihil jam praestare fortuna majus potest quam hostium discordiam.

Angrivarios et Chamavos a tergo Dulgibini et Cha- 34 suarii clidunt aliæque gentes haud perinde memoratae; a fronte Frisii excipiunt. Majoribus minoribusque Frisiis vocabulum est ex modo virium. Utræque nationes usque ad Oceanum Rheno prætexuntur, ambiuntque immensos insuper lacus et Romanis classibus navigatos. Ipsum quinetiam Oceanum illa tentavimus. 2 Et superesse adhuc Herculis columnas fama vulgavit, sive adiit Hercules, seu quicquid ubique magnificentum est, in claritatem ejus referre consensimus. Nec defuit 3 audentia Druso Germanico: sed obstitit Oceanus in se simul atque in Herculem inquiri. Mox nemo tentavit, sanctiusque ac reverentius visum de actis deorum credere quam scire.

Hactenus in Occidentem Germaniani novinius. In 35 Septentrionem ingenti flexu redit. Ac primo statim

Chaucorum gens, quanquam incipiat a Frisiis, ac partem litoris occupet, omnium quas exposui gentium lateribus 2 obtenditur, donec in Chattos usque sinuetur. Tam immensum terrarum spatium non tenent tantum Chauci, sed et implet, populus inter Germanos nobilissimus, 3 quique magnitudinem suam malit justitia tueri. Sine cupiditate, sine impotentia, quieti secretique nulla provocant bella, nullis raptibus aut latrociniis populantur. Id praeципuum virtutis ac virium argumentum est, quod ut superiores agant, non per injurias assequuntur. 4 Prompta tamen omnibus arma ac, si res poscat, exercitus, plurimum virorum equorumque; et quiescentibus eadem fama.

36 In latere Chaucorum Chattorumque Cherusci nimiam ac marcecentem diu pacem illacessiti nutrierunt. Idque jucundius quam tutius fuit, quia inter impotentes et validos falso quiescas: ubi manu agitur, modestia ac 2 probitas nomina superioris sunt. Ita qui olim boni æquique Cherusci, nunc inertes ac stulti vocantur: Chattis victoribus fortuna in sapientiam cessit. Tracti ruina Cheruscorum et Fosi, contermina gens: adversarum rerum ex æquo socii sunt, cum in secundis minores fuissent.

37 Eundem Germaniae sinum proximi Oceano Cimbri tenent, parva nunc civitas, sed gloria ingens. Veterisque famæ lata vestigia manent, utraque ripa castra ac spatia, quorum ambitu nunc quoque metiaris molem 2 manusque gentis, et tam magni exitus fidem. Sexcentesimum et quadragesimum annum urbs nostra agebat, cum primum Cimbrorum audita sunt arma, Cæcilio Metello ac Papirio Carbone consulibus. Ex quo si ad alterum imperatoris Trajani consulatum compute- 3 mus, ducenti fermi et decem anni colliguntur. Tam diu

Germania vincitur. Medio tam longi ævi spatio multa invicem damna. Non Samnis, non Pœni, non Hispaniæ Galliæve, ne Parthi quidem sæpius admonuere: quippe regno Arsacis acrior est Germanorum libertas. *V*Quid enim aliud nobis quam cædem Crassi, amisso et ipse Pacoro, infra Ventidium dejectus Oriens objecerit? At 4 Germani, Carbone et Cassio et Scauro Aurelio et Ser-vilio Cæpione, Marco quoque Manlio fusis vel captis, quinque simul consulares exercitus populo Romano, Varum tresque cum eo legiones etiam Cæsari abstulerunt. *V*Nec impune C. Marius in Italia, divus Julius 5 in Gallia, Drusus ac Nero et Germanicus in suis eos sedibus perculerunt. Mox ingentes C. Cæsaris minæ in ludibrium versæ. Inde otium, donec occasione dis- 6 cordiæ nostræ et civilium armorum, expugnatis legionum hibernis, etiam Gallias affectavere; ac rursus pulsi [inde] proximis temporibus triumphati magis quam victi sunt.

Nunc de Suevis dicendum est, quorum non una, ut 38 Chattorum Tencterorumve gens: majorem enim Germaniæ partem obtinent, propriis adhuc nationibus nominibusque discreti, quanquam in commune Suevi vocentur. Insigne gentis obliquare crinem nodoque substringere. Sic Suevi a cæteris Germanis, sic Suevorum ingenui a servis separantur. In aliis gentibus, seu cognatione 2 aliqua Suevorum, (seu quod sæpe accidit,) imitatione, rarum, et intra juventæ spatium: apud Suevos usque ad canitiem horrentem capillum retro sequuntur, ac sæpe in ipso solo vertice religant. Principes et orna- 3 tiorem habent. Ea cura formæ, sed innoxiae: neque enim ut ament amenturve, in altitudinem quandam et terrorem, adituri bella, compti, ut hostium oculis, ornantur. Vetustissimos se nobilissimosque Suevorum 39 Semnones memorant. Fides antiquitatis religione fir-

2 matur. Stato tempore in silvam, auguriis patrum et prisca formidine sacram, omnes ejusdem sanguinis populi legationibus coëunt, cæsoque publice homine ce-  
 3 lebrant barbari ritus horrenda primordia. Est et alia luco reverentia. Nemo nisi vinculo ligatus ingreditur, ut minor, et potestatem numinis præ se ferens. Si forte prolapsus est, attolli et insurgere haud licitum :  
 4 per humum evolvuntur. Eoque omnis superstitione respicit, tanquam inde initia gentis, ibi regnator omnium deus, cætera subjecta atque parentia. Adjicit auctoritatem fortuna Semnonum : centum pagi iis habitantur ; magnoque corpore efficitur, ut se Suevorun caput cre-  
 40 dant. Contra Langobardos paucitas nobilitat. Plurimis ac valentissimis nationibus cincti, non per obsequium, sed præliis et periclitando tuti sunt. Reudigni deinde et Aviones et Anglii et Varini et Eudoses et Suardones et Nuithones fluminibus aut silvis muniuntur.  
 2 Nec quicquam notabile in singulis, nisi quod in commune Nerthum, id est, Terram matrem, colunt, eamque intervenire rebus hominum, invehi populis arbitrantur. Est in insula Oceani castum nemus, dicatumque in eo vehi-  
 3 culum, veste coniectum. Attingere uni sacerdoti concessum. Is adesse penetrali deam intelligit, vectamque bubus feminis multa cum veneratione prosequitur. Læti tunc dies, festa loca, quæcunque adventu hospitioque  
 4 dignatur. Non bella ineunt, non arma sumunt ; clausum omne ferrum ; pax et quies tunc tantum nota, tunc tantum amata, donec idem sacerdos satiatam con-  
 5 versatione mortalium deam templo reddat. Mox vehiculum et vestes et, si credere velis, numen ipsum secreto lacu abluitur. Servi ministrant, quos statim idem lacus haurit. Arcanus hinc terror sanctaque ignorantia, quid sit illud quod tantum perituri vident.

Et hæc quidem pars Suevorum in secretiora Germaniæ 41 porrigitur. Propior (ut, quomodo paulo ante Rhenum, sic nunc Danubium sequar,) Hermundurorum civitas, fida Romanis; eoque solis Germanorum non in ripa commercium, sed penitus, atque in splendidissima Rætiæ provinciæ colonia. Passim sine custode transeunt; et, 2 cum cæteris gentibus arma modo castraque nostra ostendamus, his domos villasque patefecimus non concupiscentibus. In Hermunduris Albis oritur, flumen inclitum et notum olim; nunc tantum auditur.

Juxta Hermunduros Narisci, ac deinde Marcomani et 42 Quadi agunt. Præcipua Marcomanorum gloria viresque, atque ipsa etiam sedes, pulsis olim Boiis, virtute parta. Nec Narisci Quadive degenerant. Eaque Ger- 2 maniæ velut frons est, quatenus Danubio peragitur. Marcomanis Quadisque usque ad nostram memoriam reges manserunt ex gente ipsorum, nobile Marobodui et Tudri genus: jam et externos patiuntur. Sed vis et 3 potentia regibus ex auctoritate Romana. Raro armis nostris, sæpius pecunia juvantur, nec minus valent.

Retro Marsigni, Gothini, Osi, Buri terga Marcomana- 43 norum Quadorumque claudunt. E quibus Marsigni et Buri sermone cultuque Suevos referunt: Gothinos Gallica, Osos Pannonica lingua coarguit non esse Germans, et quod tributa patiuntur. Partem tributorum 2 Sarmatæ, partem Quadi ut alienigenis imponunt. Gothini, quo magis pudeat, et ferrum effodiunt. Omnesque hi populi pauca campestrium, cæterum saltus et vertices montium [jugumque] insederunt. Dirimit enim scinditque Sueviam continuum montium jugum, ultra quod plurimæ gentes agunt. Ex quibus latissime patet, Ligiorum nomen in plures civitates diffusum. Valentissimas nominâsse sufficiet, Harios, Helveconas, Manimos,

- 4** Helisios, Nahanarvalos. Apud Nahanarvalos antiquæ religionis lucus ostenditur. Præsidet sacerdos muliebri ornatu; sed deos, interpretatione Romana, Castorem Pollucemque memorant. Ea vis numini: nomen Alcis.
- 5** Nulla simulacula, nullum peregrinæ superstitionis vestigium. Ut fratres tamen, ut juvenes venerantur. Cæterum Harii super vires, quibus enumeratos paulo ante populos antecedunt, truces, insitæ feritati arte ac tempore lenocinantur. Nigra scuta, tincta corpora. Atras ad prælia noctes legunt, ipsaque formidine atque umbra feralis exercitus terrorem inferunt, nullo hostium sustinente novum ac velut infernum aspectum: nam primi in omnibus præliis oculi vincuntur.
- 44** Trans Ligios Gothones regnantur, paulo jam adductius quam cæteræ Germanorum gentes, nondum tamen supra libertatem. Protinus deinde ab Oceano Rugii et Lemovii; omniumque harum gentium insigne, rotunda scuta, breves gladii, et erga reges obsequium.
- 2** Suionum hinc civitates, ipso in Oceano, præter viros armaque classibus valent. Forma navium eo differt quod utrinque prora paratam semper appulsui frontem agit. Nec velis ministrantur, nec remos in ordinem lateribus adjungunt: solutum, ut in quibusdam fluminum, et mutabile, ut res poscit, hinc vel illinc remigium.
- 3** Est apud illos et opibus honos, eoque unus imperitat, nullis jam exceptionibus, non precario jure parendi. Nec arma, ut apud cæteros Germanos, in promiscuo, sed clausa sub custode, et quidem servo, quia subitos hostium incursus prohibet Oceanus, otiosa porro armatorum manus facile lasciviunt. Enimvero neque nobilis neque ingenuum, ne libertinum quidem armis præponere regia utilitas est.
- 45** Trans Suionas aliud mare, pigrum ac prope immotum,

quo cingi cludique terrarum orbem hinc fides, quod extremus cadentis jam solis fulgor in ortus edurat adeo clarus, ut sidera hebetet ; sonum insuper audiri, formasque deorum et radios capitum aspici persuasio adjicit. Illuc usque, et fama vera, tantum natura. Ergo jam 2 dextro Suevici maris litore *Æstiorum* gentes alluuntur ; quibus ritus habitusque Sucvorum, lingua Britannicæ propior. Matrem deum venerantur. Insigne superstitionis, formas aprorum gestant : id pro armis omniumque tutela securum deæ cultorem etiam inter hostes præstat. Rarus ferri, frequens fustum usus. Fru- 4 menta cæterosque fructus patientius quam pro solita Germanorum inertia laborant. Sed et mare scrutantur, ac soli omnium succinum, quod ipsi glesum vocant, inter vada atque in ipso litore legunt. Nec quæ natura 5 quæve ratio gignat, ut barbaris, quæsitum compertumve. Diu quinetiam inter cætera ejectamenta maris jacebat, donec luxuria nostra dedit nomen. Ipsis in nullo usu : rude legitur, informe perfertur, pretiumque mirantes accipiunt. Succum tamen arborum esse intelligas, quia 6 terrena quædam atque etiam volucria animalia plerumque interlucent, quæ implicata humore, mox durescente materia, cluduntur. Fecundiora igitur nemora lucos- 7 que, sicut Orientis secretis, ubi thura balsamaque sudantur, ita Occidentis insulis terrisque inesse crediderim ; quæ vicini solis radiis expressa atque liquentia in proximum mare labuntur, ac vi tempestatum in adversa litora exundant. Si naturam succini admoto 8 igne tentes, in modum tædæ accenditur, alitque flamman pingue et olenem ; mox ut in picem resinamve lentescit.

Suionibus Sitonum gentes continuantur. Cætera si- 9 miles uno differunt, quod femina dominatur : in tantum

non modo a libertate sed etiam a servitute degenerant.  
Hic Sueviæ finis.

46 Peucinorum Venetorumque et Fennorum nationes Germanis an Sarmatis ascribam dubito, quanquam Peucini, quos quidam Bastarnas vocant, sermone, cultu, sede ac domiciliis ut Germani agunt. Sordes omnium ac torpor: procerum connubiis mixtis nonnihil 2 in Sarmatarum habitum foedantur. Veneti multum ex moribus traxerunt: nam quicquid inter Peucinos Feunosque silvarum ac montium erigitur, latrociniis pererrant. Hi tamen inter Germanos potius referuntur, quia et domos figunt et scuta gestant et peditum usu ac perniciitate gaudent; quæ omnia diversa Sarmatis sunt 3 in plaustro equoque viventibus. Fennis mira feritas, fœda paupertas: non arma, non equi, non penates; victui herba, vestitui pelles, cubile humus. Sola in sagittis spes, quas, inopia ferri, ossibus asperant. Idemque venatus viros pariter ac feminas alit: passim enim 4 comitantur, partemque prædæ petunt. Nec aliud infantibus ferarum imbriumque suffugium, quam ut in aliquo ramorum nexu contegantur. Huc redeunt juvenes, hoc senum receptaculum. Sed beatius arbitrantur quam ingemere agris, illaborare domibus, suas alienasque for 5 tunas spe metuque versare. Securi adversus homines, securi adversus deos, rem difficillimam assecuti sunt, ut illis ne voto quidem opus esset. Caetera jam fabulosa: Hellusios et Oxionas ora hominum vultusque, corpora atque artus ferarum gerere; quod ego, ut incompertum, in medium relinquam.

# C. CORNELII TACITI

## VITA

# J U L I I A G R I C O L Æ.

---

CLARORUM virorum facta moresque posteris tradere, 1  
antiquitus usitatum, ne nostris quidem temporibus,  
quanquam incuriosa suorum, ætas omisit, quoties magna  
aliqua ac nobilis virtus vicit ac supergressa est vitium,  
parvis magnisque civitatibus commune, ignorantiam  
recti et invidiam. Sed apud priores ut agere digna  
memoratu prouum magisque in aperto erat, ita celebri-  
mus quisque ingenio ad prodendam virtutis memoriam,  
sine gratia aut ambitione, bonæ tantum conscientiæ  
pretio ducebatur. Ac plerique suam ipsi vitam narrare 3  
fiduciam potius morum quam arrogantiam arbitrati  
sunt; nec id Rutilio et Scauro citra fidem aut obtrec-  
tationi fuit. Adeo virtutes iisdem temporibus optime  
æstimantur, quibus facilime gignuntur. At nunc nar- 4  
raturo mihi vitam defuncti hominis venia opus fuit;  
quam non petissem, incusaturus tam sæva et intesta  
virtutibus tempora. Legimus, cum Aruleno Rustico 2  
Pætus Thrasea, Herennio Senecioni Priscus Helvidius  
laudati essent, capitale fuisse, neque in ipsos modo  
auctores, sed in libros quoque eorum sævitum, delegato  
triumviris ministerio, ut monumenta clarissimorum in-

2 geniorum in comitio ac foro urerentur. Scilicet illo  
igne vocem populi Romani, et libertatem senatus, et  
conscientiam generis humani aboleri arbitrabantur, ex-  
pulsis insuper sapientiae professoribus, atque omni bona  
arte in exsilium acta, ne quid usquam honestum occur-  
3 reret. Dedimus profecto grande patientiae documen-  
tum ; et sicut vetus ætas vidit quid ultimum in libertate  
esset, ita nos quid in servitute, adempto per inquisi-  
tiones et loquendi audiendique commercio. Memoriam  
quoque ipsam cum voce perdidissemus, si tam in nostra  
3 potestate esset oblivisci quam tacere. Nunc demum  
redit animus ; et quanquam primo statim beatissimi  
seculi ortu Nerva Cæsar res olim dissociabiles mis-  
cuerit, principatum ac libertatem, augeatque quotidie  
felicitatem temporum Nerva Trajanus, nec spem modo  
ac votum securitas publica, sed ipsius voti fiduciam ac  
robur, assumpserit, natura tamen infirmitatis humanæ  
tardiora sunt remedia quam mala ; et ut corpora nostra  
lente augescunt, cito extinguuntur, sic ingenia studia-  
2 que oppresseris facilius quam revocaveris. Subit quippe  
etiam ipsius inertiae dulcedo, et invisa primo desidia  
postremo amatur. Quid, si per quindecim annos, grande  
mortalis ævi spatium, multi fortutis casibus, promp-  
3 tissimus quisque sævitia principis interciderunt ? Pauci  
et, ut ita dixerim, non modo aliorum sed etiam nostri  
superstites sumus, exemptis e media vita tot annis,  
quibus juvenes ad senectudem, senes prope ad ipsos  
4 exactæ ætatis terminos per silentium venimus. Non  
tamen pigebit, vel incondita ac rudi voce, memoriam  
prioris servitutis ac testimonium præsentium bonorum  
composuisse. Hic interim liber honori Agricolæ socii  
mei destinatus, professione pietatis aut laudatus erit  
aut excusatus.

A. D. 61.]

Cnæus Julius Agricola, vetere et illustri Foro juli-<sup>4</sup>  
 ensium colonia ortus, utrumque avum procuratorem  
 Cæsarum habuit, quæ equestris nobilitas est. Pater  
 [Julii] Julius Græcinus, senatorii ordinis, studio elo-  
 quentiæ sapientiæque notus, iisque ipsis virtutibus iram  
 Caïi Cæsaris meritus: uamque Marcum Silanum accusare  
 jussus, et, quia abnuerat, interfectus est. Mater Julia<sup>2</sup>  
 Procilla fuit, raræ castitatis. In hujus sinu indulgen-  
 tiaque educatus per omnem honestarum artium cultum  
 pueritiam adolescentiamqne transegit. Arcebat eum<sup>3</sup>  
 ab illecebris peccantium, praeter ipsius bonam integrum-  
 que naturam, quod statim parvulus sedem ac magistrum  
 studiorum Massiliam habuit, locum Graeca comitate et  
 provinciali parcimonia mixtum ac bene compositum.  
 Memoria teneo, solitum ipsum narrare, se prima in<sup>4</sup>  
 juventa studium philosophiæ acrius, ultra quam con-  
 cessum Romano ac senatori, hausisse, ni prudentia  
 matris incensum ac flagrantem animum coercuisset.  
 Scilicet sublime et erectum ingenium pulchritudinem<sup>5</sup>  
 ac speciem magnæ excelsæque gloriæ vehementius quam  
 caute appetebat. Mox mitigavit ratio et ætas; reti-  
 nuitque, quod est difficillimum, ex sapientia modum.

Prima castrorum rudimenta in Britannia Sueto-<sup>5</sup>  
 nio Paulino, diligenti ac moderato duci, approbavit,  
 electus quem contubernio æstimaret. Nec Agricola<sup>2</sup>  
 licenter, more juvenum qui militiam in lasciviam ver-<sup>A.U.O.</sup>  
 tunt, neque segniter ad voluptates et commeatus ti-<sup>814.</sup>  
 tulum tribunatus et inscitiam retulit: sed noscere pro-<sup>A.D.</sup>  
 vinciam, nosci exercitui, discere a peritis, sequi optimos,  
 nihil appetere in jactationem, nihil ob formidinem recu-  
 sare, simulque et anxius et intentus agere. Non sane<sup>3</sup>  
 alias exercitator, magisque in ambiguo Britannia fuit.  
 Trucidati veterani, incensæ coloniæ, intersepti exercitus;

**4** tum de salute, mox de victoria certavere. Quæ cuncta, et si consiliis ductuque alterius agebantur, ac summa rerum et recuperatæ provinciæ gloria in ducem cessit, artem et usum et stimulos addidere juveni; intravitque animum militaris gloriæ cupidus, ingrata temporibus, quibus sinistra erga eminentes interpretatio, nec minus periculum ex magna fama quam ex mala.

**6** Hinc ad capessendos magistratus in urbem di-  
**A.U.C.** gressus, Domitiam Decidianam, splendidis natalibus  
**815.** ortam, sibi junxit. Idque matrimonium ad majora  
**A.D.** 62. nitenti decus ac robur fuit. Vixeruntque mira con-  
 cordia, per mutuam caritatem et invicem se antepo-  
 ponendo, nisi quod in bona uxore tanto major laus,  
**2** quanto in mala plus culpæ est. Sors quæsturæ pro-  
 vinciam Asiam, proconsulem Salvium Titianum dedit.  
 Quorum neutro corruptus est, quanquam et provincia  
 dives ac parata peccantibus, et proconsul in omnem  
 aviditatem pronus, quantilibet facilitate redempturus  
**3** esset mutuam dissimulationem mali. Auctus est ibi  
 filia, in subsidium simul et solatium: nam filium ante  
 sublatum brevi amisit. Mox inter quæsturam ac tri-  
 bunatum plebis atque ipsum etiam tribunatus annum  
 quiete et otio transiit, gnarus sub Nerone temporum,  
**4** quibus inertia pro sapientia fuit. Idem præturæ tenor  
 et silentium: nec enim jurisdictio obvenerat. Ludos,  
 et inania honoris, medio rationis atque abundantiae  
**5** duxit, uti longe a luxuria, ita famæ propior. Tum  
 electus a Galba ad dona templorum recognoscenda,  
 diligentissima conquisitione fecit, ne cuius alterius sa-  
 crilegium res publica quam Neronis sensisset.

**7** Sequens annus gravi vulnere animum domumque  
 ejus affixit. Nam classis Othoniana, licenter vaga-  
 dum Intemelios (Liguriæ pars est,) hostiliter popu-

A. D. 75.]

latur, matrem Agricolæ in prædiis suis interfecit, A. U. C.  
prædiaque ipsa et magnam patrimonii partem diri- 822.  
puit, quæ causa cædis fuerat. Igitur ad sollennia 2  
pietatis profectus Agricola, nuntio affectati a Vespa-  
siano imperii deprehensus, ac statim in partes trans-  
gressus est. Initia principatus ac statum urbis Mu- 3  
cianus regebat, juvēne admodum Domitiano, et ex  
paterna fortuna tantum licentiam usurpante. Is mis- 4  
sum ad delectus agendos Agricolam, integreque ac  
strenue versatum, vicesimæ legioni, tarde ad sacra-  
mentum transgressæ, præposuit, ubi decessor seditiose  
agere narrabatur: quippe legatis quoque consularibus  
nimia ac formidolosa erat, nec legatus prætorius ad  
cohendum potens, incertum suo an militum inge-  
nio. Ita successor simul et ulti electus, rarissima 5  
moderatione maluit videri invenisse bonos quam fecisse.  
Praerat tunc Britanniæ Vettius Bolanus, placidius 8  
quam feroci provincia dignum est. Temperavit Agri-  
cola vim suam, ardoremque compescuit, ne increceret,  
peritus obsequi, eruditusque utilia honestis miscere.  
Brevi deinde Britannia consularem Petilium Ceriale 2  
accepit. Habuerunt virtutes spatium exemplorum. Sed  
primo Cerialis labores modo et discrimina, mox et glo-  
riam communicabat: sæpe parti exercitus in experimen-  
tum, aliquando majoribus copiis ex eventu præfecit. Nec 3  
Agricola unquam in suam famam gestis exsultavit: ad  
auctorem ac ducem, ut minister, fortunam referebat.  
Ita virtute in obsequendo, verecundia in prædicando,  
extra invidiam nec extra gloriam erat.

Revertentem ab legatione legionis divus Vespa- 9  
sianus inter patricios adscivit, ac deinde provinciæ A. U. C.  
Aquitaniæ præposuit, splendidæ imprimis dignitatis ad- 828.  
ministratione ac spe consulatus cui destinârat. Cre- A. D.  
75.

2 dunt plerique militaribus ingenii subtilitatem deesse, quia castrensis jurisdictio secura et obtusior, ac plura manu agens, calliditatem fori non exerceat. Agricola naturali prudentia, quamvis inter togatos, facile 3 justeque agebat. Jam vero tempora curarum remissionumque divisa. Ubi conventus ac judicia poscerent, gravis, intentus, severus, et saepius misericors: ubi officio satisfactum, nulla ultra potestatis persona.

4 Tristitiam et arrogantiam et avaritiam exuerat; nec illi, quod est rarissimum, aut facilitas auctoritatem aut severitas amorem deminuit. Integritatem atque abstinentiam in tanto viro referre injuria virtutum 5 erit. Ne famam quidem, cui saepe etiam boni indulgent, ostentanda virtute aut per artem quæsivit: procul ab æmulatione adversus collegas, procul a contentione adversus procuratores, et vincere inglorium et atteri 6 sordidum arbitrabatur. Minus triennium in ea legatione detentus ac statim ad spem consulatus revocatus est, comitante opinione Britanniam ei provinciam dari, nullis in hoc suis sermonibus, sed quia par videbatur.

7 Haud semper errat fama; aliquando et elegit. Consul egregiae-tum spei filiam juveni mihi despondit, ac post consulatum collocavit, et statim Britanniæ præpositus est, adjecto pontificatus sacerdotio.

10 Britanniæ situm populosque, multis scriptoribus memoratos, non in comparationem curæ ingenive referam, sed quia tum primum perdomita est. Ita quæ priores nondum comperta eloquentia percoluere, rerum fide tra- 2 dentur. Britannia, insularum quas Romana notitia complectitur maxima, spatio ac caelo in Orientem Germaniæ, in Occidentem Hispaniæ obtenditur, Gallis in Meridiem etiam inspicitur; septentrionalia ejus, nullis contra 3 terris, vasto atque aperto mari pulsantur. Formam

A. D. 75.]

totius Britanniæ Livius veterum, Fabius Rusticus recentium eloquentissimi auctores oblongæ scutulæ vel bipenni assimulavere. Et est ea facies citra Caledoniam, unde et universis fama est transgressa. Sed immensum 4 et enorme spatium procurrentium extremo jam litore terrarum velut in cuneum tenuatur. Hanc oram novis- 5 simi maris tunc primum Romana classis circumvecta insulam esse Britanniam affirmavit, ac simul incognitas ad id tempus insulas, quas Orcadas vocant, invenit domuitque. Dispecta est et Thule, quam † hactenus jussum et 6 hiems abdebat, sed mare pigrum et grave remigantibus, perhibent, ne ventis quidem perinde attolli: credo, quod rariores terræ montesque, causa ac materia tempestatum, et profunda moles continui maris tardius impellitur. Naturam Oceani atque æstus neque quærere 7 hujus operis est, ac multi retulere. Unum addiderim: Nusquam latius dominari mare, multum fluminum huc atque illuc ferre, nec litore tenus accrescere aut resorberi, sed influere penitus atque ambire, et jugis etiam ac montibus inseri velut in suo. Cæterum Britanniam qui 11 mortales initio coluerint, indigenæ an advecti, ut inter barbaros, parum compertum. Habitus corporum variū, atque ex eo argumenta. Namque rutilæ Caledoniam 2 habitantium comæ, magni artus, Germanicam originem asseverant. Silurum colroati vultus, torti plerumque crines, et posita contra Hispania, Hiberos veteres trajeccisse easque sedes habitâsse fidem faciunt. Proximi 3 Gallis et similes sunt, seu durante originis vi, seu, procurrentibus in diversa terris, positio cœli corporibus habitum dedit. In universum tamen æstimanti Gallos 4 vicinam insulam occupâsse credibile est. Eorum sacra deprehendas, superstitionum persuasione; sermo haud multum diversus, in depositis periculis eadem auda-

[A. U. C. 828.]

- cia et, ubi advenere, in detrectandis eadem formido.  
 5 Plus tamen ferociæ Britanni præferunt, ut quos nondum longa pax emollierit. Nam Gallos quoque in bellis floruisse accepimus; mox segnitia cum otio intravit, amissa virtute pariter ac libertate. Quod Britannorum olim victis evenit: cæteri manent quales Galli fuerunt.
- 12 In pedite robur; quædam nationes et curru præliantur. Honestior auriga: clientes propugnant. Olim regibus parebant, nunc per principes factionibus et studiis tra-  
 2 huntur. Nec aliud adversus validissimas gentes pro nobis utilius, quam quod in commune non consulunt. Rarus duabus tribusve civitatibus ad propulsandum communc periculum conuentus: ita singuli pugnant,  
 3 universi vincuntur. Cælum crebris imbribus ac nebulis foedum; asperitas frigorum abest. Dierum spatia ultra nostri orbis meusuram; nox clara et extrema Britanniae parte brevis, ut finem atque initium lucis exiguo discri-  
 4 mine internoscas. Quodsi nubes non officiant, aspici per noctem solis fulgorem, nec occidere et exsurgere sed transire affirmant. Scilicet extrema et plana terrarum, humili umbra, non erigunt tenebras, infraque cælum et  
 5 sidera nox cadit. Solum, præter oleam vitemque et eætera calidioribus terris oriri sueta, patiens frugum, fecundum. Tarde mitescunt, cito proveniunt; eademque utriusque rei causa, multus humor terrarum cæli-  
 6 que. Fert Britannia aurum et argentum et alia metalla, pretium victoriæ. Gignit et Oceanus margarita, sed suffusca ac liventia. Quidam artem abesse legentibus arbitrantur: nam in rubro mari viva ac spirantia saxis  
 7 avelli, in Britannia, prout expulsa sint, colligi. Ego facilius crediderim, naturam margaritis deesse quam nobis avaritiam.
- 13 Ipsi Britanni delectum ac tributa et injuncta im-

A. C. 55. A D. 43—61.]

perii munera impigre obeunt, si injuriæ absint: has ægre tolerant, jam domiti ut pareant, nondum ut ser-viant. Igitur primus omnium Romanorum divus Ju-lius cum exercitu Britanniam ingressus, quanquam pro-spera pugna terruerit incolas ac litore potitus sit, potest <sup>2</sup> videri ostendisse posteris, non tradidisse. Mox bella <sup>3</sup> civilia, et in rem publicam versa principum arma, ac longa oblivio Britanniæ etiam in pace. Consilium id divus Augustus vocabat, Tiberius præceptum. Agitâsse <sup>4</sup> Caïum Cæsarem de intranda Britannia satis constat, ni velox ingenio, mobilis pænitentia, et ingentes adversus Germaniam conatus frustra fuisseut. Divus Claudio <sup>A.U.C.</sup>  
 † anectoritate [auctor?] operis, transvectis legionibus <sup>796.</sup> auxiliisque et assumpto in partem rerum Vespasiano; <sup>A.D.</sup> <sup>43.</sup> quod initium venturæ mox fortunæ fuit. Domitæ <sup>5</sup> gentes, capti reges, et monstratus fatis Vespasianus. <sup>14</sup> Consularium primus Aulus Plautius præpositus, ac sub-<sup>A.U.C.</sup> <sup>796—814</sup> inde Ostorius Scapula, uterque bello egregius; re-dactaque paulatim in formam provinciæ proxima pars <sup>A.D.</sup> <sup>43—61.</sup> Britanniæ. Addita insuper veteranorum colonia. Quæ- <sup>2</sup> dam civitates Cogidumno regi donatæ (is ad nostram usque memoriam fidissimus mansit,) ut, vetere ac jam pridem recepta populi Romani consuetudine, ha-beret instrumenta servitutis et reges. Mox Didius <sup>3</sup> Gallus parta a prioribus continuit, paucis admodum castellis in ulteriora promotis, per quaē fama aucti officii quæreretur. Didium Veranius excepit, isque intra annum extinctus est. Suetonius hinc Paulinus biennio <sup>4</sup> prosperas res habuit, subactis nationibus, firmatisque præsidiis; quorum fiducia Monam insulam, ut vires rebellibus ministrantem, aggressus, terga occasione patefecit. Namque absentia legati remoto metu, Britanni <sup>15</sup>.

agitare inter se mala servitutis, conferre injurias et interpretando accendere. Nihil profici patientia nisi ut graviora, tanquam ex facili tolerantibus, imperentur.

**2** Singulos sibi olim reges fuisse, nunc binos imponi, e quibus legatus in sanguinem, procurator in bona sæviret. Æque discordiam præpositorum, æque concordiam subjectis exitiosam. Alterius manus centuriones, alterius

**3** servos vim et contumelias miscere. Nihil jam cupiditati, nihil libidini exceptum. In prælio fortiorem esse qui spoliet: nunc ab ignavis plerumque et imbellibus eripi domos, abstrahi liberos, injungi delectus, tanquam

**4** mori tautum pro patria nescientibus. Quantulum enim transisse militum, si sese Britanni numerent? Sic Germanias excussisse jugum: et flumine, non Oceano defendi. Sibi patriam, conjuges, parentes, illis avaritiam

**5** et luxuriam causas belli esse. Recessuros, ut divus Julius recessisset, modo virtutem majorum suorum sœmularentur. Neve prælia unius aut alterius eventu pavescerent: plus impetus, majorem constantiam

**6** penes miseros esse. Jam Britannorum etiam deos misereri, qui Romanum ducem absentem, qui relegatum in alia insula exercitum detinerent; jam ipsos, quod difficillimum fuerit, deliberare. Porro in ejusmodi consiliis periculosius esse deprehendi quam audere.

**16** His atque talibus invicem instincti, Boudicea, gene-

**A. u. c.** ris regii femina, duce, (neque enim sexum in imperiis

**814.** discernunt,) sumpsere universi bellum; ac sparsos per

**A. D.** 61.. castella milites consecinati, expugnatis præsidiis, ipsam coloniam invasere ut sedem servitutis. Nec ullum in

**2** barbaris sævitiae genus omisit ira et victoria. Quodnisi Paulinus, cognito provinciæ motu, propere subvenisset,

amissa Britannia foret; quam unius prælia fortuna veteri patientiæ restituit, (tenentibus arma plerisque,

A. D. 78.]

quos conscientia defectionis et proprius ex legato timor agitabat,) ni quanquam egregius cætera arroganter in deditos et, ut suæ cujusque injuriæ ultor, durius consulteret. Missus igitur Petronius Turpilianus, tanquam 3 exorabilior, et delictis hostium novus, eoque pænitentiæ mitior, compositis prioribus, nihil ultra ausus Trebellio Maximo provinciam tradidit. Trebellius segnior, et 4 nullis castrorum experimentis, comitate quadam curandi provinciam tenuit. Didicere jam barbari quoque ignoscere vitiis blandientibus; et interventus civilium armorum præbuit justam segnitiae excusationem. Sed discordia laboratum, cum assuetus expeditionibus miles otio lasciviret. Trebellius, fuga ac latebris vitata exercitus 5 ira, indecorus atque humilis precario mox præfuit; ac velut pacti, exercitus licentiam, dux salutem, [et] seditio sine sanguine stetit. Nec Vettius Bolanus, manen-6 tibus adhuc civilibus bellis, agitavit Britanniam disciplina. Eadem inertia erga hostes, similis petulantia castrorum, nisi quod innocens Bolauus, et nullis delictis inquisitus, caritatem paraverat loco auctoritatis. Sed ubi 17 cum cætero orbe Vespasianus et Britanniam recuperavit, magni duces, egregii exercitus, minuta hostium spes. Et terrorem statim intulit Petilius Cerialis, Brigantum 2 civitatem, quæ numerosissima provinciæ totius perhibetur, aggressus. Multa prælia, et aliquando non in-  
cruenta; magnamque Brigantum partem aut victoria amplexus est aut bello. Et Cerialis quidem alterius 3 successoris curam famamque obruisset, *sed* sustinuit molem Julius Frontinus, vir magnus, quantum licebat, validamque et pugnacem Silurum gentem armis subegit, super virtutem hostium locorum quoque difficultates eluctatus.

Hunc Britanniæ statum, has bellorum vices, me- 18

A.U.C. dia jam æstate transgressus, Agricola invenit, cum  
 831. et milites, velut omissa expeditione, ad securitatem,  
 A.D. 78. et hostes ad occasionem, uterentur. Ordovicum civi-  
 2 tas, haud multo ante adventum ejus, alam in finibus  
 suis agentem prope universam obtriverat; eoque initio  
 3 erecta provincia. Et quibus bellum volentibus erat,  
 probare exemplum, ac recentis legati animum oppre-  
 riri, cum Agricola, quanquam transvecta ætas, sparsi  
 per provinciam numeri, præsumpta apud militem illius  
 anni quies, tarda et contraria bellum inchoaturo, et  
 plerisque custodiri suspecta potius videbatur, ire ob-  
 viam discrimini statuit; contractisque legionum vexillis  
 et modica auxiliorum manu, quia in æquum degredi  
 Ordovices non audebant, ipse ante agmen, quo cæteris  
 4 par animus simili periculo esset, erexit aciem. Cæ-  
 saque prope universa gente, non ignarus instandum  
 famæ ac, prout prima cessissent, terrorem cæteris  
 fore, Monam insulam, cuius possessione revocatum  
 Paulinum rebellione totius Britanniæ supra memoravi,  
 5 redigere in potestatem animo intendit. Sed, ut in  
 dubiis consiliis, naves deerant: ratio et constantia du-  
 cis transvexit. Depositis omnibus sarcinis, lectissimos  
 auxiliarium, quibus nota vada et patrius nandi usus,  
 quo simul seque et arma et equos regunt, ita repente  
 immisit, ut obstupefacti hostes, qui classem, qui naves,  
 qui mare exspectabant, nihil arduum aut invictum cre-  
 6 diderint sic ad bellum venientibus. Ita petita pace, ac  
 dedita insula, clarus ac magnus haberi Agricola, quippe  
 cui ingredienti provinciam, quod tempus alii per osten-  
 tationem aut officiorum ambitum transigunt, labor et  
 7 periculum placuisse. Nec Agricola prosperitate rerum  
 in vanitatem usus, expeditionem aut victoriam vocabat  
 victos continuisse: ne laureatis quidem gesta prosecutus

A. D. 79.]

est. Sed ipsa dissimulatione famæ famam auxit, æstimantibus quanta futuri spe tam magna tacuisset. Cæ 19 terum animorum provinciæ prudens, simulque doctus per aliena experimenta parum profici armis, si injuriæ sequerentur, causas bellorum statuit excidere. A se 2 suisque orsus primum domum suam coërcuit; quod plerisque häud minus arduum est quam provinciam regere. Nihil per libertos servosque publicæ rei, non studiis privatis, nec ex commendatione aut precibus, centurionem, milites nescire, sed optimum quemque fidissimum putare. Omnia scire, non omnia exsequi. 3 Parvis peccatis veniam, magnis severitatem commodore; nec pœna semper, sed saepius pænitentia contentus esse; officiis et administrationibus potius non peccaturos præponere, quam damnare cum peccassent. Frumenti et tributorum exactiouem æqualitate mu- 4 nerum mollire, circumcisio quæ in quæstum reperta ipso tributo gravius tolerabantur. Namque per ludibrium assidere clausis horreis, et emere ultro frumenta, ac ludere pretio cogebantur. Devortia iti- 5 nerum et longinquitas regionum indicebatur, ut civitates proximis hibernis in remota et avia deferrent, donec quod omnibus in promptu erat, paucis lucrosum fieret. Hæc primo statim anno comprimendo 20  
A.U.C. 832.  
A.D. 79.  
 egregiam famam paci circumdedit, quæ vel incuria vel intolerantia priorum haud minus quam bellum timebatur. Sed ubi æstas advenit contracto exercitu, 2 multus in agmine, laudare modestiam, disjectos coërcere; loca castris ipse capere, æstuaria ac silvas ipse prætentare; et nihil interim apud hostes quietum pati, quo minus subitis excursibus popularetur; atque ubi satis terruerat, parcendo rursus irritamenta pacis ostentare. Quibus rebus multæ civitates, quæ in illum diem 3

ex æquo egerant, datis obsidibus iram posuere, et præsidiis castellisque circumdatae, tanta ratione curaque, ut nulla ante Britanniæ nova pars.

21 Illacessita transiit sequens hiems, saluberrimis consiliis absumpta. Namque ut homines dispersi ac rudes, eoque in bella faciles, quieti et otio per voluptates assuescerent, hortari privatim, adjuvare publice, ut tempa, fora, domus exstruerent, laudando promptos et 2 castigando segnes. Ita honoris æmulatio pro neccsitate erat. Jam vero principum filios liberalibus artibus erudire, et ingenia Britannorum studiis Gallorum anteferre, ut qui modo linguam Romanam abnuebant, 3 eloquentiam concupiscerent. Inde etiam habitus nostri honor et frequens toga. Paulatimque discessum ad delenimenta vitiorum, porticus et balnea et conviviorum elegantiam. Idque apud imperitos humanitas vocabatur, cum pars servitutis esset.

22 Tertius expeditionum annus novas gentes aperuit,  
 A.U.C. vastatis usque ad Taum (æstuario nomen est,) nati-  
 833. onibus. Qua formidine territi hostes, quanquam con-  
 A.D. 80. flictatum sævis tempestatibus exercitum, lacessere non  
 2 ausi; ponendisque insuper castellis spatium fuit. An-  
 notabant periti, non alium ducem opportunitates locorum sapientius legisse; nullum ab Agricola posi-  
 3 tum castellum aut vi hostium expugnatum, aut pacti-  
 one ac fuga desertum. Crebræ eruptiones: nam ad-  
 versus moras obsidionis annuis copiis firmabantur.  
 Ita intrepida ibi hiems, et sibi quisque præsidio, irritis  
 hostibus eoque desperantibus, quia, soliti plerumque  
 damna æstatis hibernis eventibus pensare, tum æstate  
 4 atque hieme juxta pellebantur. Nec Agricola un-  
 quam per alios gesta avidus intercepit: seu centurio  
 seu præfectus incorruptum facti testem habebat. Apud

A. D. 81, 82, 83.1

quosdam acerbior in conviciis narrabatur; ut erat comis bonis, ita adversus malos injucundus. Cæterum ex ira- 5 cundia nihil supererat; secretum et silentium ejus non timeres. Honestius putabat offendere quam odisse.

Quarta æstas obtinendis quæ percurrerat insump- 23 ta; ac si virtus exercituum et Romani nominis gloria <sup>A.U.C.</sup>  
834. pateretur, inventus in ipsa Britannia terminus. Nam <sup>A.D.</sup>  
81. Clota et Bodotria, diversi maris æstibus per immen-  
sum revectæ, angusto terrarum spatio dirimuntur. Quod 2  
tum præsidiis firmabatur; atque omnis propior sinus  
tenebatur, summotis velut in aliam insulam hosti-  
bus.

Quinto expeditionum anno nave prima transgres- 24 sus, ignotas ad id tempus gentes crebris simul ac <sup>A.U.C.</sup>  
835. prosperis præliis domuit; eamque partem Britanniae <sup>A.D.</sup>  
82. quæ Hiberniam aspicit copiis instruxit, iu spem magis  
quam ob formidinem, si quidem Hibernia, medio in-  
ter Britanniam atque Hispaniam sita et Gallico quo-  
que mari opportuna, valentissimam imperii partem mag-  
nis invicem usibus miscuerit. Spatium ejus, si Britan- 2  
niæ comparetur, angustius; nostri maris insulas superat.  
Solum cœlumque et ingenia cultusque hominum haud  
multum a Britannia differunt. Melius aditus portus-  
que per commercia et negotiatores cogniti. Agricola 3  
expulsum seditione domestica unum ex regulis gentis  
exceperat, ac specie amicitiae in occasionem retinebat:  
sæpe ex eo audivi legione una et modieis auxiliis de-  
bellari obtinerique Hiberniam posse; idque etiam ad-  
versus Britanniam profuturum, si Romana ubique arma,  
et velut e conspectu libertas tolleretur.

Cæterum æstate, qua sextum officii annum in- 25  
choabat, amplexus civitates trans Bodotriam sitas, <sup>A.U.C.</sup>  
836. quia motus universarum ultra gentium et infesta <sup>A.D.</sup>  
83. .

[A. U. C. 835.]

hostilis exercitus itinera timebantur, portus classe exploravit; quæ, ab Agricola primum assumpta in partem virium, sequebatur egregia specie, cum simul terra simul mari bellum impelleretur, ac sæpe iisdem castris pedes equesque et nauticus miles, mixti copiis et luctitia, sua quisque facta, suos casus attollerent, ac modo silvarum ac montium profunda, modo tempestatum ac fluctuum adversa, hinc terra et hostis, hinc victus Oceanus, militari jactantia compararentur. Britannos quoque, ut ex captivis audiebatur, visa classis obstupefaciebat, tanquam aperto maris sui secreto, ultimum 3 victis perfugium clauderetur. Ad manus et arma conversi Caledoniam incolentes populi, paratu magno, majore fama, uti mos est de ignotis, oppugnâsse ultro, castella adorti metum ut provocantes addiderant; regredendumque citra Bodotriam, et excedendum potius quam pellerentur, ignavi specie prudentium admonebant, cum interim cognoscit hostes pluribus agminibus irrupturos. Ac ne superante numero et peritia locorum circumiretur, diviso et ipse in tres partes exercitu in 26 cessit. Quod ubi cognitum hosti, mutato repente consilio, universi nonam legionem ut maxime invalidam nocte aggressi, inter somnum ac trepidationem cæsis 2 vigilibus irrupere. Jamque in ipsis castris pugnabatur, cum Agricola, iter hostium ab exploratoribus edoctus et vestigiis insecurus, velocissimos equitum peditumque assultare tergis pugnantium jubet, mox ab universis ad 3 jici clamorem. Et propinqua luce pulsere signa. Ita ancipiiti malo territi Britanni; et Romanis redit animus, ac securi pro salute de gloria certabant. Ulro quin etiam erupere; et fuit atrox in ipsis portarum angustiis prælium, donec pulsi hostes, utroque exercitu certante, his, ut tulisse opem, illis, ne eguisse auxilio

A. D. 84.]

viderentur. Quod nisi paludes et silvæ fugientes tex-  
issent, debellatum illa victoria foret. Cujus conscienc- 27  
tia ac fama ferox exercitus, nihil virtuti suæ invium,  
et penetrandam Caledoniam inveniendumque tandem  
Britanniæ terminum continuo præliorum cursu, fre-  
mebant. Atque illi, modo cauti ac sapientes, prompti 2  
post eventum ac magniloqui erant. Iniquissima hæc  
bellorum conditio est: prospera omnes sibi vindicaut,  
adversa uni imputantur. At Britanni † non virtute, 3  
sed occasione et arte ducis rati, nihil ex arrogantia  
remittere, quo minus juventutem armarent, conjuges  
ac liberos in loca tuta transferreut, cœtibus ac sacri-  
ficiis conspirationem civitatum sancirent. Atque ita  
irritatis utrinque animis discessum.

Eadem æstate cohors Ukipiorum, per Germanias con- 28  
scripta, et in Britanniam transmissa, magnum ac memo-  
rable facinus ausa est. Occiso centurione ac militibus, 2  
qui, ad tradendam disciplinam immixti manipulis, ex-  
emplum et rectores habebantur, tres liburnicas, adactis  
per vim gubernatoribus, ascendere; et uno remigante,  
suspectis duobus eoque imperfectis, nondum vulgato ru-  
more, ut miraculum prævehebantur. † Mox ad aquam 3  
atque ut illa raptis secum plerisque Britannorum sua  
defensantium prælio congressi, ac sæpe victores, ali-  
quando pulsi, eo ad extremuni inopiae venere, ut infir-  
missimos suorum, mox sorte ductos vescerentur. Atque 4  
circumvecti Britanniam, amissis per inscitiam regendi  
navibus, pro prædonibus habití, primum a Suevis, mox  
a Frisiis intercepti sunt. Ac fuere, quos, per commercia 5  
venumdatos, et in nostram usque ripam mutatione emen-  
tium adductos, indicium tanti casus illustravit. 29

Initio æstatis Agricola domestico vulnere ictus,

A.D.C.  
837.  
A.D.  
84.

anno ante natum filium amisit. Quem casum ne-

[A. U. C. 837.]

que ut plerique fortium virorum ambitiose, neque per lamenta rursus ac mærorem muliebriter tulit. Et  
 2 in luctu bellum inter remedia erat. Igitur præmissa classe, quæ pluribus locis prædata magnum et incertum terrorem faceret, expedito exercitu, cui e Britannis fortissimos et longa pace exploratos addiderat, ad montem  
 3 Grampium pervenit, quem jam hostis insederat. Nam Britanni, nihil fracti pugnæ prioris eventu, et ultionem aut servitium exspectantes, tandemque docti commune periculum concordia propulsandum, legationibus et fœ-  
 4 deribus omnium civitatum vires exciverant. Jamque super triginta millia armatorum aspiciebantur, et adhuc affluebat omnis juventus et quibus cruda ac viridis senectus, clari bello, ac sua quisque decora gestantes, cum inter plures duces virtute et genere præstans, nomine Calgacus, apud contractam multitudinem præ-  
 30 lium poscentem in hunc modum locutus fertur: "Quoties causas belli et necessitatem nostram intueor, magnus mihi animus est, hodiernum diem consensumque  
 2 vestrum initium libertatis totius Britanniae fore. Nam et universi servitutis expertes, et nullæ ultra terræ, ac ne mare quidem securum, imminentे nobis classe Ro-  
 manæ. Ita prælium atque arma, quæ fortibus honesta,  
 3 eadem etiam ignavis tutissima sunt. Piores pugnæ, quibus adversus Romanos varia fortuna certatum est, spem ac subsidium in nostris manibus habebaut, quia nobilissimi totius Britanniae, eoque in ipsis penetralibus siti, nec servientium litora aspicientes, oculos quoque  
 4 a contactu dominationis inviolatos habebamus. Nos, terrarum ac libertatis extremos, recessus ipse ac sinus famæ in hunc diem defendit. Nunc terminus Britan-  
 niæ patet. Atque omne ignotum pro magnifico est.  
 5 Sed nulla jam ultra gens, nihil nisi fluctus et saxa,

A. D. 84.<sup>1</sup>

et infestiores Romani, quorum superbiam frustra per obsequium et modestiam effugeris. Raptiores orbis, postquam cuncta vastantibus defuere terræ, et mare scrutantur; si locuples hostis est, avari, si pauper, ambitiosi; quos non Oriens, non Occidens satiaverit. Soli omnium opes atque inopiam pari affectu concu- 5  
piscunt. Auferre, trucidare, rapere, falsis nominibus imperium, atque, ubi solitudinem faciunt, pacem ap-  
pellant. Liberos cuique ac propinquos suos natura 31  
carissimos esse voluit: hi per delectus alibi servituri auferuntur: conjuges sororesque, etiamsi hostilem libi-  
dinem effugiant, nomine amicorum atque hospitum pol-  
luuntur. Bona fortunasque in tributum aggerant, an- 2  
num in frumentum. Corpora ipsa ac manus silvis ac paludibus emuniendis inter verbera ac contumelias con-  
terunt. Nata servituti mancipia semel veneunt, atque ultro a dominis aluntur: Britannia servitutem suam quotidie emit, quotidie pascit. Ac sicut in familia 3  
recentissimus quisque servorum etiam conservis ludibrio est, sic in hoc orbis terrarum vetere famulatu novi nos et viles in excidium petimur. Neque enim arva nobis aut metalla aut portus sunt, quibus exercendis reservemur. Virtus porro ac ferocia subjectorum in- 4  
grata imperantibus; et longinquitas ac secretum ipsum quo tutius, eo suspectius. Ita sublata spe veniae, tan-  
dem sumite animum, tam quibus salus quam quibus gloria carissima est. Brigantes femina duce exurere 5  
coloniam, expugnare castra, ac, nisi felicitas in socordia in vertisset, exuere jugum potuere: nos integri et indomiti et libertatem non in pænitentiam laturi, primo statim congressu ostendamus, quos sibi Caledonia viros se posuerit. An eandem Romanis in bello virtutem 32  
quam in pace lasciviam adesse creditis? Nostris illi

dissensionibus ac discordiis clari vitia hostium in gloriam exercitus sui vertunt; quem, contractum ex diversissimis gentibus, ut ecundæ res teneat, ita adversæ 2 dissolvent. Nisi si Gallos et Germanos et (pudet dictu,) Britannorum plerosque, licet dominationi alienæ sanguinem commoident, diutius tamen hostes quam servos, fide et affectu teneri putatis. Metus et terror est, infirma vincla caritatis; quæ ubi removeris, qui timere desierint, odisse incipient. Omnia victoriae incitamenta 3 pro nobis sunt. Nullæ Romanos conjuges accendunt, nulli parentes fugam exprobraturi sunt; aut nulla plerisque patria, aut alia est. Paucos numero, trepidos ignorantia, cælum ipsum ac marc et silvas, ignota omnia circumspæctantes, clausos quodammodo ac vinctos 4 dì nobis tradiderunt. Ne terreat vanus aspectus et auri fulgor atque argeuti, quod neque tegit neque vulnerat. In ipsa hostium acie inveniemus nostras manus. Agnoscent Britanni suam causam, recordabuntur Galli priorem libertatem: deserent illos cæteri Germani, tanquam nuper Usipii reliquerunt. Nec quicquam ultra 5 formidinis. Vacua castella, senum coloniæ, inter male parentes et injuste imperantes ægra municipia et discordantia. Hic dux, hic exercitus: ibi tributa et metalla et cæteræ servientium poenæ, quas in æternum perferre aut statim ulcisci in hoc campo est. Proinde ituri in aciem et majores vestros et posteros cogitate.”

33 Excepere orationem alacres, ut barbaris moris, cautu fremituque et clamoribus dissonis. Jamque agmina, et armorum fulgores audentissimi eujusque procursu: simul instruebatur acies, cum Agricola quauquam lætum et vix munimentis coërcitum militem accendendum 2 adhuc ratus, ita disseverit:—“Octavus annus est, comilitones, ex quo virtute et auspiciis imperii Romani,

A. D. 84.]

fide atque opera vestra Britanniam vicistis. Tot expeditionibus, tot præliis, seu fortitudine adversus hostes, seu patientia ac labore pene adversus ipsam rerum naturam opus fuit, neque me milituni neque vos ducis pænituit. Ergo egressi, ego veterum legatorum, vos pri-<sup>3</sup> orum exercituum terminos, finem Britanniæ non fama nec rumore sed castris et armis tenemus. Inventa Britannia et subacta. Evidem sœpe in agmine, cum <sup>4</sup> vos paludes montesve et flumina fatigarent, fortissimi cujusque vocem audiebam: ‘Quando dabitur hostis, quando acies?’ Veniunt, e latebris suis extrusi, et vota virtusque in aperto, omniaque prona victoribus atque eadem viciis adversa. Nam ut superâsse tantum <sup>5</sup> itineris, silvas evasisse, transisse aestuaria pulchrum ac decorum in frontem, ita fugientibus periculosissima quæ hodie prosperrima sunt. Neque enim nobis aut locorum eadem notitia, aut commeatum eadem abundantia, sed manus et arma et in his omnia. Quod ad <sup>6</sup> me attinet, jam pridem mihi decretum est, neque exrcitus neque ducis terga tuta esse. Proinde et honesta mors turpi vita potior, et incolumitas ac decus eodem loco sita suut. Nec inglorium fuerit in ipso terrarum ac naturæ fine eccidisse. Si novæ gentes atque ignota <sup>34</sup> acies constitisset, aliorum exercituum exemplis vos hor-  
tarer: nunc vestra decora recensete, vestros oculos interrogate. Hi sunt quos proximo anno unam legionem furto noctis aggressos clamore debellâstis; hi cæterorum Britannorum fugacissimi, ideoque tam diu superstites. Quomodo silvas saltusque penetrantibus fortissimum <sup>2</sup> quodque animal contra ruere, pavida et inertia ipso agminis sono pelluntur, sic acerrimi Britannorum jam pridem ceciderunt, reliquus est numerus ignavorum et metuentium. Quos quod tandem invenistis, non resti-<sup>3</sup>

terunt, sed deprehensi sunt; novissimæ res et extremo metu corpora defixere aciem in his vestigiis, in quibus 4 pulchram et spectabilem victoriam ederetis. Transigite cum expeditionibus; imponite quinquaginta annis magnum diem; approbate reipublicæ nunquam exercitui imputari potuisse aut moras belli, aut causas rebel-  
35 landi." Et alloquente adhuc Agricola militum ardor eminebat, et finem orationis ingens alacritas consecuta 2 est, statimque ad arma discursum. Instinctos ruen- tesque ita disposuit, ut peditum auxilia, quæ octo millium erant, medium aciem firmarent, equitum tria millia cornibus affunderecetur. Legiones pro vallo ste-  
terc, ingens victoriæ decus citra Romanum sanguinem 3 bellanti, et auxilium, si pellerentur. Britannorum acies in speciem simul ac terrorem editioribus locis constiterat ita, ut primum agmen in æquo, cæteri per aeclive jugum convexi velut insurgerent; media campi covinnarius et 4 eques strepitū ac discursu complebat. Tum Agricola, superante hostium multitudine, veritus, ne simul in frontem simul et latera suorum pugnaretur, diductis ordinibus, quanquam porrectior acies futura erat et arcessendas plerique legiones admonebant, promptior in spem et firmus adversis, dimisso equo pedes ante vexilla  
36 constituit. Ae prino congressu eminus certabatur. Si mulque constantia, simul arte Britanni ingentibus gladiis et brevibus cetris missilia nostrorum vitare vel exeutere, atque ipsi magnam vim telorum superfundere, donec Agricola *tres* Batavorum cohortes ac Tungrorum duas cohortatus est, ut rem ad muerones ac manus adducerent; quod et ipsis vetustate militiae exereitatum, et hostibus inhabile, parva scuta et enormes gladios geren-  
2 tibus. Nam Britannorum gladii sine mucerone complexum armorum et in aperto pugnam non tolerabant.

A. D. 84.]

Igitur ut Batavi miscere ictus, ferire umbonibus, ora  
fœdare, et stratis qui in æquo adstiterant, erigere in  
colles aciem cœpere, cæteræ cohortes, æmulatione et  
impetu commixtae, proximos quosque cædere: ac plerique  
semineces aut integri festinatione victoriae reliquen-  
bantur. Interim equitum turnæ fugere, covinnarii 3  
peditum se prælio miscuere. Et quanquam recentem  
terrorem intulerant, densis tamen hostium agminibus et  
inæqualibus locis hærebant; minimeque † equestres.  
Ea enim pugnæ facies erat cum ægra diu aut stante 4  
simul equorum corporibus impellereutur; ac sæpe vagi  
currus, exterriti sine rectoribus equi, ut quemque for-  
mido tulerat, transversos aut obvios iucursabant. Et 37  
Britanni, qui adhuc pugnæ expertes summa collum  
insederant et paucitatem nostrorum vacui spernebant,  
degredi paulatim et circumire terga vincentium cœper-  
rant, ni id ipsum veritus Agricola quatuor equitum alas,  
ad subita belli retentas, venientibus opposuisset, quantoque  
ferocius accucurrerant, tanto acrius pulsos in  
fugam disjecisset. Ita consilium Britannorum in ipsos 2  
versum, transvectæque præcepto ducis a fronte pugnantium  
alæ aversam hostium aciem iuvasere. Tum vero  
patentibus locis grande et atrox spectaculum. Sequi,  
vulnerare, capere, atque eosdem oblatis aliis trucidare.  
Jam hostium, prout cuique ingenium erat, catervæ 3  
armatorum paucioribus terga præstare, quidam inermes  
ultra ruere ac se morti offerre. Passim arma et cor-  
pora et laceri artus et cruenta humus; et aliquando  
etiam victis ira virtusque. Postquam silvis appropin- 4  
quaverunt, collecti primos sequentium, incautos et lo-  
corum ignaros, circumveniebant. Quod ni frequens  
ubique Agricola validas et expeditas cohortes indaginis  
modo, et sicubi arctiora erant, partem equitum, dimissis

equis, simul rariores silvas equitem persultare jussisset, acceptum aliquod vulnus per nimiam fiduciam foret.

5 Cæterum ubi compositos firmis ordinibus sequi rursus videre, in fugam versi, non agminibus, ut prius, nec alius alium respectantes, rari et vitabundi invicem longinqua atque avia petiere. Finis sequendi nox et sa-tictas fuit. Cæsa hostium ad dece[m] millia: nostrorum trecenti sexaginta cecidere, in quîs Aulus Atticus, præ-fectus cohortis, juvenili ardore et ferocia equi hos-

38 tibus illatus. Et nox quidem gaudio prædaque lata victoribus: Britanni palantes, mixtoque virorum mulierumque ploratu trahere vulneratos, vocare integros, dc-sererc domos ac per iram ultro incendere, eligere latebras, et statim relinquere; miscere invicem consilia aliqua, dein separare; aliquando frangi aspectu pignorum

2 suorum, sæpius concitari. Satisque constabat, sævisse quosdam in conjuges ac liberos, tanquam misererentur. Proximus dies faciem victoriæ latius aperuit: vastum ubique silentium, secreti colles, fumantia procul tecta,

3 nemo exploratoribus obvius. Quibus in omuem partem dimissis, ubi incerta fugæ vestigia neque usquam con-globari hostes compertum, et exacta jam æstate spargi bellum nequibat, in fines Borestorum exercitum deducit.

4 Ibi acceptis obsidibus, præfecto classis circumvehi Bri-tanniam præcepit. Datae ad id vires, et præcesserat terror. Ipse peditem atque equites lento itinere, quo novarum gentium animi ipsa transitus mora terrorerentur,

5 in hibernis locavit. Et simul classis secunda tempestate ac fama Trutulensem portum tenuit, unde proximo Bri-tanniae latere lecto omni redicrat.

39 Hunc rerum cursum, quanquam nulla verborum jac-tantia epistolis Agricolæ auctum, ut Domitiano moris erat, fronte latus, pectorc anxius exceptit. Incrat con-

A. D. 84.]

scientia derisui fuisse nuper falsum e Germania triumphum, emptis per commercia, quorum habitus et crinis in capiivorum speiem formarentur: at nunc veram magnamque victoriam, tot millibus hostium cæsis, ingenti fama celebrari. Id sibi maxime formidolosum, 2 privati hominis nomen supra principis attolli: frustra studia fori et civilium artium decus in silentium acta, si militarem gloriam alius occuparet; et cætera uteunque facilius dissimulari, ducis boni imperatoriam virtutem esse. Talibus curis exercitus, quodque sævæ cogita- 3 tionis indicium erat, seereto suo satiatus, optimum in præsentia statuit reponere odium, donec impetus famæ et favor exercitus languesceret. Nam etiam tum Agricola Britanniam obtinebat. Igitur triumphalia orna- 40 menta et illustris statuæ honorem, et quidquid pro triumpho datur, multo verborum honore cumulata, decerni in senatu jubet, addique insuper opinionem, Syriam provinciam Agrieole destinari, vacuam tum morte Atilii Rusi consularis et majoribus reservatam. Credidere 2 plerique libertum ex secretioribus ministeriis, missum ad Agricolam, codicillos, quibus ei Syria dabatur, tulisse, cum præcepto ut, si in Britannia foret, tradarentur; eumque libertum in ipso freto Oceani obvium Agrieole, ne appellato quidem eo ad Domitianum remcâsse, sive verum istud, sive ex ingenio principis fietum ac compositum est. Tradiderat interim Agricola successori suo provinciam quietam tutamque. Ac ne notabilis celebritate et frequentia occurrentium iu- 3 troitus esset, vitato amicorum officio noctu in urbem, noctu in Palatum, ita ut præceptum erat, venit; ex- ceptusque brevi osculo et nullo sermone turbæ servi- entium immixtus est. Ceterum uti militare nomen, 4 grave inter otiosos, aliis virtutibus temperaret, tran-

[A. U. C. 839—844. 843.

quillitatem atque otium penitus auxit, cultu modicus, sermone facilis, uno aut altero amicorum comitatus, adeo uti plerique, quibus magnos viros per ambitionem aestimare mos est, viso aspectoque Agricola quererent famam, pauci interpretarentur.

**41** Crebro per eos dies apud Domitianum absens accusatus, absens absolutus est. Causa periculi non crimen ullum aut querela laesi cuiusquam, sed infensus virtutibus princeps, et gloria viri, ac pessimum inimicorum genus, 2 laudantes. Et ea insecura sunt reipublicæ tempora, quæ

<sup>A. u. c.</sup> sileri Agricolam non sinerent: tot exercitus in Mœsia  
<sup>839—</sup> Daciaque et Germania et Pannonia temeritate aut per  
<sup>844.</sup> <sup>A. d.</sup> ignaviam ducum amissi, tot militares viri cum tot cohortibus expugnati et capti; nec jam de limite imperii et ripa, sed de hibernis legionum et possessione dubitatum.

**3** Ita cum damna damnis continuarentur, atque omnis annus funeribus et cladibus insigniretur, possebatur ore vulgi dux Agricola, comparantibus eunctis vigorem, constantiam, et expertum bellis animum cum inertia et formidine eorum, \* \* \* quibus sermonibus satis constat Domitiani quoque aures verberatas, dum optimus quisque libertorum amore et fide, pessimi malignitate et livore prouum deterioribus principem exstimulabant.

**4** Sic Agricola simul suis virtutibus simul vitiis aliorum in ipsam gloriam præceps agebatur.

**42** Aderat jam annus, quo proconsulatum Asie et Afriæ sortiretur, et occiso Civica nuper, nec Agricolæ consilium deerat nec Domitiano exemplum. Accessere quidam cogitationum principis periti, qui iturusne es-  
2 sct ultiro Agricolam interrogarent. Ac primo occultius quietem et otium laudare, mox operam suam in approbanda excusatione offerrere, postremo non jam obscuri suadentes simul terrentesque pertraxere ad Do-

A. D. 90. 93.]

mitianum. Qui paratus simulatione, in arrogantiam 3  
compositus, et audiit preces excusantis, et, cum au-  
nuisset, agi sibi gratias passus est, nec erubuit bene-  
ficii invidia. Salarium tamen proconsulari solitum of-  
ferri, et quibusdam a se ipso concessum, Agricolæ non  
dedit, sive offesus non petitum, sive ex conscientia, ne  
quod vetuerat videtur emisse. Proprium humani in- 4  
genii est odisse quem læseris: Domitianî vero natura  
præceps in iram et, quo obscurior, eo irrevocabilior,  
moderatione tamen prudentiaque Agricolæ leniebatur,  
quia non contumacia neque inani jactatione libertatis  
famam fatumque provocabat. Sciant, quibus moris est 5  
illicita mirari, posse etiam sub malis principibus magnos  
viros esse, obsequiumque ac modestiam, si industria ac  
vigor adsint, eo laudis excedere, quo plerique per ab-  
rupta, sed in nullum reipublicæ usum, ambitiosa morte  
inclaruerunt.

Finis vitæ ejus nobis luctuosus, amicis tristis, ex 43  
traneis etiam ignotisque non sine cura fuit. Vulgus <sup>A.U.C.</sup>  
quoque et hic aliud agens populus et ventitavere ad <sup>846.</sup>  
domum et per fora et circulos locuti sunt; nec quis-<sup>A. D.</sup>  
quam andita morte Agricolæ aut lætatus est, aut statim  
oblitus est. Augebat miseracionem constans rumor 2  
veneno interceptum. Nobis nihil comperti affirmare  
ausim. Cæterum per ommem valitudinem ejus, cre-  
brius quam ex more principatus, per nuntios visen-  
tis, et libertorum primi et medicorum intimi venere,  
sive cura illud sive inquisitio erat. Supremo qui- 3  
dem die momenta ipsa defientis per dispositos cur-  
sores nuntiata constabat, nullo credente sic accele-  
rari quæ tristis audiret. Speciem tamen doloris animo  
vultuque præ se tulit, securus jam odii, et qui facilius  
dissimularet gaudium quam metum. Satis constabat, 4

[A. U. C. 846. 790.]

leto testamento Agricolæ, quo cohæredem optimæ uxori et piissimæ filiæ Domitianum seripsit, lætatum eum velut honore judicioque. Tam cæca et corrupta mens assiduis adulatio[n]ibus erat, ut nesciret a bono patre non scribi hæredem nisi malum principem.

44 Natus erat Agricola Caio Cæsare tertium consule,

<sup>A.U.C.</sup> Idibus Juniis: excessit sexto et quinquagesimo anno,

<sup>790.</sup> <sup>A. d.</sup> decimo Kalendas Septembres, Collega Priscoque consu-

<sup>37.</sup> libus. Quod si habitum quoque ejus posteri noscere

<sup>2</sup> velint, decentior quam sublimior fuit: nihil metus in vultu; gratia oris supererat. Bonum virum facile

<sup>3</sup> crederes, magnum libenter. Et ipse quidem, quan-

quam medio in spatio integræ ætatis erctus, quantu[m] ad gloriam, longissimum ævum peregit. Quippe

et vera bona, quæ in virtutibus sita sunt, impleverat, et consulari ac triumphalibus ornamentiis prædicto quid

<sup>4</sup> aliud adstruere fortuna poterat? Opibus nimis nou-

gandebat; speciosæ contigerant. Filia atque uxore

superstitibus, potest videri etiam beatus, incolumi dignitate, florente fama, salvis affinitatibus et amicitiis,

<sup>5</sup> futura effugisse. Nam sicuti durare in hac beatissimi

seculi luce ac priuipem Trajanum videre, quod augurio votisque apud nostras aures ominabatur, ita festinatæ

mortis grande solarium fulit, evasisse postremum illud tempus, quo Domitiauus non jam per intervalla ac spi-

ramenta temporum, sed continuo et velut uno ietu

<sup>45</sup> rempublicam exhaustus. Non vidit Agricola obsessam

curiam et clausum armis senatum et eadem strage tot

consularium cædes, tot nobilissimarum feminarum ex-

silia et fugas. Una adhuc victoria Carus Metius censem-

batur, et intra Albanam arce[m] sententia Messalini

strepebat, et Massa Bæbius jam tum reus erat. Mox

nostræ duxere Helvidium in carcerem manus: nos

A. D. 37.]

Maurici Rusticique visus, nos innocentia sanguine Senecio perfudit. Nero tamen subtraxit oculos, jussitque 2 scelera, non spectavit: præcipua sub Domitiano miseriarum pars erat videre et aspici, cum suspiria nostra subscriberentur, cum denotandis tot hominum palloribus sufficeret sævus ille vultus et rubor, quo se contra pudorem muniebat. Tu vero felix, Agricola, non vitæ tautum 3 claritate, sed etiam opportunitate mortis. Ut perhibent, qui interfuerunt novissimis sermonibus tuis, constans et libens fatum excepisti, tanquam pro virili portione innocentiam principi douares. Sed mihi filiæque ejus præter 4 acerbitatem parentis erepti auget mæstiam, quod assidere valitudini, fovere deficientem, satiari vultu complexuque non contigit. Excepissemus certe mandata 5 vocesque, quas penitus animo figeremus. Noster hic dolor, nostrum vulnus, nobis tam longæ absentiae conditione ante quadriennium amissus es. Omnia sine du- 6 bio, optime parentum, assidente amantissima uxore, superfuere honori tuo: paucioribus tamen lacrimis compositus es, et novissima in luce desideravere aliquid oculi tui. Si quis piorum Manibus locus, si, ut sapientibus 46 placet, non cum corpore extinguntur magnæ animæ, placide quiescas, nosque, domum tuam, ab infirmitate desiderio et muliebribus lamentis ad contemplatiouem virtutum tuarum voces, quas neque lugeri neque plangi fas est. Admiratione te potius *quam* temporalibus laudibus, 2 et, si natura suppeditet, similitudine decoremus. Is verus honor, ea conjunctissimi cuiusque pietas. Id 3 filiæ quoque uxoriique præceperim, sic patris, sic mariti memoriam venerari, ut omnia facta dictaque ejus secum revolvant, formamque ac figuram animi magis quam corporis complectantur; non quia intercedendum putem imaginibus quæ marmore aut ære finguntur, sed ut

[A. U. C. 790.]

vultus hominum, ita simulacula vultus imbecilla ac mortalia sunt, forma mentis æterna, quam tenere et exprimere non per alienam materiam et artem, sed tuis ipse  
4 moribus possis. Quicquid ex Agricola amavimus, quicquid mirati sumus, manet mansurumque est in animis hominum, in æternitate temporum, fama rerum. Nam multos veteranos, velut inglorios et ignobiles, oblivio obruet: Agricola, posteritati narratus et traditus, superstes erit.

C. CORNELII TACITI  
D E O R A T O R I B U S  
DIALOGUS.

---

SÆPE ex me requiris, Juste Fabi, cur, cum priora 1  
secula tot eminentium oratorum ingeniiis gloriaque flo-  
ruerint, nostra potissimum ætas deserta et laude eloqnen-  
tiæ orbata vix nomen ipsum oratoris retineat. Neque  
enim ita appellamus nisi antiquos: horum autem tem-  
porum diserti eausidici et advoeati et patroni et quidvis  
potius quam oratores voeantur. Cui pereunctorationi 2  
tuæ respondere et tam magnæ quæstionis pondus exci-  
pere, ut aut de ingeniis nostris male existimandum *sit*,  
si idem assequi nou possumus, aut de judiciis, si nolu-  
mus, vix hereule auderem, si mihi mea sententia profe-  
renda ac non disertissimorum, ut nostris temporibus,  
hominum sermo repetendus esset, quos eandem hanc  
quæstionem pertractantes juveuis admodum audivi. Ita 3  
nou ingenio, sed memoria et recordatione opus est, ut  
quæ a præstantissimis viris et exegitata subtiliter et  
dicta graviter accepi, eum singuli diversas † vel easdem  
sed probabiles eausas afferrent, dum fornam sui quisque  
et animi et ingenii redderent, iisdem nunc numeris  
iisdemque rationibus persequar, servato ordine disputa-  
tionis. Neque enim defuit qui diversam quoque partem 4  
susciperet, ac multum vexata et irrisa vetustate nostro-

rum temporum eloquentiam antiquorum ingenii anteferret.

2 Nam postero die quam Curiatius Maternus Catonem recitaverat, cum offendisse potentium animos diceretur, tanquam in eo tragœdiæ argumento sui oblitus tantum Catonem cogitâisset, eaque de re per urbem frequens sermo haberetur, venerunt ad eum M. Aper et Julius Secundus, celeberrima tum ingenia fori nostri, quos ego in judiciis non utrosque modo studiose audiebam, sed domi quoque et in publico assectabar mira studiorum cupiditate et quodam ardore juvenili, ut fabulas quoque eorum et disputationes et arcana semotæ dictionis penitus exciperem, quamvis maligne plerique opinarentur nec Secundo promptum esse sermonem, et Aprum ingenio potius et vi naturæ quam iustificatione et literis famam eloquentiæ consecutum. Nam et Secundo purus et pressus et, in quantum satis erat, profluens sermo non defuit, et Aper omni eruditione imbutus contemnebat potius literas quam nesciebat, tanquam majorem industriæ et laboris gloriam habiturus, si ingenium ejus nullis alienarum artium adminiculis inniti videretur.

3 Igitur ut intravimus cubiculum Materni, sedentem, ipsum quem pridie recitaverat librum intra manus habentem deprehendimus.

2 Tum Secundus, “Nihilne te,” inquit, “Materne, fabulæ malignorum terrent, quo minus offensas Catonis tui ames? An ideo librum istum apprehendisti, ut diligenter retractares, et sublati si qua pravæ interpretationi materiam dederunt, emitteres Catonem non quidem meliorem sed tamen securiorem?”

3 Tum ille, “Leges, quid Maternus sibi debuerit, et agnosces quæ audisti. Quodsi qua omisit Cato, se-

quænti recitatione Thyestes dicet. Hanc enim tragœdiam disposui jam et intra me ipse formavi. Atque ideo maturare libri hujus editionem festino, ut, dimissa priore cura, novæ cogitationi toto pectore incumbam.”

“Adeo te tragœdiæ istæ non satiant,” inquit Aper,<sup>4</sup> “quo minus, omissis orationum et causarum studiis, omne tempus modo circa Medeam, ecce nunc circa Thyestem consumas, cum te tot amicorum causæ, tot coloniarum et municipiorum clientelæ in forum vocent, quibus vix sufficeris, ctiansi non novum tibi ipse negotium importâsses, Donitium et Catonem, id est, nostras quoque historias et Romana nomina, Graecorum fabulis aggregarc.”

Et Maternus, “Perturbarer hac tua severitate, nisi<sup>4</sup> frequens et assidua nobis contentio jam prope in consuetudinem vertisset. Nam nec tu agitare et insequi poëtas intermittis, et ego, cui desidiam advocationum objici, quotidianum hoc patrocinium defendendæ aduersus te poëticæ exerceo. Quo lætor magis oblatum<sup>2</sup> nobis judicem, qui me vel in futurum vetet versus facere, vel, quod jam pridem opto, sua quoque auctoritate compellat, ut omissis forensium causarum angustiis, in quibus mihi satis superque sudatum est, sanctiorem illam et augustiorem eloquentiam colam.”

“Ego vero,” inquit Secundus, “antequam me judi-<sup>5</sup> cem Aper recuset, faciam quod probi et modesti judices solent, ut in iis cognitionibus excusent, in quibus manifestum est alteram apud eos partem gratia prævalere. Quis enim nescit, neminem mihi conjunctiorem esse et usu amicitiae et assiduitate contuberuii quam Salciū Bassum, cum optimum virum, tum absolutissimum poëtan? Porro si poëtica accusatur, non alium video reuni locupletiorem.”

2 "Securus sit," inquit Aper, "et Saleius Bassus et quisquis alius studium poëticæ et carminum gloriam fovet, cum causas agere non possit. Ego enim, quatenus arbitrum litis hujus inveni, non patiar Maternum societate plurimum defendi: sed ipsum solum apud vos arguam, quod natus ad eloquentiam virilem et oratoriam, qua parere simul et tueri amicitias, adsciscere necessitudines, complecti provincias possit, amittit studium, quo non aliud in civitate nostra vel ad utilitatem fructuosius, vel ad dignitatem amplius, vel ad urbis famam pulchrius, vel ad totius imperii atque omnium gentium notitiam illustrius  
 3 excogitari potest. Nam si ad utilitatem vitæ omnia consilia factaque nostra dirigenda sunt, quid est tutius quam eam exercere artem qua semper armatus præsidium amicis, opem alienis, salutem periclitautibus, invidis vero et inimicis metum et terrorem ultro ferat, ipse securns et quadam velut perpetua potentia ac po-  
 4 testate munitus? Cujus vis et utilitas rebus prospere fluentibus aliorum perfugio et tutela intelligitur: sin proprium periculum increpuit, non hercule lorica et gladius in acie firmius munimentum quam reo et periclitanti eloquentia præsidium simul ac telum, quo propugnare pariter et incessere vel in judicio, sive in  
 5 senatu, sive apud principem possis. Quid aliud infestis patribus nuper Eprius Marcellus quam eloquentiam suam opposuit? Qua accinctus et minax disertam quidein sed inexercitatam et ejusmodi certaminum rudem Helvidii sapientiam elusit. Plura de utilitate non dico, cui parti niuime contradicturum Maternum meum arbitrор.

6 "Ad voluptatem oratoriæ eloquentiæ transeo, cujus jucunditas non uno aliquo momento sed omnibus prope diebus ac prope omnibus horis contingit. Quid enim

dulcior libero et ingenuo animo et ad voluptates honestas nato, quam videre plenam semper et frequentem domum suam concursu splendidissimorum hominum? Idque scire non pecuniae, non orbitati, non officii alicuius administrationi, sed sibi ipsi dari? Illos quin immo orbos et locupletes et potentes venire plerumque ad juvenem et pauperem, ut aut sua aut amicorum discrimina commendent. Ullaue tanta ingentium opum ac magnae potentiae voluptas, quam spectare homines veteres et senes et totius orbis gratia subnixos, in summa rerum omnium abundantia confitentes, id quod optimum sit, se non habere? Jam vero qui togatorum comitatus et egressus! quae in publico species! quae in judiciis veneratio! quod gaudium consurgendi assistendique inter tacentes et in unum conversos! coire populum, et circumfundi coronam, et accipere affectum quemcunque orator induerit! Vulgata dicentium gaudia et impetratorum quoque oculis exposita percenseo: illa secretiora et tantum ipsis orantibus nota majora sunt. Sive accuratam meditatamque profert orationem, est quoddam sicut ipsius dictionis, ita gaudii pondus et constantia; sive novam et recentem curam non sine aliqua trepidatione animi attulerit, ipsa solicitude commendat eventum et lenocinatur voluptati. Sed extemporalis audacie atque ipsius temeritatis vel praecipua jucunditas est. Nam in ingenio quoque, sicut in agro, quanquam alia diu serantur atque elaborentur, graviora tamen quae sua sponte nascuntur.

“ Evidem, ut de me ipso fatear, non eum diem laetorem egi, quo mihi latus clavus obesus est, vel quo homo novus et in civitate minime favorabili natus quæsturam aut tribunatum aut præturam accepi, quam eos quibus mihi, pro mediocritate hujus quantulæcumque in dicendo

facultatis, aut reum prospere defendere, aut apud centumviros causam aliquam feliciter orare, aut apud principem ipsos illos libertos et procuratores principum  
 2 tueri et defendere datur. Tum mihi supra tribunatus et præturas et consulatus ascendere videor, tum habere quod, si non in † alio oritur, nec codicillis datur, nec  
 3 cum gratia venit. Quid, fama et laus cuius artis cum oratorum gloria comparanda est, † qui non illustres et in urbe non solum apud negotiosos et rebus intentos, sed etiam apud vacuos et adolescentes, quibus modo et  
 4 recta indoles est et bona spes sui? Quorum nomina prius parentes liberis suis ingerunt? Quos saepius vulgus quoque imperitum et tunicatus hic populus trans-euntes nomine vocat et digito demonstrat? Advenæ quoque et peregrini jam in municipiis et coloniis suis auditos, cum primum urbem attigerunt, requirunt ac velut agnoscere concupiscunt.

8 “Ausim contendere, Marcellum hunc Eprium, de quo modo locutus sum, et Crispum Vibium (libentius enim novis et recentibus quam remotis et obliteratis exemplis utor,) non minus esse in extremis partibus terrarum  
 2 quam Capuae aut Vercellis, ubi nati dicuntur. Nec hoc illis alterius ter millies sestertium præstat, quamquam ad has ipsas opes possunt videri eloquentiae beneficio venisse, sed ipsa eloquentia; cuius numen et cælestis vis multa quidem omnibus seculis exempla edidit, ad quam usque fortunam homines ingenii viribus per venerint; sed hæc, ut supra dixi, proxima et quæ non auditu cognoscenda, sed oculis spectanda haberemus.  
 3 Nam quo sordidius et abjectius nati sunt, quoque notabilior paupertas et angustiæ rerum nascentes eos circumsteterunt, eo clariora et ad demonstrandam oratione eloquentiae utilitatem illustriora exempla sunt,

quod sine commendatione natalium, sine substantia facultatum, neuter moribus egregius, alter habitu quoque corporis contemptus, per multos jam annos potentissimi sunt civitatis ac, donec libuit, principes fori, nunc principes in Cæsaris amicitia agunt feruntque cuncta, atque ab ipso principe cum quadam reverentia diliguntur, quia Vespasianus, venerabilis senex et patientissimus veri, bene intelligit, ceteros quidem amicos suos iis niti quæ ab ipso acceperint, quæque ipsi accumulare et in alios congerere promptum est, Marcellum autem et Crispum attulisse ad amicitiam suam quod non a principe acceperint, nec accipi possit. Minimum inter 4 tot ac tanta locum obtinent imagines ac tituli et statuæ, quæ neque ipsa tamen negliguntur, tam hercule quain divitiæ et opes, quas facilius invenies qui vituperet, quam qui fastidiat. His igitur et honoribus et ornamentis et facultatibus refertas domos eorum videmus qui se ab ineunte adolescentia causis forensibus et oratorio studio dederunt.

“ Nam carmina et versus, quibus totam vitam Mater- 9 nus insumere optat, (inde enim omnis fluxit oratio,) neque dignitatem ullam auctoribus suis conciliant neque utilitates alunt ; voluptatem autem brevem, laudem inauem et infructuosam consequuntur. Licet hæc ipsa, et quæ 2 deinceps dicturus sum, aures tuæ, Materne, respuant, cui bono est, si apud te Agamemnon aut Jason diserte loquitur ? Quis ideo domum defensus et tibi obligatus redit ? Quis Saleium nostrum, egregium poëtam vel, si hoc honorificentius est, præclarissimum vatem, deducit aut salutat aut prosequitur ? Nempe si amicus, si pro- 3 pinquus, si denique ipse in aliquod negotium inciderit, ad hunc Secundum recurret, aut ad te, Materne, non quia poëta es, neque ut pro eo versus facias : hi euim

Basso domi nascuntur, pulchri quidem et jucundi, quorum tamen hic exitus est ut, cum toto anno, per omnes dics, magna noctium parte unum librum excudit et elucubravit, rogare ulti et ambire cogatur, ut sint qui dignentur audire, et ne id quidem gratis: nam et dominum mutuatur, et auditorium exstruit, et subsellia con-  
4 ducit, et libellos dispergit. Et ut beatissimus recitationem ejus eventus prosequatur, omnis illa laus, intra unum aut alterum diem, velut in herba vel flore præcepta, ad nullam certam et solidam pervenit frugem; nec aut amicitiam inde refert aut clientelam aut manus-  
5 rum in animo cujusquam beneficium, sed clamorem vagum et voces inanes et gaudium volucre. Landavimus nuper, ut miram et eximiam, Vespasiani liberalitatem, quod quingenta sestertia Bassō donasset. Pulchrum id quidem, indulgentiam principis ingenio mereri:  
quanto tamen pulchrius, si ita res familiaris exigat, se ipsum colere, suum genium propitiare, suam experiri  
6 liberalitatem! Adjice quod poëtis, si modo dignum aliquid elaborare et efficere velint, relinquenda conversatio amicorum et jucunditas urbis, deserenda cætera officia et, ut ipsi dicunt, 'in nemora et lucos,' id est, in solitudinem, recedendum est.

10 "Ne opinio quidem et fama, cui soli serviunt et quod unum esse pretium laboris sui fatentur, æque poëtas quam oratores insequitur, quoniam mediocres poëtas  
2 nemo novit, bonos pauci. Quando enim rarissimarum recitationum fama in totam urbem penetrat? nedum ut per tot provincias innotescat. Quotus quisque, cum ex Hispania vel Asia, ne quid de Gallis nostris loquar, in urbem venit, Saleium Bassum requirit? Atque adeo si quis requirit, ut semel vidit, transit et contentus est,  
3 ut si picturam aliquam vel statuam vidisset. Neque

hunc meum sermonem sic accipi velo, tanquam eos  
quibus natura sua oratorium ingenium denegavit deter-  
reami a carminibus, si modo in hac studiorum parte  
oblectare otium et nomen inserere possunt famæ. Ego 4  
vero omnem eloquentiam omnesque ejus partes sacras  
et venerabiles puto, nec solum cothuruum vestrum aut  
heroici carminis sonum, sed lyricorum quoque jucundi-  
tatem, et elegorum lascivias, et iamborum amaritudinem,  
*et* epigrammatum lusus, et quameunque aliam speciem  
eloquentia habeat, anteponeudam cæteris aliarum artium  
studiis credo. Sed tecum mihi, Materne, res est, quod, 5  
cum natura tua in ipsam arcem eloquentiæ ferat, errare  
mavis, et summa adepturus in levioribus subsistis. Ut  
si in Graecia natus essem, ubi ludieras quoque artes  
exercere honestum est, ac tibi Nicostrati robur ac vires  
dī dedissent, non paterer immanes illos et ad pugnam  
natos lacertos levitate jaculi aut jactu disci vanescere,  
sic nunc te ab auditoriis et theatris in forum et ad  
causas et ad vera prælia voco, cum præsertim ne ad  
illud quidem confugere possis quod plerisque patro-  
cinatur, tanquam minus obnoxium sit offendere poëta-  
rum quam oratorum studium. Effervescit enim vis 6  
pulcherrimæ naturæ tuæ; nec pro amico aliquo, sed,  
quod periculosius est, pro Catone offendis. Nec ex-  
cusatur offensa necessitudine officii aut fide advoca-  
tionis aut fortuitæ ac subitæ dictionis impetu: medita-  
tus videris † aut elegisse personam notabilem et cum  
auctoritate dicturam. Sentio quid responderi possit: 7  
hinc ingentis † ex his assensus, hæc in ipsis auditoriis  
præcipue laudari et mox omnium sermonibus ferri.  
Tolle igitur quietis et securitatis excusationem, cum tibi  
sumas adversarium superiorem. Nobis satis sit privatas 8  
et nostri seculi controversias tucri, in quibus expressis

si quando necesse sit pro periclitante amico potentiorum aures offendere, et probata sit fides et libertas excusata."

11 Quæ cum dixisset Aper acrius, ut solebat, et intento ore, remissus et subridens Maternus, "Parantem," inquit, "me non minus diu accusare oratores quam Aper laudaverat (fore enim arbitrabar ut a laudatione eorum digressus detrectaret poëtas atque carminum studium prosterneret,) arte quadam mitigavit, concedendo iis qui 2 causas agere non possent, ut versus facerent. Ego autem sicut in causis agendis efficere aliquid et eniti fortasse possum, ita recitatione tragœdiarum et ingredi famam auspicatus sum, cum quidem in † Neronem improbam et studiorum quoque sacra profanantem Vatinii potentiam fregi: et hodie si quid in nobis notitiae ac nominis est, magis arbitror carminum quam orationum 3 gloria partum. Ac jam me dejungere a forensi labore constitui, nec comitatus istos et egressus aut frequentiam salutationum concupisco, non magis quam æra et imagines, quæ etiam me nolente in domum meam ir- 4 rumpunt. Nam statum hucusque ac securitatem melius innocentia tueor quam eloquentia; nec vereor ne mihi unquam verba in senatu nisi pro alterius discrimine facienda sint.

12 "Nemora vero et luci et secretum ipsum, quod Aper increpabat, tantam mihi afferunt voluptatem, ut inter præcipuos carminum fructus numerem, quod nec in strepitu, nec sedente ante ostium litigatore, nec inter sordes ac lacrimas reorum componuntur, sed secedit animus in loca pura atque innocentia, fruiturque sedibus 2 sacris. Hæc eloquentiæ primordia, hæc penetralia; hoc primum habitu cultuque commoda mortalibus in illa casta et nullis contacta vitiis pectora influxit; sic oracula loquebantur. Nam lucrosæ hujus et sanguinantis

eloquentiæ usus recens et ex malis moribus natus, atque, ut tu dicebas, Aper, in locum teli repertus. Cæterum felix illud et, ut more nostro loquar, aurenim 3 seculum et oratorum et criminum inops, poëtis et vatibus abundabat, qui bene facta canerent, non qui male admissa defendereut. Nec ullis aut gloria major aut augustior 4 honor, primum apud deos, quorum proferre responsa et interesse epulis ferebantur, deinde apud illos dīs genitos sacrosque reges, inter quos neminem causidicorum, sed Orpheo ac Linū ac, si introspicere altius velis, ipsum Apollinem accepimus. Vel si hæc fabulosa 5 nimis et composita videntur, illud certe mihi coucedis, Aper, non minorem honorem Homero quam Demostheni apud posteros, nec angustioribus terminis famam Euphoridis aut Sophoclis quam Lysiæ aut Hyperidis includi. Plures hodie reperies, qui Ciceronis gloriā quam qui Virgilii detrectent; nec ullus Asinii aut Messalæ libertam illustris est, quam Medea Ovidii aut Varii Thyestes.

“Ac ne fortunam quidem vatum et illud felix con- 13 tuberium comparare timuerim cum inquieta et anxia oratorum vita. Licet illos certamina et pericula sua ad consulatus evexerint, malo securum et quietum Virgilii secessum, in quo tamen neque apud divum Augustum gratia caruit, neque apud populum Romanum notitia. Testes Augusti epistolæ, testis ipse populus, qui, au- 2 ditis in theatro Virgilii versibus, surrexit universus et forte præsentem spectantemque Virgilium veneratus est sic quasi Augustum. Ne nostris quidem temporibus 3 Secundus Pomponius Afro Domitio vel dignitate vitæ vel perpetuitate famæ cesserit. Nam Crispus iste et Marcellus, ad quorum exempla me vocas, quid habent in hac sua fortuna concupiscendum? Quod timent, an 4 quod timentur? Quod, cum quotidie aliquid rogentur

ii, quibus præstant, indignantur? Quod alligati adulatione nec imperantibus unquam satis servi videntur, nec nobis satis liberi? Quæ hæc summa eorum potentia est? Tantum posse liberti solent. Me vero *dulces*, ut Virgilius ait, *Musæ*, remotum a solicitudinibus et curis et necessitate quotidie aliquid contra animum faciendi, in illa sacra illosque fontes ferant; nec insanum ultra et lubricum forum famamque pallentem trepidus experiar.

6 Non me fremitus salutantium nec anhelans libertus excitet; nec incertus futuri testamentum pro pignore scribam; nec plus habeam quam quod possim, cui velim, relinquere, quandoque † enim fatalis et meus dies veniet; statuarque tumulo non mæstus et atrox, sed hilaris et coronatus; et pro memoria mei nec consulat quisquam, nec roget."

14 Vixdum finierat Maternus, concitatus et velut instinctus, cum Vipstanus Messala cubiculum ejus ingressus est, suspicatusque ex ipsa intentione singulorum, altiorem inter eos esse sermonem, "Num parum tempestivus," inquit, "interveni secretum consilium et causæ alicujus meditationem tractantibus?"

2 "Minime, minime," inquit Secundus; "atque adeo vellem maturius intervenisses; delectâsset enim te et Apri nostri accuratissimus sermo, cum Maternum ut omne ingenium ac studium suum ad causas agendas converteret exhortatus est, et Matri pro carminibus suis læta, utque poëtas defendi decebat, audentior et poëtarum quam oratorum similior oratio."

3 "Me vero," inquit, "et sermo ipse infinita voluptate affecisset, atque id ipsum delectat, quod vos, viri optimi et temporum nostrorum oratores, non forensibus tautum negotiis et declamatorio studio ingenia vestra exerceatis, sed ejusmodi etiam disputationes assumitis,

quæ et ingenium alunt et eruditionis ac literarum jucundissimum oblectamentum cum vobis, qui illa disputationis, afferunt, tum etiam iis ad quorum aures pervenerint. Itaque hercule non minus probari video in te, 4 Secunde, quod Julii Asiatici vitam componendo spem hominibus fecisti plurium ejusmodi librorum, quam in Apro, quod nondum ab scholasticis controversiis recessit, et otium summum mavult novorum rhetorum more quam veterum oratorum consumere.”

Tum Aper, “ Non desinis, Messala, vetera tantum et 15 antiqua mirari, nostrorum autem temporum studia irridere atque contemnere? Nam hunc tuum sermonem saepe excepisti, eum, oblitus et tuæ et fratri tui eloquentiæ, neminem hoc tempore oratorem esse contenderes; atque id eo, credo, audacius, quod malignitatis opinionem non verebaris, cum eam gloriam, quam tibi alii concedunt, ipse tibi denegares.”

“ Neque illius,” inquit, “ sermonis mei pænitentiam 2 ago, neque aut Secundum aut Maternum aut te ipsum, Aper, quanquam interdum in contrarium disputes, aliter sentire credo. Ac velim impetratum ab aliquo vestrum, ut causas hujus infinitæ differentiæ scrutetur ac reddat, quas mecum ipse plerumque conquiro. Et quod qui- 3 busdam solatio est, mihi anget quæstionem, quia video etiam Graiis accidisse, ut longius absit Æschine et Demosthene sacerdos iste Nicetes, et si quis alias Ephesum vel Mytilenas concentu scholasticorum et clamoribus quatit, quam Afer aut Africanus aut vos ipsi a Cicerone aut Asinio recessistis.”

“ Magnam,” inquit Secundus, “ et dignam tractatu 16 quæstionem movisti. Sed quis eam justius explicabit quam tu, ad cuius summam eruditionem et præstantissimum ingenium cura quoque et meditatio accessit?”

Et Messala, "Aperiam," inquit, "cogitationes meas, si illud a vobis ante impetravero, ut vos quoque sermonem hunc nostrum adjuvetis."

- 2 "Pro duobus," inquit Maternus, "promitto. Nam et ego et Secundus exsequemur eas partes, quas intellexerimus te non tam omisisse, quam nobis reliquisse. Aprum enim solere dissentire et tu paulo ante dixisti, et ipse satis manifestus est jamdudum in contrarium accingi, nec æquo animo perferre hanc nostram pro antiquorum laude concordiam."
- 3 "Non enim," inquit Aper, "inauditum et indefensum seculum nostrum patiar hac vestra conspiratione damnari. Sed hoc primum interrogabo, quos vocetis antiquos, quam oratorum ætatem significatione ista determinetis.
- 4 Ego enim cum audio antiquos, quosdam veteres et olim natos intelligo; ac mihi versantur ante oculos Ulixes ac Nestor, quorum ætas mille fere et trecentis annis seculum nostrum antecedit: vos autem Demosthenem et Hyperidem profertis, quos satis constat Philippi et Alexandri temporibus floruisse, ita tamen ut utrique
- 5 superstites essent. Ex quo apparet, non multo plures quam quadringentos annos interesse inter nostram et Demosthenis ætatem. Quod spatium temporis, si ad infirmitatem corporum nostrorum referas, fortasse longum videatur; ad naturam seculorum ac respectum immensi
- 6 hujus ævi perquam breve et in proximo est. Nam si, ut Cicero in Hortensio scribit, is est magnus et verus annus, quo eadem positio caeli siderumque, quæ cum maxime est, rursum exsistet, isque annus horum, quos nos vocamus, annorum duodecim millia nongentos quinquaginta quatuor complectitur, incipit Demosthenes vester, quem vos veterem et antiquum fingitis, non solum eodem anno quo nos, sed fere codem mense exstitisse.

“ Sed transeo ad Latinos oratores, in quibus non Me-17  
 nenum, ut puto, Agrippam, qui potest videri antiquus,  
 nostrorum temporum desertis anteponere soletis, sed  
 Ciceronem et Cæsarem et Cælum et Calvum et Brutum  
 et Asinium et Messalam. Quos quid antiquis tem-  
 poribus potius ascribatis quam nostris, non video. Nam 2  
 ut de Cicerone ipso loquar, Hirtio nempe et Pansa  
 consulibus, ut Tiro libertus ejus scripsit, septimo Idus  
*Decembr.* occisus est, quo anno divus Augustus in locum  
 Pansæ et Hirtii se et Q. Pedium consules suffecit.  
 Statue sex et quinquaginta annos, quibus mox divus  
 Augustus rem publicam rexit; adjice Tiberii tres et  
 viginti, et prope quadriennium Caii, ac bis quaternos  
 denos Claudii et Neronis annos, atque illum Galbae et  
 Othonis et Vitellii longum et unum annum, ac sextam  
 jam felicis hujus principatus stationem, qua Vespasianus  
 rem publicam fovet: centum et viginti anni ab interitu  
 Ciceronis in hunc diem colliguntur, unius hominis ætas.  
 Nam ipse ego in Britannia vidi senem, qui se fateretur 3  
 et pugnæ interfuisse qua Cæsarem, inferentem arma  
 Britanniae, arcere litoribus et pellere aggressi sunt. Ita  
 si eum, qui armatus C. Cæsari restitit, vel captivitas vel  
 voluntas vel fatum aliquod in urbem pertraxisset, idem  
 Cæsarem ipsum et Ciceronem audire potuit et nostris  
 quoque actionibus interesse. Proximo quidem congiario 4  
 ipsi vidistis plerosque senes, qui se a divo quoque Au-  
 gusto semel atque iterum accepisse congiarium nar-  
 rabant. Ex quo colligi potest et Corvinum ab illis et  
 Asinium audiri potuisse: nam Corvinus in medium  
 usque Augusti principatum, Asinius pâne ad extremum  
 duravit. Ne dividatis seculum, et antiquos ac veteres 5  
 vocitatis oratores, quos eorundem hominum aures ag-  
 noscere ac velut conjungere et copulare potuerunt.

.8 "Hæc ideo prædixi, ut si, qua ex horum oratorum fama gloriaque laus temporibus acquiritur, eandem docerem in medio sitam et propiorem nobis quam Servio Galbae aut Caio Carboni quosque alios merito antiquos vocaverimus. Sunt enim horridi et impoliti et rudes et informes, et quos utinam nulla parte imitatus esset  
 2 Calvus vester aut Cælius aut ipse Cicero. Agere enim fortius jam et audentius volo, si illud ante prædixero, mutari eum temporibus formas quoque et genera di-  
 eendi. Sic Catoni seni comparatus C. Graechus plenior et uberior; sic Graccho politior et oruatiior Crassus; sic utroque distinctior et urbanior et altior Cicero, Cicerone mitior Corvinus et dulcior et in verbis magis  
 3 elaboratus. Nec quæro, quis discretissimus: hoc interim probâsse contentus sum, non esse unum eloquentiæ vultum, sed in illis quoque quos vocatis antiquos plures species deprehendi; nec statim deterius esse, quod di-  
 versum est; vitio autem malignitatis humanæ vetera  
 4 semper in laude, præsentia in fastidio esse. Num dubitamus inventos, qui præ Catone Appium Cæcum magis mirarentur? Satis constat ne Ciceroni quidem obtrec-  
 tatores defuisse, quibus inflatus et tumens nec satis pressus, sed supra modum exsultans et superfluens et  
 5 parum Atticus videretur. Legistis utique et Calvi et Bruti ad Ciceronem missas epistolas, ex quibus facile est deprehendere, Calvum quidem Ciceroni visum ex-  
 sanguem et attritum, Brutum autem otiosum atque dijunctum; rursusque Ciceronem a Calvo quidem male audisse tanquam solutum et enervem, a Bruto autem,  
 ut ipsius verbis utar, tamquam *fructum atque elum 6 bem.* Si me interroges, omnes mihi videantur verum dixisse. Sed mox ad singulos veniam: nunc mihi cum universis negotium est.

“ Nam quatenus antiquorum admiratores hunc velut 19 terminum antiquitatis constituere soleut, quem usque ad Cassium Severum faciunt, quem primum affirmant flexisse ab illa vetere atque dicendi directa via, non infirmitate ingeuii nec inscitia literarum transtulisse se ad illud dicendi genus contendo, sed judicio et intellectu. Vedit namque, ut paulo ante dicebam, cum con- 2 ditione temporum et diversitate aurium formam quoque et speciem orationis esse mutandam. Facile perferebat prior ille populus, ut imperitus et rudis, impeditissimorum orationum spatia, atque id ipsum laudi dabatur, si dicendo quis diem eximeret. Jam vero longa prin- 3 cipiorum præparatio et narrationis alte repetita series et multarum divisionum ostentatio et mille arguuentiorum gradus, et quidquid aliud aridissimis Hermagoræ et Apollodori libris præcipitur, in honore erat; quodsi quis odoratus philosophiam videretur et ex ea locum aliquem orationi suæ insereret, in cœlum laudibus ferebatur. Nec mirum: erant enim hæc nova et ineogra- 4 nita, et ipsorum quoque oratorum paucissimi præcepta rhetorum aut philosophorum placita cognoverant. At 5 hereule pervulgatis jam omnibus, cum vix in cortina quisquam assistat, quin elementis studiorum, etsi non instructus, at certe imbutus sit, novis et exquisitis eloquentiæ itineribus opus est, per quæ orator fastidium aurium effugiat, utique apud eos judices qui vi et potestate, non jure et legibus cognoscunt, et nec accipiunt tempora, sed constituunt, nec exspectandum habeut oratorem, dum illi libeat de ipso negotio dicere, sed sæpe ultro admoneant, atque alio transgredientem revo- cant et festinare se testantur.

“ Quis nuuc feret oratorem de infirmitate valetudinibus 20 suæ præfantem? Qualia sunt ferc principia Corvini.

Quis quinque in Verrem libros exspectabit? Quis de exceptione et formula perpetietur illa immensa volumina, quæ pro M. Tullio et Aulo Cæcina legimus?

2 Præcurrit hoc tempore judex dicentem, et, nisi aut cursu argumentorum aut colore sententiarum aut nitore et cultu descriptionum invitatus et corruptus est,

3 aversatur dicentem. Vulgus quoque assistentium, et affluens et vagus auditor, assuevit jam exigere lætitiam et pulchritudinem orationis; nec magis perfert in judiciis tristem et impexam antiquitatem, quam si quis in scena Roscii aut Turpionis Ambivii exprimere gestus

4 velit. Jam vero juvenes et in ipsa studiorum incude positi, qui profectus sui causa oratores sectantur, non solum audire, sed etiam referre domum aliquid illustre et dignum memoria volunt; traduntque invicem ac sæpe in colonias et provincias suas scribunt, sive sensus aliquis arguta et brevi sententia effulgit, sive locus ex-

5 quisito et poëtico cultu enituit. Exigitur enini jam ab oratore etiam poëticus decor, non Accii aut Pacuvii veterno inquinatus, sed ex Horatii et Virgilii et Lucani

6 sacrario\* prolatus. Horum igitur auribus et judiciis obtemperans nostrorum oratorum ætas pulchrior et ornatior exstitit. Neque ideo minus efficaces sunt orationes nostræ, quia ad aures judicantium cum voluptate perveniunt. Quid enim, si infirmiora horum temporum tempora credas, quia non rudi cæmento et informibus tegulis exstruuntur, sed marmore nitent et auro radiantur?

21 “Evidem fatebor vobis simpliciter, me in quibusdam antiquorum vix risum, in quibusdam autem vix somnum tenere. Nec unum de populo † Canuti: aut Atti de Furnio et Toranio quique alias in eodem valetudinario hæc ossa et hanc maciem probant. Ipse mihi Calvus, cum unum et viginti, ut puto, libros reliquerit,

vix in una et altera oratiuncula satisfacit. Nec dis- 2  
sentire cæteros ab hoc meo judicio video: quotus enim  
quisque Calvi in Asitium aut in Drusum legit? At  
hercule in hominum studiosorum manibus versantur  
accusationes quæ in Vatinium inscribuntur, ac præ-  
cipue secunda ex iis oratio. Est enim verbis ornata 3  
et sententiis, auribus judicum accommodata, ut scias  
ipsum quoque Calvum intellexisse quid melius esset,  
nec voluntatem ei, quo sublimius et cultius diceret,  
sed ingenium ac vires defuisse. Quid ex Cælianis 4  
orationibus? Nempe eæ placent, sive universæ, sive  
partes carum, in quibus nitorem et altitudinem horum  
temporum agnoscimus. Sordes verborum, et hians com-  
positio, et inconditi sensus redolent antiquitatem; nec  
quemquam adeo antiquarium puto, ut Cælium ex ea  
parte laudet qua antiquus est. Concedamus sane C. 5  
Cæsari, ut propter magnitudinem cogitationum et oc-  
cupationes rerum minus in eloquentia effecerit quam  
divinum ejus ingenium postulabat; tam hercle, quam  
Brutum philosophiæ suæ relinquantius: nam in ora-  
tionibus minorem esse fama sua etiam admiratores  
ejus fatentur. Nisi forte quisquam aut Cæsaris pro 6  
Decio Samnite aut Bruti pro Deiotaro rege cæteros-  
que ejusdem lentitudinis ac teporis libros legit, + nisi  
qui et carmina eorundem miratur. Fecerunt enim  
et carmina et in bibliothecas retulerunt, non melius  
quam Cicero, sed felicius, quia illos fecisse pauciores 7  
sciunt. Asinius quoque, quanquam propioribus tempo-  
ribus natus sit, videtur mihi inter Menenios et Ap-  
pios studuisse. Pacuvium certe et Accium non so-  
lum tragœdiis sed etiam orationibus suis expressit: 8  
adeo durus et siccus est. Oratio autem, sicut corpus  
hominis, ea demum pulchra est, in qua non eminent

venæ, nec ossa numerantur, sed temperatus ac bonus sanguis implet membra et exsurgit toris, ipsosque 9 nervos rubore tegit et decore commendat. Nolo Corvinum insequi, quia nec per ipsum stetit, quo minus lætitiam nitoremque nostrorum temporum exprimeret: viderimus, in quantum judicio ejus vis aut animi aut ingenii suffecerit.

22 “Ad Ciceronem venio, cui eadem pugna cum æqualibus suis fuit quæ mihi vobiscum est. Illi enim antiquos mirabantur, ipse suorum temporum eloquentiam anteponebat; nec ulla re magis oratores ætatis ejusdem 2 præcurrit quam judicio. Primus enim excoluit orationem, primus et verbis delectum adhibuit et compositioni artem; locos quoque lætiores attentavit, et quasdam sententias invenit, utique in iis orationibus quas jam senior et juxta finem vitæ composuit, id est, postquam magis profecerat, usque et experimentis 3 didicerat quod optimum dicendi genus esset. Nam priores ejus orationes non carent vitiis antiquitatis: lentus est in principiis, longus in narrationibus, otiosus circa excessus; tarde commovetur, raro incalescit; pauci sensus apte et cum quodam lumine terminantur. Nihil excerpere, nihil referre possis; et velut in rudi ædificio firmus sane paries et duraturus, sed non satis expolitus 4 et splendens. Ego autem oratorem, sicut locupletem ac lautum patrem familiæ, non tantum eo volo tecto tegi quod imbrem ac ventum arceat, sed etiam quod visum et oculos delectet; non ea solum instrui supellectile quæ necessariis usibus sufficiat, sed sit in apparatu ejus et aurum et gemmæ, ut sumere in manus et aspicere sepius libeat. Quædam vero procul arceantur ut jam oblitterata et olentia; nullum sit verbum velut rubigine infectum; nulli sensus tarda et inertis structura in

morem Annalium componantur; fugitet fœdam et insulsam scurrilitatem, variet compositionem, nec omnes clausulas uno et eodem modo determininet.

“Nolo irridere ‘rotam Fortune,’ et ‘jus verrinum,’<sup>23</sup> et illud, tertio quoque sensu in omnibus orationibus pro sententia positum, ‘esse videatur.’ Nam et hæc invitus retuli, et plura omisi, quæ tamen sola mirantur atque exprimunt ii, qui se antiquos oratores vocant. Neminem nominabo, genus hominum significâsse contentus: sed vobis utique versantur ante oculos, qui Lucilium pro Horatio et Lucretium pro Virgilio legunt; quibus eloquentia Aufidii Bassi aut Servilii Noniani ex comparatione Sisennæ aut Varronis sordet; qui rhetorum nostrorum commentarios fastidiunt et oderunt, Calvi mirantur. Quos, more prisco apud iudicem fabulantes, non auditores sequuntur, non populus audit, vix denique litigator perpetitur: adeo mæsti et inculti illam ipsam, quam jactant, sanitatem non firmitate sed jejunio consequuntur. Porro ne in corpore quidem valetudinem medici probant, quæ animi anxietate contingit; parum est ægrum non esse: fortem et lætum et alacrem volo. Prope abest ab iuficitate, in quo sola sanitas laudatur. Vos vero, disertissimi, ut potestis, ut facitis, illustrate seculum nostrum pulcherrimo genere dicendi. Nam et te, Messala, video lætissima quæque antiquorum imitantem; et vos, Materne ac Secunde, ita gravitati sensuum nitorēm et cultum verborum miscetis, ea electio inventionis, is ordo rerum, ea, quoties causa poscit, ubertas, ea, quoties permittitur, brevitas, is compositionis decor, ea sententiarum planitas est, sic exprimitis affectus, sic libertatem temperatis, ut, etiamsi nostra judicia malignitas et invidia tardaverit, verum de vobis dicturi sint posteri nostri.”<sup>4</sup>

24 Quæ cum Aper dixisset, "Agnoscitisne," inquit Maternus, "vim et ardorem Apri nostri? Quo torrente, quo impetu seculum nostrum defendit! Quam copiose ac varie vexavit antiquos! Quanto non solum ingenio ac spiritu, sed etiam eruditione et arte, ab ipsis mutuatus est, per quæ mox ipsos incesseret! Tuum tamen, Messala, promissum immutasse non debet. Neque enim defensorem antiquorum exigimus, nec quemquam nostrum, quanquam modo laudati sumus, iis quos insectatus est Aper comparamus. Ac ne ipse quidem ita sentit, sed more veteri, et a vestris philosophis saepe celebrato, sumpsit sibi contradicendi partes. Igitur exprome nobis non laudationem antiquorum, (satis enim illos fama sua laudat,) sed causas cur in tantum ab eloquentia eorum recesserimus, cum præsertim centum et viginti annos ab interitu Ciceronis in hunc diem effici, ratio temporum collegerit."

25 Tum Messala, "Sequar præscriptam a te, Materne, formam. Neque enim diu contradicendum est Apro, qui primum, ut opinor, nominis controversiam movit, tanquam parum proprie antiqui vocarentur, quos satis constat ante centum annos fuisse. Mihi autem de vocabulo pugna non est; sive illos antiquos sive majores sive quo alio mavult nomine appellat, dummodo in confesso sit, eminentiorem illorum temporum eloquentiam fuisse. Ne illi quidem parti sermonis ejus repugno, + si cominus fatetur, plures formas dicendi etiam iisdem seculis, nedum diversis, exstisset. Sed quo modo inter Atticos oratores primæ Demostheni tribuuntur, proximum autem locum Æschines et Hyperides et Lysias et Lyceurgus obtinent, omnium autem concessu hæc oratorum ætas maxime probatur, sic apud nos Cicero quidem cæteros eorundem temporum disertos

antcessit, Calvus autem et Asinius et Cæsar et Cælius et Brutus suo jure et prioribus et sequentibus anteponuntur. Nee refert quod inter se speie differant, <sup>4</sup> cum genere consentiant. Adstrictior Calvus, numerosior Asinius, splendidior Cæsar, amarior Cælius, gravior Brutus, vehementior et plenior et valentior Cicero: omnes tamen eandem sanitatem eloquentiæ ferunt, ut si omnium pariter libros in manum sumpseris, scias, quamvis in diversis ingeniis, esse quandam judicii ac voluntatis similitudinem et cognationem. Nam quod invicem <sup>5</sup> se obtrectaverunt, (et sunt aliqua epistolis eorum inserta ex quibus mutua malignitas detegitur,) non est oratorum vitium, sed hominum. Nam et Calvum et Asinium et ipsum Ciceronem credo solitos et invidere et livere et eeteris humanæ infirmitatis vitiis affici: solum inter hos arbitror Brutum non malignitate nec invidia, sed simileiter et ingenue judicium animi sui detexisse. An <sup>6</sup> ille Ciceroni invideret, qui mihi videtur ne Cæsari quidem invidisse? Quod ad Ser. Galbam et C. Lælum attinet, et si quos alios antiquorum agitare non destitit, non exigit defensorem, cum fatear, quædam eloquentiæ eorum, ut nascenti adhuc, nec satis adulteræ, defuisse.

“Cæterum si, omisso optimo illo et perfectissimo generi eloquentiæ, eligenda sit forma dieendi, malim herele C. Gracchi impetum aut L. Crassi maturitatem quam calamistros Mæcenatis aut tinnitus Gallionis. Adeo melius est oratorem vel hirta toga induere, quam fucatis et meretrieiis vestibus insignire. Neque enim <sup>2</sup> oratorius iste, immo hercle ne virilis quidem cultus est, quo plerique temporum nostrorum actores ita utuntur, ut lascivia verborum et levitate sententiarum et licentia compositionis histrionales modos exprimant. Quodque <sup>3</sup> vix auditu fas esse debeat, laudis et gloriæ et ingenii

loco plerique jactant cantari saltarique commentarios  
 suos. Unde oritur illa foeda et præpostera, sed tamen  
 frequens † quibusdam exclamatio, ut oratores nostri  
 4 teucre dicere, histriones diserte saltare dicantur. Equi-  
 dem non negaverim Cassium Severum, quem solum  
 Aper noster nominare ausus est, si iis comparetur qui  
 postea fuerunt, posse oratorem vocari, quanquam in  
 magna parte librorum suorum plus vis habeat quam sau-  
 5 guinis. Primus enim, contempto ordine rerum, omissa  
 modestia ac pudore verborum, ipsis etiam quibus utitur  
 armis incompositus et studio feriendi plerumque de-  
 jectus, non pugnat sed rixatur. Cæterum, ut dixi,  
 sequentibus comparatus et varietate eruditionis et le-  
 pore urbanitatis et ipsarum virium robore multum cæ-  
 teros superat; quorum neminem Aper nominare et  
 6 velut in aciem educere sustinuit. Ego autem exspec-  
 tabam ut, incusato Asinio et Cælio et Calvo, aliud  
 nobis agmen produceret, pluresque vel certe totidem  
 nominaret, ex quibus alium Ciceroni, alium Cæsari,  
 7 singulis deinde singulos opponeremus. Nunc detrec-  
 tâsse nominatim antiquos oratores contentus neminem  
 sequentium laudare ausus est nisi in publicum et in  
 commune, veritus, eredo, ne multos offenderet, si pau-  
 8 cos excerptisset. Quotus enim quisque scholasticorum  
 non hae sua persuasione fruitur ut se ante Ciceronem  
 numeret, sed plane post Gabinianum?

27 “At ego non verebor nominare singulos, quo facilius,  
 propositis exemplis, appareat quibus gradibus fracta sit  
 et diminuta eloquentia.”

2 “Appara te,” inquit Maternus, “et potius exsolve pro-  
 missum. Neque enim hoc colligi desideramus, disser-  
 tiores esse antiquos, quod apud me quidem in confessio  
 est, sed causas exquirimus, quas te solitum tractare †

paulo ante *dixisti*, plane mitior et eloquentiae temporum nostrorum minus iratus, antequam te Aper offendere<sup>t</sup> maiores tuos lacescendo.”

“Non sum,” inquit, “offensus Apri illa disputatione; 3 nam nec vos offendi decebit, si quid forte aures vestras perstringat, cum sciatis hanc esse ejusmodi sermonum legem, judicium animi citra damnum affectus proferre.”

“Perge,” inquit Maternus: “cum de antiquis loquaris, 4 utere antiqua libertate, a qua vel magis degeneravimus quam ab eloquentia.”

Tum Messala, “Non reconditas, Materne, causas re- 28 quiris, nec aut tibi ipsi aut huic Secundo vel huic Apro ignotas, etiamsi mihi partes assiguatis proferendi in medium quæ omnes sentimus. Quis enim ignorat et 2 eloquentiam et cæteras artes descivisse ab illa vetere gloria, non inopia hominum, sed desidia juventutis et negligentia parentum et inscientia præcipientium et oblivione moris antiqui? Quæ mala, primum in urbe nata, mox per Italiam fusa, jam in provincias manant. Quanquam vestra vobis notiora sunt. Ego de urbe 3 et his propriis ac vernaculis vitiis loquar, quæ natos statim excipiunt et per singulos ætatis gradus cumulautur, si prius de severitate ac disciplina majorum circa educandos formandosque liberos pauca prædictero. Jam primum suus cuique filius, ex casta parente natus, 4 non in cella emptæ nutricis, sed gremio ac sinu matris educabatur, cuius præcipua laus erat tueri domum et inservire liberis. Eligebatur autem major aliqua natu 5 propinqua, cuius probatis spectatisque moribus omnis ejusdem familiæ suboles committeretur; coram qua neque dicere fas erat quod turpe dictu, neque facere quod dishonestum factu videretur. Ac non studia modo 6 curasque, sed remissiones etiam lususque puerorum

sanctitate quadam ac verecundia temperabat. Sic Corneliam Gracchorum, sic Aureliam Cæsaris, sic Atiam Augusti matrem præfuisse educationibus, ac produxisse 7 principes liberos accepimus. Quæ disciplina ac severitas eo pertinebat, ut sincera et integra et nullis pravitatibus detorta unius cujusque natura toto statim pectore arriperet artes honestas, et, sive ad rem militarem, sive ad juris scientiam, sive ad eloquentiæ studium inclinâasset, id solum ageret, id universum hauriret.

29 “At nunc natus infans delegatur Græculæ alicui ancillæ, cui adjungitur unus aut alter ex omnibus servis, plerumque vilissimus, nec cuiquam serio ministerio accommodatus. Horum fabulis et erroribus teneri statim et rudes animi imbuuntur; nec quisquam in tota domo pensi habet, quid coram infante domino aut dicat aut 2 faciat. Quin etiam ipsi parentes nec probitati neque modestiæ parvulos assuefaciunt, sed lasciviæ et dicitati, per quæ paulatim impudentia irrepit et sui 3 alienique contemptus. Jam vero propria et peculiaria hujus p̄rbis vitia p̄ene in utero matris concipi mihi videntur, histrionalis favor et gladiatorum equorumque studia; quibus occupatus et obsessus animus quantulum loci bonis artibus relinquit? Quotum quemque inveniris, qui domi quidquam aliud loquatur? Quos alias adolescentulorum sermones excipimus, si quando audi- 4 toria intravimus? Nec præceptores quidem ulla cerebriores cum auditoribus suis fabulas habent: colligunt enim discipulos non severitate disciplinæ nec ingenii experimento, sed ambitione salutationum et illecebris adulacionis.

30 “Transeo prima discentium elementa, in quibus et ipsis parum laboratur; nec in auctoribus cognoscendis

nec in evolvenda antiquitate nec in notitia vel rerum  
vel hominum vel temporum satis operæ insumitur. Sed 2  
expetuntur quos rhetoras voeant; quorum professio  
quando primum in hanc urbem introducta sit quamque  
nullam apud maiores nostros auctoritatem habuerit,  
statim dicturus, referam necesse est animum ad eam  
disciplinam qua usos esse eos oratores accepimus, quo-  
rum infinitus labor et quotidiana meditatio et in omni  
genere studiorum assiduae exercitationes ipsorum etiam  
eontinentur libris. Notus est vobis utique Cieeronis 3  
liber, qui ‘*Brutus*’ inscribitur; in ejus extrema parte  
(nam prior commemorationem veterum oratorum habet,)  
sua initia, suos gradus, suæ eloquentiæ velut quandam  
educationem refert: se apud Q. Mueium jus civile  
didieisse; apud Philonem Academicum, apud Diodotum  
Stoicum omnes philosophiæ partes penitus hausisse;  
neque his doctoribus contentum, quorum ei eopia in  
urbe contigerat, Aethiam quoque et Asiam peragrâsse;  
ut omnem omnium artium varietatem complectetur.  
Itaque herele in libris Cieeronis deprehendere licet, non 4  
geometriæ, non musicæ, non grammaticæ, non denique  
ullius artis ingenuæ scientiam ei defuisse. Ille dialec-  
ticæ subtilitatem, ille moralis partis utilitatem, illæ  
rerum motus causasque cognoverat. Ita est enim, 5  
optimi viri, ita. Ex multa eruditione et plurimis arti-  
bus et omnium rerum scientia exundat et exuberat illa  
admirabilis eloquentia; neque oratoris vis et facultas,  
sicut cæterarum rerum, angustis et brevibus terminis  
cluditur, sed is est orator, qui de omni quæstione pul-  
chre et ornate et ad persuadendum apte dieere pro-  
dignitate rerum, ad utilitatem temporum, eum volup-  
tate audientium possit.

“ Hoc sibi illi veteres persuaserant, ad hoc efficieundum 31

intelligebant opus esse, non ut in rhetorum scholis declamarent, nec ut fictis nec ullo modo ad veritatem accendentibus controversiis linguam modo et vocem exercent, sed ut iis artibus pectus implerent, in quibus de bonis ac malis, de honesto et turpi, de justo et <sup>2</sup> injusto disputatur. Hæc enim est oratori subjecta ad dicendum materia. Nam in judiciis fere de æquitate, in deliberationibus de honestate disserimus ita, ut plerumque hæc [ipsa] invicem misceantur, de quibus copiose et varie et ornate nemo dicere potest, nisi qui cognovit naturam humanam et vim virtutum pravitatemque vitiorum et intellectum eorum, quæ nec in virtutibus <sup>3</sup> nec vitiis numerantur. Ex his fontibus etiam illa profluunt, ut facilius iram judicis vel instiget vel leniat, qui scit quid ira, promptius ad miserationem impellat, qui scit quid sit misericordia et quibus animi motibus <sup>4</sup> concitetur. In his artibus exercitationibusque versatus orator, sive apud infestos sive apud cupidos sive apud invidentes sive apud tristes sive apud timentes dicendum habuerit, tenebit venas animorum, et prout cuiusque natura postulabit, adhibebit manum et temperabit orationem, parato omni instrumento et ad omnem usum <sup>5</sup> reposito. Sunt apud quos adstrictum et collectum et siugula statim argumenta concludens dicendi genus plus fidei mcretur: apud hos dedisse operam dialecticæ proficiet. Alios fusa et æqualis et ex communibus ducta sensibus oratio magis delectat: ad hos permovendos mutuabimur a Peripateticis aptos et in omnem <sup>6</sup> disputationem paratos jam locos. Dabunt Academici pugnacitatem, Plato altitudinem, Xenophon jucunditatem: ne Epicuri quidem et Metrodori honestas quasdam exclamaciones assumere, iisque prout res poscit <sup>7</sup> uti, alienum erit oratori. Neque enim sapientem in-

formamus neque Stoicorum † artem (*regem*), sed eum, qui quasdam artes haurire, omnes libare debet. Ideo-  
que et juris civilis scientiam veteres oratores comprehendebant, et grammaticē, musice et geometrice im-  
buebantur. Incidunt enim causæ plurimæ quidem ac 8  
pæne omnes quibus juris notitia desideratur, pleræque  
autem in quibus hæc scientia requiritur.

“ Nec quisquam respondeat, sufficere ut ad tempus 32  
simplex quiddam et uniforme doceamur. Primum enim  
aliter utimur propriis, aliter commodatis, longeque in-  
teresse manifestum est, possideat quis quæ profert, an  
mutuetur. Deinde ipsa multarum artium scientia etiam  
aliud agentes nos ornat, atque, ubi minime credas,  
eminet et excellit. Idque non doctus modo et prudeus 2  
auditor sed etiam populus intelligit ac statim ita laude  
prosequitur, ut legitime studuisse, ut per omnes elo-  
quentiæ numeros isse, ut denique oratorem esse fatea-  
tur; quem non posse aliter exsistere nec exstitisse  
unquam confirmo, nisi eum, qui, tanquam in aciem  
omnibus armis instructus, sic in forum omnibus artibus  
armatus exierit. Quod adeo negligitur ab horum tem- 3  
porum disertis, ut in actionibus eorum † vis (*virus*)  
quoque quotidiani sermonis, foeda ac pudenda vitia  
deprehendantur; ut ignorent leges, non teneant sena-  
tus consulta, jus civitatis ultro derideant, sapientiæ  
vero studium et præcepta prudentium penitus refor-  
mident, in paucissimos sensus et angustas sententias  
detrudant eloquentiam velut expulsam regno suo; ut  
quæ olim omnium artium domina pulcherrimo comitatu  
pectoris implebat, nunc circumcisæ et amputata, sine  
apparatu, sine honore, paene dixerim sine ingenuitate,  
quasi una ex sordidissimis artificiis discatur. Ergo 4  
hanc primam et præcipuam causam arbitror cur in

tantum ab eloquentia antiquorum oratorum recesserimus. Si testes desiderantur, quos potiores nominabo quam apud Græcos Demosthenem, quem studiosissimum Platonis auditorem fuisse memoriae proditum est? Et Cicero his, ut opinor, verbis refert, quicquid in eloquentia effecerit, id se non rhetorum sed Academie 5 spatiis consecutum. Sunt aliae causæ, magnæ et graves, quas a vobis aperiri æquum est, quoniam quidem ego jam meum munus explevi, et, quod mihi in consuetudine est, satis multos offendit, quos, si forte hæc audiverint, certum habeo dicturos me, dum juris et philosophiae scientiam tanquam oratori necessariam laudo, ineptiis meis plausisse."

33 Et Maternus, "Mihi quidem," inquit, "susceptum a te munus adeo peregrisse nondum videris, ut inchoâsse tantum, et velut vestigia ac lineamenta quædam ostendisse videaris. Nam quibus instrui veteres oratores soliti sint dixisti, differentiamque nostræ desidiæ et inscieutiæ adversus acerrima et fecundissima eorum studia demonstrâsti: cætera exspecto, ut, quemadmodum ex te didici quid aut illi scierint aut nos nesciamus, ita hoc quoque cognoscam, quibus exercitationibus juveues jam et forum ingressuri confirmare et alere in 3 genia sua soliti sint. Neque enim + dum (*dumtaxat*) arte et scientia sed longe magis facultate et . . . (*usu*) eloquentiam contineri nec tu, puto, abnues, et hi significare vultu videntur."

4 Deinde cum Aper quoque et Secundus idem annuisserint, Messala, quasi rursus incipiens: "Quoniam initia et semina veteris eloquentiae satis demonstrâsse videor, docendo quibus artibus antiqui oratores institui eruditique soliti sint, persequar nunc exercitationes corum. 5 Quanquam ipsis artibus inest exercitatio, nec quisquam

percipere tot reconditas aut tam varias res potest, nisi ut scientiæ meditatio, meditationi facultas, facultati vis eloquentiæ accedat. Per quæ colligitur, eandem esse rationem et percipiendi quod proferas, et proferendi quæ percepseris. Sed si cui obscuriora hæc videntur,<sup>6</sup> isque scientiam ab exercitatione separat, illud certe concedet, instructum et plenum his artibus animum longe paratiorem ad eas exercitationes venturum, quæ propriæ oratorum videntur.

“Ergo apud majores nostros juvenis ille qui foro et <sup>34</sup> eloquentiæ parabatur, imbutus jam domestica disciplina, refertus honestis studiis, deducebatur a patre vel a propinquis ad eum oratorem qui principem in civitate locum obtinebat. Hunc sectari, hunc prosequi, <sup>2</sup> hujus omnibus dictionibus interesse sive in judiciis sive in concionibus assuescebat, ita ut altercationes quoque exciperet et jurgiis interesset, utque sic dixerim, pugnare in prælio disceret. Magnus ex hoc usus multum-<sup>3</sup> que constantiæ, plurimum judicii juvenibus statim contingebat, in media luce studentibus atque inter ipsa discrimina, ubi nemo impune stulte aliquid aut contrarie dicit, quo minus et judex respuat et adversarius expobret, ipsi denique advocati aspernentur. Igitur <sup>4</sup> vera statim et incorrupta eloquentia imbuebantur; et quanquam unum sequerentur, tamen omnes ejusdem ætatis patronos in plurimis et causis et judiciis cognoscebant; habebantque ipsius populi diversissimarum aurium copiam, ex qua facile deprehenderent quid in quoque vel probaretur vel displiceret. Ita nec præ-<sup>5</sup> ceptor deerat, optimus quidem et electissimus, qui faciem eloquentiæ, non imaginem præstaret; nec adversarii et æmuli ferro, non rudibus dimicantes, sed auditorium semper plenum, semper novum, ex invidis

et faventibus, ut † nec bene *nec male* dicta dissimularentur. Scitis enim magnam illam et duraturam eloquentiae famam non minus in diversis subselliis parari quam suis; inde quin immo constantius surgere ibi 5 fidelius corroborari. Atque hercule sub ejusmodi præceptoribus juvenis ille de quo loquimur, oratorum discipulus, fori auditor, sectator judiciorum, eruditus et assuefactus alienis experimentis, cui quotidie audienti notæ leges, non novi judicum vultus, frequens in oculis consuetudo concionum, sæpe cognitæ populi aures, sive accusationem suscepcrat sive defensionem, solus statim 6 et unus cuicunque causæ par erat. Nonodecimo ætatis anno L. Crassus C. Carbouem, unoetvicesimo Cæsar Dolabellam, altero et vicesimo Asinius Pollio C. Catonem, non multum ætate antecedens Calvus Vatinium iis orationibus insecurti sunt, quas hodie quoque cum admiratione legimus. At nunc adolescentuli nostri deducuntur in sceuam scholasticorum, qui rhetores vocantur, quos paulo ante Ciceronis tempora exstitisse nec placuisse majoribus nostris ex eo manifestum est, quod Crasso et Domitio censoribus cludere, ut ait Cicero, 35 2 ludum *impudentiæ* jussi suut. Sed ut dicere institeram, deducuntur in scholas, quibus non facile dixerim, utrumne locus ipse, an condiscipuli, an genus studiorum plus mali ingenii afferant. Nam in loco nihil reverentiæ, sed in quem nemo nisi æquic imperitus 2 intrat. In condiscipulis nihil profectus, cum pueri inter pueros et adolescentuli inter adolescentulos pari securitate et dicant et audiantur. Ipsæ vero exercitationes magna ex parte contrariæ. Nempe enim duo genera materiarum apud rhetoras tractantur, suasoriæ et 4 controversiæ. Ex his suasoriæ quidem, tanquam plane leviores et minus prudentiæ exigentes, pueris delegan-

tur, controversiae robustioribus assignantur, quales, per fidem, et quam ineribiliter compositae! Sequitur autem, ut materiae abhorrenti a veritate declamatio quoque adhibetur. Sic fit ut tyrannicidarum præmia aut vi-  
tiatarum electiones aut pestilentiae remedia aut incesta matrum, aut quicquid in schola quotidie agitur, in foro vel raro vel nunquam, ingentibus verbis perse-  
quantur; cum ad veros judices ventum \*\*\* rem co-  
gitant, nihil humile vel abjectum eloqui poterat.

“ Magna eloquentia, sicut flamma, materiam alitur et 36 motibus excitatur et urendo clarescit. Eadem ratio in nostra quoque civitate antiquorum eloquentiam pro-  
vexit. Nam etsi horum quoque temporum oratores ea consecuti sunt, quæ composita et quieta et beata repub-  
lica tribui fas erat, tamen illa perturbatione ac licentia plura sibi assequi videbantur, cum, mixtis omnibus et moderatore uno carentibus, tantum quisque orator sap-  
ret, quantum erranti populo persuaderi poterat. Hinc 2 leges assidue et populare nomen, hinc conciones magis-  
tratum pene pernoctantium in Rostris, hinc accusa-  
tiones potentium reorum et assignatae etiam domibus inimicitiae, hinc procerum factiones, et assidua senatus adversus plebem certamina. Quæ singula etsi distrahe-  
bant rempublicam, exercebant tamen illorum temporum eloquentiam et magnis cumulare præmiis videbantur, quia quanto quisque plus dicendo poterat, tanto facilius honores assequebatur, tanto magis in ipsis hono-  
ribus collegas suos anteibat, tanto plus apud principes gratiae, plus auctoritatis apud patres, plus notitiae ac nominis apud plebem parabat. Hi clientelis etiam 4 exterarum nationum redundabant; hos ituri in provin-  
cias magistratus reverebantur, hos reversi colebant; hos et præturæ et consulatus vocare ultro videbantur;

hi ne privati quidem sine potestate erant, cum et populum et senatum consilio et auctoritate regerent. Quin immo sibi persuaserant, neminem sine eloquentia aut assecqui posse in civitate aut tueri conspicuum et eminentem locum. Nec mirum, cum etiam inviti ad populum producerentur; cum parum esset in senatu breviter censere, nisi qui iugentio et eloquentia sententiam suam tuerentur; cum in aliquam invidiam aut crimen vocati sua voce respondendum haberent; cum testimonia quoque in *judiciis* publicis non absentes nec per tabellam dare, sed coram et praesentes dicere cogèrentur. Ita ad summa eloquentiae præmia magna etiam necessitas accedebat; et quomodo disertum haberi pulchrum et gliosum, sic contra mutum et elinguem videri deforme habebatur.

- 37 “Ergo non minus rubore quam præmiis stimulabantur, ne clientulorum loco potius quam patronorum numerarentur; ne traditæ a majoribus necessitudines ad alios transirent; ne tanquam inertes et non suspecturi honoribus aut non impetrarent aut impetratos male tuerentur.
- 2 Nescio an venerint in manus vestras hæc vetera, quæ et in antiquiorum bibliothecis adhuc manent et cum maxime a Muciano contrahuntur, ac jam undecim, ut opinor, Actorum libris et tribus Epistolarum composita et edita sunt. Ex his intelligi potest Cn. Pompeium et M. Crassum non viribus modo et armis, sed ingenio quoque et oratione valuisse; Lentulos et Metellos et Lucullos et Curiones et cæteram procerum manum multum in his studiis operæ curæque posuisse, nec quemquam illis temporibus magnam potentiam sine 3 et aliqua eloquentia consecutum. His accedebat splendor reorum et magnitudo causarum, quæ et ipsa plurimum eloquentiae præstant. Nam multum interest utrumne
- 4

de furto aut formula et interdicto dicendum habeas, an de ambitu comitiorum, expilatis sociis et civibus trucidatis. Quæ mala sicut non accidere melius est, isque 5 optimus civitatis status habendus est, in quo nihil tale patimur, ita, cum acciderent, ingentem eloquentiae materiam subministrabant. Crescit enim cum amplitudine rerum vis ingenii, nec quisquam claram et illustrem orationem efficere potest, nisi qui causam parem invenit. Non, opinor, Demosthenem orationes illustrant quas 6 adversus tutores suos composuit; nec Ciceronem magnum oratorem P. Quintius defensus aut Licinius Archias faciunt: Catilina et Milo et Verres et Antonius hanc illi famam circumdederunt. Non quia tanti fuit 7 reipublicæ malos ferre cives, ut uberem ad dicendum materiam oratores haberent: sed, ut subinde admoneo, quæstionis meminerimus, sciamusque *nos* de ea re loqui quæ facilius turbidis et inquietis temporibus exstitit. Quis ignorat, utilius ac melius esse frui pace quam bello vexari? Plures tamen bonos præliatores bella quam pax ferunt. Similis eloquentiæ conditio. Nam 8 quo sæpius steterit tanquam in acie, quoque plures et intulerit ictus et exceperit, quoque major adversarius et acriores pugnas sibi ipsa desumpserit, tanto altior et excelsior et illis nobilitata discriminibus in ore hominum agit, quorum ea natura est, ut \* \* secura velint.

“Transeo ad formam et consuetudinem veterum judi-38 ciorum, quæ etsi nunc aptior est veritati, eloquentiam tamen illud forum magis exercebat, in quo nemo intra paucissimas horas perorare cogebatur, et liberæ comprehensiones erant, et modum dicendi sibi quisque sumebat, et numerus neque dierum neque patronorum finiebatur. Primus hæc tertio consulatu Cn. Pompeius 2 astrinxit, imposuitque veluti frenos eloquentiæ, ita

tamen ut omnia in foro, omnia legibus, omnia apud prætores gererentur; apud quos quanto majora negotia olim exerceri solita sint, quod majus argumentum est quam quod causæ centumvirales, quæ nunc primum obtinunt locum, adeo splendore aliorum judiciorum obruebantur, ut neque Ciceronis neque Cæsaris neque Bruti neque Cælii neque Calvi, non denique ullius magni oratoris liber apud centumviros dictus legatur, exceptis orationibus Asinii quæ ‘pro hæredibus Urbiniæ’ inscribuntur, ab ipso tamen Pollione mediis divi Augusti temporibus habitæ, postquam longa temporum quies et eoutinuum populi otium et assidua senatus tranquillitas et maximi principis disciplina ipsam quoque eloquentiam sicut omnia pacaverat.

- 39 “Parvum et ridiculum fortasse videbitur quod dicturus sum: dicam tamen, vel ideo ut ridear. Quantum humilitatis putamus eloquentiæ attulisse paenulas istas, quibus astricti et velut inclusi cum judicibus fabulamur?
- 2 Quantum virium detraxisse orationi auditoria et tabularia credimus, in quibus jam fere plurimæ causæ explicantur? Nam quomodo nobiles equos cursus et spatia probant, sic est aliquis oratorum campus, per quem nisi liberi et soluti ferantur, debilitatur ac frangitur eloquentia. Ipsam quin immo curam et diligentis stili anxietatem contrariam experimur, quia saepe interrogat judex, quando incipias, et ex interrogatiōne ejus incipiendum est. Frequenter probationibus et testibus silentium + patronus indicit. Unus inter hæc dicenti aut alter assistit, et res velut in solitudine agitur.
- 4 Oratori autem clamore plausuque opus est et velut quodam theatro; qualia quotidie antiquis oratoribus contingebant, cum tot pariter ac tam nobiles forum carent, cum clientelæ quoque ac tribus ac municipiorum

etiam legationes ac pars Italiæ periclitantibus assisteret, cum in plerisque judiciis crederet populus Romanus sua interesse quid judicaretur. Satis constat, C. Cornelium et M. Scaurum et T. Milonem et L. Bestiam et P. Vatinium concursu totius civitatis et accusatos et defensos, ut frigidissimos quoque oratores ipsa certantis populi studia excitare et incendere potuerint. Itaque hercule ejusmodi libri exstaut, ut ipsi quoque qui egerunt non aliis magis orationibus censeantur.

“Jam vero conciones assiduae et datum jus potentissimum quemque vexandi atque ipsa inimicitiarum gloria, cum se plurimi disertorum ne a P. quidem Scipione aut Sulla aut Cn. Pompeio abstinerent, et ad incessuos principes viros, ut est natura invidiae, populi quoque † et histriones auribus uterentur, quantum ardorem ingenii, quas oratoribus faces admovebant! Non de otiosa et quieta re loquimur, et quæ probitate et modestia gaudeat: sed est magna illa et notabilis eloquentia alumna licentiæ, quam stulti libertatem vocabant, comes seditionum, effrenati populi incitamentum, sine obsequio, † sine servitute, contumax, temeraria, arrogans, quæ in bene constitutis civitatibus non oritur. Quem enim oratorem Lacedæmonium, quem Cretensem accepimus? quarum civitatum † severissima disciplina et severissimæ leges traduntur. Nec Macedonum quidem ac Persarum aut ullius gentis, quæ certo imperio contenta fuerit, eloquentiam novimus. Rhodii quidam, plurimi Athenienses oratores exstiterunt, apud quos omnia populus, omnia imperiti, omnia (ut sic dixerim,) omnes poterant. Nostra quoque civitas, donec erravit, donec se partibus et dissensionibus et discordiis confecit, donec nulla fuit in foro pax, nulla in senatu concordia, nulla in judiciis moderatio, nulla superiorum

reverentia, nullus magistratum modus, tulit sine dubio valentiorem eloquentiam, sicut indomitus ager habet quasdam herbas lætiores. Sed nec tanti reipublicæ Gracehorum eloquentia fuit, ut pateretur et leges, nec bene famam eloquentiæ Cicero tali exitu pensavit.

- 41 “Sic quoque, quod superest antiqui oratoribus, forum non emendatæ nec usque ad votum compositæ civitatis argumentum est. Quis enim nos advocat nisi aut noeens aut miser? Quod municipium in clientelam nostram venit, nisi quod aut vicinus populus aut domestica discordia agitat? Quam provinciam tuemur, nisi spoliatam vexatamque? Atqui melius fuisset non queri quam vindicari. Quodsi inveniretur aliqua civitas in qua nemo peccaret, supervacuus esset inter innocentes orator sicut inter sanos medicus. Quomodo + inde minimum usus mininimum profectus ars medentis habet in iis gentibus, quæ firmissima valetudine ac saluberrimis corporibus utuntur, sic minor oratorum obscuriorque gloria est inter bouos mores et in obsequiis regentis paratos. Quid enim opus est longis in senatu sententiis, cum optimi cito consentiant? Quid multis apud populum concionibus, cum de republica non imperiti et multi delibèrent, sed sapientissimus et unus? Quid voluntariis accusationibus, cum tam raro et tam parce peccetur? Quid invidiosis et excedentibus modum defusionibus, cum clementia cognoscentis obviā periclitantibus eat? Credite, optimi et, in quantum opus est, disertissimi viri, si aut vos prioribus seculis aut isti quos miramur his nati essent, ac deus aliquis vitas ac vestra tempora repente mutasset, nec vobis summa illa laus et gloria in eloquentia neque illis modis et temperamentum defuisset. Nunc, quoniam nemo eodem tempore assequi potest magnam famam et

magnam quietem, bono seculi sui quisque citra obtrectationem alterius utatur."

Finierat Maternus, cum Messala, "Erant quibus con- 42  
tradicerem, erant de quibus plura dici vellem, nisi jam dies esset exactus." "Fiet," inquit Maternus, "postea arbitratu tuo, et si qua tibi obscura in hoc meo sermone visa sunt, de iis rursus conferemus." Ac simul 2 assurgens et Aprum complexus, "Ego," inquit, "te poëtis, Messala antiquariis criminabimur." "At ego vos rhetoribus et scholasticis," inquit.

Cum arrisissent, discessimus.



## CLASSICS.

---

### THUCYDIDES,

With Notes, chiefly Historical and Geographical.  
By the late T. ARNOLD, D.D. *A New Edition*,  
with Maps. 3 vols. 8vo. 1*l.* 10*s.*

---

### THUCYDIDES.

The Text of ARNOLD, with his Argument. The Indexes  
adapted to his Sections, and the Greek Index  
greatly enlarged. In One thick Volume. 8vo. 12*s.*

---

### HERODOTUS.

Edidit THOMAS GAISFORD, S.T.P., Gr. Ling. Prof.  
Reg. Editio tertia, subinde emendata. 2 vols. 8vo.  
1*l.* 1*s.*

---

### MITCHELL'S SOPHOCLES.

SOPHOCLIS TRAGŒDÆ, with Notes, adapted to the  
use of Schools and Universities. By THOMAS  
MITCHELL, M.A. 2 vols. 8vo. 1*l.* 8*s.*

The Plays may also be had separately, at 5*s.* each.

---

JOHN HENRY and JAMES PARKER, Oxford and London.

## TEXTS WITH SHORT NOTES.

THE Texts of the OXFORD POCKET CLASSICS are now issued with Short Notes, calculated as well for the use of Schools as for the junior members of the Universities.

### SOPHOCLES,

				s.	d.
AJAX, ( <i>with short Notes,</i> )	...	...	...	1	0
ELECTRA	...	...	...	1	0
ŒDIPUS REX	...	...	...	1	0
ŒDIPUS COLONEUS	...	...	...	1	0
ANTIGONE	...	...	...	1	0
PHILOCTETES	...	...	...	1	0
TRACHINIAE	...	...	...	1	0

The Text separately. One vol., cloth, 3s.

The Notes separately. One vol., cloth, 3s.

### ÆSCHYLUS,

PROMETHEUS VINCTUS, ( <i>with short Notes,</i> )	...	...	...	1	0
SEPTEM CONTRA THEBAS	...	...	...	1	0
PERSÆ	...	...	...	1	0
AGAMEMNON	...	...	...	1	0
CHOEPHORÆ	...	...	...	1	0
EUMENIDES	...	...	...	1	0
SUPPLICES	...	...	...	1	0

The Text separately. One vol., cloth, 3s.

The Notes separately. One vol., cloth, 3s. 6d.

### EURIPIDES,

HECUBA, ( <i>with short Notes,</i> )	...	...	...	1	0
MEDEA	...	...	...	1	0
ORESTES	...	...	...	1	0

PLEASE DO NOT REMOVE  
CARDS OR SLIPS FROM THIS POCKET

---

---

UNIVERSITY OF TORONTO LIBRARY

---

---

LL Tacitus, Cornelius  
T1186Nz.2 Opera omnia;  
ed. by Orelli  
v.2

